



8

7-c

24

あ




Bibliotheca
Romana
Societ. Jesu

49.4.43.

~~8-8-c-24~~

8-8-c-24



FRANC. XAV. MANNHART
SOCIETATIS JESU SACERDOTIS

BIBLIOTHECA DOMESTICA

BONARUM ARTIUM
AC ERUDITIONIS
STUDIOSORUM USUI
INSTRUCTA ET APERTA.

OPUS

SECVLI NOSTRI STUDIIS AC MORIBUS
ACCOMMODATUM.

TOMVLVS VII.
DE JURISPRVDENTIA CIVILI
ET ECCLESIASTICA.



CUM PRIVILEGIO CÆSAREO.

AUGUSTÆ VINDELICORVM,
SUMTIBVS MATTHÆI RIEGER, BIBLIOPOLÆ
MDCCLXII. +





EPITOME LIBRI XI.



DE
JURISPRUDENTIA SACRA
ET PROFANA.

CAPUT I. JURISPRUDENTIÆ UTRIUS- QUE ENCOMIUM.



§. I.

Scientiæ hujus præstantia.

I.

Gregoriū IX. Pontificis commendatio
Juris Ecclesiastici in Proœnio De-
cretalium : Justiniani Imperatoris com-
mendatio Juris Civilis in Præfatione
Institutionum. Elegans imago Juris

Epitome Libri XI.

& Justitiæ, in qua illius dotes exprimuntur.

II.

Homo, quacunque ex parte consideratur, Juri subjacet tam naturali, gentium, & civili, quam divino & Ecclesiastico. Jurisprudencia est munus Dei.

§. II.

Jurisperitorum dotes.

III.

Jurisperitus ingenio, judicio, usu & experientia rerum, ac eruditione polleat; necessum est. Ciceronis testimonium de priscis Jurisperitis. Jurisprudencia est scientia Regia & Regum.

CAPUT

Epitome Libri XI.

C A P U T II.

HISTORIA JURISPRUDENTIÆ
SACRÆ ET PROFANÆ.

Proœmium.

*J*urisprudentiæ sacræ ac profanæ historia admodum confusa & vitiata reperitur apud Scriptores. A catholici jus Ecclesiasticum, quantum possunt, imminuunt, & vix non destruunt: Catholici non pauci parum de hoc solliciti jus civile ultra quam par est, extendunt.

§. I.

Prima Periodus.

IV.

Hæc continet historiam Jurisprudentiæ utriusque a prima mundi ætate usque ad Mosis, & Regum ac Rerumpublicarum tempora. Deus condendo mundum Jus exercuit: hu-
** 3 jus*

Epitome Libri XI.

jus solius est leges supremo jure con-
dere. Veteres Legislatores suas leges
alicui semper divinitati adscripserunt.
Deus condito mundo jus naturale in-
stituit, ejusque principia palam fecit
per lumen naturæ: præter hoc et-
iam supernaturale per fidem, spem &
charitatem, quæ duo jura jus publicum
tunc erant. Quin & privatum insti-
tuit in paradiso, præceptum dando de
non comedendo fructu arboris, in quo
præcepto veluti omnia alia contenta
fuerunt.

V.

Primordia divisionis in jus Ecclesia-
sticum & Civile: in familia Seth &
Enoch reperire est vestigia juris sacri:
in familia Caini, qui primus ædificavit
urbem Henoch, juris civilis.

VI.

Circa diluvii tempus jus naturale ac
supernaturale vix non extinctum fuit ;
sed

Epitome Libri XI.

*Sed instauratum post diluvium per Noe-
num. In familia Sem & Abraham
conservatum fuit jus sacrum; in fami-
lia reliquorum Noe Posterorum jus pro-
fanum viguit. Lex circumcisionis.*

§. II.

Secunda periodus.

VII.

*Continet hæc historiam Jurispruden-
tiæ in secunda mundi ætate a Mose us-
que ad Christi adventum. Instauravit
Deus jus naturale & divinum per Mo-
sen in tabulis Decalogi: Jus Ecclesia-
sticum veteris Testamenti in libris Exo-
di, Levitici, & Deuteronomii: Jus
civile passim in Deuteronomio. Moses
a Deo constituitur Legislator juris sacri
& profani. Triplicis generis præcepta
in Veteri lege: Moralia, Ceremonialia,
& Judicialia.*

Epitome Libri XI.

VIII.

Jus legis Mosaicæ tum per Pontifices & Judices, tum per Reges, tum per Prophetas administratum fuit ac propagatum. Insigne exemplum Josaphati Regis Juda circa administrandum jus sacrum & civile. Scholæ juris utriusque : discipuli & Professores. Perturbatio legis Mosaicæ sub Rege Antiocho. Lex Mosaica ultra 700. annos ante Romam conditam, & ultra 1000. annos ante XII. Tabulas lata fuit.

IX.

Juris politici origo apud varias gentes sub ipsarum Regibus. Primi profani Legislatores enumerantur in Decreto Gratiani. Platonis Respublica & leges.

X.

Juris Romani initia. Leges curiaticæ. Romulus jus naturæ, Numa jus gen-

Epitome Libri XI.

gentium, Servius jus civile propagavit. Leges Regiæ. Exactis Regibus omnia per curias & comitia tractabantur. Facies veterum comitiorum. Jus civile Papirianum.

XI.

Senatus consulta. Plebiscita. Leges XII. Tabularum, earumque descriptio. Decemviri, Censores, Prætores & Aediles Curules, penes quos omnes potestas ferendi leges fuit. Post Julium Cæsarem, & Pompejum sub Augusto primo Monarcha Lex Regia rediit, & suprema potestas penes Principem esse cæpit.

§. III.

Tertia periodus.

XII.

Continet hæc historiam Jurisprudentiæ a Christi adventu ad hæc usque tempora. Jurisdictio Ecclesiastica: Con-
* 5 *cilia*

Epitome Libri XI.

eilia Apostolorum : leges in his Conciliis latae, & Apostolorum : leges in his Conciliis latae, & Apostolorum sanctiones. Jus sacrum scriptum & non scriptum.

XIII.

Incrementum Juris sacri. Canones Apostolorum & Constitutiones Clementis Papae. Epistolae Decretales Pontificum. Decretum Gratiani, & libri Decretalium S. Raymundi de Pennafort. Gratiani & Raymundi imago, eorumque elogium.

XIV.

Incrementum juris profani. Lege regia & potestate suprema Augustus & reliqui Imperatores moderate primum usi sunt. Crescente legum multitudine iis in ordinem redigendis initium datum est opera Jurisconsultorum. Codices duo Constitutionum ab Imperatoribus Ethnicis factarum conscripti

Epitome Libri XI.

pti a Gregorio & Hermogene. Codex Theodosianus continens Constitutiones Imperatorem Christianorum a Constantino M. usque ad ea tempora. Sex Jurium seu Constitutionum species: Leges, Plebiscita, Senatusconsulta, Placita Principum, Prætorum Edicta, Responsa Prudentum. Multitudo legum.

XV.

Justinianus Imp. sparsas leges colligit & Codicem, Digesta seu Pandectas, ac Institutiones condit opera trium Jurisconsultorum. Justiniani imago & encomium. Jus Justinianum in Occidente collapsum ob irruptiones barbararum gentium: in Oriente neglectum ob novum corpus Juris a Leone Imp. & ejus filio Constantino conditum. Lotharius II. Imp. in Romano Imperio resuscitat Jus Justinianum. Irnerius J. C. jussu Lotharii Pisis, tum hortatu Mathildis Bonnoniæ Justiniani libros publice interpretatur, sequentibus aliis. Jus Justinianum in Germaniam

Epitome Libri XI.

*nam non ante seculum XIV. fuit intro-
ductum, primo receptum tacito con-
sensu Imperatorum & Statuum Impe-
rii: postea a Maximiliano I. confirma-
tum & præscriptum.*

CAPUT III.

OECONOMIA JURIS UTRIUSQUE.

§. I.

Jus naturæ.

XVI.

*Triplex naturæ status proponitur &
describitur: 1. status naturæ in-
tegræ. 2. Status naturæ lapsæ ac
reparatæ. 3. Status puræ naturæ.
Prærogativæ ac circumstantiæ cujusque
horum statuum.*

XVII.

*Juris naturæ descriptio ex Aristotele,
Cicerone, & Gratiano. Jus naturale
non*

Epitome Libri XI.

non solum est lumen & dictamen rationis, sed ordinatio rationis a Deo per lumen rationis omnibus manifestata. Huic juri naturali soli homines sunt subiecti, non vero animalia. Continet jus naturale non solum generalia duo principia, sed alia quoque ex his manifeste deducta. Istorum triplex est classis secundum triplex officium, quod Deo, quod nobis, quod proximo debemus. Jus naturale mutationi obnoxium haud esse demonstratur.

§. II.

Jus gentium.

XVIII.

Jus naturæ & jus gentium sunt diversa jura. Difinitur jus gentium. Varia regimina politica: Monarchicum, Aristocraticum, Democraticum: in unoquoque istorum viget jus gentium. Duplex consideratio juris gentium, cum pacto, & sine pacto. Scriptores clari de jure naturæ & gentium.

CAPUT

Epitome Libri XI.

CAPUT IV.
JUS DIVINUM.

§. I.

Jus divinum veteris Testamenti.

XIX.

Descriptio veteris Testamenti. Legis Mosaicae conditor Deus fuit, non Moses, qui solum promulgavit. Solus populus Israeliticus tenebatur lege Mosaica. Fides in Christum tam ante, quam post legem Mosaicam fuit necessaria ad salutem. Triplicis generis praecepta in hac lege: Moralia, Ceremonialia, Judicialia: singula describuntur. Christi adventu leges veteris Testamenti fuerunt abrogatae.

§. II.

Jus divinum novi Testamenti.

XX.

Quid novum Testamentum. Præ-
rogativæ quatuor novæ legis præ ve-
teri.

Epitome Libri XI.

veri. In nova lege sunt præcepta Juris divini partim moralia, partim ceremonialia. Judicialia nulla sunt a Christo instituta, sed relicta fuerunt Ecclesiæ, ejusque jurisdictioni. Præcepta juris divini nec mutationi subjacent, nec dispensationi, nisi improprie dictæ, seu declarationi. Quo tempore obligare cœperit lex nova. Scriptores inclyti de Jure divino veteris & novi Testamenti.

CAPUT V.

JUS HUMANUM ECCLESIASTICUM.

XXI.

Proœmium.

Juris humani fundamentum est humana societas, quæ triplex est: Conjugalis, Paterna, & Civilis. Ex his nascitur communitas familiæ, & ex hac communitas civilis. Tres classes hominum in civili societate. Egregia.
D. Tho.

Epitome Libri XL

D. Thomæ doctrina de societate humana, & communitatibus. Differitur de Principum ac Regum potestate.

§. I.

Jus Canonicum.

XXII.

Prærogativæ Juris Ecclesiastici præ Politico. Falsum esse ostenditur, Jus Canonicum a primo seculorum usu alienum esse. Sacerdotum potestas, & Jus Pontificium apud Ethnicos. Potestas Ecclesiastica exercita primis Ecclesiæ temporibus. Negant jurisdictionem Pontificibus Wicleffus, & Lutherus, alique Acatolici, quorum argumenta & calumniæ refelluntur.

§. II.

Decretum Gratiani.

XXIII.

Variæ collectiones sanctionum Ecclesiasticarum, & Pontificiarum Constitutio-

tutio-

Epitome Libri XI.

tutionum, a variis in lucem datæ: Prima, a Dionysio Exiguo, & Stephano Episcopo Ephesino. Secunda, a Fulgentio Ferrando. Tertia, a Martino Brabavensi. Quarta, ab Isidoro Hispalensi, & a Peccatore Episcopo Setubensi. Quinta, a Cresconio. Sexta, a Burchardo. Septima, a Deusdedit Cardinale, & Anselmo Episcopo Lucensi. Octava, ab Ivone Bellovacensi. Nona demum, a Gratiano. Synopsis Decreti Gratiani.

XXIV.

Discutitur, quantam habeat auctoritatem Decretum Gratiani: & an vim legis obtineat.

XXV.

Differitur de Canonibus Pœnitentialibus. Facies pœnitentiæ publicæ in antiqua Ecclesia. Examinatur controversia circa canones Apostolorum.

Epitome Libri XI.

§. III.

Decretalium Libri V.

XXVI.

Collectores Decretalium epistolarum:
1. Bernardus Balbus. 2. Joannes Walensis seu Galensis. 3. Bernardus Compostellanus. 4. Galensis Magister, vel Tancredus Bononiensis. 5. Innocentius Cironius. 6. S. Raymundus de Pennafort jussu Gregorii IX. Totum corpus Juris Canonici describitur.

XXVII.

Synopsis quinque librorum Decretalium, quid quilibet contineat. Auctoritas Decretalium.

§. IV.

Decretalium Liber VI. Clementinæ, & Extravagantes.

XXVIII.

Liber VI. auctoritate Bonifacii VIII. Hic usus est opera Guilielmi de Mandago-

Epitome Libri XI.

dagoto, Fredello seu Stredelio, Richardo de Senis. Clementinas Constitutiones colligi curavit Clemens V. & Joannes XXII. Extravagantes. Liber VII. Decretalium Auctore Petro Matthæo JCr. Institutiones Lancelotti JCr. Alius liber VIII. Decretalium curante Gregorio XIII. a Flavio Ursino, Francisco Alciato, Antonio Caraffa, Pinello Aldobrandino, & Matthæo Columna Cardinalibus confectus, sed ineditus. Recensentur insignes Juris Ecclesiastici Scriptores.

C A P U T VI.

JUS HUMANUM POLITICUM SEU CIVILE.

XXIX.

Proœmium.

Primo mundi ævo familiæ sola benevolentia mutua regebantur: crescente hominum multitudine successit Justitia. Exemplum regiminis in familiis

Epitome Libri XI.

*miliis Abraham & Loth. Tum leges
in Communitatibus conditæ fuerunt.*

XXX.

*Veteres æconomiam Juris in tres
partes dividerunt : in vincula societatis,
in casus, in remedia. Explicantur
singulæ. Jus sacrum tendit ad finem
supernaturalem & felicitatem sempiter-
nam : Jus vero profanum ad pacem &
tranquillitatem præsentis vitæ, quam-
vis ordinari possit, & ordinetur opti-
me ad æternam quoque felicitatem. Ni-
hil magis respublicas & regna pessimum
dedit, quam religionis & justitiæ negle-
ctus.*

§. I.

Codex Justiniani.

XXXI.

*Confectus est ab Imperatore, opera
potissimum Triboniani & Theophili
Jurisconsultorum unius anni spatio, sed immen-
so labore. Codex repetitæ lectionis qua-
re*

Epitome Libri XI.

re ita vocetur : duo illius beneficia, scilicet doctrinae ordo, & litigiorum proscriptio. Synopsis Codicis.

§. II.

Pandecta seu Digesta.

XXXII.

Hæc confecit Imperator opera Triboniani adjunctis 16. Jurisconsultis intra triennium. Quare vocetur opus hoc Pandectæ & Digesta. Duo millia voluminum priscorum in quinquaginta libros fuerunt contracta, & in septem Tractatus divisa. Synopsis horum septem Tractatum.

§. III.

Institutiones.

XXXIII.

Fontes, e quibus Institutiones fuerunt confectæ. Sunt tempore posteriores Pandectis, sed promulgatione priores. Synopsis quatuor horum librorum.

Epitome Libri XI.

§. IV.

Novellæ seu Authenticae.

XXXIV.

Quare vocentur Novellæ. Supplent vel corrigunt, vel confirmant jus antiquum: quandoque jus novum constituunt. Non conveniunt auctores in numero Novellarum, neque in vi obligandi.

§. V.

Feuda, seu Consuetudines Feudorum.

XXXV.

Utilitas & necessitas juris feudalis. Origo nominis & historia feudorum. Synopsis Juris feudalis. Recensentur insignes Juri qui in Corpus Juris Civilis commentati sunt. Quatuor Scholæ Juris peritorum.

CAPUT

CAPUT VII.

Jus publicum Ecclesiasticum.

XXXVI.

Proœmium.

Versatur hoc jus (cujus nomen quidem novum est, sed res antiqua) circa Hierarchiam Ecclesiasticam, id est, circa hierarchiæ hujus Caput & membra, seu Pontificem, Cardinales, Patriarchas, Primates, Archiepiscopos, & reliquum Clerum: circa Concilia: circa tribunalia Curiae Romanæ: circa leges Ecclesiasticas Universales.

§ I.

Hierarchia Ecclesiæ.

XXXVII.

Quid sit Hierarchia: ostenditur dari Hierarchiam in Ecclesia. Hujus supremum caput est Pontifex, cujus prima-

Epitome Libri XI.

tus & infallibilitas adseritur. Cardinalium S. R. E. origo, & dignitas.

XXXVIII.

Patriarcharum numerus & praeogativa. Primatum & Archiepiscoporum dignitas & potestas. Differitur de Pallio.

XXXIX.

Episcoporum nominis etymon: eorum munus. Parochorum nomen & officium. Canonicorum origo antiquissima: diversitas & dignitas.

XL.

Sacerdotes seu Presbyteri constituunt ordinem diversum ab Episcopis. Monachi & Religiosi sunt membra Hierarchiae Ecclesiasticae, in qua animarum saluti invigilant.

XLI.

*Reliqui Ministri Ecclesiae minoris ordinis: Ostiarii, Lectores, Exorcistae,
Acq-*

Epitome Libri XI.

Acolyti : Majoris Ordinis : Subdiaconi, & Diaconi. In reliquis præter Romanam & Catholicam Ecclesiis nullus ordo hierarchicus, sed mera confusio.

§. II.

Concilia.

XLII.

Conciliorum summa auctoritas. Conciliorum variae classès. Origo Conciliorum: utilitas & causæ convocandi Concilium: 1. Orta hæresis. 2. Schisma inter Pontifices. 3. Turcæ aliique Ecclesiæ hostes. 4. Suspicio hæresis in Romano Pontifice. 5. Abusus & vitia Ecclesiasticæ disciplinæ.

XLIII.

Ad Concilii infallibilitatem requiruntur tria: 1. Ut legitime sit congregatum. 2. Fura & industria in rebus examinandis. 3. Confirmatio summi Pontificis. Refelluntur hæreticorum calumniæ.

Epitome Libri XI.

XLIV.

Imago Concilii celebrandi ex Actis Apostolorum desumpta.

§. III.

Tribunalia.

XLV.

Causæ, cur variæ Congregationes fuerint erectæ. Congregatio Concilii circa Decreta Tridentini. Congregatio S. Officii seu Inquisitionis. Congregatio super negotiis Episcoporum & Regularium. Congregatio Jurisdictionis & Immunitatis Ecclesiasticæ. Congregatio Sacrorum Rituum. Congregatio de propaganda fide Catholica. Congregatio Iudicis librorum prohibitorum. Congregatio de Indulgentiis & Reliquiis &c.

§. IV.

Leges Universales.

XLVI.

Canones & Decreta Concilii Tridentini, cujus imago exhibetur.

XLVII.

Epitome Libri XI.

XLVII.

Magnum Bullarium: Decisiones Rotæ: Regulæ Cancellariæ: Singula describuntur.

XLVIII.

Commendatio Juris Publici Ecclesiastici. Ejus scriptores celebriores enumerantur.

C A P U T VIII.

JUS PUBLICUM CIVILE.

XLIX.

Proœmium.

Juris hujus studium quid sit: neglectum a priscis Jctis. Diversa illius forma: aliud in Gallia, aliud in Anglia, aliud in Dania, aliud in Imperio Romano-Germanico.

Epitome Libri XI.

§. I.

Caput, & membra Imperiũ nobiliora.

L.

De Romani Imperatoris dignitate, persona, & prærogativis. De Collegio Electorum, horumque numero, & officiis. De Collegio Principum. De Collegio civitatum liberarum. Imperiũ status, eorumque jura.

§. II.

Comitia & Conventus.

LI.

Imperium in decem circulos divisum. Matricula Imperii. Principes Directores Circulorum. Conventus Circulorum. Comitia Generalia, horumque forma.

§. III.

Tribunalia Imperii.

LII.

Concilium Intimum Cæsareum. Concilium Imperiale Aulicum. Judicium Came-

Epitome Libri XI.

Camera Imperialis. Judicium Comitum Palatini. Judicium Rotuvilanum. Judicium Austregæ dictum. Origo & forma horum Judiciorum.

§. IV.

Leges Imperii.

LIII.

Aurea Bulla. Capitulatio Cæsarea. Recessus Imperii. Pax publica profana. Pax Religiosa. Transactio Passavienfis. Pax Westphalica. Matricula Imperii. Horum omnium descriptio. Recensentur Scriptores Juris Publici.

CAPUT IX.

CRITICA JURISPRUDENTIÆ.

§. I.

Errores quorundam in tradenda Juris disciplina.

LIV.

Malæ artes quorundam A catholicorum Scriptorum, in explanando jure

Epitome Libri XI.

jure naturæ ac publico. Non sine injuria gravi Patres ac Theologos criminantur, quod revelatas doctrinas cum juris placitis perperam commiscuerint, & crassis erroribus illud impleverint. Jus naturale a supernaturali violenter separant hi Scriptores contra Christi doctrinam. Eximium juris naturalis cum supernaturali arcte connexi exemplar.

LV.

Pufendorffius negat actiones aliquas esse inhonestas & turpes secundum naturam, sed solum per legem prohibentem tales fieri. Fleischerus docet præcepta naturalia esse mera consilia, nec Deum Legislatorem, sed Patrem tantummodo esse. Thomasius falsiloquium vocat prudentiam a natura per sermonem intentam. Refelluntur prava hæ doctrinæ.

LVI.

Graves hallucinationes & absurda dogmata Vahrenbergii, Thomasi, & Bar-

Epitome Libri XI.

Barbeyraci. Weberi calumnia impudens Catholicis Doctoribus & Scholasticis impacta. Velhemii & Conringii testimonium pro D. Thoma, & Theologis circa doctrinam Juris naturalis.

LVII.

Quamvis Jus naturæ, etiam a revelatis separatim utiles suppeditet doctrinæ, homini tamen Christiano ultra progrediendum esse ostenditur. Gravis quorundam contemptus Juris & rerum Ecclesiasticarum. A catholicorum dogmata e claris Juris Civilis textibus refelluntur. Num in his melius atque perfectius lumen naturæ dominetur, quam in Patribus & Doctoribus Catholicis, expenditur.

§. II.

*Errores quidam in discenda
Jurisprudentia.*

LVIII.

Nimia in studio Juris festinatio. Lætitio periculosa quorundam librorum. Ludovici Vives grave hac de re testimonium.

Epitome Libri XI.

nium. Quid de peregrinationibus in
exteris terras ad Jurisprudentiam ad-
discendam sentiendum. Insolens in Aca-
demia Jenensi dissertatio.

§. III.

Nævi in administranda Justitia.

LIX.

Peccant, qui omnem scientiæ hujus
vim in legum subtilitatibus ponunt.
Minus quam oportet, attenditur ad
mentem Legislatoris, & ad Æquum &
Justum. Querelæ de causis protelatis.

LX.

Kayseri sensus de Jure Ecclesiastico.
Adulatio Scriptorum, dum jus in sacra
tribuunt Laicis Principibus & Magi-
stratibus. Felicitas Principum erga
Deum & Ecclesiam reverentium ac li-
beralium. Memorabile effatum Nico-
lai I. Pontif. Max. ad Michaclem Im-
peratorem Orientis de usu Juris Pon-
tificii & Imperatorii. Commenda-
tur Æquitas, & justitiæ integritas.

LIBER



LIBER XI.
DE
JURISPRUDENTIA.

CAPUT I.
JURISPRUDENTIÆ
ENCOMIUM.

§. I.
Scientiæ hujus præstantia.

I.

Non est, cur ad commendandam Jurisprudentiam testimonia magno circuitu velut e longinquis regionibus petamus: abundant domestica, atque intra ipsos Jurisprudentiæ tum Sacræ tum profanæ parietes nata, & quidem omni exceptione majora. Duo dun-

taxat in medium produco, unum Gregorii IX. Pontificis Maximi, cujus jussu, industria, auctoritate præcipua illa Juris Canonici pars, seu Libri quinque Decretalium, ut vocant, in lucem prodierunt: Alterum D. Justiniani Imperatoris, qui immenso labore, sumtu incredibili, ac immortalī memoria Jus Civile seu condidit seu insturavit. Prior voluminum illorum Proæmium his verbis gravissimis, & temporum eorum sinceritati, indoli ac stylo accommodatis orditur: *Rex pacificus pia miseratione disposuit sibi subditos fore pudicos, pacifcos, & modestos. Sed effrænata cupiditas sui prodiga, pacis amula, mater litium, materia jurgiorum tot quotidie nova litigia generat, ut nisi justitia conatus ejus sua virtute reprimeret, & quæstiones illius implicitas explicaret, jus humani fæderis litigatorum abusus extingueret; & dato libello repudii, concordia extra mundi terminos exularet. Ideoque lex proditur, ut appetitus noxius sub juris regula limitetur, per quam genus humanum ut boneſte vivat, alterum non lædat, jus suum unicuique tribuat, informetur.* E quibus verbis facile patet, Jurisprudentiam esse fortissimum, quo totius humani generis tanquam vastissimi corporis membra omnia inter se colligan-

Jurisprudentiæ encomium. 3

gantur, vinculum: esse frenum, quo continentur ac reprimuntur effrenatæ hominum cupiditates, ne suis egressæ finibus pacis & honestatis repagula perrumpant, & utrumque forum litibus ac jurgiis impleant: esse Templum Deæ concordiæ, quæ civium animos mutuis officiis demulcet, ac in commune bonum conspirare facit. Posterior vero, nempe Imp. Justinianus in suarum Institutionum opere ita præfatur: *Imperatoriam majestatem non solum armis decoratam, sed etiam legibus oportet esse armatam, ut utrumque tempus & bellorum & pacis, recte possit gubernari, & Princeps Romanus non solum in hostilibus præliis victor existat, sed etiam per legitimos tramites calumniantium iniquitates expellat, & fiat tam juris religiosissimus, quam victis hostibus triumphator magnificus.* Censuit nimirum Justinianus, Majestatis Imperatoriæ decus ab armis, præsidium vero a legibus & Jurisprudentia petendum esse, ac si plus roboris & firmitatis in Imperio administrando inesset legum scientiæ, quam armorum tractationi. Et vero præliis subjugari solent hostes ac exteri, cives vero ac domestici legibus in officio contineri, quam rem majoris momenti esse nos docent antiqua Romanæ Reipublicæ

tempora, quibus post tot victorias & triumphos per Julium Cæsarem & Pompejum ab hostibus reportatos, conculcatis legibus contra jus & fas civile bellum exarsit, totaque respublica rebus fortissime gestis ornatissima in summum discrimen adducta fuit.

Porro si hujus scientiæ, seu Jurisprudentiæ indolem non tam oculorum quam mentis acie curatius contemplari velimus, eam sane regiam esse, immo divinum quid spirare deprehendemus. Non abs re me facturum existimo, si heic loci Justitiæ imaginem vivis sane coloribus ab Apelle quodam depictam, vel scalpro Praxitelis alicujus effictam in conspectum adducam ex Auctore Anonymo, qui eam ad modum Dialogismi interloquente Philosophorum uno sequenti carmine adumbravit:

Ph. *Quæ Dea?* Just. *Justitia.* P. *cur
torvo lumine spectas?*

J. *Nescia sum flecti, nec moveor
precio.*

P. *Unde genus?* J. *Cælo.* P. *Qui te
genuere parentes?*

J. *Νόμος * est genitor, clara Fides
genetrix.*

P. *Au-*

* *Νόμος quod latine significat legem.*

Jurisprudentiæ encomium. 5

P. *Aurium aperta tibi cur altera, & altera clausa est?*

J. *Una patet justis, altera clausa malis.*

P. *Cur gladium tua dextra gerit, cur læva balancem?*

J. *Ponderat hæc causas, percutit ille reos.*

P. *Cur sola incedis?* J. *Quia copia rara bonorum est.*

Hæc referunt paucos secula Fabricios.

P. *Paupere cur cultu es?* J. *Semper justissimus esse*

Qui cupit, immensas nemo parabit opes.

Amorem simul ac reverentiam imago hæc Justitiæ, quæ Jurisprudentiæ filia est, ut cujusvis hominum animo ingeneret, apertissima esse videtur.

II.

Sed ut plus dicam, & quidem, uti loquimur, ad *hominem*, ea profecto est Juris conditio, ut totum sibi hominem vendicat. Quippe quacunque ratione hunc considerare velimus, omni ex parte Juri devotum esse reperimus. Vel enim consideramus hominem, uti animal est, & tunc utitur jure naturæ, latissime accepto, quatenus naturæ ductum ad ea,

A 3

quæ

quæ sensuum sunt, impellentem sequitur: si tanquam substantiam ratione præditam, regitur jure naturali proprie dicto, quo ad ea vitanda, quæ rectæ rationi adversantur, illaque præstanda, quæ eidem consentientia sunt, dirigitur: si ut membrum totius communitalis humanæ spectetur, subjacet juri gentium, eoque adstringitur ad illa, quæ ad populorum ac nationum omnium, sive totius humanæ communitalis bonum ac felicitatem pertinent: si ut subditum Romano Imperio, jure gaudet civili, per totum Imperium divulgato: si tanquam Christianum & S. Matris Ecclesiæ obedientem filium, Ecclesiastico seu Canonico juri subditur: Si denique ut civis seu membrum cujusdam regni, reipublicæ, aut civitalis consideretur, horum propriis ac peculiaribus legibus ad commune bonum regni ac reipublicæ aut loci, cujus civis est, obstringitur, quemadmodum observat Lancelotus, insignis Jurisconsultus (a). Quid igitur magis homini convenit, quam Jurisprudentiæ studium, quod totum hominem, quacunque ex parte intueri eum libeat, veluti circumstat, ubique comitatur, & arctissime complectitur; verbo, sine quo nec animal, nec homo, nec mem-

(a) *Pr. lib. I. Inst. in Gloss. V. est igitur.*

membrum communitalis, nec Chriſtianus, nec ſubditus Imperii, nec regni aut rei-publicæ civis eſſe poteſt?

Quod autem omnium maxime Jurisprudentiam commendat, eſt, quod ea munus quoddam Dei ſit, & velut Palladium e cœlo delapſum, e cujus cultu atque cuſtodia omnis humani generis felicitas pendet. Expers ſane rerum in orbe geſtarum eſt, qui haud novit, tamdiu floruiſſe reſpublicas, & regna firma ſteſſiſſe, quamdiu juſtitia fulcro innitebantur, & Jurisprudentum oraculis regebantur: periſſe vero, ac ſuſdeque verſa fuiſſe, ubi pulſa in exilium juſtitia juſ & fas oppreſſum fuit, ac neſas ſucceſſit. Hinc eſt, quod Poetæ Aſtræam Jovis & Themidis filiam, Juſtitia Antititam aureo illo ſeculo e cœlo in terram migratſſe, aſt demum ſcleribus mortalium offenſam cœlum repetiſſe fabulentur. Primam hanc in terras delapſam fuiſſe canit Claudianus (b).

Tu prima hominem ſylveſtribus an-
tris

Elicis, & ſædo detergiſ ſecula victu.

Ulti

(b) *De Conſul. Manlii.*

Ultimam vero migrasse testatur Ovidius (c)

*Viſta jacet pietas, ac virgo cæde madentes
Ultima Cæleſtum, terras Aſtraa reliquit.*

§. II.

Jurisperitorum dotes.

III.

Quatuor numerantur præcipuæ, quibus instructos esse oportet eos, qui tam sancto nomine gloriari cupiunt: scilicet ingenium, judicium, usus & experientia rerum, ac eruditio. Ingenio quidem opus est, ut Jurisperitus penetret in arcana primorum Juris principiorum, atque ex his eruat ea, quæ ad causas suis circumstantiis (quales possunt esse innumeræ) vestitas pertinent vel reducendo illas ad prima de quibus dixi principia, vel hæc ipsa illis adplicando: præterea ut fracto legum cortice ad nucleum perveniat, & quod ajunt *juris punctum* tangat: ut pugnantes inter se leges in concordiam revocet: ut non tam verborum apices, quam latentem sub his veritatem æquitatemque expendat. Præter ingenium judicio polleat necesse est, ut rerum momenta, circumstantiarum varietatem,

(c) *L. i. Metamorph.*

Jurisprudentiæ encomium. 9

tem, legum vim, & causæ totius merita maturo consilio ponderet, nec juris specie quadam decipi se sinat, sed æquitatem semper ante oculos habeat. Sulmonensis Poeta monet (d):

*Meritis expendite causam,
non sanguinis ordo,
Sed virtutis honor spoliis quærat^{ur}
in istis.*

Requiritur etiam experientia rerum & usus, qui tribunalium anima est, sine quo tanquam perito nauclero præcellens etiam ingenium justitiæ navem ventorum turbini relictam scopulis & syrtibus frequenter impinget. Jurisprudentia ad pacem & tranquillitatem reipublicæ conservandam tendit, qui finis obtineri nunquam poterit sine diuturna rerum experientia, ut quid prosit, quid oblit, quam accuratissime intelligatur. Neque enim semper jus summum sequi oportet, ut pridem advertit Terentius (e) dicens:

*Verum illud Chreme
Dicunt jus summum, summa saepe ma-
litia est.*

De

(d) *Lib. 13. Metamorph.* (e) *In Heauton.*

Demum non postremo loco habenda est eruditio. Hæc enim ipsos Juris utriusque primos fontes detegit, & aperto antiquitatum, maxime Romanorum, sacrario monstrat, unde jura & leges: qui earum Conditores; quæ regiminum forma: quæ metamorphoses regnorum & Monarchiarum &c. sine quarum rerum notitia scientiæ hujus Candidatus nunquam e leguleiorum turba emerget, nec ad Jurisperitorum subsellia evehetur.

His quorum memini adjumentis, ingenio scilicet, judicio, usu & experientia rerum, ac eruditione Veteres Sophi de jure audebant respondere, „ad quos „olim in foro ambulantes, & in folio „sedentes domi sic adibatur (*quemadmodum a Tullio proditum est*) ut „non solum de jure civili ad eos, verum etiam de filia collocanda, de „fundo emendo, de agro colendo, de „omni denique aut negotio aut officio „referretur, de divinis & humanis rebus univérse. Idem & in senatu & „ad populum, & in causis amicorum, „& domi & militiæ consilium suum fidemque præstabant. Illi demum vere „erant Jurisconsulti, seu verius, *ut idem Tullius de Servio Sulpitio dicit,* „Ju-

Jurisprudentiæ encomium. II

„ Justitiæ Consulti, & æquitatis Sacer-
„ dotes, atque Antistites., Et vero
felicem Rempublicam, ubi ad aram Ju-
stitiæ præclarissimi quique Antistites seu
Jurisperiti excubant. Compages enim
Reipublicæ justitia est, a cujus recta ad-
ministratone salus ipsa potissimum pen-
det: Jus & æquitas vincula sunt civita-
tum, sine quibus incolames diu stare
non possunt. Immo non est Respublica,
ubi non est Justitia, ut præclare apud
Ciceronem disputat Scipio: *quocirca*, in-
quiens, *ubi non est vera justitia, juris-*
consensu sociatus hominum cætus esse non
poteſt.

Eam maxime ob cauſſam gentes per
orbem terrarum diſperſæ in reſpublicas
ſeſe conſociarunt, & Magiſtratum, Re-
ges, Principes &c. ſibi præfecerunt,
ut adminiſtrata ſingulis æqua lance ju-
ſtitia infirmiores a potentioribus, juſti
ab injuſtis, boni a ſcleratis defenderen-
tur, & ſuum cuique jus tribueretur. Nec
alia quam hæc Principaliſ poteſtati� ori-
go eſt teſte Juſto Lipſio, Magno illo
Politiceſ Magiſtro; quin & Horatio ca-
nente (f):

Jura

(f) *Satyr. 3. lib. 1.*

12 Cap. I. *Jurisprudentiæ encomium.*

*Jura inventa metu injusti fateare ne-
cesse est,*

*Tempora si fastosque velis evolvere
Mundi :*

Quum vero Principes ac Reges tot oculos, tot aures, tot manus non habeant, quibus per se tanti momenti negotium perficiant, Jurisperitos ac Consultos maturo judicio seligunt atque constituunt, quorum opera in tribuendo cuique suo utantur, & quorum custodiæ Justitiam publicam privatamque committant. Qua re nescio quid majus dici possit tum ad scientiæ hujus dignitatem atque præstantiam commendandam, tum ad eorum, qui ejus candidatos se profitentur, animos excitandos, ut summa qua par est cura, vigilantia, labore eas sibi dotes comparent, quas ad tam sublime munus necessarias esse diximus. Sublime munus adpello Jurisprudentiam: est enim, teste Contzenio, insigni Jurisperito, ἐπισήμη Βασιλική, καὶ τῶν Βασιλέων, seu scientia Regia & Regum. Nam & Regibus digna est, & necessaria Regibus; quam ob causam in quibusdam Universitatibus in Actibus solemnibus Doctores Juris purpureis insignibus, qui regius color est, uti videmus.

CAPUT



CAPUT II.

HISTORIA JURISPRUDENTIÆ
SACRÆ AC PROFANÆ.*Præcæmium.*

Historiam Jurisprudentiæ tam Sacræ quam profanæ dum pro instituti mei ratione in conspectum dare adior, labyrinthum ingredi mihi videor; adeo omnia ad eam pertinentia apud scriptores plerosque confusa, lubrica, mutila, sine ordine ac serie tradita invenio. A catholici quidem, utpote jugi Ecclesiastici impatientes, vel omnem juris sacri dicendi potestatem eliminare conantur, vel certe illud posterioribus primum Ecclesiæ confirmatæ seculis Pontificum & Cleri potentia introductam esse contendunt: Non minus Catholici parum de Ecclesiastica jurisdictione solliciti omnem in id curam impendisse videntur, ut juris civilis antiquitatem & fontes detegerent, ejusque fines ultra quam par est ac decet, extenderent. Quapropter ex infectis fontibus sinceram sanamque hoc in negotio

tio seu eruditionem seu doctrinam frustra expectamus: Utrique autem sacra profanis & profana sacris miscentes, plurimamque e Romana historia in unum coniecisse cumulum contenti omnium primam juris originem, ejusque fontem, & præcipuam in Ecclesiasticum ac Politicum divisionem prodere neglexerunt, dum vel hinc a Codice Justiniano illinc a Decreto Gratiani, vel qui longissimo etiam intervallo progressi sunt, tum a duodecim Tabularum legibus, tum ab illis, quas Moses promulgavit, initium duxere. Verum altius repetenda res hæc est, & ab origine mundi prima Juris conditi exordia & incunabula sunt investiganda, quoniam sine jure mundus nunquam stetit, nec stare potuit. Tum vero indagandum, qua ratione primus fons iste in duos veluti alveos longo seculorum tractu se se diviserit, nimirum in Jus sacrum & profanum, in Ecclesiasticum & Civile, in *Pontificium* & *Imperatorium*, ita ut vastissima hæc scientia, scilicet Jurisprudentia, in bono lumine atque sub unum veluti conspectum collocetur sine tantis, quibus plurimi utuntur, ambagibus, sed potius cum continua temporum & mutationum sibi succedentium serie, atque sic a prima
omni-

omnium origine ad nostra usque tempora Jurisprudentiæ historicum ut loquimur filum se se porrigat. Quare in tres potissimum periodos temporum illam dividendam esse censui; in prima ut palam fiat Jurisprudentiæ tum sacræ tum profanæ fons & origo usque ad Mosis, & Regum ac Rerumpublicarum Veterum tempora: in secunda, ut ab his ad Christi adventum, atque Augustum Cæsarem: in tertia denique hinc ad Gratianum & Gregorium IX. Pontificem illinc ad Justinianum Imperatorem usque recto tramite pergatur, atque ita suum cuique, quod primum omnis Juris fundamentum est, tribuatur.

§. I.

Prima Periodus.

§. IV.

Condendo mundum, & in mundo incolas ratione præditos, fieri non potuit, ut non continuo Jus quoddam nasceretur. Nam hac ratione Conditor Deus superiorem, immo supremum Dominum se se constituit, homines vero a se creatos inferiores & sibi subditos fecit. Ubi autem superior & inferior, ubi
Do-

Dominus & Subditus, ibi Jus, quod in hunc illi competit, abesse non potest. Porro jus absque lege nequit subsistere, quum hæc sit illius *exercitium*, sitque interpres jure suo utentis lateri perpetuo adhærens: proprium autem duntaxat est superiori; legem & præcepta inferiori constituere; hocque ipsum sempiterna lege cautum est, *inferiores parere superioribus*, & *parem in parem non habere imperium*. Quare solius Dei est prærogativa, divinæque dominationis excellentia, leges (id est juris, ac boni & æqui præcepta) ponere hominibus, ita ut legislatores humani vicariam solum potestatem condendo leges exerceant, quumque homo homini jure proprio leges dare nequeat, interpretes sint Dei, supremo sibi proprio in omnes jure gaudentis, suamque in illos potestatem, certis tamen limitibus circumscriptam transferentis. Quopropter homo hac in parte fungitur officio Dei, diciturque *illius imago*, ut jam pridem Plutarchus (g) animadvertit, & S. Scriptura conceptis verbis prodit: *Per me Reges regnant, & legum conditores justa decernunt* (h). Res hæc minime latuit antiquos legum latores etiam mediis in tenebris

(g) *De Doctrin. Princip.* (h) *Prov. 8.*

nebris idololatriæ versantes. Nam dum probe cognoscerent, humanam auctoritatem fore imbecilliolem, quam ut pondus addat, & apud populos sibi subiectos firmiter stabiliat leges a se conditas, divinam quandam & ex alto derivatam iisdem conciliare studuerunt, fingendo, se a Numine quodam eas accepisse, aut certe cum aliquo Deorum Dearumque maturo consilio communicasse. Ita ferunt Regem Minoem in vulgus sparsisse, leges suas a Jove Deorum maximo inspiratas sibi dictatasque fuisse: ita Rex Numa Pompilius ab Ægeria Nympha, cum qua familiaris sibi sermo intercederet, arcanis colloquiis suggestas esse dictitabat: Trismegistus Ægyptiis persuasit, Mercurium esse legum suarum auctorem: Lycurgus ut Lacedæmoniis fucum faceret, ab Appolinis ore leges suas hausisse se jactabat: Draco & Solon Atheniensibus vendiderunt leges a se latas quasi totidem divina Minervæ oracula: quin & Mahometes Alcoranum suum, seu legum codicem tanquam a Gabriele Archangelo traditum consignatumque Arabum genti observandum proposuit. Nimirum agnoverunt homines isti, quam cæci in religionis negotio, tam sapientes plerique in

populorum regimine ; agnoverunt inquam nullum esse jus , nec vim ac robur inesse legibus sine Numine quodam, & altiore aliqua, unde repetantur, dominatione. Quod isti factis , hoc pridem dictis comprobavit Tullius (i): *Hanc video, ait, sapientissimorum fuisse sententiam, legem neque hominum ingeniiis excogitatam, nec scitum esse aliquod populorum, sed æternum quiddam, quod universum mundum regeret, imperandi probibendique sapientia. Ita principem legem illam & ultimam mentem dicebant, omnia ratione aut cogentis aut vetantis Dei: ex qua illa lex, quam Dii humano generi dederunt, recte est laudata; est enim ratio mensque sapientis ad jubendum, deterrendum idonea. Ex his jam patet primus fons & origo omnis juris ac potestatis ferendi leges, qui alius non est nisi Deus, isque solus; quique dum mundum, & in mundo homines ratione præditos omnipotente verbo suo ex nihilo condidit, Superiorem ut memini se fecit ac Dominum, & Jus potestatemque statuendi leges in subditos ac inferiores, ut ita dicam, acquisivit. Videamus nunc, qua ratione jus hoc, potestatemque istam nascente statim*

(i) *Lib. 2. de leg.*

Jurisprudentiæ sacræ ac profanæ. 19

tim mundo exercuerit Numen. Considerare possumus hominem tanquam Deo subditum duplici ratione, scilicet secundum naturæ suæ conditionem, & secundum eam, quæ supra naturam est, quæ nimirum ad altiore coelestemque finem in prima sui origine Dei beneficio fuit elevatus. Utrique huic conditioni idem Deus ac Dominus de jure ac legibus providit. Et primo quidem Jus, quod naturale vocamus, constituit, dum indidit homini lumen rationis, quod quædam facienda, vitanda alia esse dicit. Hujus juris principia omnium prima sunt: *declina a malo & fac bonum: & , quod tibi non vis fieri , alteri ne feceris*; e quibus latissime patentibus manifesta ratione alia deducuntur ad Deum, ad seipsum, ad proximum spectantia, nimirum: *colendum esse Deum tanquam rerum omnium conditorem, quique bonos præmiatur, contra puniat malos: honeste vivendum esse ac abstinendum a vitiis naturam rationalem dedecentibus: parentes esse honorandos: neminem lædendum in bonis animæ, corporis, ac fortunæ.* &c. Quemadmodum autem natura humana omnibus hominibus, tanquam ejusdem speciei, communis est, ita etiam jus hoc naturale ad universos

homines pertinet. Nullus enim est quantumvis barbarus & sylvester, qui non hoc lumine naturali, si mentis oculos aperire velit, quædam quæ justa sunt, ab illis quæ injusta, secernat. Differant quantum velint homines sermone, ritibus, vestitu, ingenio, moribus; at hac in re tanquam in natura communi, sibi que intime præsentī consentiunt omnes. Sed & aliud jus, idque excellentius homini vix condito mundo pro ratione conditionis suæ ad ea, quæ supra naturam sunt, elevatæ posuit Deus, quod *supernaturale* vocamus, quo per fidem, spem, & charitatem ad finem supernum tendere tenetur; per *fidem* quidem, quam firmissimam adhibere debet iis, quæ a Deo revelata sunt, ob ejusdem loquentis summam auctoritatem & sapientiam: per *spem*, qua animum ad cœlestia dona, gratiam, vitamque æternam consequendam erigat oportet, innixus Dei potentissimi simul & fidelissimi promissis: per *charitatem* vero, eum tanquam Ens infinite bonum atque perfectum toto corde totisque viribus diligendo. Atque lex ista, quum per divinam gratiam omnium mentibus infusa & velut insculpta fuerit, omnes omni tempore obstringebat, eadem Dei gratia

gratia vires ad id exequendum suppeditante. Utrumque hoc jus tam naturale, quam supernaturale, quum ad omnes ut dixi pertineret, quasi jus commune ac publicum erat. Verum neque privatum defuit in ipsa mundi origine, e quo fluxit præceptum illud, quo Deus Adamo & Evæ interdixit esu *ligni scientiæ boni & mali* (k). Atque hanc legem exstitisse matrem ac fontem aliarum omnium, quæ postea per Moſen latae fuerunt Hebræis, scite animadvertit Tertullianus (l) sequentibus verbis: *Deus in principio mundi ipsi Adæ & Evæ legem dedit, ne de fructu arboris plantatæ in medio paradisi ederent. Quodsi contra fecissent, morte morerentur, quæ lex eis sufficeret, si esset custodita.* Quippe in hac lege Adamo data quasi omnia præcepta recondita fuisse cognoscimus, quæ postea per Moſen in lucem protracta fuerunt. Si enim primi parentes dilexissent Deum, illius præceptum nulla ratione fuissent transgressi: Si dilexissent se ipsos, nunquam intentatæ mortis, totque miseriarum reos se fecissent: Si proximum, neutiquam posteritatem omnem in extremum præcipitassent exitium: neque homicidium in se ipsis, no-

B 3

bis-

(k) *Genes. 2.* (l) *Libr. advers. Judæos.*



bisque omnibus commisissent; neque furtum clam gustando vetitum sibi fructum; neque serpenti falsum testimonium dicenti fidem adhibuissent; neque debitum parenti optimo, Deo Maximo honorem unquam subtraxissent.

V.

Constituto sic jure communi ac privato alia quoque juris vestigia non procul ab ipso mundi exordio apud primos parentes reperire licet, & quidem duplicis, nimirum si sic vocare fas est, juris sacri ac civilis. Quid enim? dum legimus in Sacris Literis (m), Abelem & Cainum obtulisse Deo munera de frugibus terræ, & primitiis gregum, dubium esse haud potest, præceptum de tali Numinis cultu & sacrificio fuisse a Deo intimatum Adamo ejusque filiis, id quod ad jus sacrum pertinet. Rursus ubi idem Numen Adamum & Evam, & in his posteros conceptis verbis allocutus est (n): *Relinquet homo patrem & matrem, & adhærebit uxori suæ, & erunt duo in carne una*; legem quandam civilem, scilicet de conjugio, quod ad vitæ communis societatem pertinet, nec adhuc ad sacramenti dignitatem eve-

(m). *Genes. 4.* (n) *Genes. 2.*

Ætū erat, condidisse merito videtur, diciq̃ue potest, p̃ima hęc quasi rudimenta, immo fundamenta Juris Utriusque jacta esse, primumque juris peritum fuisse Adamum, qui omni scientiarum genere atq̃ue notitia a Deo ornatus istud cum naturali ac supernaturali jure, de quibus dictum est, in familia sua magnis sensim incrementis aucta propagavit, explicavit, & sartum tectumque servavit. Ab eo tempore usque ad Noemum & diluvium, quod totam inundavit terram, & paucis exceptis humanum genus extinxit, non est reperire certa quædam aliarum legum vestigia, & quæ jura tunc fuerint usurpata. Quum tamen sacra Scriptura prodāt, una ex parte quidem, Sethi & Enochī filios pie sanctęque vixisse, ac divinum propagasse cultum, ex altera vero Cainum primum ædificasse civitatem Henoch ad plagam orientalem Eden, cumque filiis suis & nepotibus, qui primi civilibus artibus & opificiis operam dedere, ea in urbe ac vicina regione Damasci habitasse, non abs re licet asserere, jus sacrum penes Sethi & Enochī posteros, quos *filios Dei* adpellat S. Scriptura, custoditum ac quibusdam legibus ad sacra pertinentibus auctum amplificatum-

tumque fuisse: jus vero profanum aliquod a Caino ejusque stirpe, e qua *filias hominum* procreatas esse eadem Scriptura sacra memorat, ad societatem civilem, quam inierant, conservandam esse constitutum. Quippe, si duos characteres illos probe considerare velimus, quibus Divinæ Literæ utramque Sethi & Caini progeniem insigniunt, omissis aliis rebus utrinque gestis, facile patebit, non inanem esse, quam adtuli, opinionem. De Seth inquit: *Peperit* (scilicet Adam) *filium, vocavitque nomen ejus Seth, dicens: posuit mihi Deus semen aliud pro Abel, quem occidit Cain. Sed & Seth natus est filius, quem vocavit Enos: ipse cepit invocare nomen Domini* (o). Dubium autem esse nequit; quin Adam cum uxore sua, reliquaque familia amplissima Dei nomen quotidie invocaverit, supremum hunc Conditorum ac Dominum colendo, honorandoque. Quare dum Enos dicitur coepisse invocare Dei nomen, intelligendum hoc esse videtur de cultu quodam veri Numinis publico, certis quibusdam legibus constituto. Profecto nobilissimus Scripturæ S. interpres Cornelius a Lapide (p) dum in hunc locum commentatur, ait: „Enos auctor
„ fuit,

(o) *Gen. 4.* (p) *In Genes. c. 4. v. 26.*

Jurisprudentiæ sacræ ac profanæ. 25

„ fuit , ut passim homines rite Deum
„ colerent. Unde hebræa habent: *tunc*
„ *captum est* , scilicet publice & per
„ cœtus , auctore Enos , *invocari no-*
„ *men Domini*. Tempore ergo Enos vi-
„ dentur cœtus hominum institui & in
„ Ecclesiam congregari cœpisse ad pu-
„ blicas preces , ad publicas conciones
„ & catecheses , ad publicum Dei cul-
„ tum per sacrificia , aliosque ritus &
„ ceremonias., Atque ita jus quod-
„ dam sacrum & Ecclesiasticum , latis ali-
„ quibus quoad tempus , ritus & ceremo-
„ nias legibus , sine quibus ætatem ferre
„ non potuisset , circumscriptum , in Eno-
„ chi familia , & apud filios Dei multo
„ tempore floruisse satis constat. Jam ve-
„ ro de Cain , ejusque filiis & nepotibus
„ alium characterem producit S. Scriptura ,
„ dum ait : *Habitavit . . . in terra ad*
„ *orientalem plagam Eden . . . ædificavit*
„ *civitatem , vocavitque nomen ejus ex no-*
„ *mine filii sui Henoch*. De nepotibus
„ vero Caini: quod Jabel fuerit *Pater ba-*
„ *bitantium in tentoriis , atque pastorum* ,
„ Jubal *pater canentium citbara & orga-*
„ *no* , Tubalcain *malleator & faber in*
„ *cuncta opera æris ac ferri*. Ex quibus
„ patet , Cainum ædificasse civitatem
„ (quæ omnium prima fuit) in qua cum

B 5

filiis



filiis & nepotibus, omnique familia sua satis utique copiosa habitavit, civilemque vitam egit, ita ut quidam agriculturæ, alii Musicæ, opificiis alii & artibus diversis sub suis quisque magistris operam dederint. Hæc autem civilis vita, & opificum artificumque cœtus sine certis quibusdam legibus subsistere ne-tiquam poterant, ut ita ex hac prima hominum in urbe ac vicis circumjacentibus degentium communitate profanum ac civile jus originem suam, licet adhuc rudem ac tenuem, traxisse videatur, majoribus semper postea incrementis auctam.

VI.

Verum succedentibus temporibus, ubi crescente hominum numero malitia quoque & scelerum colluvies in immensum excrevit, uti morum, ita & jarium mutatio ingens secuta est. Nam jus illud naturale ac supernaturale declinante a via veritatis omni hominum genere, & in scelera gravissima foedissimaque ruente misere vastatum, ac lumen rationis clarissimum in densissimam impietatis noctem conversum, omneque jus & fas injuriis & nefandis criminibus vix non penitus extinctum fuit: *omnis quippe caro corruperat viam suam*, ut ait S. Scriptura

Jurisprudentiæ sacræ ac profanæ. 27

ra (q). Jus quoque sacrum, in Seth & Enos familia per multos annos religiose conservatum, nepotibus sceleratæ stirpi Cainiticæ se miscentibus vix non omnino pessum iit, sacro cultu duntaxat penes Noe ejusque filios & uxores remanente: jus autem profanum & civile sublato per diluvium, dissolutoque humanæ societatis vinculo penitus disparuit. At expiato per aquas ultrices terrarum orbe, humanoque genere per Noemum ejusque familiam sensim propagato rursum jura & leges instaurari cœperunt. Duas tum temporis invenire leges licet in SS. Literis expressas, quas Deus ipse tulit vix exacto diluvio, quibusque esum carnis cum sanguine prohibuit, & homicidii reos morte mulctari præcepit: *Carnem cum sanguine non comedetis, & quicumque effuderit humanum sanguinem, fundetur sanguis illius* (r): eam vero matrimonii, quam in paradiso dederat, confirmavit: *crescite & multiplicamini*. Reliqua prudentiæ ac sapientiæ Noemi commisisse visus est. Et vero Patriarcha hic spectatæ pietatis *justus* atque *perfectus*, juris naturalis & sacri profanique veluti reliquias communi naufragio substractas collegit, & divinarum humanarumque legum

(q) *Genes. 6.* (r) *Genes. 9.*

legum observantiam pene sepultam suscitavit. Quippe ut Berosus auctor tam ab antiquitate, quam ab eruditione spectabilis (s) scribit: Noe vetustissimus omnium pater antea edoctus Theologiam & sacros ritus, coepit etiam homines erudire ac docere humanam sapientiam, eamque mandavit literis, & reliquit Armeniæ populis. Verum a Noemi præceptis rursus desciverunt posterius; primum quidem Cham ejus filius degener, cui Pater maledixit, cum posteritate sua: deinde & alii, quo longius latiusque multiplicata gente ad inhabitandas vicinas regiones (præcipue post factam a Noemo inter filios suos terræ distributionem, linguasque apud turrim babilonicam confusas) discesserunt. Omnia tum paullatim occupavit idololatria, & veræ de rebus in mundi ortu ac diluvio gestis narrationes in fabulas transmissæ fuerunt, a quibus ad majores Principes, ac Heroes gentis suæ in Deorum numerum referendos progressi sunt homines, dimittentes, ut ait D. Augustinus (t): *Deum a quo facti erant, & colentes illa, quæ ipsi fecerant.* In sola stirpe Sem, filiorum Noe primogeniti (e qua postmodum Abrahamus descendit) uti vera religio, ita sacrum quoque jus asy-

(s) Lib. 3. (t) In Psalm. 84.

asylum invenit, fuitque conservatum. Silente inter reliquos hoc jure sacro, jus profanum caput extulit. Quippe tres Noem filii Sem, Cham, & Japhet orbem inter se velut ad testamenti a patre relictæ normam sunt partiti, dum primus cum familia sua interiores Asiæ partes, alter occidentales plagas seu Europam, tertius exteriores Asiæ regiones cum Africa incoluerunt, & oppida & civitates moliri, ac ditiones, respublicas, principatus & regna fundare cœperunt, ad quæ gubernanda conservandaque utique opus erat. civilis juris ac legum sanctionibus, quæ qualesve fuerint tum temporis, quum pro cujusque arbitrio factæ sint, equidem ignoramus, facile tamen eas e variarum gentium ac nationum succedentium juribus, legibus, ac regiminis forma intelligere licet, quoniam e posteriorum moribus primorum parentum ac conditorum institutio ac norma, quam tenuerunt, plerumque trahet. Interea in Semî posteritate, uti dictum est, præcipue vero in Abrahami a Deo electi, ut pater multarum gentium esset, familia vera religio deique cultus angustos intra fines sese continebat. Heic novam a Deo legem, ab Abrahamo totaque ejus progenie virili observandam fuisse latam

S. Scri-

S. Scriptura prodit, quam legem *Circumcisionis* dicunt (u) *circumcidetur ex vobis omne masculinum, & circumcidetis carnem præputii vestri, ut sit in signum fœderis inter me & vos.* Ad sacrum jus lex hæc pertinebat, quoniam ritu hoc initiabantur, quotquot veram tum temporis religionem fidemque palam profitebantur, & figura fuerat sacramenti baptismatis in nova lege postmodum succedentis. Ipse Abraham de Ur Chaldæorum evocatus, quum in regionem Chanaan migraret, eos populos omni sapientia tam divina quam humana erudientes suscepit, ut ita merito inter primos Juris Doctores numerandus veniat. Neque deerant scholæ his disciplinis tradendis discendisque. Nam ut Hebræi apud Lyranum tradunt teste Cornelio a Lapide (x), una erat, cui Melchisedec seu Sem, altera cui Heber, tertia cui Abraham præerat, cuique operam suam præcipue Chaldæi ac Ægyptii navarunt. Atque hæc, quæ hucusque in medium attuli, prima velut semina sunt, & rudimenta omnis jurisprudentiæ tam sacræ quam profanæ, quemadmodum primi fontes fluviorum etiam ingentium semper parvi & absconditi esse solent, donec plu-

(u) *Genes. 17.* (x) *In cap. Genes. 25.*

pluribus aucti rivulis, quo plus progrediuntur, crescant, & in immensum sese spatium denique diffundant.

§. II.

Secunda Periodus.

VII.

Quemadmodum in prima mundi ætate Jurisprudentiam illam, quam non in membranis aut tabulis, sed in primorum hominum mentibus exaravit Deus vivis veluti characteribus, seu lumine tum eo, quod naturale, tum quod supra naturam est, indito; quemadmodum, inquam, Jurisprudentiam illam a posteris Adæ in flagitia passim ruentibus vix non deletam per Noemum suscitavit, ita rursus ab ejusdem Noemi progenie scelerata depravatam in altera mundi ætate per Mosem instauravit. Erat Moyses *Vir eruditus omni sapientia Ægyptiorum, potens in verbis & in operibus suis* (y), electus a Deo Israelitarum Dux, natus anno Mundi 2373. vivensque eodem tempore, quo Cecrops primus Athenarum Rex, qui bello Trojano quadringentis annis superior fuit. Huic nempe Mosis, postquam e servitu-

(y) *Act.* 7. v. 22.

vitute Ægyptiaca Israeliticum populum liberavit, ipse supremus Legislator Deus in monte Sinai duas Tabulas lapideas, atque in iis Decalogum seu decem leges proprio digito conscriptas tradidit (z): *Ascende ad me in montem, & esto ibi: daboque tibi tabulas lapideas, & legem ac mandata, quæ scripsi, ut doceas eos.* In his continebatur tota quasi summa & series legis naturalis, quam etiam Moses tanquam Dei Legatus summa cum fidelitate promulgavit, & tanquam Doctor publicus a Numine constitutus maxima cum perspicacia, doctrinæque ubertate toti populo explanavit. Voluit autem Deus scripto consignatum dare jus hoc, ne impofterum ulla apud homines oblivione deleteretur. Non solum autem jus naturale velut e tenebris & densa noctis caligine in lucem tunc prodire visum est, sed & jus sacrum & civile magis se se explicare ac latius dominari cœpit. Juris sacri quidem legibus plenus est Pentateuchus, præsertim liber Exodi, Leviticus, & Deuteronomium: in horum primo Deus ipse Mosi præcepit, quæ ad cultum sibi debitum pertinent, dum Tabernaculum ædificari, altare construï, sacerdotes constitui, sacrificia

(z) *Exodi 24.*

ficia fieri & hostias immolari exquisitis-
simis verbis mandavit. In Levitico au-
tem continentur leges, quibus ritus in
holocaustis & victimis offerendis, & sa-
cerdotibus initiandis religiose observandi
ordinantur: item leges de vino Dei mi-
nistris, quando tabernaculum intrabant,
& Nazaræis ac Rechabitis perpetuum in-
terdicto, de votis ac decimis solvendis,
de ciborum certo genere vitando, de
animalium & hostiarum delectu, de to-
tius anni festis solemnissimis, Paschatis
nempe, Pentecostes, Tabernaculorum,
Expiationis publicæ, Tubarum sive exor-
dii civilis anni, Sabbatici, ac Jubilæi.
Juris civilis vero norma & leges tradun-
tur passim in Deuteronomio, ubi agitur
de delictis morte aut alio pœnarum ge-
nere castigandis, de conservandis cujus-
que juribus, de usuris & fraudibus in
commercio vitandis, de damnis datis re-
sarcieendis, maxime de judiciorum ac re-
giminis forma. Hanc ipsius Mosis tan-
quam Legislatoris etiam civilis a Deo con-
stituti verbis heic referre juvat: *Non va-*
leo, inquit ad populum, solus negotia ve-
stra sustinere, & pondus ac jurg.a . . .
Tulique de tribubus vestris viros sapien-
tes, & nobiles, & constituti eos princi-
pes, tribunos, & centuriones, & quin-
BIBLIOTH. DOMEST. LIB. XI. C qua-

quagenarios, ac decanos, qui docerent vos singula. His vero præcepit idem Moyses: audite illos, & quod justum est judicate: sive civis sit ille, sive peregrinus. . . . quod si difficile vobis visum aliquid fuerit, referte ad me, & ego audiam (a). Observanda heic duo veniunt: primum quidem est discrimen illud, quod S. Scriptura facit, dum in tradendis juris naturalis & sacri legibus semper Deum ipsum locutum esse memorat: *Locutus est Dominus ad Moysen, dicens &c.* At in judicialibus promulgandis Moysen loquentem inducit: *Hæc sunt verba, quæ locutus est Moyses ad omnem Israël &c.* quo discrimine indicare voluit, ea quæ Juris naturalis & sacri sunt, a Numinis ipsius ore pendere, atque ab eo tanquam rem suam curari: illa vero, quæ ad Jus humanum & civile pertinent, hominibus vicaria cum potestate a se relinqui. Alterum est, triplicis generis præcepta fuisse legis veteris seu Mosaicæ: *Moralia, Cereimonialia, & Judicialia.* Moralia docebant partim debitum Deo cultum esse exhibendum, partim proximo non inferendam injuriam, quæ quoniam ratio quoque naturalis humanæ insita naturæ dicitur, sunt etiam Juris naturalis: Cere-

mo-

(a) *Deuteron. cap. i.*

Jurisprudentiæ sacræ ac profanæ. 35

monialia in ritibus, quibus colitur Numen, speciatim determinandis occupabantur: Judicialia vero statuebant modum, quo justitia in populo Israelitico esset administranda; quas leges Judiciales apud Hebræos instar juris civilis fuisse Philo Judæus testatur.

VIII.

Hac ratione constitutum apud Hebræos jus, seu lex quam Mosaicam adpellamus; indies magis illustratum & promulgatum fuit tum per Pontifices & Judices, tum per Reges, tum per Prophetas. Pontifices quidem Aaron, Eleazar, Phinees, horumque successores erudiebant populum in iis, quæ ad sacrificia, festa, & ceremonias adtinebant, & leges legumque apices publicis in cœtibus explicabant: Judices vero, ut Moses, Josue, Othoniel, Debora, Gedeon, Samuel &c. velut Dei interpretes ejus præcepta promulgaverunt, & ut ab omnibus custodirentur, diligentissime invigilarunt, ita ut ad eos tanquam ad oracula in rebus arduis confugeretur: non minus summa cum potestate populum regere, judicia exercere, gerere bella contra hostes infideles, demi forisque cuncta gubernare consueverunt. Ubi autem Judicum mu-

nus populi importuno desiderio, & Numinis indulgentis auctoritate abrogatum fuit, ac Reges successerunt, isti magnam in rebus sacris & profanis curandis potestatem exercuere. Inter hos eminebant David Rex religiosissimus, qui tot inter regiminis & bellorum curas quamplurimis psalmis & canticis veram Dei Ecclesiam & Numinis cultum illustravit: Filius ejus Salomon, qui magnificum templum Hierosolymitanum struxit, & summa cum magnificentia Deo dedicavit; præterea libris suis & juris naturalis & morum præcepta ad omnium Ægypti ac Græciæ sapientium invidiam explicando complexus est: Josaphat Rex Juda, sub cujus regimine plurimum floruit juris utriusque auctoritas. Nam quum alii Reges complures Israelis & Juda ad jura gentium deflecterent, ipse ad stabiliendum jus civile constituit *judices terræ in cunctis civitatibus Juda munitis per singula loca, & præcipens judicibus: videte ait quid faciatis: non enim hominis exercetis judicium, sed Domini, & quodcumque judicaveritis, in vos redundabit. Sit timor Domini vobiscum, & cum diligentia cuncta facite. Non enim est apud Dominum Deum nostrum iniquitas, nec personarum acceptio, nec cupido munerum.*

Ad

Jurisprudentiæ sacræ ac profanæ. 37

Ad custodiendum vero jus sacrum in Jerusalem quoque constituit Josaphat Levitas & Sacerdotes, & Principes familiarum ex Israel, ut judicium & causam Domini judicarent habitatoribus ejus. Præcepitque eis dicens: sic agetis in timore Domini fideliter & corde perfecto omnem causam, quæ venerit ad vos fratrum vestrorum, qui habitant in urbibus suis inter cognationem & cognationem, ubicunque quæstio est de lege, de mandato, de ceremoniis, de justificationibus: ostendite eis, ut non peccent in Dominum, & ne veniat ira super vos, & super fratres vestros: sic ergo agentes non peccabitis (b).

En! præclaram divisionis ideam inter jus Ecclesiasticum & Civile, uti & inter Judices sacros & profanos. Nec est, quod persuadeamus nobis, illius ævi Juris studia & Judicia nonnisi rudia atque simplicia fuisse, quemadmodum stylus est, quo a S. Scriptura describi solent. Non defuerunt legum codices, non Jurisconsulti, quales erant seniores populi, non Leguleii ac Judices, scilicet sacerdotes ac Principes, non solemnitates, non tribunalia, quæ sub portis civitatum constituebantur; neque etiam defuerunt fraudes

&

(b) 2. Paral. c. 19.

& artes, quibus jura pervertebantur, & corrumpebantur judicia, uti patet e pluribus ejusdem S. Scripturæ locis, ubi non raro in iudices iniquos, & perversa judicia declamatur. Demum Prophetæ magna apud populum & Reges auctoritate pollebant, eorumque verbis velut oraculis fides habebatur, quum illis Deus tanquam præconibus legum ac mandatorum suorum uteretur, præsertim tristi tempore illo, quo in captivitatem Babyloniam abstracti Reges Israel & Juda cum populis suis, in eaque per annos septuaginta detenti fuerunt. Ibi Prophetæ patria jura & leges, veramque religionem in medio nationis pravæ conservarunt, ne omnino extinguerentur, uti Jeremias, Daniel, Zacharias, Aggæus &c. Inter hos præcipue memorandus heic venit Esdras. Hic Sacerdos, Prophetæ, Scriba, & Doctor post solutam sub Cyro Rege captivitatem cum reliquis Hierosolymam reversus sacrum codicem legis Mosaicæ, injuria temporum magnam partem deperditum memoriæ beneficio integritati suæ restituit. Porro Prophetæ tum temporis multos quoque discipulos & Auditores numerabant, quos sacra Scriptura *Filios prophetarum* nuncupat, quosque in scholis illi erudiebant in lege

ge

Jurisprudentiæ sacræ ac profanæ. 39

ge divina humanaque. Ejusmodi scholæ fuerunt in Naioth Ramathæ auctore Samuele (c) in Bethel civitate (d) in agro Hierichuntino sub Elia & Elifæo (e) in Silo & Galgalis &c. plures in Jerusalem, inter quas celeberrima fuit magna Synagoga, seu senatus centum & viginti Patrum, quorum princeps Esdras, de quo dixi, eum in finem congregatus, tum ut divinæ legis observantia pristino splendore restitueretur, tum ut in unum corpus collectis sacris libris scripturarum, quæ tunc temporis exstabant, Canon & correctæ S. Codicis editio vulgaretur. Ab hoc tempore jus naturale, divinum & humanum, publicum & privatum magna in veneratione nec minore observatione apud Principes & populum erat adnitentibus summis sacerdotibus, inter quos Eleazar Ptolemæo Philadelpho Ægyptiorum Regi septuaginta duos senes doctrina conspicuos & legis peritissimos submitit, qui sacram Bibliam miro consensu ex Hebraico in Græcum idioma transtulerunt, ut etiam in alias gentes Hebræorum Jurisprudentia diffunderetur. Sed invalescentibus sensim pravis moribus, & legibus impune violatis accedente Pontifi-

(c) 1. Reg. 19. (d) 4. Reg. 2. (e) *ibid.*

tificum æmulatione jus & fas omne in summum discrimen adductum est, Quippe perversi quidam viri Israelitæ, patriæ proditores, missis ad Regem Antiochum legatis obtinuerunt ab eo potestatem, ut facerent justitiam gentium. Et adificaverunt Gymnasium in Jerosolymis secundum leges Nationum &c. (c) Accessit huic malo aliud non minus grave, nimirum æmulatio summorum sacerdotum. Nam Jason Oniæ frater ab Antiocho Epiphane supremum Pontificatum muneribus emit, pulso Onia: mox idem de Jasone tentavit perfecitque Menelaus: capta Solyma cum ingenti Judæorum strage, facer Codex Vulcano traditur, leges Gentium introductæ, totaque respublica vix non funditus everfa fuit. Obstiterunt quidem sat longo tempore huic torrenti fortissimo animo Machabæi, fuso etiam sanguine pro aris & focus ac patriis legibus domi forisque clarissimi: sed tandem & his succumbentibus, ac Herodianis per vim succedentibus, dum Sacerdotes, Scribæ ac Pharisei ad solum legis corticem & exteriores ritus plusquam religiose intenti essent, adventu morteque Christi Servatoris lex Mosaica sublata fuit, substituta in ejus locum nobiliore sanctio.

(f) 1. Machab. cap. 1.

Jurisprudentia sacra a profana. 41

Et foreque lege Gratia. Hec consideratione digna venit antiquitas Juris sacri & civilis, quo utebantur Hebræi, quum lex Mosaica septingentos & plus annos ante lata promulgataque fuerit, quam Roma fuisset condita, & plusquam mille annos, antequam XII. Tabularum Jus Romanæ introductum esset, ut Chronologia nos docet. Quo enim tempore Romulus regnum auspicabatur, nugasque illas execrandas, ut loquitur Posssevinus, suarum legum de sacris & religione ferebat, eodem tempore jam toto oriente percrebuerat fama atque cognitio Mosai-
cæ legis, quum & in Judæa notus esset Deus, & extaret celeberrimum Salomonis Templum, quo ad colendum Deum undique populi confluebant, & Prophetæ ac Sibyllæ conclamarunt Christum esse venturum, cujus legi & jugo Romanum & reliqua imperia essent subijcenda.

IX.

Dum hæc Juris sacri & civilis norma in republica populi Electi vigeat, jus quoque Politicum sensim inter exterarum gentes invaluit. Equidem divisio post confusas ad turrim Babel linguas Noemi posteris tum ante ac post Moysen Legislatorem, tum circa illius ævum diversa re-

gna & republicæ coaluerunt. Assur seu Bel jam A. M. 1758. Assyriæ regnum & Monarchiam fundavit: Abrahami tempore, quum Patriarchâ hic dei jussu peregrinaretur, quatuor Reges adversus quinque alios in aciem processisse legimus in libro Genesis (g), Ægyptii vastissimum crexere regnum, quorum Rex primus erat Apis A. M. 2108. Cærops primus Athenarum Rex fuit, Mosi cœvus A. M. 2364. Ipse Moses Og Regem Basan, & Sehon Regem Amorhæorum, aliosque finitimos commissis præliis devicit. Dardanus Troiæ, Minos Cretæ, Tantalus Phrygiæ, Janus Italiæ, Perseus Argivis, Saturnus Latio imperitabat Judicum Israeliticorum ævo (h). In his regnis atque Rebuspublicis jus quoddam & leges, quibus intra limites populus contineretur, conditas fuisse dubium esse non potest, quum perversos Israelitas aliquot *ad jura & leges gentium* defecisse memoret S. Scriptura. Quænam autem qualesve fuerint, ad nos haud pervenit. Verosimile est, alias atque alias pro cujusvis imperantis arbitrio tum circa nefanda illorum sacra, tum circa politicum regimen constitutas fuisse. Certiora de Legislatores primis, qui partim naturæ lumine, par-

(g) Cap. 14. (h) Numer. 22.

partim Philosophiæ moralis studio leges suas ad ordinatæ reipublicæ formam adaptarunt, intelligere licet e Gratiani Decreto (i) dum ita loquitur : „ Phoro-
„ neus Rex græcis primus leges judicia-
„ que constituit. Mercurius Trismegi-
„ stus primus leges Ægyptiis tradidit.
„ Solon primus leges Atheniensibus de-
„ dit. Lycurgus primus Lacædemoniis
„ jura ex Apollinis auctoritate confinxit.
„ Numa Pompilius, qui Romulo successit
„ in regno, leges Romanis edidit „. At
præ aliis Plato ille divinus & in rebus
politicis facile princeps, qui vixit A.M.
3602. magni momenti leges (siquidem
aliquam in Ægypto lucem hauserat e Di-
vini Codicis editione græca) nobis reli-
quit in suis de Republica libris. *In pri-
mo libro* statuit : „ Fidem esse servan-
„ dam, immo adversus hostem sempiter-
„ nam fidei auctoritatem constare debe-
„ re. Justitiam colendam, injustitiam om-
„ nibus diris detestandam, ex illa feli-
„ citatem, ex hac infelicitatem existere.
„ Jus suum cuiquetribuendum, ita ut
„ unicuique erit bono. Neminem læ-
„ dendum, ne hostem quidem. Qui se-
„ cus faxit, Deus ipse vindex erit. Ma-
„ gistratus subjectorum curam gerito,
„ &

(i) *Part. I. dist. 7. can. I.*

„ & publicæ utilitatis rationem habeto.
„ Qui privatum emolumentum in publi-
„ ci muneris administratione publicæ an-
„ teposuerit utiliti, damnas esto, & pe-
„ culatum pœnas luito. Qui in Repu-
„ blica Magistratum ambierit, damnas
„ esto, & ambitus pœnas luito. *In li-*
„ *bro secundo* docet: Nemini vel com-
„ modi causa esse injuriam inferendam.
„ Ne quid fallaciter, malove dolo fiat.
„ Deum esse unum, atque eundem, im-
„ mutabilem, omnium bonorum aucto-
„ rem, veracem, cupiditatibus humanis
„ nullo modo obnoxium, optimum, per-
„ fectissimum. De religione prima esto
„ cura in republica, & de ea certis le-
„ gibus cavetor. Nec ea Religio ad-
„ mittitor, quæ fabulosis commentis Dei
„ naturam perverferit: & si qua irrepso-
„ rit, mature exterminator. Eæ opinio-
„ nes, quæ Deum mutabilem, mali au-
„ ctorem, mendacem, præstigiatores fa-
„ ciunt, illius naturam pervertore cen-
„ sentor. Ex æquo & bono Judex leges
„ moderator. *In libro tertio*, Poetis,
„ quod simplicitati & gravitati piorum
„ noceant, in republica nullus locus tri-
„ buitor: Extra Imperii fines tamen co-
„ ronati & unguentis delibuti (ut eru-
„ ditioni honos aliquis detur) amandan-
„ tor.

„ tor. Fabulatores, quod mendacium
„ animis civium ingenerent, e republi-
„ ca longe facessere jubentor. Vestium,
„ ædium, picturæ, & ejusmodi rerum
„ modus ex temperantiæ formula defi-
„ nitor. Jurisperitis & Medicis, nisi
„ ex ordine exploratis, exercere artes
„ fas nequaquam esto. Magistratus suam
„ salutem reipublicæ salute, opes utilita-
„ te terminato: neque ab illa sententia
„ unquam usquam abscedito. Ab ava-
„ ritæ sordibus animum prorsus aver-
„ tito. Munia sua in commune depo-
„ nito: nihil proprium possideto.,, Ita
Plato Rempublicam suam saluberrimis le-
gibus stabilivit, quæ utinam immorta-
les forent.

X.

Sic circumcirca exsurgentibus Legisla-
toribus, ferventeque studio ferendarum
legum, quibus populi in communem vi-
tam congregati in officio continerentur,
Jus Romanum caput erigere cœpit. Ini-
tio quidem Urbis Romanus populus nul-
la certa lege vivebat, Regum arbitriis
pro Jure observatis, a quibus *lites divi-
mebantur, & quod justum illi judicassent,*
id erat pro lege, ut ait Dionysius Hal-
licar-

licarnasseus (k). Aucta civitate, simul & negotiis incrementibus Romulus primus Rex, quum omnibus definiendis non jam sufficeret, populum in 30. Curias divisit, certisque legibus constitutis, quæ *Curiatæ* adpellabantur, (eo quod a populo per lictorem curiatim congregato rogarentur) in gravioribus Reipublicæ negotiis ejusdem sententias exquisivit, uti prodit Tacitus (l). Romulum secuti Reges (scilicet Numa Pompilius, Tullus Hostilius, Ancus Martius, L. Tarquinius Priscus, Servius Tullius, L. Tarquinius superbus) Ex his alii alias quasdam tulere leges, ita ut inter eos clariores, Romulus juri naturæ, Numa juri gentium, Servius juri civili excolendo operam navarit, si Tacito credimus. Quippe Romulus de educatione liberorum, de matrimoniis, de parentum jure sanxit: Numa de homicidiis, de bonæ fidei *contractibus*, de sepultura quasdam leges tulit: Servius vero Tullius teste Dionysio de *contractibus* & injuriis quinquaginta leges rogavit, item de fœnore, de nexis ære alieno, deque aliis, quæ complura postmodum in suas Tabulas Decemviri transtulerunt. Has leges Regias, ne incerto Lare vagarentur,

Juris

(k) *Lib. 10. c. 1.* (l) *Lib. 3. Annal. c. 26.*

Jurisconsultus (primus hoc nomine compellatur Publius Papirius, tempore Tarquinii superbi, Regis ultimi) in unum veluti corpus collegit, quod *Jus Civile Papirianum* nuncupari cœpit, cujus nunc paucissima exstant fragmenta, cæteris omnibus injuria temporum deperditis. Verum non diu tenuit Regum dominatio. Nam Anno U. C. 244. ob tyrannidem ac vitæ licentiam lege Tribunitia civitate pulsi fuerunt, maxime ob violatam a Sexto Tarquinii superbi filio Lucretiam, Matronam Romanam pudiciæ laude florentissimam. Inde factum, ut cum Regibus legum quoque regiarum auctoritas exoleverit, cæperitque populus, ut initio civitatis, fere omnia negotia per Curias & Comitia tractare. Nosse hæc juvat plurimum, quid rei fuerint Curia istæ atque Comititia. Erat *Comitium* locus Romæ in foro, ubi carcer quem Tullianum adpellabant, & Rostra seu suggestum e captivarum navium rostris exstructum, statuae plurimæ Deorum & Heroum, ac Puteal Libonis, quod ara fuit, quam tenentes manibus Judices jurabant, se ex animi sententia judicaturos. Comititia vero fuerunt conventus populi, alia *Curiata* seu *ex Curiis*, quas a Romulo ob curiam rei-

reipublicæ habendam constitutas dixi, quæque ad suffragium dandum secundum censum & ætatem curiatim evocabantur: alia *Centuriata*, quando per singulas centurias suffragatio fiebat, & quidem in Campo Martio extra civitatem: alia *Tributa*, quæ inibantur, quum plebs sine Patriciis secundum urbis regiones & loca tributim seu per tribus congregabatur. In his Comitibus antequam ferebantur leges, prius publice scripto fuerunt expositæ per *Trinundinum*, hoc est, tres nundinas seu dies viginti septem. Postmodum institutis auspiciis, scilicet avium inspectione, observatione de cœlo, tripudio sive terripavio, aut solistimo ibatur in Comitibus. Facta fortitione circa ordinem dandi suffragii (in quo prima Centuria seu Tribus dicebatur *Prærogativa*) dirimebantur seu distribuebantur Tabellæ duæ, in quarum una scripta erat litera A, id est, *Antiquo* seu *nolo*, in altera U. R. *uti rogas*, id est *approbo*: quæ postmodum tabellæ cistis, urnis, cunis seu sitellis per pontes angustos collocatis injectæ, & ad ineundum suffragium extractæ recognitæque fuerunt. Tum legem laturo rogabant populum seu Quirites, ut discederent in suas classes, ac in suffragia irent, (inde legis
roga-

rogatio) quæ si Tribunis non arridebat, ipsi intercessere, seu se opposuere solemni verbo *Veto* aut *Vetamus*, atque ita prohibebant, quo minus lex ferretur. Porro quod plures tribus, centuriæ aut curiæ comprobarunt, sanciebatur, ita quidem, ut quod populus Romanus, cujus pars vilior *plebs* vocabatur, ratum habuisset, ejus rei Patres conscripti sive Senatores fierent *Auctores*, hoc est, confirmarent, omnesque cives firmarent juramento. Denique lex sive Centuriata, sive Curiata, sive Tributa in æs incidebatur. Hic itaque ritus erat ferendi leges apud Romanos in libera Republica.

XI.

Cæterum ejectis, ut dixi, Regibus duo Consules creati sunt, qui omnia jura omniaque Regum insignia capeffivere, solum de capite civis Romani judicium retinente sibi populo, lenem autem coercionem senatui relinquente. Ab eo tempore *Senatus Consultis* multum tribui coeptum est. Hic enim non de iis duntaxat, quæ ad reipublicæ majestatem amplitudinemque pertinuerunt, pro potestate decernebat, verum etiam auctoritatem suam, si privatorum res postularent, interponebat. Brevi tamen, ne

Consulum potentia ultra limites progredetur, Dictator constitutus est, cui duæ secures ad terrorem additæ: Magister quoque Equitum adjunctus fuit, cui cura ludorum faciendorum, feriarum, comitiorum, senatus legendi ac Reipublicæ constituendæ incubuit. Quoniam autem plebs opprimi a potentioribus libertatem, securioremque se esse in bello quam pace vel credebat vel re ipsa experiebatur, facta secessione Tribunos sibi constituit, quos Consulibus opponeret. Horum ampla erat vis atque facultas, scilicet intercedendi adversus Magistratus potentiam, atque ipsius etiam Dictatoris imperium, item quoties oportere visum fuit, convocandi ac dissolvendi senatum. Hac ratione quum Tribuni rogare plebem debebant, factum est, ut quod plebs jubebat, ratum firmissimumque esset, unde *Plebis scita* originem duxere. Verum nec ista regiminis forma ætatem tulit. Exortæ siquidem sunt gravissimæ frequentissimæque Patres inter ac plebem contentiones, utraque parte legum ferendarum potestatem sibi vendicante: quod his placuit, illi displicuit, Tribunis sedulo discordias foventibus. Quapropter ut turbis continuo crescentibus ac rempublicam misere depa-

scent.

scientibus tandem finis imponeretur, nec invidiæ locus esset, in eam itum est sententiam ut quas domi stabiles reperire non liceret, foris peterentur leges, quibus deinceps Romani viverent. Comuni ergo auctoritate missi sunt Athenas Legati Sp. Posthumius Albus, A. Manlius, P. Sulpitius Camerinus, qui aliarum Græciæ civitatum instituta, mores, juraque cognoscerent. Hi lustrata maxima Græciæ parte demum reversi sunt cum legibus Lacedæmoniorum & Atheniensium, quæ Romam allatæ, summaque cum veneratione ab omnibus exceptæ decem Tabulis, primum eboreis, tum æneis inscriptæ fuerunt, ac publico in foro pro Rostris, ut apertius legi ac intelligi possent, positæ A. U. C. 303. Decemviris ad id constitutis, ut sublata omni provocatione eas interpretarentur, & si opus esset, corrigerent ampliarentque, qui re ipsa duas alias Tabulas, in quibus leges Romanorum proprias consignabant, sequenti anno adjecerunt. Inde orta est adpellatio Juris XII. Tabularum. Atque ab his totius juris publici ac privati originem ducit Livius, (m) & Cicero (n) *Discebamur*, inquit *puerè duode-*

(m) *Lib. 3. c. 34.* (n) *Lib. de leg. 2.*

duodecim Tabulas ut carmen necessarium, quas jam nemo discit. Duobus autem versibus tripartitam Tabularum istarum divisionem complexus est Aufonius:

*Jus triplex Tabulae, quod ter sanxere
quaternae:*

*Sacrum, privatum, populi commune
quoduscumque est.*

Nimirum prima pars comprehendebat jus illud, quod ad sacra pertinebat, altera jus publicum, tertia privatum. Observat autem scite Possevinus, astutiam Satanæ decem Tabulas e Græcia Romanam transtulisse, quarum initio Deorum cultus, delubra & luci, & larium fedes, & ritus familiæ patriæque, & sacra execranda statuuntur, eo nimirum consilio, ut duabus Tabulis Moïsis, & contento in iis Decalogo nefandas has Tabulas opponeret. Extant adhuc hodie istarum fragmenta quædam apud varios Auctores, præsertim Vincentium Gravina (o). Decemviri vero ad exponendas XII. Tabulas illas constituti, de quibus supra memini, fuerunt Ap. Claudius, T. Genucius, P. Sestius, Sp. Vetrurius, C. Julius, A. Manlius, Serv. Sulpicius, P. Curatius, T. Romilius, Sp.

(o) *Lib. i. Orig. Jur. §. 32.*

Sp. Posthumius. Juvat heic breviter quædam de Tabulis, earumque materia, loco, ac tempore scitu digna inferere: Vocarunt Romani leges suas nomine Tabularum, ut imitarentur Athenienses, qui Solonis leges ligneis tabulis insculptas appellarunt *ἄξονας*: Ulpianus vero omnem materiam, cui leges inscribuntur, nuncupavit Tabulas, etiamsi ea papyrus esset, vel membrana, vel cortex, vel corium animalis. Eas autem, de quibus memini, Romanorum Tabulas XII. Pomponius ex ebore factas fuisse contendit, contra Diodorus Siculus, Livius & alii ex ære fusas asserunt: alii primum X. tabulas eburneas, postea vero omnes XII. æneas fuisse autumant; quod ultimum factum esse Plinius ait ad perpetuitatem monumentorum & Constitutionum publicarum. Porro scribebantur leges carmine, ut facilius a vulgo addiscerentur. Vetus autem ille mos incidendarum legum in æneas tabulas usque ad tempora posteriorum Cæsarum Theodosii atque Valentiniani propagatus fuit, uti constat ex verbis in Codice Justiniano *l. 2. de frument. urb. Constantinopol.* relatis, quibus Imperatores isti legem quandam de frumento urbis Constantinopolitanæ æreæ tabulæ incidi jussunt.

D 3

serunt. Locum vero quod adtinet, leges XII. Tabularum pro Rostris propositæ fuerunt loco illustri prope Curiam Hostiliam (cui postea circumactis plus quam centum annis navium antiaticum rostra suffixa nomen fecerunt) quod factum est exemplo Atheniensium, qui leges suas proponebant prope statuas Heroum, a quibus appellationem ducebant Tribus Atheniensium. De Tempore, quo durarunt hæ tabulæ, æternitati dicatæ, prodit Diodorus Siculus, qui vixit Augusto imperante, suo etiamnum ævo eas pro Rostris incolumi sculptura stetitisse: immo D. Cyprianus post annos fere ducentos nondum expunctas fuisse tradit in epistola secunda ad Donatum: quandonam autem posteritati subtractæ fuerint, nemo est, qui accurate referat. Hæc de Tabulis legum Romanarum. Redeamus ad Decemviratum. Mutabilis est in horas dominatio in manibus populi posita; nec Decemviratus diu substitit, utpote quo post biennium ob Appii Claudii libidinem exauctorato Censores in rempublicam introducti sunt, quorum erat populi censum inire. De horum officio ita loquitur Tullius (p): „Censores populi ævitates, soboles,
„fami-

(p) *Lib. 3. de leg.*

„ familiasque censento. Urbis templa,
„ vias, aquas, ærarium, vectigalia tuen-
„ to. Equitum peditumque prolem descri-
„ bunto. Bini sunt. Magistratum quin-
„ quennem habento. Eaque potestas sem-
„ per esto,,. At annus ab urbe condita
387. ut Livius inquit, insignis fuit novi
hominis consulatu, insignis duobus Magi-
stratibus: Prætura, & Curuli ædilitate,
quos Patricii occuparunt pro concessio ple-
bi altero Consulatu, ad quem illa L. Sex-
tum, cujus lege partus erat, e gremio
suo evexit. Porro Prætoris munus erat,
ut in urbe de causis negotiisque privatis
jus diceret. Nam in facinorosos homines
summa potestas penes populum erat, qui
extra ordinem, ubi opus fuit, Quæsitorem
seu Quæstorem constituerebat, ut adversus
ejusmodi homines inquireret. Ædiles
Curules autem ita dicti, quod curru tan-
quam sella seu throno insidentes e curia
veherentur, de certis causis jus dicebant,
& Edicta proponebant. Non minus pluri-
mæ novæ leges hac tempestate condebant-
tur, ut lex Genutia, Hortensia, Glicia,
Cincia, Acilia, Fannia, Voconia, Cor-
nelia &c. quibus utilitas tam publica quam
privata promovebatur. Ita res gerebantur
in Romana Republica usque ad Cajum Ju-
lium Cæsarem, qui rebus bellicis fortiter

gestis a militibus suis Imperator salutatus Consulatum petiit, quem quum & Pompejus ambivisset, Respublica in duas factiones scissa fuit, quarum una Cæsari, Pompejo altera adhæsit, sequente ambitionem atroci bello civili. Verum Cæsar in Pharsalica pugna victor, Pompejo profligato & Ptolomæi Ægypti Regis perfidia occiso, quinque triumphis Gallico, Ægyptiaco, Pontico, Africano, & Hispanico clarus suprema potestate potitus est; sed non multo post viginti tribus vulneribus interfectus C. Octavio Augusto imperium reliquit, qui latis multis legibus, & pacato fere toto terrarum orbe consilium quidem iniit de Republica reddenda, & imperio deponendo, sed a suis prohibitus animum ad imperium lege firmandum adiecit. Itaque anno urbis 729. C. Cæsare Augusto decimum, & C. Norbano Coss. lata est *Lex Regia*, qua summa & regia potestas, quam populus Romanus ab ejectis regibus sibi vindicaverat, in unum principem translata est, ut is quidem nulla legis necessitate teneretur, omnique scripto jure solutus esset, ei vero parent omnes. *Quod* igitur, ut Arcadius Jurisconsultus loquitur, *Principi placuit, legis habebat vigorem.* Atque ita Respublica Romana in Monarchiam migravit.

§. III.

§. III

Tertia Periodus.

XII.

Tertiam periodum, quantum ad jus sacrum & Ecclesiasticum pertinet, a Christi servatoris nostri in terras adventu auspicari juvat, qui uti veterem seu Mosaicam legem abrogavit, ita novam legem, nimirum Gratia, illi substituit. Atque in hac lege gratia a Christo Domino tanquam Legislatore supremo collata est D. Petro ejusque successoribus, utpote suis in regenda Ecclesia Vicariis, jurisdictio Ecclesiastica. Voluit enim ex his terris discessurus ad cœlestem Patrem, a quo omnem potestatem acceperat: *omnia dedit ei Pater in manus*, (q) voluit inquam Ecclesiam a se fundatam regi modo humano, ac per homines. Quare Petro dixit, & in Petro omnibus legitime successoris Pontificibus: *Tu es Petrus, & super hanc petram edificabo Ecclesiam meam: pasce oves meas: Tibi dabo claves regni cœlorum, quodcumque ligaveris super terram, erit ligatum & in cœlis &c.* (r). Nimirum duas claves seu dupli-

(q) *Joan.* 13. (r) *Matth.* 16. 19. *Joan.* 21.

duplicem contulit potestatem, & docendi & gubernandi Ecclesiam, quæ sane potestas ultima sine jure, sine legibus neutiquam subsistere potest. Et vero hac jurisdictione sibi concessa quamprimum usus est D. Petrus cum reliquis Apostolis, dum varia Concilia congregarunt, ut de iis, quæ ad cultum divinum, & Ecclesiæ pertinerent regimen, statuerent, Evangelicasque leges stabilirent. Primum erat Hierosolymitanum post Christi in cœlos ascensum, anno 34. ut sentit Baronius, vel ut computat Labbe anno 33. quo convenerant Apostoli in domo Mariæ Matris Joannis, ut duodecimus Apostolus sufficeretur in locum Judæ, & *Episcopatum ejus alter acciperet*, quod etiam forte supra Mathiam cadente factum est. Monstravit heic jurisdictionem sibi tanquam Ecclesiæ totius capiti concessam D. Petrus & congregando cœtum ex Apostolis & Fidelibus conflatum, & primus alloquendo hunc cœtum: *Exurgens Petrus in medio fratrum dixit &c.* Alterum Concilium Apostolicum eodem anno Hierosolymæ celebratum fuit. *Placuit ibi*, quum æquum haud esse videretur, Apostolos relicto Dei verbo ministrare mensis, ut eligerentur septem Diaconi, qui hoc ministerio fungerentur, quibus etiam manus

manus imposuerunt Apostoli, id est (uti Patres Concilii Neocæsarensis, S. Dionysius, Cyprianus, Isidorus, Salmeron, & Cornelius a Lapide sentiunt) in Diaconatus ordine constituerunt. Tertium Apostolorum Concilium, quod sequentium omnium norma est, & e quo desumpta fuit Oecumenicorum Conciliorum formula: *Visum est Spiritui Sancto & nobis* (s), denuo Hierosolymis Claudio Imperante anno Ch. 49. uti censet Labbeus, vel ut alii putant, an. 50. coactum fuit. Ad id convenerant Petrus, ut Præses & Caput, Paulus, Joannes, Barnabas, atque Seniores, qui aderant Jerosolymis. Non desunt, qui omnes alios Apostolos, si Jacobum Majorem excipias e vivis ab Herode an 44. vel 46. jam sublatum, singulari Numinis vocantis providentia hoc in Concilio præsentis fuisse contendunt, utpote quod cæterorum exemplar esset futurum; idque colligunt ex epistola secunda ad Galatas. In eo statutum fuit, neminem Christianorum lege *Circumcisionis*, vel alia ceremoniali teneri, præterquam ut abstinerent ab *immolatis simulacrorum* seu idolothytis, id est a rebus quæ Idolis offerebantur, & a *sanguine ac suffocato*. Utebantur autem Apostoli
his

his verbis : *Visum est. Placuit nobis*, quæ verba ad solemnem pronunciandi formulam tam in Comitibus Ecclesiasticis quam in Judiciis profanis & Senatusconsultis valde usitata fuerunt. Alii duo conventus Apostolorum recensentur in eorum Actis : primus A. C. 44. in quo Symbolum quod vocant Apostolorum collata quasi opera pro illorum numero fuisse compositum testantur S. Cyprianus (t) Ruffinus, S. Ambrosius, D. Clemens, Epiphanius, Augustinus &c. Alium Antiochiæ conventum institutum fuisse pro comperto est apud Ecclesiasticæ Historiæ Scriptores, ad sedandas controversias ibidem exortas, cujus Canones inventos a Pamphilo in Bibliotheca Origenis referunt Turrianus (u) & Binius (x) in quorum octavo stabilitus fuit cultus sacrarum imaginum; unde antiquitas illius contra veteres & recentiores Iconomachos commendatur. Verum hæ leges, aliæque Apostolorum sanctiones non statim scripto mandatae fuerunt, immo in cordibus fidelium quasi scriptæ circumferebantur tanquam Traditiones Apostolicæ, quemadmodum aliæ Christi Traditiones. Quippe Ecclesia primis illis temporibus, quæ, necdum hæreticos

(t) *In expos. symb.* (u) *l. i. advers. Magdeburgenses c. 21.* (x) *Tom. i. Concil.*

Jurisprudentiæ sacræ ac profanæ. 61

ticos noverunt, traditionibus regebatur. Hinc Tertullianus scite pronunciavit: *Prior fuit anima quam litera, & sermo prior quam liber, & prior sensus quam stylus* (y). Hujusmodi fuerunt: jejunium Quadragesimæ, suffragia pro defunctis, Pascha quocumque annis celebrandum, ritus & usus aquæ benedictæ &c. Postmodum vero tum fidelium tum præceptorum aucto numero scribi cœperunt leges, atque ita Christiana Respublica, ut quævis alia bene fundata ordinataque partim jure scripto partim non scripto gubernabatur.

XIII.

Sublatis ex hac vita Apostolis, & ad capeffenda meritorum præmia in cœlum evectis non ideo destituta fuit firmo præsidio Ecclesia. Nam *pro Patribus nati sunt filii*, ut ait Propheta Regius (z), id est, ut commentatur D. Augustinus: *pro Apostolis Episcopi constituti fuerunt, qui ideo Apostolorum successores dicuntur*. S. Clemens eorum coævus, D. Petri post Linum successor & discipulus, primus fuit, qui necdum scriptis traditionibus regulas, vulgo *Canones Apostolorum* adpellatas, græco idiomate consignasse fertur, quas Dionysius cognomento Exiguus Justinii Imp. ævo in

(y) *Lib. de anim. c. 5.* (z) *Psal. 44.*

in latinam linguam quam curatissime translata posteritati transmisit. Hac ratione ex Traditionibus Apostolicis Canones manasse luculentissimi testes sunt SS. Patres, & Concilia, uti Baronius ad annum 102. & Turrianus integro, quod pro tuendis Canonibus Apostolorum conscripsit libro, nec non Binius & Balsamon demonstrare conantur, quamvis prior in altera editione Canones hos omiserit. Idem Clemens Papa plures edidisse dicitur Constitutiones, quas refert Severinus Binius (a) quasque Canonicas agnoverunt S. Ignatius, S. Athanasius, S. Epiphanius cum aliis. Ita scribunt ac censent non pauci Juris Sacri Doctores: sed num res ita se habeat, suo loco videbimus. Successerunt aliæ epistolæ, quas *Decretales* vocant, aliorum Pontificum, Evaristi, Alexandri & Successorum: varia quoque Concilia, in quibus, ut de quatuor primis duntaxat mentionem faciam, scilicet in Nicæno viginti canones, in Constantinopolitano I. Septem, in Ephesino præter 12. Anathematismos octo, in Chalcedonenſi viginti septem editi fuerunt. Crevit autem constitutorum, seu ut Jurisperiti vocant, Constitutionum Ecclesiasticarum multitudo præcipue a tempore Constantini M. quoniam prius ob Ethni-

corum

(a) *Tom. I. Concil.*

corum Imperatorum immanes & multiplices adversus Ecclesiam & Christianos excitationes persecutiones cogendarum Synodorum libera facultas haud erat (b). Unde contigit, ut per quadringentos & amplius annos non fuerit discrimen factum inter Jus Canonicum & Theologiam, iidemque essent Ecclesiastici Jurisperiti, qui Theologi; quemadmodum ex Joanne Gerson refert Bernardus van Espen (c), quæ disciplinæ & scientiæ postmodum distinctæ fuerunt, præcipue quando post varias a variis Auctoribus factas Constitutionum Pontificiarum & Canonum Sacrorum collectiones demum Gratianus Monachus famosum opus *Decretorum*: post annos septuaginta vero S. Raymundus de Pennafort celebres quinque libros *Decretalium* in lucem ediderunt, e quibus grande illud Corpus Juris Canonici, quo etiamnum hodie utimur, coaluit, de quo enucleatius atque uberius differendi campus postmodum sese aperiet. Heic duntaxat præstantium Duumvirorum istorum effigies paucis adumbrabo. Gratianus Etruscus erat, ex Ordine S. Benedicti, quem aliqui patria Classensem, alii melius Clusinum, quod Thuscianæ oppidum est, adpellant. De loco ubi S. Ordinem professus est, certant inter se
Mona-

(b) *Cap. i. dist. 15.* (c) *In Prolegom.*

Monasteria, velut olim de Homeri patria civitates Græciæ. Monachi S. Felicis Bononiensis suum esse dicunt, suum Monachi S. Proculi, qui statuam ex marmore sculptam in Claustro suo, qua hortum respicit, erexerunt Viro æque religioso ac docto, æternaque memoria digno. Utrosque conciliare studet Arnoldus Wion, dum Gratianum prius vitam Monasticam ad S. Proculi professum esse, tum vero ad Monasterium SS. Felicis & Naboris transisse, ibidemque Decretum perfecisse scribit; nec sine testibus & tabulis, quum & inscriptio incisa saxo pervetusto præfati ultimi Monasterii, & epitaphium illustre, quod defuncto Bononiæ positum fuit, idem testentur. Ita enim loquitur epitaphium: *Gratiani Clusini, Cæsarei juris & Pontificii Eucleatoris prope divini, qui Monachus in Martyrum Felicis & Naboris ade absolutissimum ibidem Opus Decretorum anno Gratia 1151. Compilavit, sepulcrum, quod illic Curiaë ruderibus absorptum, hic magnificentius renovatum Joan. Franciscus Aldrovandus Bononicæ III. Dictator ære publico instauravit. Anno salutis 1498. Idib. Junii Joanne Bentivolio II. PP. Remp. feliciter gubernante. Quonam autem anno Gratianus Decretum suum in legem publicam ediderit, non minus dissentiunt*

Jurisprudentiæ sacræ ac profanæ. 65

tiunt inter se Auctores: quidam id factum esse contendunt An. 1151. tempore Eugenii III. uti docet volumen vetustissimum Decreti, & Chronicon in Bibliotheca Vaticana adservatum: alii an. 1141. quemadmodum legitur in editione jussu Gregorii XIII. emendata: Bellarminus (d) item compositurus collectionem a Gratiano an. 1127. forte inchoatam, an. 1141. editam, & an. 1151. in scholis publice prælectam fuisse autumat. Illud constat, quod volumini suo immenso labore conscripto titulum præfixerit: *Concordia discordantium Canonum*, quum in eo non solum Decretis colligendis (quemadmodum Antecessores fecerant) sed per propositas in utramque partem quæstiones Canonibus, qui inter se pugnare videbantur, in concordiam revocandis operam dedit. Atque hoc Decretorum corpus (uti vocat Innocentius III.) in Academiis, maxime Bononiensi, publicæ prælegi jussit Eugenius III. Pont. Max. cui præterea Gratianus consilium dedit, ut gradus quosdam Academicos institueret *Baccalaureatus*, *Licentiat*, & *Doct*, qui literatis non tam annorum numero, quam doctrinæ merito conferrentur, additis aliis non paucis privile-

(d) *De Script. Eccles.*

BIBLIOTH. DOMEST. LIB. XI.

E

vilegiis, quibus scholastica juvenus ad Juris Canonici studium excitaretur. Quare Gratianus inter omnes Collectores primus obtinuit, ut non solum publicis e cathedris ejus Decretum viva voce explicaretur, verum etiam doctissimorum virorum illustraretur commentariis. Hinc ævo illo celeberrima fuit Academia Bononiensis, utpote ad quam magno numero confluxere illi, quibus ex ipso fonte Sacri Juris scientiam haurire animus erat, non lecus ac ad Parisiensem ii, qui Artium Liberalium & Theologiæ studio se totos consecrabant. Hæc de Gratiano. S. Raymundus de Pennafort (seu de *rupe forti*, quam *penna* Hispanis significat) Barcinonensis, primus *Capellanus* ac *Pœnitentiarius* ut vocant, Gregorii IX. postmodum ingens sidus Dominicanæ Familiæ fuit, cui cum suprema & Generali potestate præerat. Hic Episcopatu Tarraconensi recusato multos pro Ecclesia Dei labores suscepit, magnam doctrinam majori cum sanctitate conjungens: hanc miraculis comprobavit, illam relictis ingenii monumentis. Scripsit autem egregiam *summam* seu libros quatuor de Casibus Pœnitentiæ Sacramenti & Matrimonii, qui diu inter MSS. delitescentes tandem typis dati publicam lucem aspexere. In his arcto fœdere rigo-
rem

Jurisprudentiæ sacræ ac profanæ. 67

rem ac lenitatem conjunxit, ne mollius quam par est, neu severius quam oportet, cum pœnitentibus agerent ii, qui in sacro Tribunali jus dicunt. Præcipuum vero illius opus & per totum orbem vulgatum sunt Libri quinque *Decretalium*, ex antiquis Romanorum Pontificum Decretis, eorumque collectionibus in ordinem & titulos digesti, a Gregorio IX. Summo Pontifice approbati an. 1230. & in omnibus Catholicarum Academiarum cathedris celebrati. Stetit opus maxime arduum trium annorum ingenti labore.

XIV.

Nunc ad Juris politici prosequendam historiæ seriem progredi juvat. Augustus Cæsar, ut memini priore periodo, rerum potitus, reliquique post ipsum Imperatores tum novis legibus a se latis, tum antiquis Romam ac regna & provincias sub jugum missas moderabantur. Nam Regia lege ac potestate sibi concessa & Augustus & Successores moderatus usi fuerunt inter Principatus initia; unde leges adhuc complures a populo vetere ritu rogatæ sunt, ac Senatui simulacrum aliquod pristinæ auctoritatis in jure condendo relictum est. Quippe quæ Principes de Jure privato constituti essent, orationibus in Senatu prius expe-

riebantur, de his censendi arbitrio eidem relicto: eas deinde orationes sequebatur Senatus consultum, donec succedente tempore Romanis paulatim servituti adsuētis, firmatoque magis imperio id quod principi placuit, legis haberet vigorem. Tum initium datum est legibus in ordinem redigendis. Hadrianus Imp. circa an. 119. opera Salvii Juliani Jurisconsulti Ediſta prætorum in unum volumen non ita magnum digessit, quod commentariis suis illustrarunt Æmilius Papinianus acutissimi vir ingenii, & Severi Imper. Affinis; Domitius Ulpianus Alexandro Imp. a consiliis; Julius Paulus Patavinus Ulpiano vita funſto subrogatus & prætorio præfectus: Pomponius, qui cum Ulpiano, Paullo & aliis e schola Papiniani prodiit: Herennius Modestinus Maximini Imperatoris Præceptor, aliiſque. Postmodum vero imperante Diocletiano Constitutiones Principum ethnicorum in duos Codices privata potius quam publica auctoritate colligebant Gregorius & Hermogenes: ille quidem Hadriani usque ad Valerianum & Gallienum, hic vero Claudii, Aureliani, Probi, Cari, Carini, Diocletiani & Maximiani Impp. Delato autem in Christianorum Principum manus Imperii clavo Theodosius Minor, doctissimus Cæsar, horum

rum sanctiones a Constantino M. usque ad suam ætatem uno volumine complexus est, quod ab ejus nomine adpellatum est Codex Theodosianus, qui perpetuis commentariis Jacobi Gothofredi illustratus etiamnum exstat. Ex his facile patet, Romanos Imperatores translato in se regimine sæpius & solícite in id fuisse intentos, ut nimix legum multitudini modum ponerent, & ut scite loquitur Tertullianus, universam illam veterem & squalentem sylvam legum novis Principalium Rescriptorum & Edictorum securibus trunca-
rent. Ferunt, jam ipsum Julium Cæsarem, quin & Pompejum id consilii cepisse, ut ex immensa atque diffusa legum copia saltem ea, quæ optima & necessaria videbantur, in certos quosdam libros colligerent. Sed utriusque consilium mors violenta intercidit. Ita narrat Suetonius. Perfecit tandem grande hoc opus, quod Antecessores vel cogitarunt vel inchoarunt, Justinianus Imperator, quod qua ratione factum fuerit, ut rite intelligatur, operæ pretium est, breviter sub unum conspectum dare Reipublicæ Romanæ, ejusque regiminis formam, uti erat ante Justiniani tempora, & quæ prius sparsim dicta fuerunt, heic in pugnum contrahere. Sex jurium sive Constitutionum species
E 3 erant.

erant. Nam I. quædam constituta dicebantur *Leges*, quæ ferebantur a populo (id est, universis civibus connumeratis etiam Patriciis & Senatoribus) cujus suffragia Magistratus per Consulem legebat seu colligebat. II. alia vocabantur *Plebiscita*, lata a plebe (id est civibus absque Patriciis & Senatoribus) cujus suffragia Tribuni plebis legebant. III. alia rursus *Senatusconsulta*, quæ tempore Aristocratiae ferebantur a Senatu, ad quem tunc rerum summa spectabat. IV. alia *Placita principum*, quæ vigente Monarchia tulere Principes, in quos lege regia rerum summa translata est, & renovata in Augusto lex hæc regia, quæ prius Tarquinio expulso abolita fuerat. V. alia adpellabantur *Prætorum Edicta*, quæ a Prætoribus ferebantur, quorum jurisdictio nonnisi annua fuerat initio, sed postea una cum officio Prætoris etiam Edicta finiebantur. VI. Tandem sequebantur *Responsa Prudentum* sive Jurisconsultorum, quibus a Cæsare jus datum erat respondendi & jura publice interpretandi, quorumque sententiæ ac opiniones in eo auctoritatis gradu positæ fuerunt, ut Judici recedere a responso eorum non liceret. Jam vero una ex parte non raro contrariæ ferebantur leges pro cujusvis Ordinis in tanta varietate

tate dominandi affectu, a Patriciis contra plebem, a plebe contra Patricios, a Lucio Sulla contra Tribunos plebis &c. ex altera vero tanta facta est ab urbe condita usque ad tempora Justiniani per mille & trecentos fere annos legum accessio, tamque copiosi Interpretum commentarii in lucem prodibant, ut præter tres Codices Hermogenianum, Gregorianum, & Theodosianum, qui tunc vige-
bant, in librorum duo millia, versuum autem trecenties decem millia, seu tres ut vocant *milliones*, Jurium ac legum multitudo excreverit.

XV.

Itaque rem arduam aggressus est tandem Justinianus Imperator, cui gloria hæc reservata videbatur, non minore animo quam successu felici, ad grande hoc opus impulsu Triboniani Viri acerrimo ingenio præditi & Quæstoris Palatii incitatus. Primo quidem adhibitis in laboris societatem Dorotheo, Theophilo, aliisque Jurisconsultis Constitutiones Imperatorum præcedentium tribus vastissimis voluminibus antea comprehensæ in unum librum collectæ fuerunt, quem *Codicem Justinianum* adpellari voluit. Tum illa duo mil-
lia librorum, de quibus memini, facto

delectu in quinquaginta fuerunt redacti, imposito *Digestorum & Pandectarum* titulo. Demum extracta e Codice, Digestis, & veterum Commentariis veluti doctrinae medulla *Institutiones* in quatuor libros divisas confici iussit, adjectis *Novellis*, e quibus omnibus Corpus Juris Civilis, quod hodie adhuc in utroque foroviget, in lucem prodiit, & de quibus explicatius & commodius in Oeconomia Juris Civilis agemus. Aspexit autem Justinianus primam lucem in ea Pannoniae parte, quam hodie Bulgariam dicimus, humilis conditionis patrem nactus, Matrem vero Justinii I. Imperatoris sororem, ut refert Spondanus (c). Ad majora natum probavit tam ingenium quam indoles: illo post navatam studiis operam omnium ferme dignitatum ordines quasi per gradus conscendit: hac vero Imperatoris, Senatus, populi que animos ita sibi devinxit, ut Justinus Avunculus, senio & viribus fractus, eum annos quadraginta natum in filium adoptarit, ac tandem urgente senatu in Imperii societatem adsciverit an. 527. Justino autem post quatuor menses vita functo solus ad Imperii clavum sedit annis fere novem supra triginta, quo tempore toga sagoque praereli-

(c) *Annal. Eccles. p. 2. ad A. C. 527.*

reliquis Imperatoribus eminuit. Nam bel-
liducibus expertissimis usus Bellisario &
Narfete Persas coercuit, Vandalos ex
Africa ejecit, Hunnos in Thracia ad in-
terneccionem delevit, domuit Gallos, &
Italiam a Totila misere vastatam vindica-
vit. Jura vero Romani Imperii, quæ le-
gibus quaquaversum dispersis nimium late
vagabantur, opera prudentissimorum Vi-
rorum, Triboniani, Dorothei, Theophi-
li, incredibili ardore simul ac labore in
ordinem redegit, qualem hodie adhuc ad-
miramur. Verum non pari felicitate hu-
jus Juris Justiniani tradendi ac observandi,
quemadmodum condendi, ratio processit.
Quippe Imperatore hoc an. 563. velut alii
scribunt 566. e vivis erepto mox cum di-
gnitate Imperii Romani etiam legum stu-
dium atque disciplina collabi cœpit, ita
ut annis vix quadraginta a Justiniani mor-
te lapsis in Occidente quidem nulla, in
Oriente vero non admodum magna eo-
rum haberetur ratio. Nam in Occiden-
te gentes barbaræ Gothi, Vandali, Hun-
ni (qui jam Justiniani temporibus Ita-
liam misere vastare cœperunt) omnia
susdeque verterant, & cum Imperii Ro-
mani amplitudine ac nomine leges quo-
que Romanas delere, suasque ingerere
& alieno in solo plantare conabantur: in

Oriente autem, quum jam antea inter turbas Imperii jura silerent, Leo Imperator cognomento Philosophus, nescio an æmulatione an temporum injuria, Pandectas novos condere cœpit, voluminibus sex & libris sexaginta distinctos an. 890. quod Corpus Juris ab ejusdem filio Constantino Porphyrogenito paullo emendatius prodiit, & diutissime per Orientem viguit, Pandectis Justiniani penitus contemptis atque suppressis. Equidem Carolus M. Primus Germanorum Imperator, postquam regnum Lombardicum circa annum Ch. 800. evertit, bonas artes & scientias velut e ruinis barbaricis extractas instaurare cœpit, juris tamen Justiniani, quod in Occidente jam omnino exoleverat, in usum revocandi viam invenire haud potuit. Invenit Lotharius II. Saxo Imper. circa an. 1136. qui ut scribit Gravina (f) publico edicto in omnes Imperii regiones emissio jussit, ut Romanorum jus in scholas publicas, inque omnia tribunalia reciperetur, ex eoque imposterum causæ judicarentur, deletis barbaris legibus, profligatisque cruentis moribus, Italico nomine prorsus indignis. Itaque hoc edicto, Romano Juri fasces reddidit ab hostibus ereptos, eique

(f) *Orig. Jur. Civil. lib. I. §. 142.*

Jurisprudentiæ sacræ ac profanæ. 75

eique publicam auctoritatem lucemque restituit. Hujus vero præclari facinoris auctor suasorque fuit Irnerius (Wernerium alii dicunt; Mediolanensis an Germanus fuerit, ambigitur) qui Juris Civilis volumina tunc prorsus ignota e Bibliotheca eduxit, ut in scholis publice proponerentur. Et vero ipse Irnerius primus Juris professionem in Italia collapsam & extinctam postliminio lapsis sexcentis ferme annis restituit, dum primum Pisis jussu Lotharii, dein Bononiæ hortante Mathilde Tusciæ ac Liguriæ tum Dominiæ scholam publicam aperuit, & Justiniani libros interpretatus est, quem ducem deinceps Friderici II. ævo Bulgarus, Martinus, Jacobus, Hugo & alii Viri docti & Jurisperiti sunt secuti. Gallia quoque ac Hispania Italiam imitatæ Jus hoc Justiniani foro & civitate donarunt seculo XIII. Quando autem in Germaniam migrarit, res adeo certa non est: verior eorum videtur opinio, qui contendunt, illud ante seculum XIV. in Germaniam non fuisse introductum, quoniam tunc primum Academiæ illic erigi cœperunt; quumque ad earum cathedras ex Italia Viri docti expertique evocarentur, factum est, ut republica literaria ad Italicos mores composita Jus
Justi-

76 Cap. II. Historia Jurisprud. &c.

Justinianæum quoque primo in scholis reciperetur, tum etiam in foro Imperii Romano-Germanici in usum deductum fuerit, consensu primum tacito Imperatorum ac Germaniæ ut vocant *Statuum*, postea vero Maximiliano I. imperante an. 1496. publicis Imperii tribunalibus secundum Jura Communia, id est, Romana judicandi lege obstrictis.

Atque hæc est historia Jurisprudentiæ tum Sacræ tum Politicæ a prima sui origine, atque ab ipso Mundo condito ad hæc usque tempora non interrupta serie per tot rerum ac regiminum vicissitudines deducta. Nunc in ipsa scientiæ hujus adyta profundius penetrare juvat, ac singulas Oeconomix Juris partes attentius lustrare.



CAPUT



CAPUT III.

OECONOMIA JURIS

UTRIUSQUE.

§. I.

Jus naturæ.

XVI.

Hujus tractationi triplicis naturæ status notitiam præmittere visum fuit, utpote scitu admodum dignam & utilem tum ad rite intelligendam Juris naturæ doctrinam, tum ob multiplicem, quam in se continet eruditionem, tum & vel maxime ad refellendos plurimos errores, quos valde perniciosos ex eo deduxerunt hæretici, ut Pelagius, Bajus, Jansenius, & etiamnum hodie deducunt in hoc ipso de jure naturæ negotio complures A catholici Scriptores, quemadmodum suo loco demonstrabimus. I. *Status naturæ integræ* tria complectitur: primo quidem perfectiones humanæ naturæ convenientes ac debitas ex parte corporis: ejusmodi sunt integritas sensuum, membrorum omnium symmetria, staturæ decor, temperamen-
ti

ti & humorum iusta proportio, e quibus promanabant sanitas, virtus, & vires ad operandum, pulchritudo, tantaque perfectio, quanta integræ naturæ conditionem decebat: ex parte animæ Protoparentis nostri Adami intellectui a Deo infusa fuit habitus scientiæ rerum omnium naturalium, non solum quæ ad vitæ usum & conservationem, gubernationem ac regimen rerum creatarum, verum etiam ad contemplationem laudemque supremi conditoris Dei pertinebant; unde fluxit multiplex & clara cognitio rerum naturalium terrenarum æque ac cœlestium, primorum principiorum moralium ad vitam naturæ rationali conformem instituendam, maxime vero cognitio Dei tanquam causæ universorum & auctoris naturæ. Atque hæc scientia erat ordinis naturalis, ab ideis intellectui congenitis dependens. His supperaddidit benignum Numen primo habitus virtutum moralium, ut earum adminiculo voluntas rectæ rationi esset subiecta, & ad appetitum inferioris hominis in honestatis officio continendum rite comparata. Hæ virtutes eo in gradu perfectionis fuerunt infusæ, qui statui huic erat conveniens. Secundo, humanæ naturæ in naturali sua conditione rectæ perfectæque a Deo adjectæ
tue-

fuere dona quoque supernaturalia gratiæ in ipsa prima sui origine, scilicet habitus gratiæ sanctum facientis, seu charitas cum aliis virtutibus & donis S. Spiritus: unde voluntas charitate ac spe beatitudinis futuræ ornata fuit, intellectus autem per lumen gratiæ circa myſteria supra naturam posita illustratus; ipsa vero natura humana ad finem supernaturalem per gratias ejusdem ordinis divina benignitate fuit elevata. Tertio demum his naturæ ac gratiæ dotibus veluti complementum acceſſerunt privilegia & dona Dei exteriora, nimirum ut homo singulari ejusdem providentia ab omni errore ac periculo, ne deciperetur, immunis fuerit, antequam peccarit, ut omnis rebellionis pravarum cupiditatum expers eſſet, ut ſuo modo nec infirmitatibus corporis aut morti ſubjaceret. Eſſi enim naturæ ſuæ conditio ab his eum non eximeret, potuiſſet tamen nunquam mori, ſi voluiſſet, ſeu nunquam fuiſſet moriturus, ſi non peccaſſet. Atque in iſtis naturæ ac gratiæ donis, nec non privilegiis heic recensitis juſtitia illa originis, ſeu quam *originalem* nuncupant, conſtituta fuit. Porro ut alios quosdam hujus feliciffimi ſtatus, ſi non primorum parentum peccato & culpa everſus fuiſſet, character-

rañeres palam faciam, propagatio humani generis utpote naturæ conformis futura fuisset salva illius perfectione, uti observat S. Augustinus (g) inquires: *Quid prohibere potuerit, ut essent hominibus honorabiles nuptiæ, & thorus immaculatus, etiam in paradiso: hoc Deo præstante fideliter justæque viventibus, ut sine ullo inquieto ardore libidinis, sine ullo labore doloreque pariendi, fœtus ex eorum semine gigneretur.* Circa genus autem vitæ poliucæ dubium haud est, quin homines in statu naturæ integræ victuri fuissent in quadam communitate, saltem domestica familiæ, quum societas ista teste Philosopho (h) ex prolium procreatione ac multiplicatione filiorum & nepotum oriatur. Immo censent D. Thomas, Eximius Suarez, & alii probabilius civilem quoque ac publicam communitatem fuisse futuram, *utpote naturæ per se convenientem, & secundum se perfectam:* neque hominis in illo statu plenæ libertati dominium solius gubernationis repugnasse videtur. Præterea eodem in statu primæva rerum ac bonorum communio conservata fuisset, nulla introducta strictæ dicta divisione, privatisque dominiis: divisio enim evasit necessaria ad vitandas lites,

(g) *Lib. 9. Genes.* (h) *Lib. I. Polit. c. I.*

tes, rixas, & ad pacem inter homines servandam, quin & propter sustentationem ex bonorum cultura, quæ in eorum communione facile neglecta fuisset; quæ ratio tamen in illo pacifico tranquilloque integræ naturæ statu omnino cessisset. Nulla etiam insonassent classica, nulla bella vastassent regiones illas, neque negotiationum tumultus perstrepuissent, neque corporum cura in vestibus cibusque artificiose paratis homines exercuisset, sed vitam duxissent beatam, solitudinum vacuum, & rerum cœlestium divinique Numinis contemplatione atque obsequio, scientiarumque cultu occupatam, cum moderata & delectabili terræ cultura, dicente S. Scriptura (i): *Posuit Deus Adam in paradiso voluptatis, ut operaretur & custodiret illum.* II. *Status naturæ lapsæ ac reparatæ* dicitur is, in quo natura humana justitiam originis atque integritatem primævam a Proto-parente Adamo acceptam per lapsum in peccatum perdidit, variisque malis subiecta fuit, quamvis postmodum in hac rerum providentia ex infinita Dei bonitate per Christum reparata fuerit, quantum ad culpam, non vero quantum ad immu-

(i) *Genes. 2.*

immunitatem a rebellionē cupiditatum, aliisque vitæ hujus miseriis, & peccati pœnis temporariis adinet. Hoc autem peccatum originis est ipsum peccatum Adami, quatenus *moraliter* nostrum est, seu in omnes posteros, si sanctissimam Dei Matrem sine omni labe conceptam excipias, propagatum. Fuit enim voluntas hominum secundum communem SS. Patrum & Doctorum sententiam alligata ad voluntatem Adami, tanquam Capitis morales humani generis, in ordine ad observationem vel transgressionem legis de fructu arboris non comedendo per pactum a Deo constitutum, eo fere modo, quo Magistratus alligare solet voluntatem pupilli, non expectato ejus consensu, voluntati Tutoris: *ipsi autem sicut Adam transgressi sunt pactum* (k). Atque ita peccatum hoc Adami *moraliter* voluntarium nobis est factum. Et vero optabile erat humano generi pactum istud ante omnem eventum, quoniam Adam eximiis omnino donis naturæ & gratiæ, aliisque prædiis ad observandum præceptum adeo facile fuit instructissimus. Interea diversi generis pœnæ tanquam comites ac tristes appendices peccatum hoc sequebantur: ejusmodi erant, quod
anima

(k) *Qsee* 6.

anima gratia sanctum faciente, aliisque donis supernaturalibus spoliata, ac præcipuæ ipsius potentia, nempe intellectus, voluntas, memoria, & appetitus uterque, quem *concupiscibilem* & *irascibilem* dicunt, graviter vulneratæ fuerint: corpus vero morti, morbis, pesti, & doloribus aliisque miseriis subiectum. His additæ pœnæ aliæ, scilicet inimicitia Dei, servitus dæmonis, calamitates a cœli, intemperie, elementis, hominibus & feris provenientes. Demum secuta est pœna alterius vitæ pedissequa, seu beatitudinis æternæ ac hæreditatis cœlestis amissio. Hinc apud Theologos axioma illud originem duxit: naturam humanam peccato originis *spoliatam fuisse donis gratuitis*, & *vulneratam quoque in naturalibus bonis*; quamvis secundum communem Patrum opinionem saltem in viribus liberi arbitrii puræ naturæ debitis non sic facta debilior. Reparata vero fuit ingens hæc jactura universi generis humani, quantum ad animæ salutem & felicitatem sempiternam adtinet, per benignissimi Servatoris divini mortem & merita infiniti valoris ita, ut neque gentilibus, quibus absque culpa est incognita vera religio, quæ in sola Ecclesia Catholica reperitur, omnis spes salutis sit adempta,

84 Cap. III. Oeconomia

liquidem naturæ legem observent. Quippe facientibus quod est in se non deerit Deus, subministrando necessaria variaque subsidia, quibus ad salutem perveniant, dicente S. Augustino: *Salus religionis bujus, per quam solam salus vera, veraciterque promittitur, nulli unquam defuit, qui dignus fuit, & cui defuit, dignus non fuit* (1). III. *Statum puræ naturæ* vocant illum Theologi, in quo homo si constitutus fuisset sine originis peccato, omnes quidem facultates naturæ humanæ proprias possedisset, quin tamen ad finem seu beatitudinem supra naturam positam per ejusdem conditionis gratias obtinendam ordinaretur, ita ut observatis naturæ legibus beatitudinem obtinuisset non nisi mere naturalem, suæque conditioni convenientem, qua vero ipsa violatis legibus illis excidisset. Fuisse autem possibilem hunc statum, res confessa est & manifesta, si non Dei potentiae limites præscribere velimus. Cur enim non potuisset ille hominem creare absque gratiis supernaturalibus, aliisque donis gratuitis, scilicet quin esset immunis a rebellionem cupiditatum, seu concupiscentiæ ut adpellant Theologi, & a morte

(1) *De temp. Cbrist. Relig. item de predestinatione. c. 9.*

morte exemptus ? nihil fape quod repugnet, hac in re invenitur, immo ad perfectissimum dei in res creatas dominium pertinet, ut eas ad hunc vel illum finem pro lubentia sua ordinare queat. Quapropter non tenebatur hominem per gratiam adoptare in filium cum jure hæreditatis æternæ, neque a lege mortis ac rebellionis illius eximere, utpote quæ non sunt proprietates naturæ, sed dotes primævæ justitiæ. Hinc merito damnata fuit a tribus Pontificibus Baji Doctoris Lovaniensis doctrina, asserentis; *sublimationem hominis ad consortium Dei naturæ innocenti fuisse debitam ac naturalem: hominem non potuisse initio creari talem, qualis nunc nascitur: immortalitatem fuisse conditionem naturalem* &c. Illud equidem fateri oportet, non potuisse homini in hoc statu a Deo præfigi finem solummodo per tempus duraturum, seu felicitatem hujus vitæ ambitu conclusam: nulla enim fuisset inter hanc & animam ex natura sua spiritualem ac immortalem proportio. Quare finis ille præfixus ac beatitudo naturalis constitisset in cognitione dei per res creatas, seu mere *abstractiva* ut scholæ vocant (qualem habet anima in hac vita, quamdiu corpori immersa est) clara tamen & suo modo

perfecta, ex qua manasset amor Dei, ut Auctoris naturæ, itidem suo modo perfectus, sui securus, & qui animæ desiderium satiaffet. Ut autem hanc beatitatem consequi potuisset homo, de adjumentis ad eam necessariis illi a Deo provideri debuisset, nempe de illustrationibus intellectus & motibus voluntatis, quibus ad bonum tam universe quam speciatim dirigeretur; forsan etiam aliis quibusdam exterioribus auxiliis ad removendas ac superandas graviores tentationes aptis, sine quibus alias non fuisset ad ultimum suum finem rite comparatus. ex quo consequitur, hominem in hoc statu habere potuisse propositum absolutum & efficax observandi totam naturæ legem, etiam per longius vitæ tempus, etiam per omnem vitam, quum saltem sub conditione, id est, *faciende quod est in se*, ut Theologi loquuntur, debitum fuisset illi auxilium ad diuturniorem semper legis observantiam, qua posita pervenisset tandem ad vitæ terminum seu beatitudinem illam naturalem, tanquam in meritorum præmium debitam, licet simul fuisset Dei donum. Sicuti autem in statu naturæ puræ non defuisset homini libertas & peccandi occasio, ita & peccatum non abfuisset, cujus reme-

remedium, quoniam homo par non fuisset condigne satisfaciendo, potuisset esse gratuita Dei condonatio. Præmium vero, nempe beatitudo prius descripta, licet soli animæ impensum, virtuti ac meritis suffecisset. Nam ut corpus resurgeret, illiusque particeps esset, dei favor est naturæ statui nequitiam debitus, & extra naturæ ordinem positus. Quod autem ad propagationem humani generis, & civilis vitæ rationem adtinet, in hoc statu eodem modo res acta fuisset, quemadmodum in statu naturæ lapsæ. Nam in illo etiam homines sensim in peccatum prolapsi fuissent, atque iisdem ad vitam sustentandam, pacem publicam servandam, & felicitatem tam hujus quam alterius vitæ obtinendam subsidiis indiguissent; quumque iisdem naturæ legibus fuissent obstristi, ita & disciplina legum omnibus communi tam circa naturæ officia, quam circa humanam societatem opus habuissent.

XVII.

Jam vero Jus naturæ commune velut emporium est omnium nationum, ad quod cuncti adpellunt in hujus vitæ commercio & humanarum actionum negotiatione, sive Gentiles sint, sive Judæi, sive Christiani: est enim omnium animis in-

fitum, nec a quoquam absque culpa ignorari longiore saltem tempore, aut violari potest. Quapropter illius vis non pendet, quemadmodum in aliis juribus fit, a libera præcipientis voluntate, sed ex ipsa rei præceptæ vel prohibitæ natura oritur, quæ quia mutationi obnoxia haud est, sed eadem ubique, idcirco etiam ipsum jus naturæ apud omnes gentes eandem vim obtinet. Unde Aristoteles recte pronunciavit (m): *Jus naturæ esse illud, quod ubique eandem vim habet, & non quia videtur, vel non videtur.* In quem ipsum sensum loquitur Gratianus in Decreto (n): *est commune omnium nationum, eo quod ubique instinctu naturæ, non constitutione aliqua habetur.* Variis Jus hoc nominibus compellant Scriptores tum Veteres tum Recentiores. Gajus Jurisconsultus (o) vocat *Jus commune.* Cicero pro Milone *legem non scriptam, quam non didicimus, accepimus, legimus, verum ex natura ipsa arripuimus, hausimus, expressimus: ad quam non docti, sed facti, non instituti, sed imbuti sumus.* Seneca nuncupat *legem divinam.* Theologi vero satis communiter *legem æternam.* In eo autem finien-

do

(m) *Ethic. 7.* (n) *Can. 7. dist. 1.*(o) *L. omnes 9. ff. de J. & J.*

do ut plurimum dissident Auctores, quorum aliqui volunt Jus naturæ nihil aliud esse, quam lumen & dictamen rationis ab auctore naturæ nobis inditum, quo honestum discernimus ab inhonesto, suamque opinionem tuentur illis Apostoli verbis (p). *Gentes, ait, quæ legem (Mosaicam) non habet, naturaliter ea, quæ legis sunt, faciunt*, scilicet lumine ac ductu rationis pleraque opera legis perficiunt. Nam *ejusmodi legem, pergit, non habentes ipsi sibi sunt lex*, ostendendo nimirum *opus legum scriptum in cordibus suis, testimonium reddente ipsis conscientia ipsorum*. Contra alii Jus seu legem naturalem esse contendunt ordinationem rationis a Deo proficiscentem, & ab eodem per lumen rationis omnibus manifestatam, præcipientem ea, quæ rectæ rationi sunt consentanea, contraria prohibentem, & permittentem ea, quæ sunt indifferencia. Atque hanc sententiam suam stabiliunt D. Augustini auctoritate contra Faustum dicentis (q): *legem æternam esse divinam rationem, vel voluntatem, ordinem naturalem conservari jubentem, perturbari vetantem*. Si rem hanc in utramque partem recte perpendero velimus, fateri

(p) *Ad Rom. 2.*(q) *Lib. 22. c. 27.*

fateri oportet, naturam ipsam secundum se spectatam nullum jus statuere, legem ferre, aut obligare posse, sed hanc potestatem esse penes auctorem naturæ, utpote superiorem omni natura, quæ sua non est. Iste igitur & scit, utpote sapientissimus, quæ naturæ rationali, de qua heic sermo est, a se conditæ convenient, quæ disconvenient: & vult ac velle debet, utpote rectissimus, ut illa fiant, omitantur ista; atque hoc ipsum per lumen rationis manifestum facit. Quoniam vero, ut doctissime animadvertit Eximius Suarez (1), duplici modo considerari potest Jus seu lex naturalis, prout est in Deo, & in nobis; priore modo Jus naturæ in ea, quam dixi, ordinatione rationis a Deo proficiscente, posteriore vero in lumine rationis, quid honestum sit, quid inhonestum nobis dictante, consistit, qua ratione utrique parti satisfactum esse videri potest.

Huic autem juri naturæ sic constituto soli homines sunt subjecti, non vero bruta, ut quidam perperam existimant, Ulpianum sequentes, qui Jus naturæ finit esse illud, *quod natura omnia animalia docuit*. Ad quam opinionem tuendam quoque afferunt S. Scripturæ loca quædam,

(1) *Lib. 2. de LL. 6. c. 6. n. 13.*

dam, in quibus Deus rebus creatis etiam ratione carentibus, v. g. aquis & pluviis legem posuisse perhibetur (s), nec non animalium quorundam exempla ut canum, apum, avium, quæ actiones suas ita naturæ suæ conformare norunt, ac si quædam juris naturalis notitia iis inesset. Verum juri locus esse non potest, ubi deficit rationis usus, libertas, & facultas ad observationem aut poenam subeundam. Primum enim tum ad actionis præceptæ aut prohibitæ naturam & indolem, tum ad vim legis præcipientis aut prohibentis agnoscendam requiritur: alterum, quoniam frustra imperatur aut vetatur, quod fit aut omittitur necessitate cogente: tertium quia lex observationem inducit, & poenam prævaricantibus statuit. Jam vero quum hæc omnia in brutis deficiant, palam est, quod jus naturæ ad ea se non extendat. Quare Ulpiani finitio passim rejicitur, & quod S. Scriptura meminit de animalibus aliisque, ad metaphoricæ locutiones pertinet, quemadmodum si leoni fortitudo, formicis prudentia, vulpibus astutia &c. tribuitur. Non igitur brutis verum ac proprie dictum jus naturale, sed umbram quandam illius & analogiam inesse, solum.

(s) *Job. 28. item Prov. 8.*

lumque hominem ejusdem juris esse capacem dicendum est.

Porro Jus hoc naturæ latius patet, quam non pauci existimarunt, apud Suarium docentes, pertinere ad jus naturæ generalia solum principia per se nota, quæ circa bonitatem vel malitiam moralem actionum versantur, qualia sunt, quæ S. Scriptura his verbis explicat : *declina a malo & fac bonum : quod tibi non vis fieri, alteri ne feceris.* Sed nimis angustos hi fines ponunt juri naturæ, ejusque Auctori. Sunt & alia plura principia quæ *particularia* vocant, & præcepta moralia, quæ in generalibus principiis continentur, & ex iis manifesta ratione deducuntur, quæque idcirco præcipiuntur, quia honesta, non autem vice versa idcirco honesta sunt, quia præcipiuntur, aut inhonesta, quia prohibentur. Hæc ad triplicem classem reduci solent, nimirum ad triplex officium, quod Deo, quod nobis, quod proximo debemus. Ad primam classem pertinet : *Deum ut conditorem omnium, remuneratorem bonorum, ac malorum vindicem esse colendum, adorandum : nomen ejus invocandum : servanda vota Deo facta, abstinendum a blasphemia.* Ad secundam : *honeste vivere, non mentiri, abstinere ab ebrietate, illicito*

*cito concubitu &c. Ad tertiam: bonora-
re parentes, Magistratus & Superiores:
neminem lædere sive in animæ, sive in
corporis bonis, fama, facultatibus &
juribus: injuste ablata restituere, bona
fide stare pactis conventis, & similia, quæ
lumine rectæ rationis manifestante ac ad-
probante omnes laudant ut recte facta,
contraria vituperant ut perperam acta.
Neque ignota fuerunt hæc triplicis gene-
ris officia ipsis ethnicis Sapientibus, ma-
gisterio ductuque solius luminis natura-
lis ad ea palam commendanda impulsis.
Certe si sectas & scholas Stoicorum, quo-
rum facile principes fuerunt Zeno, Se-
neca & Epictetus, consulere velimus,
maxime Marcum Tullium, qui integrum
opus de officiis hominum posteritati re-
liquit, sequentia illorum dogmata & pla-
cita deprehendemus, scilicet: „ Deum
„ omnium effectorem esse, supremum
„ Dominum, ubique præsentem, etiam
„ ad vitæ commoda: providentissimum
„ esse: colendum super omnia & invo-
„ candum. „ *Ecce officium hominis erga
Deum.* „ Tranquillo animo ferenda ad-
„ versa a Deo immissa: honestatis cul-
„ tum, animi integritatem, constantiam
„ & æquitatis amorem esse præhabenda
„ cuiusque rerum jacturæ: etiam mor-
„ tem*

„ tem oppetendam esse ab homine , ne
 „ violet leges Dei. „ *Ecce ! officium*
hominis erga se ipsum. Hominem non
 „ sibi soli, sed in commune bonum esse
 „ natum : mutuam fovendam esse ami-
 „ citiam : ab injuria & fraudibus esse
 „ abstinendum : fidem datam servandam :
 „ omnibus benefaciendum. „ *Ecce ! of-*
ficiū hominis erga proximum.

Denique singulari quadam prærogativa gaudet Jus naturale, quæ nulli alteri juri concessa est, nimirum quod mutationi obnoxium non sit: sed immutabile semper persistat. Vel enim consideramus illud, uti est in Deo, vel ut est in homine? In homine lumen rationis est proprietas adeo arcte illi conjuncta, tamque intime inhærens, ut manente natura rationali nequeat auferri: in Deo autem jus naturæ non pendet ab hujus arbitrio, quoniam circa ea versatur, quæ in se, suæque natura vel honesta vel inhonesta sunt. Quam parum igitur rerum essentiæ mutari possunt, tam parum jus naturæ quocunque modo spectetur, mutationi subiacet. Equidem videntur aliqua, quæ ad legem naturalem pertinent, fuisse mutata: sic omnia jure naturæ communia sunt, uti loquitur Clemens Papa (t): *communis*
usus

(t) *Can. dilectissimis. 2. Caus. 21. q. 1.*

usus omnium, quæ sunt in hoc mundo, omnibus esse hominibus debuit. Nihilominus post lapsum generis humani bonorum divisio introducta fuit. Sic jure naturæ omnes nascuntur liberi, gentium tamen jure in bello justo capti in servitutem rediguntur. Sic rem suam auferre alicui contra jus naturæ pugnat, & tamen ipsius Dei jussu Israelitæ ante abitum suum spoliarunt Ægyptios: quin etiam rem alienam per viam legitimæ *præscriptionis* facimus nostram. Verum non est hæc proprie dicta mutatio Juris naturæ, sed ejusmodi res in his positæ circumstantiis, talique hypothesi affectæ, non sunt, nec unquam fuerunt præceptæ vel prohibitæ per legem naturæ. Quamvis enim, ut in exemplo res pateat, occidere hominem in thesi ac remotis circumstantiis sit contra jus naturæ, licitum tamen est, si accedat justa & necessaria sui defensio (*cum moderamine inculpatae tutelæ*, ut jura loquuntur) aut Magistratus auctoritas crimina vindicantis, aut publici justique belli ratio, vel potestas ab ipso Deo, qui vitæ ac necis dominus est, accepta. Quum enim Deus uti naturæ, ita & juris naturæ Conditor sapientissimus præviderit, quædam in his vel illis circumstantiis naturæ rationali convenire potius, quam discon-

disconvenire, aut saltem non opponi, nunquam ea intra Juris illius sphaeram comprehensa fuisse dicendum est. Fateri tamen oportet, esse quasdam actiones, quæ ita juri naturæ adversantur, ut in nullis quibuscunque circumstantiis cohonestari queant, quemadmodum odisse Deum, blasphemare, mentiri &c. hæ siquidem opponuntur perfectionibus Dei, qui infinite amabilis, infinite dignus omni laude, infinite verax est. Tantum ergo abest, ut eas approbare vel permittere unquam possit, ut potius necesse sit, ut talia semper prohibita esse velit, semper detestetur. Si enim ea, quæ naturæ rationali repugnant, jure naturæ vetita sunt, quanto magis illa, quæ naturæ ipsius Dei infinite perfectæ adversantur?

§. II.

Jus gentium.

XVIII.

A naturali ad jus gentium pergamus. Hoc non pauci confundunt cum priore, vel saltem ejus partem esse contendunt, scilicet ii, qui etiam in brutis jus naturæ agnoscunt, ita ut jus naturale omnibus animalibus, jus vero gentium solis hominibus

nibus esse commune doceant, freti auctoritate legis (u), ubi dicitur: *Jus gentium a naturali recedere per hoc, quod jus naturale omnibus animalibus, jus gentium vero solis hominibus inter se commune sit.* Verum si rem æqua lance perpendamus, plura sunt, in quibus hæc duo jura discrepant. Primo quidem jus naturale homini congenitum est ab ipso conditi generis humani exordio: jus gentium autem postea primum & temporis progressionem exigentibus id necessitatibus & commodis introductum fuit, nempe ad mutuum auxilium ferendum, ad societatem & communionem inter gentes, quæ multiplices sunt in orbe terrarum, conservandam, quum una ope alterius indigeat. Nam

non omnis fert omnia tellus.

Dein jure naturæ obligantur omnes homines, qui ratione utuntur, estque omnibus populis commune, nec nisi per errorem solum alicubi non observatur. At jus gentium non omnibus omnino hominibus aut populis commune est; sed fere omnibus, unde etiam citra errorem apud aliquos potest non observari; apud illos nimirum, qui nunquam in hanc vel
illam

(u) *L. i. §. fin. ff. de J. & J.*

BIBLIOTH. DOMEST. LIB. XI.

G

illam consuetudinem cum reliquis nationibus convenerunt. Demum ea, quæ juri naturali repugnant, in se & natura sua mala sunt, & prohibentur, quia mala: quæ vero juri gentium adversantur, duntaxat mala fiunt consensu gentium, non quidam verbis expresso, aut per editum promulgato, sed tacito, per illarum mores & usum insinuato. Adde, quod jus naturæ mutationi obnoxium haud sit, contra jus gentium mutari queat hominum conspiratione, e qua descendit; & sicut per gentes introductum est, ita per easdem rursus tolli possit. Quapropter jus gentium velut medium inter naturale ac humanum occupat locum, dum de utriusque natura aliquid participat; de naturali, quoniam e principiis rectæ rationis deducitur: de humano autem, quia libero inter homines consensu constituitur. Est igitur jus gentium, si bene finire illud velimus, Jus non scriptum, dictante recta ratione, communibus moribus gentium probe institutarum introductum in genus humanum. Per gentes autem probe institutas neutiquam intelliguntur, quæ procul ab humanæ vitæ societate in sylvis & solitudinibus habitant vel potius vagantur, absque lege, honestate, republica, sed

sed quæ sub politico quodam regimine vivunt, & cum aliis gentibus communionem ineunt, cujuscunque demum sint religionis, sive sint Ethnici, sive Mahumetani, sive Saraceni aut Christiani, sive hæretici seu schismatici. Ejusmodi regimina politica sunt varia in genere humano per orbem diffuso, quorum alia Monarchiæ formam præferunt, ubi unus dominatur, alia Aristocratix, ubi Optimates regunt; Democratix alia, ubi populus per se ipsum & per comitia communitem moderatur; alia demum quæ formam e memoratis mixtam induunt. Novimus autem, gentes sub horum aliquo politico regimine constitutas tum in Europa, Asia & Africa, tum modo etiam in America, quando in Rempublicam coaluerunt, inire ac fovere cœpisse inter se, maxime finitimæ cum finitimis (non raro cum remotioribus quoque) communicationem aliquam in commercis, in fœderibus sancendis, in legatis mittendis ac recipiendis, in gerendis bellis aliisque, quæ communiter ab ipsis observantur vi consuetudinis generalis, in qua jus gentium præcipue fundatur. Qua in re deprehendere licet quemdam naturæ instinctum, ab altiore providentia proficiscentem. In tan-

ta enim gentium varietate, quum diversissimæ sint linguis, regionibus, moribus, legibus, armis, vestitu, religione, institutione, modoque regendi, in tanta inquam varietate gentium, tantisque rerum vicissitudinibus universi mundi gubernatio in præsens perturbationis ac ruinæ periculum brevi tempore adduceretur, si non eæ in certas leges convenirent ad se invicem conservandas, ut dissensionibus, simultatibus, latrociniis, præliis & bellis modus poneretur, sternereturque via rupto pacis vinculo ad consensionem & concordiam redeundi, quod fit per commercia, per legatos, per sancita fœdera, & similia.

Duplici autem ratione jus gentium hucusque descriptum considerari potest: una quidem, quatenus gentium moribus introductum atque receptum est sub tacito quodam mutuoque pacto aliqua inter se observandi, sive quædam agendi, alia omittendi, quæ ad communem rem ac tranquillitatem spectant, e quo pacto descendit naturale quoddam debitum & hoc jus gentium proprie dictum est. Altera vero, quatenus gentes, regna, & respublicæ quædam inter se observare passim solent commodi atque utilitatis communis causa, absque tamen pacto aliquo,

aug

aut obligatione mutua; estque istud jus gentium improprie dictum. Ad prius pertinet inprimis jus legatorum, qui ab uno Principe vel Republica ad alium Principem vel Rempublicam mittuntur, ut plena & publica securitate fruantur: item jus belli, quod Principibus & Rebus publicis superiorem non agnoscentibus competit ad puniendam, vindicandam, aut reparandam injuriam sibi vel subditis suis illatam; ubi prius per feciales bellum indici oportet, nec arma, vel fontes veneno infici, aut hostis per sicarios clam submissos e medio tolli potest: rursus fœdera pacis & induciarum: servitus seu facultas liberos homines justo bello captos in servitutem redigendi: demum jus commercii sine fraudibus exercendi, ac sepulturæ, qua defuncto supremus honor habetur. Ad secundum vero, seu jus gentium improprie dictum referuntur, quæ ad Religionem seu Deum colendi modum per sacrificia, & institutionem certi hominum status ad illa offerenda spectant: porro usus panis, ædium constructio, munitio civitatum, divisio rerum, jus postliminii, ut finito bello quis ad possessiones suas redire possit: emptio, venditio & similia, quæ, quum nationes pleræque inter se his utantur ob

singulorum utilitatem, non ob communem felicitatem, licet inter gentes plerumque observentur, mutuum tamen civile inter ipsa communitatum membra debitum haud pariunt, neque sub publicum pactum cadunt. Hæc omnia disertis verbis & Jus Politicum & Jus Ecclesiasticum nos docent: istud (x) *Jus gentium* ait, est *sedium occupatio, ædificatio, munitio, bella, captivitates, servitutes, postliminia, fœdera, paces, induciæ, legatorum non violandorum religio, connubia inter alienigenas prohibita*. Illud vero (y) hoc *jure gentium* inquit, *introducenda bella, discretæ gentes, regna condita, dominia distincta, agris termini positi, adificia collocata, commercium, emptiones, venditiones, locationes, conductiones, obligationes instituta*. Tanta vero tamque fortis inest juri gentium vis obligandi, ut non tantum populos & subditos, sed ipsos etiam supremos Principes, qui jure civili non ligantur, obstringat. Hinc vel maxime illis curæ debet esse, ut jura ista facta testaque serventur, memores oportere se non unius gentis, sed totius humani generis rationem habere.

Super-

(x) *Can. 9. dist. 1.* (y) *Lib. 5. ff. de J. & J.*

Supereſt, ut Juri naturæ ac Gentium, quod paucis complexus ſum, ſcriptores ſubjungam, qui de utroque doctis lucubrationibus bene meriti ſunt. Atque inter hos jure numerandi veniunt inprimis inſigniores quidam Theologi, qui licet, plerique non peculiaribus libris ac velut ex inſtituto diſciplinam hanc jurisprudentiæ adornarint, omneſque difficultates exhauſerint, præclare tamen ac dilucide ejus fundamenta, principia, concluſiones, ac maximi ad morum doctrinam momenti veritates explanarunt, abſque eo, quod curioſarum ac inutilium quæſtionum indagine, ut hodie fieri a multis videmus, in ſcopulos & ſyrtes impeerint. Ejusmodi fuerunt D. Thomas in 1. 2. part. Summæ ſuæ Angelicæ . . . ejus interpres doctiſſimus Cajetanus Card. . . . Eximius Doctor Suarius S. J. qui integrum de legibus Tomum conſcripſit. . . . Dominicus Sotus O. P. decem libris de J. & J. in lucem editis clarus. . . Ludovicus Molina S. J. univerſam juris ſacri & civilis ſcientiam mira eruditione ac doctrinæ fama ſex Tomis complexus. . . . Leonardus Leſſius S. J. quatuor libris de J. & J. exaratis notiſſimus . . . Vaſquez, Sanchezius, Valentia, Haunoldus,

104 *Cap. III. Oeconomia Juris &c.*

Card. de Lugo , aliiq̃ue ex eadem Societate. . . , Franciscus Schmier O. S. B. Cl. Gletle, Franzius, de Wollern, egregii Juris Consulti Salisburgenses . . . Janus Vincentius Gravina in Archigymnasio Romano Juris Doctor qui insignem de ortu & progressu Juris , de Jure naturæ ac gentium , & XII. Tabulis , de legibus & senatusconsultis librum conscripsit. . . . Præclaram vero præ cæteris operam huic disciplinæ a gravissimis A catholicorum quorundam scriptorum erroribus , ac perversis morum doctrinis expurgandæ duobus voluminibus impenderant Ignatius Schwarzius S. J. & Anselmus Desingius O. S. B. uterque eruditione sua aliisque compluribus operibus in lucem datis clarissimi Viri. . . . A catholici inter scriptores de Jure naturæ ac Gentium miris laudibus extolunt Samuelem Pufendorffium , Joan. Barbeyracum , Thomam Hobbesium , Franciscum Budæum , Ludovicum Sekendorffium , Christianum Wolfium (de quibus suo loco in Critice Jurisprudentiæ loquemur) Hugonem Grotium , & Joannem Gottlieb Heineccium , qui duo postremi & doctrina & scribendi modestia reliquos antecelluerunt.

CAPUT



CAPUT IV. JUS DIVINUM.

§. I.

Jus Divinum Veteris Testamenti.

XIX.

Exposito pro instituti ratione breviter jure Naturæ ac Gentium ad Jus illud gradum faciamus, quod *Positivum* communi acceptione nuncupatur, scilicet quia ultra ea, quæ a jure Naturali ac Gentium præcipiuntur, prohibentur, aut permittuntur, libera Dei vel hominis voluntate aliquid ponit, unde etiam recte a Conano (z) *Jus positum* adpellatur. Divinum, de quo agere hoc in loco decrevi, auctoritate Dei constitutum, & tum in Veteri Testamento per Moysen ac Prophetas, tum in Novo per Christum in terris degentem, & per Apostolos ac Evangelistas fuit promulgatum. Erat autem Vetus Testamentum status ille, in quo Deus promissione facta pactum cum populo Israelitico iniit de bonis tum hujus
tum

(z) *Lib. I. Comment. c. 8.*

monias, justaque judicia, & universam legem? Equidem cæteri gentiles populi adstricti erant ad servanda præcepta naturalia, quum ad hæc omnes ratione præditos ipsum jus naturæ in cordibus scriptum obliget, non tamen vi legis Mosaicæ, quoniam lex non obligat, nisi eos quibus imponitur & promulgatur. Non minus tamen plures Gentilium a lege *Circumcisionis* liberi salutem æternam consecuti sunt, quia Deum verum coluere, ac juris naturæ præcepta observabant. Hos inter eminebat S. Melchisedech, qui Rex fuisse dicitur in Salem oppido, quod dein excrevit in civitatem Jerusalem: quin & Sacerdotem fuisse constat, dum Abraham in reditu suo occurrens *oblato pane & vino* (e) magna illum benevolentia excepit. Illi vero Gentiles, qui populo Israelitico fuerunt adscripti, quorum sat magnus erat numerus, uti legitur in libro Esther (f), reliquarum quoque legum jugo erant subiecti. Porro Mosaica lege instruebatur populus tum in iis, quæ ad naturalem morum honestatem spectabant, tum vero maxime in illis, quæ pertinebant ad Dei cultum, ut hac ratione Beatitudinem æternam ac supernaturalem sibi compararet,

(e) *Genes. 14.*(f) *Cap. 8.*

raret, & quidem per fidem in Christum venturum obtinendam. Non enim tunc lex illa justos faciebat homines, id quod ceremoniæ illæ duntaxat significarunt, sed ipsa fides in Christum, qui e cœlo in hunc mundum descensurus erat, non ut solveret, sed impleret legem; atque hæc fides sive ante sive post legem Mosaicam, *explicita* vel saltem *implicita*, secundum communissimam Theologorum doctrinam fuerat ad salutem omnino necessaria.

Jam vero triplicis generis fuerunt præcepta veteris legis, nempe Moralia, Ceremonialia, & Judicialia, quæ conceptis verbis prodit liber Deuteronomii (g): *Tu vero hic sta mecum, & loquar tibi omnia mandata mea, ceremonias atque judicia. & Hæc sint præcepta, ceremoniæ, atque judicia.* Moralia præcepta sunt, quæ ad mores dirigendos, & secundum rectæ rationis normam conformandos spectant, uti præcepta Decalogi, quæ in libro Exodi (h) ordine suo referuntur. Provido autem Dei consilio hæc quæ juris naturæ præcepta sunt, nec ignorari a populo poterant, in lege scripta velut noviter tradita & explicata fuerunt.

(g) Deut. c. 5. & 6.
4 versu 3.

(h) Exod. c. 20.

runt. Quum enim rationis lumen, licet clarissimum, multis tamen per peccatum tenebris circa moralia & naturalia præcepta fuerit obscuratum, ita ut in rationis tribunali de actionum humanarum bonitate atque malitia sinistrum sæpe ac lubricum judicium ferretur, necessum erat per auctoritatem legis divinæ & præcepta *positiva* imbecillitati intellectus humani ad ea rite agnoscenda, & voluntati ad implenda illa subvenire. Atque ad hæc moralia non tantum præcepta naturalia, sed etiam supernaturalia, quæ in lege veteri circa fidem, spem & charitatem versabantur, ut alia omnia revocantur, dicente Christo apud Evangelistam Matthæum (i): *Diliges Dominum Deum tuum ex toto corde tuo &c. Diliges proximum tuum sicut te ipsum, in his duobus universa lex pendet, & Prophetæ.*

Præcepta ceremonialia in quatuor classes distribui possunt. Alia enim ad sacrificia & sacramenta, alia ad sacra seu instrumenta, & observantias pertinebant. Prima classis continebat sacrificia, uti *holocaustum, hostiam pro peccato, & hostiam pacificam*. Altera duplicis generis sacramenta, unum quod ad universum populum, quemadmodum *circumcisio, esus*
agni

(i) Cap. 22.

agni paschalis, purificationes, expiationes, a peccatis: aliud quod ad Sacerdotes adtinebat, sicuti *rasio capillorum, ablutio pedum, efus panis propositionum*. Hæc omnia numerant quidam inter Sacramenta veteris Legis, quæ Christum venturum ac legem gratiæ significarunt. Tertiam classem constituebant sacra seu instrumenta peragendis Sacris destinata: cuiusmodi fuerunt *tabernaculum, arca fæderis, propitiatorium, candelabrum, mensa, duplex altare, vestes sacerdotales* &c. item vasa sacra diversissimi generis: *thuribula, lebetes, mortariola, bydria, acetabula, phiala, cyathi* &c. Quarta demum observantias legales complectebatur, inter quas erant *abstinentia a sanguine, adipe, discretio ciborum, jejunia Nazaræorum, solemnitates, certarum vestium usus, vota* &c. Hæc omnia more suo docte nitideque pluribus explicat D. Thomas (k).

Præcepta demum judicialia ad populi regimen, illumque in officio continendum lata fuerunt; & quidem quadruplicis ordinis, ut rursus exponit Doctor Angelicus (l): „Dantur autem, ait, quædam præcepta de institutione Principum,

(k) I. 2. q. 101. & seqq.
 & 105. 4. 4.

(l) I. 2. q. 104.

„ pum, & officia eorum, & de reveren-
„ tia eis exhibenda: & hæc est una pars
„ judicialium præceptorum. Dantur etiam
„ quædam præcepta pertinentia ad con-
„ cives ad invicem, puta, circa emptio-
„ nes & venditiones, & judicia & pœ-
„ nas: & hæc est secunda pars judicia-
„ lium præceptorum. Dantur etiam quæ-
„ dam præcepta pertinentia ad extraneos,
„ puta de bellis contra hostes, & de
„ susceptione peregrinorum, & advena-
„ rum: & hæc est tertia pars judicia-
„ lium præceptorum. Dantur etiam in
„ lege quædam præcepta pertinentia ad
„ domesticam conversationem: sicut de
„ servis, & uxoribus, & filiis; & hæc est
„ quarta pars judicialium præceptorum. „
Sic optime lex Mosaica in populo electo,
e quo tum temporis vera Dei Ecclesia
componebatur, fere per bis mille annos
viguit, usque dum a Christo in terras
adveniente, ut novum sibi suoque popu-
lo regnum, novamque gratiæ legem pa-
raret, Vetus Testamentum fuerit abro-
gatum, substituto Novo. Ceremonialia
quidem præcepta fuere exauctorata, quia
*translato sacerdotio necesse est, ut & le-
gis translatio fiat*, inquit Apostolus (m):
erantque solum figura & umbra, quam
ex-

(m) *Ad Hebr. 7.*

exortæ veritatis luci cedere oportebat. Dein judicialia; nam Christus *legem mandatorum evacuans* rempublicam Judaicam pessumdedit: quum populus iste post Christi adventum desierit esse populus peculiaris Dei, adeoque & leges sublatae fuerunt, quæ ad politicum ejus regimen pertinebant, cujusmodi erant præcepta judicialia. Verosimilius quoque videtur, Moralia prout a Mose tradita promulgataque sunt, & ex promulgatione hac vim obtinebant, idem abrogationis fatum subiisse, uti præclare docet Suarius (n), tum quia S. Scriptura loquens de lege Mosaica passim indicat totam legem veterem per Evangelium fuisse abrogatam, tum quia lex omnis a Mose tradita promulgataque populo Israelitico, constituta nova lege perdidit vim obligandi, quam promulgatio illa post se traxit. At vero quum præcepta denuo a Christo lata, & accuratius atque perfectius observanda in lege gratiæ proposita sint (o), patet, quod nunc quoque omnes non solum vi legis naturalis, verum etiam confirmationis a Christo factæ iis obstringantur.

§. II.

(n) L. 9. c. 11. de Leg. (o) Matth. 5.

§. II.

Jus divinum novi Testamenti.

XX.

Interea Veteri divino juri sic exaucto-
 to, ut vidimus, successit Novum,
 quod Christus Dominus, Deus simul & Ho-
 mo, velut solemni Testamento relictum
 condidit, & tum per se ipsum, tum per
 Apostolos, promulgavit. Variis id no-
 minibus in S. Scriptura compellatur, nunc
lex fidei, lex spiritus vitæ, lex gratiæ,
 nunc *gratiæ veritas, lex amoris, lex li-*
bertatis; demum *Lex Nova*, vel quia
 hominem per gratiam renovat, vel quia
 lex hæc gratiæ ultima a Deo data est,
 ut priorem antiquaret: *Mandatum novum*
do vobis (p). Verum ipso in limine no-
 vi testamenti invenire est malefanos ve-
 ræ fidei hostes, qui contra id insurrexe-
 runt, negantes Christi legem veram esse
 legem, nec ipsum fuisse verum Legisla-
 torem. Ita Lutherus (q): *Nullo clamat*
opere, nulla lege homini Christiano opus
est, cum per fidem sit liber ab omni lege.
 Ita

(p) Joan. 13.

(q) Lib. de Libert. Chri-
 stian.

Ita Calvinus (r) : *O miserabilem blasphemiam justitiam, o perniciosum errorem prædicantium Christum novum Legislatorem! quasi veterem legem abrogaverit, ut novam Christianis omnibus legem imponeret.* Atque hæc perversa dogmata sua stabilire ausi sunt male adductis quibusdam S. Scripturæ locis, & in pejorem sensum detortis, nempe *Deum misisse filium suum factum sub lege, ut eos, qui sub lege erant, redimeret* (s). *Iustus non est lex posita* (t). *Si Spiritu ducimini, non eritis sub lege* (u). Neque nostris temporibus desunt, qui Patriarcharum suorum spiritu pleni in suis de Jure naturæ libris pestifera ejusmodi dogmata in vulgus spargunt, quemadmodum Thomas Hobbesius, qui (x) asserere non dubitat „ Judæos legibus Mo-

„ saicis, gentes alias civitatum suarum
 „ legibus, universum vero genus huma-
 „ num naturalibus præceptis teneri; Evan-
 „ gelium vero solum esse de consilio „.

Sed quo principia hæc falsa tendant, divinatione non egemus. Nimirum fide sola homines justos fieri contendunt: opera bona duntaxat pignora & argumenta acceptæ gratiæ justificantis esse volunt :
 legem.

(r) In comment. ad epist. ad Gal. 4. (s) ad Gal. 4. (t) I. Tim. I. (u) ad Gal. 5.
 (x) in suo Leviathan. c. 42.

legem Christi rejiciunt, quia cupiditates coercet, castimoniam præscribit, virginitatem laudat, usuram verat, Petro & Successoribus regimen Ecclesiæ adjudicat &c. Verum quod regnum, quænam respublica unquam absque lege fuit? & Christianam rempublicam sine lege, Christi regnum absque mandato esse arbitremur? an non regni ac reipublicæ hujus subditi homines sunt? qui ut in officio suo contineantur, & Regi sub Christo subjiciantur, legum freno opus habent? Sed audiamus S. Scripturam, ad quam toties ac semper provocant; quoties pro Domo sua perorant: certe Isaias clamat (y): *Deus judex noster est, Dominus Legifer noster, Dominus Rex noster*; ubi loquitur de Deo homine, seu Messia, præmittens hæc verba: *Domine miserere nostri, te enim exspectavimus*. Item (z) *de Sion exhibit lex, & verbum Domini de Hierusalem*. Christus ipse clamat (a): *Mandata mea servate: Si præcepta mea servaveritis, manebitis in dilectione mea*. Clamat Paullus (b): *Cum sine lege Dei non essem, sed in lege essem Christi*. Sed clamant surdis! Ceterum multis lex nova

(y) Cap. 33. (z) cap. lxi. (a) Joan. 14. & 15. (b) ad Corinth. 9.

nova prærogativis præ Veteri gaudet. Prima est quod lex nova ad finem usque mundi sit duratura, nec abrogationi futura obnoxia, donec cesset Ecclesia in terris militans, ac Electorum numerus compleatur. *Non præteribit generatio hæc, donec omnia fiant* (c). Secunda, quod lex nova in gradu magis eminente possideat spiritum gratiæ, per quam ipsa impletur, tum ob rationem Legislatoris Christi, qui gratiæ ipsius fons est & auctor, tum ob rationem legis, quæ longe sublimiori doctrina intellectum, & majori sanctitate mentem imbuunt. Quare in nova lege non accipimus *Spiritum servitutis in timore, sed spiritum adoptionis filiorum Dei*, ut ait Apostolus (d). Tertia est, quod lex vetus uni solum populo, ista toti mundo data fuerit. *Euntes in universum mundum prædicate Evangelium omni creaturæ* (e). Quarta demum, quia lex vetus erat figura solum, & velut umbra ad solem seu novam legem, gravium & multiplicium præceptorum oneribus plena, dum nova *Iugum suave & onus leve est*.

Porro præcepta Juris Divini novi partim moralia sunt, partim ceremonialia: ad priora pertinent, quæ sunt de dile-

(c) *Matth. 24.* & (d) *Rom. 8.* (e) *Marci 16.*

Glione Dei & Proximi, etiam inimicorum: item quæ sunt de fide, spe, & charitate. Nam etiam hæc suo modo morali-
bus accenseri merentur: ad posteriora, quæ versantur tum circa ritus sacrificii & sacramentorum exteriores, tum circa eos, qui ad horum substantiam requiruntur. Equidem in veteri testamento, ut vidi-
mus, quatuor erant præceptorum ceremonialium genera, scilicet, quæ circa sacrificia, sacramenta, sacra, & observan-
tias lata fuerunt: in novo autem circa duo posteriora nullum a Christo datum fuisse præceptum reperimus, sed potesta-
tem instituendi ea, & instituta præci-
piendi Ecclesiæ prudenti arbitrio commi-
sit. Verum negari haud potest, quod quantum ad priora duo adinet, divina dentur præcepta etiam in nova lege. Quippe Sacrificia & Sacramenta ad sub-
stantiam divini cultus pertinent; sacrificium quidem, quia velut essentiam cul-
tus divini exterioris & publici continet: Sacramenta vero, quia ad cultores Dei sanctos faciendos ordinantur. Non au-
tem conveniens erat, horum institutio-
nem humano relinqui arbitrio, quum firma & perpetua esse decreverit Deus, ita ut Ecclesia Christi ab aliis sectis vel con-
gregationibus his quasi characteribus di-
stingeretur. *H. 3* *fin.*

stingueretur, uti notat D. Augustinus (f): *In nullum inquiring nomen Religionis coagulari homines possunt, nisi aliquorum signorum vel sacramentorum consortio colligantur.* Quapropter oportebat tum ad legis istius perfectionem, tum ad unitatis vinculum conservandum dari præcepta divina, quæ substantiam illorum determinarent: reliqua vero, quæ accidentia sunt, quum in iis unitas non consistat, Ecclesiæ determinanda relinqui poterant. Neque præcepta ista aut suavitati & libertati, aut perfectioni novæ legis quidquam officiant: non libertati & suavitati, dicente rursus Augustino (g): *Levi iugo suo nos subdidit Christus & sarcinæ levi: unde sacramentis numero paucissimis, observatione facillimis, significatione præstantissimis societatem novi populi colligavit.* Non perfectioni, quia secum velut animam legis adferunt spiritum gratiæ & charitatis, qui eodem Augustino teste (h) *facit præcepti sarcinam non prementem onere ponderum, verum etiam sublevantem vice pennarum.* Judicialia præcepta in hac lege nulla reperiuntur a Christo constituta. Neque mirum: non enim ut regnum aut rempublicam politi-

cam

(f) *Lib. 19. contra Faustum c. 11.* (g) *Epist. 118. c. 1.* (h) *Lib. de perfect. justit. c. 5.*

cam in hoc mundo erigeret aut stabiliret, Servator advenit; (unde Pilato respondit: *Regnum meum non est de hoc mundo* (i)), & quum postularet quidam ab eo: *Dic fratri meo, ut dividat mecum hæreditatem, reposuit: Homo quis me constituit Judicem inter vos* (k)?) sed ut Ecclesiam suam, quatenus Congregatio est fidelium, ad finem supra terrena hæc positum per adjumenta ejusdem rationis ordinaret, ad quem consequendum legibus judicialibus absolute opus haud erat. Et quamvis ad politicum regimen Ecclesiasticum aliquæ leges judiciales sint necessariae, satis providit Christus Ecclesiæ, dum potestatem ferendi leges ejusmodi pro necessitate hujus regiminis Vicariis suis commisit, quæ proin non sub Divino sed Canonico Jure continentur. Quod autem ad præcepta ab Apostolis nobis tradita adtinet, ea duntaxat, quæ velut ex ore Christi excerpta promulgarunt, pro Divinis habenda sunt; unde Gentium Apostolus: *Ego ait accepi a Domino, quod & tradidi vobis. Item: præcipio non ego, sed Dominus* (l). Illa vero, quæ accepta a Christo potestate tanquam Pastores

(i) *Joan.* 18. (k) *Luc.* 12. (l) *1. ad Corinth.* 11. & 7.

stores & Rectores Ecclesiæ decreta reliquerunt, qualia sunt Canones Apostolorum, præceptum de observanda die Dominica, de jejuniis quadraginta dierum &c. ad jus humanum Ecclesiasticum spectant.

Tantam vero vim obtinent præcepta Juris divini, seu legis novæ, sive a Christo per se ipsum, sive per Apostolos ipsius nomine tradita, ut a nullo hominum mutari queant, nec *dispensationi* ut vocant Jurisperiti, in iis locus sit. Quamvis enim Deus, utpote in lege sua, *dispensare* pro arbitrio suo etiam sine causa possit, quum sit summus Dominus & Legislator, ejusque voluntas sit suprema regula bonitatis, non tamen potestatem hanc, sine qua inferior in lege superioris *dispensare* nequit, ulli hominum, etiam Pontifici, concessisse communior ac verior Theologorum sententia docet. Equidem Christus Petro dixit: *Quodcunque ligaveris super terram, erit ligatum & in cælis, & quodcunque solveris super terram, erit solutum & in cælis* (m). Verum nimis late patent hæc verba, nec illis indulgisse Christus Petro & successoribus est censendus facultatem ejusmodi, per quam solvi queat Jus divinum, ejusque

(m) *Matth. 16.*

que præcepta, quæ fundamenta sunt Ecclesiæ, labefactari aut variari possint, ita ut decursu temporis vix Ecclesiæ unitas atque stabilitas amplius agnosceretur. Nihilominus non pauci Theologorum æque ac Jurisperitorum summo Pontifici potestatem adstruunt interpretandi ac declarandi: hæc vel illa, in his vel illis circumstantiis sub jure divino non comprehendendi; atque ita in votis, juramentis &c. dispensare dicitur Pontifex, quamvis minus proprio loquendi modo. Quo tempore autem obligare cœperit abrogata veteri lex nova, satis controversa res est, abeuntibus in diversas partes Doctoribus: quidam contendunt, jam ante Christi mortem cessasse Veterem, suamque vim exeruisse Novam, in iis saltem, quæ jam tunc Christus instituerat, quemadmodum baptismum ad salutem esse necessarium jam declaravit his verbis: *Nisi quis renatus fuerit ex aqua & Spiritu Sancto, non potest introire in regnum Dei* (n). Verum opinio, hæc non videtur esse verosimilis. Nullum enim præceptum hujus legis vivente adhuc Christo publice prædicatum fuit tanquam ad salutem necessarium, multo minus confirmatum; quamvis aliqua fuerint a Servatore

(n) Joan. 3.

H 5

vatore privatim proposita : præterquam quod idem, dum viveret, in multis legi Mosaicæ palam se ipsum ac sponte sua subjecerit. Quare melius alii autumant, exspirasse vetus Testamentum cum ipso novi Conditor Deo-homine animam in cruce agente, clamanteque *consummatum est*, quando scilicet velum Templi scissum, translatum sacerdotium, & Testamentum novum confirmatum est, quum & alia testamenta morte confirmata quamprimum obligandi vim exercere soleant, uti argumentatur Apostolus (o): *Ubi enim testamentum est, mors necesse est intercedat testatoris. Testamentum enim in mortuis confirmatum est: alioquin nondum vallet, dum vivit, qui testatus est.* Optime omnium sentire videntur, qui docent legem novam ante Pentecostes diem obligare haud cæpisse: tunc enim velut e privata in publicam legem promulgationis ope transit. Hinc Christus .e terris discessurus Apostolis præcepit: *Euntes docete omnes gentes & prædicate Evangelium*, quod mandatum illi non poterant exequi, nisi postquam Spiritum sanctum ex alto submissum recepissent. Nam præcedente Pentecosten tempore jubebantur *sedere in civitate, donec induerentur virtute*

(o) *Ad Hebr. 9.*

tute ex alto, nimirum dotibus illis, quas tam ardua publice prædicandæ Legis Evangelicæ provincia requirebat. Neque etiam Christus institutionem Ecclesiæ suæ ante suum in cœlos ascensum complevit, quum paullo ante, ut patet e D. Joannis Evangelio (p) Sacramentum pœnitentiæ instituerit, ac potestatem sacerdotibus ad peccata remittenda dederit, quin & Apostolos ad Episcoporum, ac Petrum, in quo fundenda erat Ecclesia, ad summi Pontificis munus evexerit. Non autem verosimile videtur esse, quod Christus Dominus legem suam ut obligantem tulerit prius, quam esset Ecclesia constituta, pro qua illam legem ferebat. Itaque ipsa die Pentecostes in principe civitate Solymæa, quum in ea tam diversarum gentium homines divina ordinante Providentia congregati fuerunt (Parthi, Medi, Ælamitæ, & qui Mesopotomiam, Judæam, Cappadociam, Pontum, Asiam, Phrygiam, Pamphyliam, Ægyptum & partes Lybiæ habitabant, Judæi, Proselyti, Cretes & Arabes) ab Apostolis Spiritu sancto plenis solemni ritu publico, ita ut unusquisque nationum illarum lingua sua loquentes audiverit, lex nova promulgata fuit, ac obligare cœpit. Hæc de

(p) *Cap. 20. & 21.*

de jure divino tum veteris, tum novi testamenti, quod partim Theologi D. Thomas, Suarius, Dominicus Sotus, Molina, Lessius &c. doctissimis disputationibus, partim S. Scripturæ Interpretes Alphonsus Salmeron, qui undecim tomis in Evangelia, in reliquum S. Scripturam quinque commentatus est, Joannes Maldonatus, Alphonsus Tostatus Abulensis Episcopus, Cornelius a Lapide, Augustinus Calmet, aliique complures eruditissimis commentariis illustrarunt.



C A P U T V.

JUS HUMANUM ECCLESIASTICUM.

XXI.

Proœmium.

Emenso Juris naturæ, gentium, ac divini stadio gradum faciamus ad Jus humanum, seu quod homines accepta a Deo potestate condiderunt ac promulgarunt, cujus ea est natura, ut omnem obligandi vim obtineat a libera voluntate hominis, publica auctoritate aliquid præcipientis vel prohibentis. Jus
ris

ris hujus fundamentum est ipsa humana societas. Hæc autem triplex est: omnium prima conjugalis, quæ marem inter & foeminam intercedit, ad humani generis propagationem necessaria: altera paterna, seu filiorum cum parentibus, & parentum cum filiis: tertia herilis, seu servitutis, famulatus, & domini; quum homines vitam agere absque aliorum ministerio & auxilio nequeant. Jam vero e tribus his primis societatibus coalescit integra communitas, intra limites tamen domesticos unius cujusdam *familie*, qualis œconomico regimine dirigitur. Quoniam vero hominum aucto numero augeri quoque familias ac in plures dividi necesse est, istæ vero sibi solis non sufficiant sine artium, opificiorum, & agriculturæ adjumento, neque etiam si separatæ degerent, diu pax conservari, ac injuriæ propelli queant, oritur alia grandior communitas, quam *civitatem* adpellant, quæque ex pluribus familiis componitur. Quod si quemadmodum ad vitæ commoda atque præsidia fieri solet, plures quoque civitates in unam societatem coeant, demum maxima confurgit communitas, puta *Respublica*, *Principatus*, *Regnum*, *Imperium*. Paucis rem totam M. Tullius

lius (q) complectitur : „Nam cum hoc
 „ sit, inquit, natura commune animan-
 „ tium, ut habeant libidinem procrean-
 „ di, prima societas in ipso conjugio
 „ est : proxima in liberis : deinde una
 „ domus, communia omnia. Id autem
 „ est principium urbis, & quasi semina-
 „ rium reipublicæ. Sequuntur Fratrum
 „ conjunctiones ; post consobrinorum,
 „ sobrinorumque, qui cum una domo
 „ jam capi non possint, in alias domos
 „ tanquam in colonias abeunt. Sequun-
 „ tur connubia & affinitates, ex quibus
 „ etiam plures propinqui. Quæ propo-
 „ gatio & soboles origo est rerum pu-
 „ blicarum. Magnum enim est eadem
 „ habere monumenta Majorum, iisdem
 „ uti sacris, sepulchra habere commu-
 „ nia. „ Palam igitur est, causam effi-
 „ cientem proximam civitatis ac reipubli-
 „ cæ haud aliam esse, quam tacitum ho-
 „ minum consensum, quem recta ratio di-
 „ ctat, & ad coeundum in societates ac
 „ communitates ejusmodi impellit, ob in-
 „ numerata quæ secum adferunt, vitæ com-
 „ moda. Est enim reperire tres hominum
 „ classes, quæ in civili societate præcipua
 „ consideratione dignæ sunt : Mercatores,
 „ Milites, Judices seu Patres conscriptos.

Primi

(q) *Lib. i. Offic. c. 17.*

Primi ea in civitatem inferunt, quæ vitæ sustentandæ sunt vel necessaria vel jucunda. Secundi arcent hostes, prædones, omnemque vim & injuriam repellunt, ultimi denique saluberrimis legibus & consiliis magna cum providentia & justitia rei communi prospiciunt. Jam vero constitutis semel hujusmodi communitatibus seu civitatibus, rebus publicis, & regnis consequitur humanarum legum & supremarum potestatum necessitas; illarum quidem, ut ipsa communitas in officio contineatur; istarum vero, ut legum observantiam & regiminis formam factam tectamque conservent. Sicut enim rectæ rationi nihil magis consentaneum est, quam societas, ita societati nihil magis quam regimen & leges, quibus bonum commune promoveatur. Egregie rem omnem, de qua hucusque dixi, explicat Doctor Angelicus (r) his verbis: „Et siquidem ho-
„ mini conveniret singulariter vivere,
„ sicut multis animalium, nullo alio di-
„ rigente indigeret ad finem: sed ipse
„ sibi unusquisque esset Rex sub Deo
„ summo Rege, in quantum per lumen
„ rationis divinitus datum sibi in suis
„ actibus se ipsum dirigeret. Naturale
„ autem

(r) *Lib. I. de regim. Princip. cap. I.*

„ autem est homini, ut sit animal so-
„ ciale & politicum, in multitudine vi-
„ vens, magis etiam quam alia anima-
„ lia: quod quidem naturalis necessitas
„ declarat. Aliis enim animalibus natura
„ præparavit cibum, tegumenta pilorum,
„ defensionem ut dentes, cornua, un-
„ gues, vel saltem velocitatem ad fu-
„ gam. Homo autem institutus est nul-
„ lo horum sibi a natura præparato: sed
„ loco omnium data est ei ratio, per
„ quam sibi hæc omnia officio manuum
„ posset præparare: ad quæ omnia præ-
„ paranda unus homo non sufficit: nam
„ unus homo per se sufficienter vitam
„ transigere non posset. Est igitur ho-
„ mini naturale, quod in societate mul-
„ torum vivat . . . si ergo naturale est
„ homini, quod in societate multorum
„ vivat, necesse est, in hominibus esse,
„ per quod multitudo regatur. Multis
„ enim existentibus hominibus, & uno-
„ quoque id quod sibi est proprium pro-
„ vidente, multitudo in diversa disper-
„ geretur, nisi etiam esset aliquis de eo,
„ quod ad bonum commune multitudi-
„ nis pertinet, curam habens: sicut &
„ corpus hominis, & cujuslibet anima-
„ lis diffunderet, nisi esset aliqua vis re-
„ gitiva communis in corpore, quæ ad
„ bonum

„ bonum commune omnium membro-
„ rum intenderet. Quod considerans
„ Salomon dicit: *ubi non est gubernator*
„ *corrueſt populus.*„ Hæc autem pote-
ſtas gubernans forma eſt civitatum, eſt-
que poteſtas ſumma, quæ Majeſtas voca-
tur, quæque nullum alium ſe ſuperiorem
agnoscendo civium actiones dirigit ad
communem & publicam felicitatem. Non
tamen propterea adeo late patens nul-
liſque conſtricta limitibus eſt, ut non illi,
in quibus reſidet, ſeu Optimates ſeu
Principes ſeu Reges ſint, legum ſuarum
vi dirigenti ſubjaceant, quantumvis a co-
gente aut vindicante ſint immunes. Ori-
ginem ſuam hæc ducit haud ab alio,
quam a Deo ipſo dicente: *Per me Reges*
regnant, & legum conditores juſta decer-
nunt (s). Et ſane quemadmodum infe-
riores reipublicæ Principes a ſumma Ma-
jeſtate terrena, ita hæc a ſupremo Re-
ge ac Dominantium Domino pendeat ne-
ceſſum eſt. An vero in Reges ac Prin-
cipes nullo interveniente ſumma hæc po-
teſtas fluat, ita ut non a republica, ſed
a ſolo Deo ea conferatur, tam contro-
verſa quam ſalebris plena res eſt, una
quidem ex parte, ne Principum regi-
men

(s) *Prov. 8.*

men in *despotismum* ut vocant, aut tyrannidem degeneret, ex altera vero ne populus semper varius & in seditiones pronus potestatem & jus quoddam extra ordinem super ipsum Caput suum ac Rectorem sibi arroget. Dixisse sufficiat, summam potestatem, quanta quanta est, a Deo in Reges ac Principes, superiori humano non subiectos, proficisci, ita ut populus semper meminerit verborum Paulli (t). *Qui resistit potestati, Dei ordinationi resistit.* Ac D. Petri: *Subiecti estote omni creaturae propter Deum, sive Regi quasi praecellentem, sive Ducibus tanquam ab eo missis ad vindictam malefactorum, laudem vero bonorum . . . sicut servi Dei . . . Deum timeate, Regem honorificate* (u). Principes vero memores sint verborum Christi, quibus Pilato dicenti: *nescis, quia potestatem habeo crucifigere te, & dimittere te?* respondit: *non haberes potestatem adversus me ullam, nisi tibi datum esset desuper* (x). Profecto jam olim D. Chrysostomus quam vere tam circumspecte hoc in negotio locutus est, dum in verba illa Paulli: *Non est potestas, nisi a Deo.* sic commentatur: „Quid dicis? „ergo

(t) *Ad Rom.* 13.(u) *1. Petr.* 2.(x) *Joan.* 19.

„ ergo omnis Princeps a Deo constitu-
 „ tus est? Istud non dico. Non enim de
 „ quovis Principe mihi sermo est, sed
 „ de re ipsa, id est, de ipsa potestate.
 „ Quod enim Principatus sint, quod-
 „ que non simpliciter & temere cuncta
 „ ferantur, divinæ sapientiæ opus esse
 „ dico. Propterea non dicit (Aposto-
 „ lus) non enim Princeps est, nisi a
 „ Deo, sed de re ipsa disserit dicens:
 „ non est potestas nisi a Deo (y).

§. I.

Jus Canonicum.

XXII.

Jus humanum communi Jurisperitorum
 bene moratorum calculo in Ecclesia-
 sticum seu Canonicum, & in Politicum
 seu Civile dividitur. Nec abs re Jus
 Ecclesiasticum Politico præponitur tum
 ob nobilitatem finis, dum non ad feli-
 citatem hujus vitæ transeuntem, sed ad
 animarum salutem sempiternam legibus
 suis atque præceptis tendit, quemadmo-
 dum Gratianus in Decreto ex ore D. Hie-
 ronymi, loquitur (z): *Duo sunt gene-
 ra*

(y) *Homil. 23. in epist. ad Rom.* (z) *C. duo
 sunt. 7. caus. 12. q. 1.*

ra Christianorum. Est autem unum genus, quod mancipatum divino officio, & deditum contemplationi & orationi, ab omni strepitu temporalium cessare convenit, ut sunt Clerici . . . aliud vero genus est Christianorum, ut sunt Laici. His licet temporalia possidere &c. Tum ob præstantiam Legislatoris, quam explicat Gelasius Papa scribens Anastasio Imperatori (a): Duo sunt quippe Imperator Auguste, quibus principaliter hic mundus regitur; auctoritas sacra Pontificum, & Regalis potestas. In quibus tanto gravius pondus est sacerdotum, quanto etiam pro ipsis Regibus hominum in divino sunt reddituri examine rationem. Tum ob amplitudinem rerum, ad quas se se extendit Jus istud sacrum. Hinc apud pios Imperatores tanta semper veneratio, tantaque fuit auctoritas SS. Canonum, ut quod contra eos sancitum fuit, nullius roboris esse voluerint, uti patet e verbis Impp. Valentini & Marciani (b): Omnes sane pragmaticas sanctiones, quæ contra Canones Ecclesiasticos interventu gratiæ & ambitionis elicitæ sunt, robore suo & firmitate vacuatas cessare præcipimus.

Verum

(a) C. duo sunt. 10. dist. 96. (b) L. Privilegia. 12. §. 1. Cod. de SS. Ecclesiis.

Verum heic ipso in limine litem movent Ecclesiæ Catholicæ, simul ac Hierarchiæ Ecclesiasticæ hostes, dum nomen Legis ac Juris Canonici velut a primorum seculorum usu alienum esse audacter non minus quam falso pronunciant, omnemque juris dicundi potestatem Pontificibus subtrahere conantur. Num hoc ex ignorantia faciant, aut ex malitia & odio dogmatum Ecclesiasticorum, aut ex utroque, nolim disquirere. Certum est, si antiquissimi etiam ævi monumenta consulamus, nunquam hominum communitatem aliquam, ne quidem inter Ethnicos sine sacris, nec sacra sine sacerdotibus, nec sacerdotes sine potestate legis sancientiæ fuisse, aut sine auctoritate judicii statuendi circa ea, quæ vel ad ipsa sacra adtinebant, vel quæ cum sacris ratione aliqua connexa fuere. Apud Ægyptios Sacerdotes erant simul Judices (c), teste Æliano. Druidæ Gallorum sacerdotes fere de omnibus controversiis qua publicis qua privatis pronunciabant: & si quod facinus erat commissum, si cædes facta, si de familia eriscunda, aut limitibus ponendis lis mota, iidem pro potestate decernebant,

ac

(c) *Lib. 14. hist. c. 34.*

ac poenas præmiaque constituebant: quod si vero seu de plebe seu de Primariis unus aliquis eorum decreto non stetisset, sacrificiis illum interdixere, quæ poena apud has gentes erat gravissima. Quippe hujusmodi homines interdicti in numero sceleratorum habebantur, eorum sermonem atque contubernium fugiebant omnes, ne quid ex contagione incommodi acciperent, ut fide dignissimus & oculatus testis omnium est Julius Cæsar (d). Apud Romanos Numa Pompilius Romanorum Rex sacris in rempublicam investis Pontificem Maximum cum aliis sacerdotibus & Virginitibus Vestalibus creavit, ut refert Plinius secundus (e), iisdemque condendarum legum, de sacris potissimum, pro arbitrato suo auctoritatem dedit, ipsosque Pontifices nullius potestati voluit esse obnoxios, ita ut nequidem senatui aut populo rationem reddere tenerentur, quemadmodum prodit Dionysius Halicarnassæus (f). Atque hoc tempore apud Romanos Jus Pontificium cœpit, partim a Numa conscriptum, partim a Pontificibus auctum. Versabatur autem jus hoc vel circa religionem, vel circa rem-

(d) *Lib. 6. Comment.* (e) *Lib. de Vir. Illust.*
c. 3. (f) *Lib. 2.*

republicam. Ex parte religionis tractabat de rebus divinis, de sacris, de ceremoniis, de personis deorum suorum cultui initiatis, horumque bonis ac fortunis: ex parte reipublicæ vero de pauperum & viduarum cura, de causis, deque negotiis personarum, quæ ad illorum forum spectabant, uti Cicero & Livius testantur (g). Hæc erat vel apud barbaras nationes & gentiles legum ferendarum potestas & Jus Pontificum, cui inter cultas nationes etiam his temporibus male feriatum quidam diem dicere non erubescunt.

Redeamus ad prima Ecclesiæ Catholicæ a Christo institutæ tempora, & reperiemus, jam Anacletum (qui quartus a S. Petro Pontifex erat circa A. C. 101. secundum Mussantii chronologiam) ecclesiæ decreta & canones adpellasse *Leges*, uti refertur in Decreto (h): *Leges Ecclesiæ Apostolica firmamus auctoritate*. Neque ipsi Imperatores SS. Canonibus vim legis unquam negarunt, sed eos tanquam leges sacras observandas esse sanxerunt. Ita loquitur Justinianus (i):

Apræ-

(g) Cicero pro domo sua, & Livius Lib. 1.

(h) C. Leges. 13. caus. 3. q. 6. (i) In Novell. 6. c. 1. §. 2.

*A præcedentibus Imperatoribus, & a nobis ipsis recte dictum est, oportere sacras Regulas pro legibus valere. Et (k) Sancimus igitur vicem legum obtinere sanctas Ecclesiasticas Regulas. Peregrinos igitur, immo cæcos, esse oportet in Jure Civili eos, qui Pontificiæ potestati circa leges ferendas litem intentare non dubitant, dum adeo experti & oculati esse videri volunt in Jure Canonico. Quis æquo animo ferret, si quis Imperatoribus, Regibus atque Principibus Imperii suis in territoriis hanc potestatem in dubium vocare auderet, quam in subditos suos Laicos, quantum ad politicum regimen adtinet, exercent? & isti paucorum dierum homines, ut ita dicam, impune ferant, si Pontifici supremo sacrorum Antistiti, cui etiam Imperatores & Reges Christiani per tot secula coronam & sceptrum inclinarunt, potestatem hanc, quæ in Ecclesiæ subditos ad animarum regimen ipsis competit, inanibus quibusdam ratiunculis in medium allatis eripere tentent? *Instar sacrilegii est disputare de Principis potestate*, ait Imperator (l). Triplex autem est potestas Ecclesiastica, una Ordinis, quæ*

(k) *Novell. 131. c. 1.* (l) *L. disputare 2. Cod. de crimine sacrilegii.*

quæ confertur ad sacramenta rite conficienda & administranda: altera Jurisdictionis interioris ad regendum populum Christianum in foro, ut ajunt, conscientiæ, quod fit absolvendo & ligando: tertia Jurisdictionis exterioris, quæ ad eundem populum circa publicas actiones regendum ordinatur, condendo leges, puniendo, cognoscendo causas, & controversias decidendo. Huic tertiæ qui bellum indixere, primi fuerunt facinore post tot secula, post tot hæreses antea non audito Wicleffus & Lutherus. Prior *Decretales Pontificum esse apocryphas docuit, & illos homines stultos, qui cognoscendis iis operam navarent* (m). Alter, quo jure, inquit: *Papa super nos leges constituit? quis ei dedit potestatem captivandæ libertatis nostræ, per baptismum nobis donatæ, cum neque Papa, neque Episcopus, neque ullus alius hominum habeat jus unius Syllabæ constituendæ super Christianum hominem, nisi fiat ejusdem consensu* (n). Ut autem verbis suis pondus adderet Hæresiarcha iste insolente quodam facto, universum corpus Juris Canonici spectante Wit-

(m) *Art. 38. damnato in Conc. Constant. Sess. 8.*

(n) *In Lib. de captiv. Babylon.*

Wittenberga an. 1520. ultricibus flammis exussit, uti testatur in ejus vita Cochlæus. Videant heic, quos duces præclaros sequantur ii, qui nostris etiam temporibus Ecclesiæ potestatem ac jurisdictionem qua scriptis qua sermonibus eversum eunt, Jurisque Canonici contemptum extremum & suis & aliorum animis ingerere conantur. Quid enim sibi volunt voces illæ, etiam per Catholicorum quorundam ora volantes: Papam & Sacerdotes non habere potestatem ullam, nisi dum stant vel ad aras, seu sacramenta conficiunt & sacrificium offerunt, vel sedent in S. Tribunali, ubi vincula solvunt vel injiciunt animabus: cætera legum ferendarum impotentes esse atque inermes. His nihilo meliores sunt, qui quidem non omnem regendi ac gubernandi Ecclesiæ subditos potestatem abnegant, eum tamen cum civili ac politica jurisdictione confundunt, non sine turpi adulatione attribuentes Principibus seculi hujus promiscue jus in sacra & profana; quod palam faciunt tot horum decreta Ecclesiasticæ libertati, personis & bonis Deo dicatis adversantia. Et quid mirum? legunt in Goldasto, Conringio, & maxime in Pufendorfio (illo Juris oraculo) hierarchiam Eccle-

Ecclesiasticam seu potestatem in sacra, sejunctam a potestate Politica figmentum Papistarum, monstrum politicum esse, quod imperia lacerat in partes, quod regimina pervertit &c. (o). Sed ecce Vertumnos! nihilominus in quibusdam Germaniæ Academiis & scholis A catholicis Jus utrumque docent, immo quod mirere, Doctores utriusque Juris, Civilis nempe & Canonici (quod postremum jus Antichristi adpellant) utriusque inquam juris & Justiniani & Antichristi Doctores creant.

Verum uterque hic error meretur, ut brevi sed solida ratiocinatione & Catholicorum & aliorum, quid juris sit, non ignarorum animis eximatur. Primo quidem negari haud potest, Ecclesiam esse communitatem aliquam perfectam, & morale corpus quoddam, congregatum atque unitum eo fine, ut ad beatitudinem *supernaturalem* tendat; quemadmodum civitas & respublica ad pacem, tranquillitatem ac præsentis vitæ felicitatem. Nulla vero communitas, nullum corpus morale sine potestate ferendi leges & gubernandi subditos suos firmare potest. In qualibet enim communitate

(o) *In libello de habitu religionis Christianæ ad vitam civilem.*

nitare non paucos reperire est; qui vel non sciunt, nisi instruantur, vel non volunt nisi cogantur, bene ac ad finem communitati præfixum actiones suas ordinare. Principium hoc est & fundamentum, e quo ipso & solo potestatem ferendi leges ac gubernandi probant pro civitate ac republica profana omnes Jurisperiti, & qui hoc negat, rectæ rationi bellum indicit. Itaque necessarium est, ut in Ecclesia tanquam communitate perfecta & corpore quodam morali detur potestas ferendi leges ac gubernandi subditos, per quam ad finem illum *supernaturalem* ignari dirigantur, ignavi compellantur, refractarii coerceantur. Aut fors plus interest efficaciter obtinere finem miseræ hujus fluxæque vitæ, quam alterius omni ex parte beatæ, ac æternum duraturæ? Hæc consecutio plane legitima est, & ad omnes sani judicii regulas exacta. Num forte respondebunt, satis superque ad hunc finem *supernaturalem* esse legem Christi in Evangelio contentam, ita ut humanam & Ecclesiasticam superaddi necesse haud sit. Sed qui ita loquuntur, caveant, ne pari ratione totum Jus civile ac politicum pessumdent. Etiam Jus naturale ad eum finem, quem respublica politi-

politica spectat, scilicet ad felicitatem naturalem sufficeret abunde, si quisque ductum rectæ rationis sequeretur: ad quid ergo opus civilibus legibus earumque appendice poenarum ac suppliciorum in transgredientes statutorum? Nimirum sicuti ad rite gubernandam rempublicam profanam necessariae sunt ejusmodi leges, quæ sunt veluti conclusiones deductæ ex primis principiis juris naturæ, quod utpote nimis generale ad singulares casus adplicant, ita & ad ordinatum regimen Ecclesiasticum præter Evangelicam legem nimis late patentem oportet esse quasdam alias, quæ ex principiis Evangelicis deductæ magis eam explicant, & quid in his vel illis circumstantiis fieri opus sit, determinent. Ita jubet Evangelium Eucharistiam sumere, sed tempus ac modum Ecclesiæ statuendum reliquit; quemadmodum præcipit jus naturale fidem servare in *contractibus* & pactis, jus civile vero modum seu condiciones ac solemnitates eorum præscribit. Secundo, nullus est in Evangelio adeo peregrinus, ut non intelligat, a Christo Domino institutam fuisse Ecclesiam, hoc est, communiter fidelium recte beneque ordinatam: an autem talis esse poterit absque regimine? Sed quale hoc esse credimus

dimus regimen ? cæcutiat oportet, qui non videt, fuisse illud ad finem longe supra naturam positum, ad felicitatem & vitam sempiternam ordinatum. Hoc sane omnis doctrina, præcepta omnia a Christo privatim & palam data demonstrant. Habet itaque regimen Ecclesiasticum finem specie ac toto genere, ut ajunt, diversum a fine regiminis politici, qui est tranquillitas & felicitas naturalis ac præsentis vitæ. Si hoc ita est, leges ac præcepta, quin & ipsa potestas, quæ dirigit ad hos fines adeo diversos, diversa quoque debent esse ac distincta. Profecto dum Christus ex hoc mundo discessurus Ecclesiam suam, ejusque regimen alteri tradidit vicaria potestate adeundum, non Magistratui civili, Principi, Regi, vel Imperatori, sed Petro, & in Petro legitimis ejus successoribus disertis verbis dixit: *Tu es Petrus, & super banc petram ædificabo Ecclesiam meam: Tibi dabo claves regni cælorum: Pasce oves meas.* Apostolis vero dixit: *Qui vos audit, me audit. Si Ecclesiam non audierit, erit tibi sicut ethnicus & publicanus.* Non minus D. Paullus ad Episcopos: *Attendite vobis, inquit, & universo gregi, in quo Spiritus S. posuit Episcopos regere Ecclesiam Dei, quam ac-*
qui.

quisivit sanguine suo (p). Neque refert, quod apud Ethnicos, præcipue Romanos, ut supra vidimus, jus sacrum atque profanum fuerit commistum, & utraque jurisdictione penes rempublicam aut principem steterit. Grande discrimen intercedit! Nam quum Ethnici deficiente baptismi sacramento veræ Christi Ecclesiæ membra non sint, sed foris in cæcitate sua relictæ a Deo, Christo, & ultimo fine longe aberrant, mirum haud est, quod sacra profanis & profana sacris misceant. Aliter sentiendum de Christianis, quibus post prædicationem Evangelii finis ultimus, & supra terrena hæc positus luce clarius ob oculos versatur, ad quem ut homines felicius perducantur, Christus, Ecclesiæ Caput, præter politicam, quæ ad felicitatem præsentis vitæ tendit, aliam jurisdictionem sacram & Ecclesiasticam esse voluit penes illos, quos ipse præfecit Ecclesiæ, constitutam.

§. II.

Decretum Gratiani.

XXIII.

Vindicata & stabilita Ecclesiastica potestate ad singulas Juris Canonicis tanquam vastissimi Corporis partes inspiciendas nos trans-

(p) *AR.* 20.

transferamus. Prima est, quam *Decretum Gratiani* vocant. Hoc grande opus præcesserunt velut antesignani quædam minoris nominis & auctoritatis. Nam multiplicatis per plura Concilia tam Universalialia quam Provincialia Ecclesiasticis sanctionibus & Pontificum constitutionibus Eximii quidam doctissimique viri animum & manum admoverunt ad varias earum collectiones tum græco tum latino sermone faciendas, quæ & Ecclesiæ regimini & fidelium utilitati servirent. Primus erat Dionysius origine Scythæ, cognomento Exiguus, Monachus, Vir in divinis æque ac profanis literis admodum peritus, qui tempore Theodorici Regis circa an 527. floruit, ac æram Christianam condidit, qua in annis a Natali Christi Domini computandis etiamnum Ecclesia Romana utitur. Hic veteres canones e græco in latinum idioma translatos collegit, initium ducens a Siricio Papa usque ad Hormisdam, & in ducentos quinque articulos opus divisit. His dein addita fuerunt Gregorii II. decreta decem & septem capitibus comprehensa, uti notat Petrus Marca (q) adpellaturque hæc collectio *Codex Canonum*, quem Adrianus I. Carolo M. dono dedisse circa

an.

(q) *Lib. 3. Concord. c. 3.*

an. 787. & Carolus Episcopos Galliarum statim admonuisse fertur, ut Canonum horum observantiam probe invigilarent. Animadvertunt hęc non pauci Criticorum, Dionysio huic adscribendum quidem esse laborem, quo Gręcos Canones in linguam latinam transtulit, ipsius vero collectionis opus vel a Stephano Episcopo Ephesino, vel alio adhuc Antiquiore Auctore Theodosii M. temporibus circa an. 385. susceptum adornatumque fuisse. Hujus suę opinionis causam adferunt, quod ipsa collectio desinat in Concilio Constantinopolitano I, quod Oecumenicum secundum erat, an. 381. celebrato.

Eodem fere tempore Fulgentius Ferrandus, Carthaginensis Ecclesię Diaconus, & discipulus S. Fulgentii Ruspensis Episcopi, aliam elucubravit Collectionem diversa methodo constructam, dum omnes variorum Conciliorum canones ita in sua quosque capita divisit, ut non tam recitaret eos, quam citaret; quod opus propterea Cresconius in Collectione a se facta *Breviarium* adpellat: ejus mentionem facit Gratianus sub nomine *Breviationis Canonum*.

Huic alia successit Collectio, an. 571. edita a Martino Benedictino, Beaharenfi Episcopo, qui Synodos gręcas in lati-

num idioma transtulit ad usum utilitatemque potissimum Ecclesiæ Hispanicæ; quin & alios canones e latinis Conciliis congeffit, maxime Toletanis, quos complures suo Decreto postmodum inseruit Gratianus, sed perperam nomine Martini Papæ insignitos. Reperitur hæc collectio in Tomis Conciliorum post secundam Synodum Bracharensem.

Quarta Collectio est Isidori Hispalensis, vel ut nonnullis placet, Mercatoris seu Peccatoris (utroque nomine eum appellat Possevinus (r) Episcopi Setubensis. Qui Isidoro Hispalensi collectionem hanc adjudicant, his nituntur fundamentis, primo quidem quod in ea mentio fiat de Concilio Toletano sexto, quod anno 638 celebratum fuit: ipse vero Isidorus vita excesserit. an. 636. Dein, quod insertæ reperiantur Epistolæ Gregorii II. & III. nec non Zachariæ Pontificis, qui primum post annum 700 Apostolicam sedem occuparunt. Demum quod Collectio ista inter opera S. Isidori Hispalensis, a SS. Braulio & Ildephonso edita non recenseatur. Contra qui S. Isidoro favent, Hincmari Remensis, qui duobus circiter post obitum Isidori seculis scripserat, auctoritate

(r) In *Apparat.* fol. 244.

tate se tuentur, dicentis (s): *Hæc sunt, quæ prædictus Isidorus in Collectario suo de Canonibus diligentissime perscripsit.* Suffragatur quoque Prælatio Corpori Juris Canonici, jussu Gregorii XIII. studiose correcti, præfixa, cui hæc verba sunt inserta: *Cæterum inter privatos Collectores . . . perantiquus est Isidorus, cujus collectio protenditur a Canonibus Apostolorum usque ad Concilium Hispalense secundum.* Denique multa, quæ in libro quinto *Etymologiarum*, qui absque controversia Auctorem habet S. Isidorum Hispalensem, leguntur, etiam in Collectione ista est reperire. Verum lis hæc facile componi posse videtur, si asseratur, collectionem quæ in controversiam adducitur, inchoatam confectamque ab Isidoro Episcopo Hispalensi, a Setubensi vero, seu Peccatore (quod nomen Vir humillimus sibi proprium fecit) auctam & adjunctis aliis Conciliis & epistolis amplificatam fuisse. Atque hæc ipsa mens est Antonii Augustini, Viri doctissimi, qui summa cum diligentia canonum collationes scrutatus est, & cum fontibus suis consulit. Nam in hanc sententiam ad Gregorium XIII. scribit: „ In primis laudandi „ sunt Isidori Hispani duo, qui & Pon-

K 2

„ tifi-

(s) in l. de variis capit. Eccles. c. 33.

„ tificum Romanorum epistolas , & om-
 „ nium conciliorum decreta collegerunt,,.
 Cæterum collectio hæc Isidoriana titulis di-
 stincte additis & indice adjecto instructa
 est, ita ut unusquisque titulus certam
 quandam materiam complectatur una
 cum numeris canonum, ad illum perti-
 nentibus.

Uberiorem locupletiolemque instru-
 xit Cresconius, sive Crisconius Episcopus
 Africanus, qui floruit eo tempore, quo
 de Saracenis in Africa triumphavit Patri-
 cius, an. scilicet 690, uti colligitur ex
 Codice Vaticano, quem allegat Baronius
 ad an. 527. Hic opus suum, quod ex-
 stat in Bibliotheca Maxima, in duas di-
 stribuit partes, quarum prima continet
Breviarium Canonicum, ubi strictim ad-
 duuntur Canones & Decreta: altera,
 quæ *concordia Canonum* inscribitur, pro-
 lixius & Decreta & Canones recitat.

Sextæ Collectionis Auctor est Burchar-
 dus, primum Lobii Monachus S. Benedi-
 cti, tum Episcopus Wormatiensis, qui im-
 perante Henrico an. 1020. Decretum
 composuit, e variis Conciliorum Cano-
 nibus, Pontificum epistolis, SS. Patrum
 sententiis, & Imperatorum sanctionibus
 collectis in viginti libros divisum. Com-
 plura quoque e Digestis, Codice, & No-
 vellis.

vellis transcripta huic suæ collectioni inseruit, ita ut vestigia secutus Joannis Scholastici & Photii, Patriarcharum Constantinopolitanorum, jus civile cum canonico conjunxerit: Vitio tamen illi vertitur a memorato superius Antonio Augustini, quod collectionem suam non ex fontibus ipsis, sed ex rivulis & stagnis aliorum hauserit.

Post istam comparuerunt duæ Collectiones, una Cardinalis Deus dedit, Victoris Papæ temporibus, methodo magis scholastica conscripta, cujus meminit Baronius ad an. 1086. Altera Anselmi Episcopi Lucensis, qui floruit ævo Gregorii VII. ad annum 1088.

Octavo loco memoranda venit Collectio Ivonis, antea Præpositi Monasterii S. Quirini Bellovacensis, Ord. Can. Reg. S. Augustini, postea Episcopi Carnotensis regnante Urbano II. usque ad annum 1114. Exstant autem duo volumina Ivonis hujus nomine insignita, & cum eadem præfatione in lucem edita, unum *Pannomia* quasi leges Ecclesiæ omnes complectens, alterum *Decretum* vulgo dictum, & in octodecim omnino partes divisum. Hoc ultimum Critici satis periti tribuunt Ivoni, quodque per annos sexaginta ante Decretum a Gratiano conscriptum passim

In scholis & cathedris juridicis usui fuit: alterum vero seu Pannoniam opus esse con-
endunt Hugonis cujusdam Catalaunensis. Verum huic postremæ opinioni obstare videtur præfatio, ut dixi, eadem utriusque voluminis, in qua Ivo ipse sic loquitur: *se ita materias congeffisse, ut non sit quarenti necesse, totum volumen evolvere.*

Demum omissis aliis Photii, Harmenopuli, Syagrii, aliorumque, in lucem prodiit longe accuratior collectio Gratiani, cujus viri effigiem spectandam dedi Capite II, Num. XIII. Ejus Decretum in tres præcipue partes distribuitur, quarum prima complectitur distinctiones centum & unam, in canones seu capitula divisas. In his de varia Juris origine, partibus & speciebus differitur: item de iis, quæ ad Jura, dignitates, Gradus, Electiones, Ordinationes, & officia Personarum Ecclesiasticarum pertinent. Pars secunda continet triginta sex causas seu controversias, quarum fere singulæ rursus in Quæstiones, & istæ in Canones & Capitula dispertiuntur, atque rerum Juridicarum, judiciorumque Ecclesiasticorum materiam pertractant. Tertia demum de Consecratione inscribitur, & distinctiones quinque cum priore canonum

num appendice numerat, ac totius Jurisdictionis & ministerii Ecclesiastici jura, ritus, ordinationes &c. explicat. Totum vero opus quasi conflatur 1. e textibus S. scripturæ. 2. e constitutionibus Apostolicis, & Conciliorum Decretis. 3. e sanctionibus & dictis SS. Patrum. 4. e textibus quibusdam juris Imperialis. 5. e narrationibus, quæ ex Historicorum, similiumque scriptorum monumentis desumptæ sunt. 6. ex aliis quibusdam, quæ Gratianus e penu sua depromta inseruit.

XXIV.

Quanta autem sit auctoritas hujus Decreti, & an vim legis Ecclesiasticæ obtineat, non levis est graves inter Doctores ac Jurisperitos controversia. Qui pro parte affirmante stant, ajunt Decretum hoc ab Eugenio III. adprobatum, & in scholas Academicas, ut publice doceretur, introductum esse : præterea jussu Gregorii XIII. a variis erroribus purgatum ac vulgatum fuisse præfixa Pontificis hujus epistola, in qua una cum reliquis libris illud adpellat Jus Canonicum; *Nos opportune providere volentes, ut hoc Jus Canonicum sic expurgatum ad omnes ubique Christi fideles sartum perveniat.*

Neque officere quidquam posse videtur, quin sit Authenticum, quod a Gratiano homine privato fuerit collectum quum etiam S. Raymundus de Pennafort *Decretales* Gregorii IX, & Trebonianus libros Institutionum Imperialium conscripserint ut privati Doctores, nec potestate ferendi legem præditi, quorum tamen libri absque controversia legis auctoritatem obtinent. Sed qui partem negantem sequuntur, asserunt exhiberi non posse ullam nec Eugenii III, nec alterius Pontificis Bullam, ut vocant, quæ Decreto huic vim legis publice adjudicaret, quamvis ob utilitatem ac præstantiam, qua gaudet, in scholarum cathedris explanetur: curam vero illam, quam Pontifex Gregorius XIII. aliique in se susceperunt, ut quam maxime correctum ac emendatum prodiret Gratiani Decretum, eo spectasse, ut Canones in illud relati, aliæque auctoritates, quæ ibidem adlegantur, suis fontibus & prototypis accurate responderent: cætera libros *Decretalium* ac Institutiones Justinianeas utique non ab illis, qui collegerunt, sed a Pontificis summi ac Imperatoris, quorum jussu compositi sunt, auctoritate ac potestate vim legis acquisivisse, ut ex Procemiis luce clarius adparet. Atque hæc sententia commun-

munior est, & hodie satis recepta inter Jurisperitos. Constat enim, multa in Decreto isto referri ex Conciliis Provincialibus, ex dictis SS. Patrum, ex jure civili, quæ omnia vim legis universe in Ecclesia non obtinent. Præterea vapulat Gratianus non parum primo apud Bellarminum (t), quod delectum Auctorum, e quibus decreta collegit, non habuerit, uti adductis quibusdam locis idem Bellarminus demonstrat: secundo reus agitur ab aliis scriptoribus, quod a Sigeberto Historiographo cæteroqui non ignobili, sed schismatis stigmate notato fabulam, cujus ille auctor est, de jure eligendi Pontificem Imperatori Carolo ab Hadriano Papa concessa in Decretum suum transtulerit: tertio quod similem aliam fabulam a schismaticis confictam Leonis VIII. nomine in gratiam Ottonis addiderit, ut in ipso Decreto legere est (u). Utraque more suo solidissime refutat Baronius (x), vehementer quidem a Goldasto impugnatus, sed strenue a Gretsero defensus (y). Fateri nihilominus

(t) *De Script. Eccles. ad an. 1145.* (u) *c. Hadrianus 22. & c. in Synodo 23. dist. 63.*
(x) *ad an. 774. & 964.* (y) *in Apolog. Baronii, c. 1.*

nus oportet, magnam Decreto huic auctoritatem inesse, tantam scilicet, quanta competit fontibus illis, e quibus hoc derivatur. Quare quæ Gratianus refert e SS. Literis, auctoritatem habent divinam; quæ ex summorum Pontificum Constitutionibus, & Decretis Conciliorum, vim Juris Ecclesiastici sortiuntur; quæ e SS. Patribus adducit, magnam præ aliis Doctoribus merentur fidem, non tamen auctoritatem legis; quæ vero ipse addit propriam dicendo sententiam; judicium alterius gravis Jurisperiti non excedunt; quæ denique ex Constitutionibus Imperatorum & jure civili admiscet, in foro Ecclesiastico vim non habent nec robur, nisi quando juris Canonici defectus suppleant, nec immunitati Ecclesiasticæ refragantur.

XXV.

Porro ad calcem Decreti a Gratiano editi referuntur Canones, quos *Pœnitentiales* dicunt, & post hos alii Canones Apostolorum. De utriusque breviter differere juvat. Sunt *Canones Pœnitentiales*, seu qui pœnas Ecclesiasticas pro diversis criminibus infligendas præscribunt, numero quadraginta septem. Fuerunt autem pœnæ istæ quædam privatim, aliæ publi-

publice subeundæ priscis seculis pari cum rigore ac religione satis frequentes. Sunt, qui hunc pœnitentiam agendi morem (quem Tertullianus vocat *humilificandi hominis disciplinam*) per duodecim fere secula vixisse in Ecclesia docent, nunc aucta nunc imminuta severitate, prout tempora & delicta exigebant. Patres illum describunt tanquam triste spectaculum, *quando apparebant rei conciliati, concinerati; ad omnium pedes prostrati, omnium vestigia lambentes, omnium genua detinentes, Dei & Ecclesiæ misericordiam deprecantes.* S. Gregorius Thaumaturgus describendo in suis Canonibus hunc ipsum antiquum pœnitendi morem quatuor diversos pœnitentium gradus enumerat: primus scilicet erat *Fletus* seu luctus, dum gravis noxæ reum extra templi portam stare, ac lugubri habitu, & flebili voce intrantium opem implorare oportebat, ut ad impetrandam misericordiam preces ad Deum & Ecclesiam funderent. Alter *Auditio* dicebatur, dum pœnitens intra portam in ipsa porticu stare jubebatur non procul a Cathemenis; egredi vero, quando sacra scriptura legi, vel doctrina Christiana exponi cœpit; si secus faceret, ejiciendus sine spe precum obtinendarum. Tertius

Sub-

Subiectio seu substratio, quando intra templi portam stare quidem cum Catechumenis, non tamen egredi cum illis licebat. Quartus demum *Congregatio* seu *Consistentia*, dum pœnitenti una cum reliquis fidelibus in loco sacro consistere concedebatur. His gradibus velut pedetentim exantlatis denique Sacramento- rum usui, & fidelium in preiobis & bonis operibus communicationi restituebatur. Hæc primis illis aureisque Ecclesiæ seculis inter Christianos recenti religionis fervore calentes agebantur: mitius nonnihil in scelera sævitum est posterioribus, uti patet ex memoratis Canonibus quamvis & in his pœnitentia decem, duodecim, quadraginta annorum, immo & per totum vitæ tempus durans pro uno graviore crimine statuatur. Verum crescente fidelium numero, quum & pari velut passu peccatorum numerus cresceret, ac primus ille Christianorum fervor decrederet, usus quoque ac praxis pœnitentiæ istius sensim minui, ac demum vix non evanescere cœpit, ita ut jam de temporum suorum benignitate questus fuerit Pelagius Papa (2) scribens Florentino Episcopo denunciante Clericum, qui cum ancilla scortatus est: *Et quamvis*

(2) *C. Fraternitatis 7. dist. 34.*

vis multa sint, quæ in bujusmodi casibus observari Canonica jubeat sublimitatis auctoritas, tamen quia defectus nostrorum temporum, quibus non solum merita, sed corpora ipsa hominum defecerunt, distributionis illius non patitur in omnibus manere censuram &c. Hoc autem quod vivimus, tempore omnino antiquati & aboliti videri possunt. Et quamvis canones isti in Corpore Juris Canonici post Decretum Gratiani contineantur, nulla tamen auctoritate legis muniti sunt aut fuerunt, sed ut præfatio loquitur, illorum *notitia viris Ecclesiasticis est valde necessaria. Sunt enim quædam regulæ directivæ ad pœnitentias delinquentibus imponendas.* Fuerunt equidem nonnulli, qui novissimis hisce temporibus, maxime in Gallia, nescio quo zelo, vel potius hypocrisis spiritu correpti, suscitare voluerunt hunc rigorem, quem antiquitus in pœnitentes exercuit Ecclesia; sed hand scio, quo animo illum ferrent isti, si propter gravissimam obstinationem, contemptum & irreverentiam Apostolicis mandatis & sanctionibus exhibitam, ac propter multiplices in rebus ad fidem & sanam doctrinam pertinentibus errores eodem rigore ac præscriptis pœnis in illos ipsos animadverteret Ecclesia.

Gra.

Gravior est controversia circa Canones Apostolorum, ut vocantur. Satis equidem constat ex ipsis Actis Apostolorum, quod hi post gloriosum Christi in cœlos ascensum cœtus aliquot & synodos celebraverint, in quibus canones condiderunt, initio non statim literis commendatos, sed Traditionum instar in corde fidelium asservatos, quos tamen postmodum a Clemente Papa I. collectos atque conscriptos fuisse, esseque hos ipsos, qui Gratiani decreto adpositi leguntur, atque ita omnino pro authenticis habendos contendunt satis concordi suffragio plurimi Juris Canonici Doctores. Sed ab his, quo minus genuinos agnoscant, maximi nominis Critici vehementer discordant, præsertim quantum ad numerum horum Canonum adtinet. Quippe dum sacri juris Periti 84 vel 85. legitimos agnoscunt, Critici duntaxat 50 vel 52. e canonibus istis authenticos esse censent, ut Baronius & Bellarminus: Petrus de Marca vero Archiepiscopus Parisiensis, Antonius Pagius, & Ludovicus du Mesnil nec ab Apostolis eos manasse, nec a Clemente conscriptos fuisse fidenter asserunt, gravibus omnino fundamentis nixi. Nam si, ajunt, Canones isti forent vere Apostolici, gravissima illa controversia de tempore

pore Paschatis celebrandi, quæ inter Orientales & Occidentales Episcopos circa finem seculi secundi sub Victore Papa exorta est, quamprimum fuisset finita, exhibendo canonem septimum: *Si quis Episcopus aut Presbyter aut Diaconus sanctum diem Paschæ ante vernum æquinoctium cum Judæis celebraverit, deponitor.* Rursus ad terminandam famosam litem de baptismo hæreticorum, quæ seculo tertio excitata fuit ab Episcopis Africæ & Asiæ, Firmiliano Cæsariensi, & S. Cypriano contra Stephanum Papam, contendentibus illis, Baptismum ab hæreticis collatum nullum esse ac irritum; ad terminandam inquam litem illam non alia re opus fuisset, quam Canonem 45. in medium proferre: *Episcopum aut Presbyterum, qui hæreticorum baptisma aut sacrificium suscepit, deponi præcipimus. Quæ etenim conventio inter Christum & Belial, aut quæ particula fidei cum infideli?* & canonem 46. *Episcopus aut Presbyter, si eum, qui verum baptisma habeat, iterum baptizaverit, aut pollutum ab impiis non baptizaverit, deponitor.* Hæc porro, quæ nos Canones istos Apostolis abjudicare cogunt, antiquis scriptoribus, qui de illis meminerunt, atque ipsi Dionysio Exiguo primo eorum Editori suboluisse credimus, dum in sua ad Ste-

Stephanum Episcopum Salonitanum epistola ita scripsit: *In principio Canones, qui dicuntur Apostolorum, de græco transtulimus.* S. Ildorus Hispalensis (a) & Hincmarus Rhemensis Episcopus (b) *Canones*, inquit, *qui vocantur Apostolorum, non ab ipsis Apostolis conscripti esse creduntur.* Photius etiam animadvertit, Canones istos *Apostolis adscribi.* Demum Fulgentius Ferrandus & Maximus Bracharensis in suis Canonum collectionibus illos neglexerunt, nulla omnino facta mentione. Quamvis autem Canones isti re ipsa Apostolici seu ab Apostolis conditi haud sint, antiquissimos tamen esse negari vix potest, quum jam Constantinus M. Canonis decimi tertii (c) mentionem fecerit, quo transitus ab uno Episcopatu ad alterum prohibetur, laudans propterea Eusebium, quod ab Episcopatu Cæsariensi ad Antiochenum, totius Asiæ Metropolitanum, ad quem fuerat electus, transire noluerit, & sic mandatum Domini & Apostolicum Ecclesiæque Canonem observaverit. Quapropter verosimilior esse videtur opinio illorum, qui Canones memoratos nec ab Apostolis traditos, nec a S. Clemente conscriptos, sed e diversis Conciliis ante Nicænum celebratis collectos

(a) *Apud Gratian. c. 1. dist. 16.* (b) *in opusc. 23. c. 24.* (c) *in ep. 2. ad Euseb. Cæsariens.*

ctos, & ex iis omnes quidem octoginta quatuor ab Ecclesia Orientali, a Romana vero quosdam, scilicet quinquaginta, receptos fuisse, atque ita vim legis obtinuisse arbitrantur. Certe ipse Gratianus (d): *Sciendum ait, quod Canonum Apostolorum auctoritate Orientalis, & ex parte Romana utitur Ecclesia.* Eidem fato subjacent Constitutiones Apostolicæ, de quibus memini, quas ob easdem fere rationes Critici meliores ac Recentiores & ab Apostolis conditas & a Clemente scripto consignatas esse negant; & quamvis antiquæ admodum sint, valdeque utilia contineant, olimque puræ fuerint, postea tamen pluribus in locis ab hæreticis fuisse corruptas demonstrant Petrus de Marca, Ant. Augustinus, Baluzius, Albaspinæus, Alexander Natalis, Pagius, Annatus, du Mesnil, peritissimi in Canonicis & Conciliorum rebus Critici.

§. III.

Decretalium Libri V.

XXVI.

Post Decretum a Gratiano compositum quamplurimæ *Constitutiones & Decretales epistolæ* emanarunt, præsertim post (d) *Dist. 32. Can. 6.* Con-

Concilium Oecumenicum Lateranense III. sub Alexandro III. an. 1179. celebratum; quumque una ex parte a Gratiano multa fuerint omissa, ex altera vero vigilans & assidua sedis Apostolicæ cura novas quotidie pareret constitutiones editis in lucem epistolis & responsis Pontificum, aliis *Decretalium* collectionibus faciendis datum est initium. Primus erat, qui huic operi se se accingebat, Bernardus Balbus, Papiensis Præpositus primum, tum Episcopus, vir in Jure Ecclesiastico eruditissimus. Hic epistolas Decretales quorundam Pontificum, nec non diversos canones Conciliorum tam Generalium quam Provincialium perquam studiose collegit, atque in quinque libros distinxit. Opus illius ab Auctore *Breviarium Extravagantium*, id est, breve compendium *decisionum*, quæ extra corpus Decreti vagabantur; ab Hostiensi vero *prima Compilatio* adpellatum fuit.

Hunc secutus est Joannes Walensis seu Galensis, Volaterris in Tuscia natus, qui post annos duodecim secundam Decretalium collectionem edidit. Intervenire quidem primam inter & secundam aliæ Collectiones duæ Gilberti Abbatis, & Alani Episcopi Altissiodorensis, sed nunquam usu receptæ fuerunt.

Tem-

Tempore vero Innocentii III. Bernardus Archidiaconus Compostellanus Romæ degens aliud Decretalium volumen composuit, quod *Compilatio Romana* vocabatur: sed quia huic operi quædam inseruit, quæ Curia Romanæ minus probabantur, ejusdem Pontificis jussu Petrus Beneventanus tertiam collectionem condidit, publica adprobatione munitam.

Huic quarta successit, quam aliqui Magistro Galensi tribuunt, a quo decreta Pontificum, qui Innocentium præceserant, velut e ruinis Collectionum Gilberti & Alani extracta fuisse memorant: alii vero Tancredo Bononiensi Archidiacono, Decretorum Magistro adscribunt. In hanc varii Canones Concilii Lateranensis IV. sub hoc Pontifice celebrati, pluresque illius epistolæ congestæ fuerunt: eam notis illustravit Joannes Teutonicus, & *quartam Compilationem* Innocentius III. nuncupari voluit.

Quinta ex epistolis Honorii III. quarum decem libros scripsit secundum seriem ac methodum aliarum collectionum, opera Innocentii Cironii, Ecclesiæ Toletanæ *Cancellarii*, Viri in utraque palæstra Juris exercitatissimi, confecta fuit.

Post hanc denique sexta prodiit in lucem ita jubente Gregorio IX. *His*, inquit Matthæus Parisiensis, *temporibus Gregorius IX. videns tædiosam Decretalium prolixitatem, sub quodam compendio eas eleganter abbreviatas & collectas solemniter per totius mundi latitudinem legi præcepit & publicari* (c). In hac expunctæ fuerunt aliæ quædam Constitutiones, aliæ vero recens additæ, præcipue quas ipse Gregorius edidit. Concinnavit eam S. Raymundus de Pennafort, Generalis postea Minister Ordinis Prædicat. sanctitate simul ac doctrina conspicuus, & intra octoginta plus minusve annos facta a diversis Pontificibus decreta complexus est. Vulgo *Decretales Gregorii*, quin & corpus Juris Canonici adpellatur opus istud, quod a se approbatum & publicæ luci datum an. 1230. idem Gregorius submisit Doctoribus, & Academiæ Bononiensis tunc florentissimæ scholas frequentantibus, ut publice prælegeretur. Exorsus est autem illud a Fidei Catholicæ professione ad normam Concilii Nicæni, & morem reliquorum. Quapropter necessarium haud erat, uti Wesembecius Juris Consultus heterodoxus mala fide crimina-

tur.

(c) *In bist. Francia.*

tur (f), invocare Divinum Numen, quemadmodum alii Principes ab eo Constitutiones suas exordiantur. Ita demum fuit completum Corpus Juris Canonici, quod quinque potissimum partibus constat, scilicet prima pars continet Decretum Gratiani supra memoratum: Secunda quinque libros istos Decretalium Gregorii IX. Tertia librum sextum Decretalium Bonifacii VIII. qui librum hunc a Viris doctissimis, præsertim opera Riccardi Petronii Card. & Dyni in Italia collectum reliquis quinque adjecit. Quarta Clementinas, sive Constitutiones a Clemente V. editas. Quinta Extravagantes Joannis XXII. & communes, sic dictas, quod antehac hæ Constitutiones extra Corpus Juris Ecclesiastici quasi incerta sede vagarentur; nunc autem, licet eidem insertæ sint, nomen tamen suum retinuerunt.

XXVII.

Jam vero horum quinque librorum Oeconomiam prodere juvat. Primus liber in titulos quadraginta tres divisus post jacta Juris Canonici fundamenta, expositaque principia ad Ordines, Gradus,

(f) *Theß* I. in princip.

duſ, Jurisdictiones, & Officia Magiſtratum, qui Eccleſiaſtico regimini præſunt, transgreditur; tum viam ſternit ad Judiciorum formam, præmittendo ea, quæ circa perſonas & res litigantium in ipſo Judiciorum limine ſolent agitari, uti ſunt *pacta, transactiones, poſtulationes, reſtitutiones, & arbitria*, quibus controverſiæ ante litis ingreſſum pacis & amicitiaſ conſervandæ cauſſa non raro terminantur. In ſecundo libro, qui titulis triginta conſtat, totus judiciæ Eccleſiaſtici apparatus, ordo, progreſſus & exitus pertractatur præceptis utriusque foro communibus, ſeu de civilibus negotiis ſeu de criminibus vindicandis agatur. Tertius liber quinquaginta titulis circumſcriptus agit de vita Clericorum, eorumque Juribus & reliquis officiis, quibus obſtringuntur tum ratione *Beneficiorum* Eccleſiaſticorum, tum ratione communium cum Laicis *obligationum*, quæ e pactationibus, teſtamentis, ſacrorum uſu & jure ſepulturæ oriri ſolent. Quartus liber, qui titulos viginti & unum numerat, totus occupatur in rebus, quæ ad ſponſiones de nuptiis, ipſaque matrimonia, & his annexa officia pertinent. Quintus denique liber, qui titulis quadraginta & uno abſolvitur, cauſſas

causas complectitur ad criminum vindictam spectantes, agitque late de accusationibus, deque ipsorum criminum ac poenarum diversa ratione. Synopsin omnium, quæ in his quinque libris exponuntur, antiquus versiculus brevissime complectitur:

*Judex, Judicium, Clerus, Sponsalia,
Crimen.*

id quod nonnihil latius explicant alii quinque:

*Pars prior officia creant, Ecclesiaque
ministros,*

*Altera dat testes & cætera judicio-
rum.*

*Tertia de rebus & vita presbytero-
rum.*

*Nubendi formam dat sponsis quarta
decentem,*

*Ultima de vitiis & poenis tractat
eorum.*

Demum horum quinque librorum, & quos continet, textuum vis & auctoritas juris, qua pollent, in dubium vocari nequit. Hanc enim plenam illis attribuit

buit ipse, cujus jussu conscripti sunt, summus Pontifex Gregorius IX. ad quod faciendum ei nec potestas nec voluntas defuit: non potestas, quum tanquam legitime electus Papa eam a Christo supremo Ecclesiæ Capite D. Petro ejusque successoribus collatam hæreditario velut jure obtinuerit, extendentem se super universam Ecclesiam, omnesque illius oves, ad quas pascendas regendasque constitutus est. Non voluntas, utpote quam memoratus Pontifex in epistola Decretalium volumini præfixa satis declaravit, quum ait: *Volentes igitur, ut hac tantum compilatione universi utantur in Judiciis, & in scholis, distriktius prohibemus, ne quis præsumat aliam facere absque auctoritate sedis Apostolicæ speciali.* Ex quibus verbis patet, quod non solum ea, quæ in Decretalibus continentur, doctrinæ in scholis tradendæ, verum etiam rerum in Judiciis agendarum regulam ac normam esse voluerit, præcipue dum hos quinque libros corpori Juris Ecclesiastici inseruit, & in Ecclesia universa observari præcepit.

§. IV.

*Decretalium Liber VI. Clementinæ,
ac Extravagantes.*

XXVIII.

Tertium Juris Canonici volumen constituit inprimis liber VI. Decretalium. Quum enim priorum Pontificum decretis & sanctionibus novæ semper sequentium constitutiones succedere soleant, quibus pro rerum & temporum varietate ac usu aliqua suppleantur, alia emendantur, alia declarantur, ex eorum cumulo accrescente Bonifacius VIII. qui in locum Cœlestini Pontificis dignitati renunciantis susceptus est, anno 1294. vel ut quidam tradunt, an. 1300. hunc sextum librum confici jussit. Compre-
hendit autem partim Decretales posteriorum Pontificum epistolas, scilicet Innocentii IV. Clementis IV. Gregorii X. &c. immo ipsius quoque Gregorii IX. recentiores aliquas: partim & præcipue decreta e Conciliis Lugdunensibus primo & secundo desumpta. Ordo idem, qui in libris quinque Decretalium, etiam in hoc sexto observatur, ita ut in plures libros, titulos, capita & paragraphos sit divisus, libros scilicet
L 5. quin-

quinque & titulos septuaginta septem. Ad eum conficiendum usus est Bonifacius opera Guilielmi de Mandagoto Archiepiscopi Ebredunensis, Berengarii Fredelli, vel ut alii nuncupant Stredelii, Episcopi Bitterrensis, & Richardi de Senis, postmodum Cardinalis Diaconi S. Eustachii.

Sequuntur Clementinæ seu Constitutiones, quas quidem tum e Canonibus Concilii Viennensis circa annum 1311. tum e suis, quas edidit, colligendas curavit Clemens V. sed morte præventus cceptum opus absolvere nequii; cui tamen perficiendo postea manum admovit successor illius Joannes XXII. illudque anno 1317. auctoritate Apostolica munitum promulgari iussit. Dividuntur Clementinæ in quinque libros, titulos quinquaginta duos, & capitula instar Decretalium.

Non multo post idem Joannes XXII. quem ex obscuris parentum opificum natalibus velut extractum eximia virtus & doctrina per diversos Episcopi, Archiepiscopi, Cardinalis gradus ad supremæ demum dignitatis apicem evexit, viginti Constitutiones in 14. titulos distinctas publici juris fecit. Eo autem fatis erepto variæ aliæ per annos facile cen-

centum & quinquaginta sequentium Pontificum constitutiones, quum antea incerta sede vagarentur, fuerunt collectæ ac promulgatæ, ita ut priores, quarum auctor memoratus Pontifex, *Extravagantes Joannis XXII.* posteriores autem aliorum plurium Pontificum *Extravagantes Communes* nuncuparentur.

Omnes vero tres istæ tertii voluminis partes recensitæ plenum robur & auctoritatem, vimque legis tum in foro tum in scholis communibus Jurisperitorum suffragiis obtinent. Nam sextus liber Decretalium a Concilio Lugdunensi, *Extravagantes* vero Joannis XXII. ab auctore suo Pontifice fuerunt approbatæ: *Communes* autem, licet non fuerint auctoritate Apostolica collectæ, eadem tamen in publicam lucem editæ, ac trium seculorum pacifica possessione sunt munitæ.

Ex tribus igitur veluti membris, ut vidimus, nimirum totidem voluminibus, quorum primus Decretum Gratiani, alter quinque Decretalium libros, tertius librum VI. Clementinas & *Extravagantes* complectitur, ex his inquam tribus veluti membris totum vastumque Juris Ecclesiastici seu Canonici Corpus componitur. Equidem in recentioribus ejusdem

dem editionibus liber VII. Decretalium, & Institutiones Lancelloti adjiciuntur. Libri hujus VII. auctor est Petrus Matthæi Juris Consultus Lugdunensis, in quem *Bullas* quasdam, ut vocant, & Constitutiones posteriorum Pontificum congeffit, & secundum ordinem quinque librorum Decretalium distribuit, additis quibusdam titulis novis *de Cardinalibus, de Infulis novi orbis, de Annatis &c.* Alium librum VII. Decretalium condere cœperunt curis Gregorii XIII. Flavius Urlinus, Franciscus Alciatus, & Antonius Caraffa Cardinales, & post Gregorium vita functum Pinellus Aldobrandinus & Matthæus Columna item Præsules Purpurati: verum licet accuratione summa opus hoc perfectum fuerit anno 1598. jam jam in lucem edendum, mota quæstione, an liceret Jurisperitis quemadmodum in alios Juris Canonici libros, ita & in decreta Concilii Tridentini, quorum plurima libro huic inserta fuerunt, commentari, id quod a Pio IV. sub gravissimis censuris est prohibitum, mota inquam hac quæstione totum opus tantis laboribus & vigiliis lucubratum, tantisque votis ab orbe literato expetitur, est suppressum. Institutiones vero Juris Canonici a Joanne Paulo Lancelloto

Ioto Jurisconsulto Perusino, qui an. 1591. octogenarius obiit, in ipsa Romana Aul. conscriptæ, & in quatuor libros ad exemplum Institutionum Imperialium, variosque titulos divisæ, ac locupletissimo summorum virorum testimonio comprobatae fuerunt; sed quum nec his, nec libro VII. memorato ullius Pontificis auctoritas accesserit, vim quoque legis in foro Juridico nunquam obtinuerunt.

Jam vero Jus Ecclesiasticum seu Canonicum hucusque expositum præstantissimos Auctores scriptoresque longa serie numerat, e quibus sane plurimis magis nominatos heic prodere juvat. Alexander III. & Honorius III. PP. primam colligendis Epistolis *Decretalibus* manum admoverunt, quod demum grande Opus in quinque libros distributum perfecit Gregorius IX . . . Bonifacius vero VIII. diu in Curia versatus, & doctrina experientiaque insignis sextum librum adjecit. . . . Usi sunt Pontifices isti laborum sociis doctissimis Viris, suo loco jam laudatis. . . . Nicolaus Tudescus, alio nomine Panormitanus, vel Abbas, ob singularem elequentiam & exquisitam juris peritiam omnibus admirationi fuit. Docuit jus Canonicum in schola Senensi ac Parmensi, postea causarum in Rota Romana

mana Auditor, tum Abbas Monacensis O. S. B. demum Archiepiscopus & Cardinalis: scripsit commentarios in jus Canonicum, & librum de potestate Pontificis, Imperatoris, & Concilii . . . Martinus Alpilueta Navarrus, qui præter moralis ac Theologiæ Scholasticæ scientiam divini humanique Juris expertissimus erat, & insigne opus illud Consiliorum ac Responsionum post se reliquit . . . Augustinus Barbosa, qui de jure Ecclesiastico & officiis Ecclesiasticorum plurima & doctissima scripsit. . . . Hostiensis Cardinalis, vir præstantissimæ in utroque Jure scientiæ . . . Card. Tuscus, novem Tomis Conclusionum practicarum inclutus . . . Henricus Zoësius J. U. Doctor, Prosper Fagnanus, Decius, Hieronymus Nicolius, Cajetanus Felix Veranus, & novissime Petrus Antonius Danieli J. C. Romanus, qui in Jus Canonicum universum, partim etiam in Civile commentati sunt . . . Jacobus Pignatellius, de Petra, Card. de Luca, Jacobus Menochius, Thomas Sanchezius, qui consultationibus & consiliis juridicis in lucem editis celebres sunt. . . . Gonzalez splendidum Juris Canonici adparatum adornavit . . . Henricus Wagne-reck, Ernricus Pirrhingius, Jacobus Wiest-nerus,

nerus, Franc. Schmalzgrueber, Vitus Pichlerus, Ferdin. Krimerus, Franciscus Phœbeus, omnes e Societate Jesu. . . . Franciscus Schmieri & Ludovicus Engelius O. S. B. celebres Juris Canonici Professores Salisburgi, & Anacletus Reifensuelius Ord. S. Francisci, recentiore methodo clara, & docta jus Canonicum universum, uti hodie traditur, illustrarunt, ut nihil in hoc studii genere desiderari posse videatur: quod ipsum in aliquas Juris Canonici partes insigni cum laude præstiterunt Paulus Laymannus commentatione in tres libros Decretalium & Antonius Söllius S. J. lucubrationibus doctissimis de Legibus, de Judiciis, de Tributis, de Decimis & Novalibus de immunitate Ecclesiastica, Josephus Binnerus S. J. *Apparatu eruditionis ad Jurisprudentiam, præcipue Ecclesiasticam*, eruditissimo opere quatuor voluminibus constante. Alegambe & Sotvellus in Bibliotheca scriptorum Societatis ad sua usque tempora numerant quadraginta, qui de Conciliis, Jure Canonico, & Decretis Pontificum scribere: sed horum longe plures post illud ævum fuere.



CAPUT VI.

JUS HUMANUM POLITICUM
SEU CIVILE.

XXIX.

Proœmium.

Hominem a Deo optimo Maximo ad societatem & in hac mortali vita, & in altera semper duratura conditum fuisse res est adeo manifesta, & intime nota cuivis hominum, ut qui dubitare velit, ex hac ipsa societate humana exeat necesse sit. Ad istam vero conservandam, promovendamque naturæ Auctor indidit hominibus pignus quoddam æque pretiosum ac potens, nimirum propensam ad officia voluntatem, seu mutuam erga se *benevolentiam*, quæ fortissimum Societatis hujus vinculum esset, & re ipsa fuisset futurum, si non per naturæ ob peccatum originis corruptæ vitium nimis cito ex animis mortalium evanuisset, converso in se duntaxat, suasque utilitates nobilissimo hoc benevolentiae dono, quod quisque in alios profundere debuisset. Profecto hac ratione primas illas nascen-

Cap. VI. *Jus humanum polit. &c.* 177

nascentis mundi colonias amplasque familias, ubi nullus adhuc litium, judiciorum nullus strepitus audiebatur, fuisse administratas merito creditur, dum mutuis officiis & se & alios conservandi cura regnabat, quemadmodum in familia *Filiorum Dei* nuncupata, scilicet Sethi, Noemi, Abrahami contigisse admodum est verosimile. Hac vero sensim sublata necesse fuit, ne vix nata Societas periret, ut *benevolentia Justitia* succederet, quæ a communi hominum republica quodvis injuriæ genus pro virili arceret. Ut autem & hoc cœli munus non denuo vel ignorantia extingueretur, vel pravis corrumpere adfectionibus, providit Deus de Viris probis & sapientibus, quorum cæteri veneratione ducti *Æquitatem* illam, quam isti censuissent, amplecterentur. Cujus rei exemplum offert S. Scriptura (g). Nam multiplicata Abrahami & Lot ejus Nepotis familia, auctaque plurimum re familiari, ita ut una utrique capiendæ regio non sufficeret, ac propterea lites orirentur non sine domestici belli periculo, res tota ad æquitatis normam ab Abrahamo decisa fuit, dicente ad Lot: *Ne quæso sit jurgium*

(g) *Genes.* 13.

BIBLIOTH. DOMEST. LIB. XI.

M

gium inter me & te, & inter pastores meos, & pastores tuos: fratres enim sumus. Ecce universa terra coram te est: recede a me obsecro; si ad sinistram ieris, ego dexteram tenebo: si tu dexteram elegeris, ego ad sinistram pergam. Acquievit quam primum æquissimo Abrahami pronunciato utraque familia, & Abrahami sententia in rem judicatam transiit. *Abraham habitavit in terra Chanaan: Lot vero moratus est in oppidis, quæ erant circa Jordannem, & habitavit in Sodomis.* Postquam autem nec iste lites amice componendi modus hominum cupiditati atque lubidini satisfaceret, præsertim majoribus communitatibus seu civitatibus constitutis, demum Legislatores communi consensu in medium prodierunt, uti Phoronus in Græcia, Trismegistus in Ægypto, Solon Athenis, Lycurgus apud Lacedæmonas, Numa Pompilius Romæ, qui certas condiderunt leges, quibus quod æquum & bonum, statuebatur ac confirmabatur. Hinc jus finitur *Ars boni & æqui.* Nihil enim iniquius, quam leges quæ per æquum & bonum non reguntur. Patet igitur, qua ratione veluti per gradus in societate humana a benevolentia ad justitiam, ab hac ad æqui & boni æstimationem perventum fuerit.

XXX.

Ut autem humana societas facta te-
taque servaretur, veteres totam Juris
œconomiam in tres veluti partes accu-
rate non minus quam ingeniose divise-
runt, quarum prima complectebatur *vin-
cula societatis* ut vocabant, scilicet jura
personarum, rerum & actionum: secun-
da *Casus*: tertia *remedia*. Ad primam
quod adinet, jus personarum est pote-
stas personæ in personam, vi cujus una
præest, diciturque sui juris, altera sub-
est, atque ita est juris alieni. Ad hoc
juris genus spectat potestas mariti supra
uxorem, & patria supra liberos: Tuto-
rum supra impuberes pupillos, & Cura-
torum supra puberes: denique potestas
Magistratus in subditos. Jus vero rerum
in potestate, quam persona quæpiam in
rem aliquam obtinet, positum est, idque
vel titulo dominii, quemadmodum in res
sibi proprias: vel possessionis, quando
quis rebus alienis utitur salva earundem
substantia: vel servitutis, quum persona
vel res alteri obstricta est, ita ut ex ea
aut fructum percipere, aut aliquid circa
eam impedire possit, uti est jus stillici-
dii, luminis, tigni immittendi, itineris
per prædium &c. Denique jus actionum,
quod oritur vel ex *conventionione*, quando

180 Cap. V. *Jus humanum*

duo vel plures consentiunt in aliquid dandum vel faciendum, seque obligant ad illud præstandum, uti fit in *stipulatione*, *pollicitatione*, & quocunque pacto vel *contractu*, vel ex delicto, quo admissio poenæ infligendæ jus nascitur.

Ad secundam pertinent Casus ii, qui ad dissolvendam vel labefactandam societatem humanam tendunt, quod contingit, si quis invadat alienum jus, aut deserat proprium, vel violet *contractus*, quorum summa est, ut cum Jurisperitis loquar: *do ut des, facio ut facias*, aut *do ut facias, facio ut des*. Ex triplici enim hoc casu omnes in communitate scaturiunt

Tertia demum pars remedia comprehendit, uti *possessionis*, *alienationis*, *nullitatis* &c. quibus omnia suum in locum restituuntur secundum Juris præscriptum, quod præterea est vel *Municipale* seu cujusque civitatis: *Provinciale* cuique provinciae proprium: *Prætorium* seu *Honorarium*, quo Prætor corrigit vel supplet aliqua in Jure Civili, utilitati publicæ caussa: vel *Jus publicum* quod ad rei communis bonum, & *Privatum*, quod ad singulorum commodum spectat: *Jus Singulare*, quod contra communem Statutorum ordinem æquitatis naturalis gratia

tia est introductum, & *Privilegium* vocatur: vel *Jus consuetudinis*, quod vetustas publica adprobatione in morem perduxit: *Jus summum* seu strictum & apex juris, quod inflecti nequit: *Jus aequitatis*, quod est humanior & benignior juris interpretatio. Atque tres hæ partes, scilicet vincula, casus, & remedia, sunt velut elementa & cardines, intra quos tam sacrum & Ecclesiasticum, quam profanum & Politicum jus volvitur. Utrumque enim ad societatem humanam constituendam, bene gubernandam, ac conservandam tendit, illud præfigendo sibi finem supra naturam positum & felicitatem sempiternam, hoc pacem & tranquillitatem præsentis vitæ; quamvis minime negandum sit, Jus quoque Politicum, ipsasque leges civiles in Republica Christiana ordinari posse, optimeque ordinari ad altiorem finem, nempe ad bonum æternæ felicitatis. Nam ut ait S. Augustinus (h) de Imperatoribus Christianis: *Felices eos dicimus, si juste imperent. . . . Si suam potestatem ad Dei cultum maxime dilatandum, majestati ejus famulam faciant. . . . & si hæc omnia faciunt non propter ardorem inanis gloriæ, sed propter charitatem*
feli-

(h) *Lib. 5. de Civit. Dei.*

182 Cap. V. *Jus humanum*

felicitatis aterna. Non enim vivimus tempora Gentilium, aut veteris Reipublicæ Romanæ, cujus leges omnes erant de iis. quæ ad pecuniam, lucrum, & dominationem pertinebant, nullum vero caput de morum compositione, de animo ad virtutem formando, quum tamen tam multa ea de re in legibus Lycurgi & Solonis, unde sumtæ fuerunt duodecim Tabulæ, fuerint sapientissime præscripta: Neque Imperatorum Ethnicorum, qui vel ipsi leges tulerunt unice ad fovendam avaritiam suam, & ambitionem satiandam, vel iis adulandi studio sanxerunt Senatus & Magistratus usque ad divinitatis communicationem: Neque Tyrannorum, qui leges sanguine scripserunt, quemadmodum de Dracone Atheniensi Solon dixit, omnia pœnarum timore atque sævitie a subditis extorquentes. Christiana vivimus tempora, ubi futurorum spe bonorum præsentium studia nitantur ac temperentur necessum est. Ad hoc autem vel maxime opus est, ut Jus Politicum nihil statuatur, quod a fine supernaturali subditos abducatur, quod cultui divino, & tum Evangelicis, tum S. Matris Ecclesiæ præceptis adversetur, quod Christianos mores, veræque virtutis culturam pessumdet. Nimis enim arctum
inter-

intercedit vinculum inter felicitatem alterius, & hujus vitæ, ita ut si illa negligatur aut posthabeatur, etiam ut plurimum ista pessum eat. Si omnes ævi Christiani Annales perlustrare velimus, facile deprehendemus, nihil magis pacem, tranquillitatem ac felicitatem rerum publicarum, regnorum, ipsiusque Romani Imperii turbasse ac profligasse, quam religionis & justitiæ neglectum, Ecclesiasticæ potestatis violationem, corruptelam morum, & Imperii ac Sacerdotii dissidium. Cujus rei licet adeo manifesta sint exempla, malumus tamen pessimis imbuti principiis, & aurium tenus caducis hujus vitæ bonis immergi temporariæ felicitati contra jus & fas inhlando & hanc, & sempiternam illam perdere. Verum nunc ad singulas Juris Politici seu Civilis partes penitus inspiciendas nos convertamus, quales sunt præcipuæ: *Codex Justinianus, Pandectæ seu Digesta, Institutiones, & Novellæ seu Authentica.*

§. I.

Codex Justiniani.

XXXI.

Primus labor, quem Justinianus Imperator ad integrum Juris corpus condendum suscepit, fuit omnes Imperatorum

priorum constitutiones sacratissimas, quas jam antea veluti vagas atque dispersas Gregorius & Hermogenes Jurisconsulti privato studio, Theodosius vero Junior publica auctoritate in peculiare codices tam vastos quam ordinis expertes conjecerant, omnes inquam in unum codicem colligere, ita ut truncatis superfluarum, similium, vel contradicentium rerum loliis ac spinis luculenter omnia inter se consonarent; id quod etiam immensis laboribus & curis potissimum Triboniani, Quæstoris sacri Palatii, atque Theophili, aliorumque Juris Consultorum perfecit, suoque Codicem illum nomine, scilicet *Justinianeum* insignivit, ediditque A.C. 529. VII. Idus April. anno Imperii Tertio. Confectus autem fuit a Decemviris huic operi præfectis intra anni unius spatium, & abolitis prioribus tot voluminibus in Foro vim obtinere jussus. Verum Codex iste, qui ante omnes alios libros, quos posteritati reliquit Justinianus, in lucem prodiit, ad nostra usque tempora non pervenit. Nam triennio illo, quo alterum Pandectarum opus moliebatur, varias prout reipublicæ utilitas postulare videbatur, Constitutiones idem Imperator edidit, & præcipuas Veterum Juris Consultorum controversias quinquaginta

Deci-

Decifionibus definivit; qua re factum est, ut non pauca prædicto in Codice immutata, correctâ, abrogataque fuerint, quæ rursus extra corpus Juris Justiniani vagabantur. Quare providentia Imperatoris exigente, ut tam novæ *Constitutiones*, quam *Decifiones* prioribus adgregarentur, ne imperfectum quid relinqueret, primum Codicem a Triboniano aliisque quatuorviris sapientissimis emendari, & quibusdam rejectis, aliis additis locupletari, atque secundis curis in lucem dari mandavit anno 534. XVI. Kalend. Decembr. imposito huic novo Codici *repetita lectionis* nomine: cujus rei rationem ipse dedit in sua *de emendatione Codicis* Constitutione: *quoniam secundæ editiones a Priscis repetita lectiones adpellari consueverint.* Duo ingentia hoc Codice beneficia Jurisprudentiæ præstitit Justinianus: primo quidem, quod Constitutionum Imperatoriarum ab Hadriano ad sua usque tempora veluti medullam singulis titulis secundum ætatis seriem, qua Cæsares Imperii fasces moderati sunt, distinctam hoc Opere suo complexus fuerit, tum quod quinquaginta *Decifiones* suas, de quibus dixi, eidem inseruerit. Accidit enim non multo post latas XII. Tabularum leges, ut Jurisconsulti, quibus eas

explicandi ac respondendi cura commissa fuit, in contrarias partes abierint, ita ut aliter Bruto, aliter Scævola, Servio aliter placuerit, uti Tullius animadvertit; quin eo res pervenit, ut sub Augusto Imperatore & sequentibus temporibus latius semper se diffundente opinionum & sententiarum divortio resonaret Forum & Curia perpetuis Jurisconsultorum discordiis, utpote qui duas in sectas se diviserunt, quarum primæ caput erat Atteius Capito, alterius Antistius Labeo, Viri potentes ingenio, sed indole & moribus multum dissimiles: illo Aulicis officiis obnoxio & honorum adpetente, isto stoicam adfectante severitatem, & avitæ libertatis vindice: uterque magnam sectatorum appendicem post se traxit. Neque æstus hic Jurisconsultorum aperta fronte dissentientium remisit usque ad Antonini Pii tempora, quibus aliud hominum horum genus surrexit, qui mitiore indole præditi media inter opiniones contrarias via incescere, dicti *Erciscundi* vel *Miscelliones*. Justinianus denique hisce velitationibus finem, & vitiligiatoribus silentium imposuit, dum post primi Codicis editionem usque ad annum 532. quinquaginta *Decisiones* promulgavit, ac in posteriorem suum Codicem referri jussit: qua

qua de re Imperator ipse (i) ita loquitur: *Dedititios quidem per Constitutionem nostram expulimus, quam promulgavimus inter nostras Decisiones, per quas suggerente nobis Triboniano Viro Excelso, Quaestore nostro, Juris antiqui altercationes placavimus. Circumscribitur autem totum Opus Codicis posterioris duodecim libris ad imitationem XII. Tabularum, quorum tamen ultimi tres longe post novem primos compositi fuerunt. Liber primus agit de Jure sacro, Legibus, Rescriptis, & Magistratibus. Secundus de iis, quæ ad judicialia, ad restitutionem in integrum, ad satis dandum, ad juramentum calumniæ pertinent. Tertius de Judiciis, de vindicationibus, de damno, de actionibus agit. Quartus de conditionibus, obligationibus. Quintus de sponsalibus & aliis juribus maritum inter & uxorem: de Tutelis, ac Curationibus. Sextus de Servis & libertis, de bonorum possessionibus, ultimis voluntatibus, & successione legitimis. Septimus de manumissionibus, præscriptionibus, & usucapionibus, de sententiis & appellationibus. Octavus de interdictis, pignoribus, exceptionibus, stipulationibus, de patria potestate, consuetudine, donationibus. Nonus de judiciis publicis, &*

cri.

(i) §. 3. *Inst. de Libert.*

188 Cap. VI. *Jus humanum*

criminibus. Decimus *de jure fisci, & municipali.* Undecimus *de universitatibus & censibus.* Duodecimus *de dignitatibus, & diversis officiis.*

§. II.

Pandectæ seu Digesta.

XXXII.

Absoluto Codice aliud Opus, & prior grandius est molitus Princeps hic immortalī gloria dignus. Quum enim, ut erat sagacissimi ingenii, vidisset veterum Jurisconsultorum volumina, e quibus oracula juris petebantur, ad eum ascendisse numerum, ut iis pervolvendis (quod tamen necessarium erat ad causas decidendas) nulla hominum ætas sufficeret, anno Imperii sui quarto laborem hunc aggressus est, humanis viribus vix non superiorem. Erant enim duo librorum millia, & in his trecenta millia versuum sive sententiarum, quibus omnes Romanorum sanctiones ab urbe condita usque ad Justiniani tempora continebantur. Curam vero huic operi perficiendo commisit rursus Triboniano, cujus felix ingenium, acre judicium, & indefessum studium satis superque, perspe-
ctum

Etum habebat, destinatio ad laborem integro decennio. At Tribonianus adjunctis sibi sedecim aliis majorum gentium Jurisperitis, ac in ipso Cæsaris palatio Constantinopoli congregatis, intra triennii spatium totum absolvit negotium, hac quidem ratione: Illis, quæ absoleta jam erant, aut superflua & inutilia forent, rejectis atque expunctis, necessaria solum atque utilia collegerunt: tum quæ obscura implicataque videbantur, dilucide ac sine ambagibus aut explicarunt, aut commode sunt interpretati: porro ut sententiæ veterum Jurisconsultorum, quibus auctoritatem conscribendi leges suas ac interpretandi Principes Antecessores indulserunt, ordine ac sensu cohærent, operam dabant: demum singulis legibus illius Jurisconsulti, e cujus scriptis lex deprompta fuit, nomen præfixere. Ita confectum Opus nomen obtinuit *Pandectarum & Digestorum*: prius quidem ratione materiæ a græco *πᾶν ὅμνη*, & *δὶ λόγων* capio, quoniam omnes Disputationes *decisionesque* legitimas undique collectas, vel potius earum nucleum intra sinum suum continebat, unde *jus enucleatum*: alterum vero ratione formæ, quum antiquis sanctionibus & responsis in unum volumen collectis, non

non temere ac confuse sed certo ordine in titulos , & his in leges , & legibus in paragraphos distributis cuncta probe digesta fuerunt. Atque sic oblatum a Triboniano lectissimum Pandectarum corpus, sententiarum gravitate, prudentia, antiquitatis eruditione, ac legum æquitate plenum, Justinianus publici juris fecit A. C. 529. VIII. Kal. Januarii, auctoritate vero Imperatoria eodem an. III. Kal. Janu. corroboravit.

Equidem duo illa voluminum priscorum millia, e quibus confecta fuerunt Digesta, in quinquaginta libros, quibus modo constant, contracta fuerunt. Sed Jurisperiti non tam ad istorum librorum numerum, quam ad septem Tractatus seu partes in divisione Digestorum attendunt. Harum prima inscribitur *τὰ πρώτα*, quibus verbis significantur juris ac judiciorum primordia, quæ quatuor libris explicantur. Secunda doctrinam proponit de judiciis tam universim quam peculiariter spectatis, absolviturque septem libris a quinto usque ad duodecimum. Tertia diversis *contractuum* speciebus occupatur, numeratque libros octo. Quarta agit de Hypothecis, Emptionibus, Locationibus, usuris, probationibus, nuptiis atque tutelis; & *umbilicus*

us Pandectarum vocatur, estque octo libris circumscripta. Quinta, quæ de Testamentis inscribitur, & continet explicationem ultimarum voluntatum, successionem, & legitimam libris novem. Sexta de bonorum possessione, interdictis, actionibus & exceptionibus tractat, & libros septem complectitur. Septima demum doctrinam de verborum *obligatione*, deque delictis tam privatis quam publicis comprehendit quinque libris. Porro aliam post restauratum in Italia Jurisprudentiæ studium partitionem machinatus est Bulgarus J. C. uti vulgo creditur, quo Auctore Digesta in tria volumina distribuuntur, quorum primo nomen Veteris Digesti viginti quatuor libros comprehendentis imposuit: Alterum Jus *Infortiatum* adpellat, quia multas fortes leges in se continet, eique quatuordecim libros tribuit. Tertium Digestum novum nuncupat, reliquis ad finem usque libris conclusum. Verum hæc particio, quemadmodum ævo illo eam ut novam plures scholæ ambabus manibus fuerant amplexatæ, ita hodie parum recepta est, antiqua illa Justinianeæ in pristinam sedem restituta.

§. III.

Institutiones.

XXXIII.

Hæ ab instituendo sic dictæ aliud non sunt, quam prima totius Juris scientiæ elementa. Quippe Justinianus Codice in lucem emisso, ac Digestis jam jam compositis, ut ad gravioris momenti studia hæc, & Jurisprudentiæ arcana viam sterneret, ejusque alumnis planiorem commodioremque redderet, prima legum principia & velut Juris primitias e diversis ac sincerissimis fontibus in compendium colligi jussit, constitutis ad hoc negotium peculiari mandato Viris Eximiis Triboniano, Dorotheo, ac Theophilo, quorum incredibilem solertiam summis Imperator ipse laudibus extollit (k). Fontes autem, e quibus hi Triumviri quasi succum totius doctrinæ hauserunt, fuere primo quidem Commentarii doctissimi Veteris Jurisconsulti Gaii, cujus Viri lucubrationibus adeo delectabatur Justinianus, ut eum licet ævo priorem *suum* adpellare non dubitaverit: Tum oracula e Romanorum legibus, Plebiscltis, Senatusconsultis ac

Respon-

(k) §. 3. *Inst. Pream.*

Responsis Prudentum jam ante Digestorum libris inserta : Demum & Antecedentium Principum , & vel maxime ipsius Justiniani Constitutiones & Decisiones , quarum ingens in Institutionum volumine numerus recensetur. His igitur e fontibus prodire Institutiones , de quibus loquimur , tanquam Epitome totius Juris Civilis , in quo breviter , dilucide ac justa ratione comprehenditur , quidquid ad cognitionem eorum , quæ in universo Corpore Juris copiosissime tradita sunt , pertinere videtur. Quamvis autem primum post Pandectarum Opus jam absolutum fuerint compositz , nihilominus fere uno mense prius quam Digesta , nimirum an. 533. 21. Novembris promulgatas esse satis constat , ita ut compositionis tempore posteriores Pandectis , promulgationis vero priores his merito dici queant. Illud tamen fateri oportet , & Institutiones & Digesta non nisi III. Kalend. Januarii seu 30. Decembris plenam obligandi vim ex auctoritate Imperatoria obtinuisse. Totum opus quatuor libris absolvitur : Primus tractat de jure universim ac de personis , numeratque titulos 26. Secundus usque ad libri tertii Titulum decimum quartum de rebus & rerum dominio. Ter-

tius a titulo decimo quarto usque ad titulum sextum libri quarti de *obligationibus*, quæ ex *contractibus* vel quasi *contractibus*, ex delictis vel quasi delictis descendunt. Quartus a titulo sexto ad decimum sextum de actionibus, & tribus postremis de judiciis, ita ut universim titulos 99. totum opus Institutionum complectatur. Ipsi vero tituli rursus in *Rubricas* (ita dictas, quod inscriptiones cocco vel minio factæ fuerint, canente Juvenali *Satyr. 14. Perlege rubras majorum leges*) & in paragraphos dividuntur. Singularis autem prærogativa & proprium decus hujus Institutionum voluminis est, quod quum Pandectarum & Codicis opus post fata Justiniani sive per invidiam, sive per æmulationem a sequentibus Imperatoribus in varias formas pro cujusque libidine velut coctum atque recoctum fuerit, istud nullo quod passum esset vitio, in pristino natalium suorum splendore intactum ad nos usque pervenerit.

§. IV.

Novellæ seu Authentica.

XXXIV.

Harum nomine veniunt Constitutiones, quæ post Codicem repetitæ Lectionis conditæ editæque, ac tanquam novellæ plantæ reliquo corpori Juris insertæ, fuerunt. Maluit enim Justinianus Imp. in aliud separate volumen novas Constitutiones has transferri, quam toties faciem Codicis aliis atque aliis quotidie adjectis immutari, quemadmodum ipse indicat sequentibus verbis (1):

„ Nulla alia extra corpus ejusdem Co-
„ dicis constitutione legenda, nisi postea
„ varia rerum natura aliquid novi crea-
„ verit, quod nostra sanctione indigeat.
„ Hoc etenim nemini dubium est, quin
„ si imposterum melius invenietur, &
„ ad Constitutionem necessario sit redi-
„ gendum, hoc a nobis & constituatur,
„ & in aliam Congregationem confera-
„ tur, quæ Novellarum nomine Consti-
„ tutionum significetur., Quoniam ve-
ro novæ Constitutiones istæ a Justiniano
conditæ juxta ante promulgatum vel sup-
pleant, vel corrigunt vel confirmant, vel
sub-

(1) *De emend. Codic.*

subinde novum constituunt, etiam *Jus postremum* seu *Novissimum* nuncupantur. Fere omnes illarum græce fuerunt conscriptæ dictæque *Νεωτάτην νομον*, paucis exceptis, nimirum sex, quæ in lingua latina prodierunt: postmodum vero omnes in idem idioma translatae sunt duorum Interpretum beneficio. Unus eorum celebratur Julianus, qui circa an. 570. vixit, *Epitomator* dictus ab epitome, in quam Novellas Justiniani plerasque omissis prologis & epilogis satis eleganti sermone contraxit: alter quorundam iudicio est vel Bulgarus, Irnero J. C. coætaneus, vel Berguntio Pisanus, vel quod verosimilius Græcus quidam Anonymus ætate non multo inferior Justiniano: hic quisquis fuerit, barbaro quidem stylo, usus est, servato tamen ad amussim verborum significatu & ordine, unde *versio latina vulgata*, quin *Authentica* dicitur, estque hæc relicta Juliana nunc in scholis & foro recepta. In numero Novellarum statuendo non conveniunt Auctores: Julianus centum viginti quinque, Vulgata octo supra nonaginta, alii centum quadraginta quatuor, quidam omnino centum sexaginta & octo producant. Non minor est controversia circa vim obligandi, qua pollent novel-
lae

1æ Constitutiones istæ, seu Authenticæ. Sunt, quæ vim legis solum tribuunt illis, quibus *glossæ* sunt adpositæ, non item aliis, quæ glossis carent: alii vero sunt, qui utrisque illam vendicant, præsertim in Germania, ubi Novellæ tanquam pars Juris Justiniani sunt receptæ.

Atque hæc sunt quatuor illa volumina, quibus veluti membris componitur Corpus Juris Civilis vulgatum, Auctore vel Reparatore incomparabili Principe ac Imperatore Justiniano, qui licet in omnibus hisce operibus atque laboribus usus fuerit industria Illustrum Virorum, præcipue Triboniani, Dorothei ac Theophyli, tamen & ipse iis ordinandis recognoscendisque operam, ac plenissimo juris robore muniendis majestatem suam indulgit. Universe vero probe notandum est id, quod unanimi consensu Juris Doctores velut regulam certam statuunt, nimirum si occurrat, uti non raro contingit, antinomia seu contradictio quædam inter leges in corpore juris contentas, tunc posteriorem derogare priori (m), ita ut leges Institutionum Digestis, & leges Codicis emendati Institutionibus, & Novellæ tanquam posteriores derogent omnibus prioribus.

§. V.

(m) *L.28. ff. de LL.*

N 3

Feuda seu Consuetudines Feudorum.

XXXV.

Memoratis quatuor partibus alia non minus insignis accessit, corpori Juris civilis inserta, scilicet *libri Feudorum seu Consuetudines Feudales*, ut vocant; partim ex Constitutionibus Imperatorum, qui in Occidente dominabantur post Carolum M. nempe Lotharii, Conradi II. & III. Henrici II. Friderici I. &c. partim ex observationibus, quas Gerardus Niger, & Obertus de Orto Consules Mediolanenses scripto adnotarunt, collectæ. Ut autem hæ consuetudines Corpori juris infererentur, rei magnitudo, utilitas, atque necessitas suasit: quippe Jus Feudale non solum circa agros & prædia fertilissima, pagos & oppida, verum etiam circa integros principatus, immo regna occupatur; neque tantum ad Laicos, sed etiam Clericos cujuscunque ordinis, & quavis Ecclesiastica dignitate fulgentes pertinet: quin quod causæ Feudales in ipsis Principum ac Regum Curiis, supremisque Imperii tribunalibus agitentur? Est vero Feudum, prout Jurisperiti finiunt, *contractus, quo alicui conceditur res im-*
mo-

mobilis cum translatione dominii utilis cum onere fidelitatis & obsequii. Nominis etymon derivant quidam a Germanica voce *Feida* inimicitiam & bellum significante: prædia enim bello occupata & a victoribus inter milites suos distributa Feuda nuncupabantur: alii a Fide ac fidelitate, quæ Longobardis & Italis *Fede* dicitur. Origo quam antiqua, quemadmodum constat e libro primo Feudorum, tam diversis interpretationibus est obnoxia. Ut in medium proferam id, quod verosimilius hac in re videtur, primum & rude adhuc initium a gentibus plus bellicosis, quales Germani semper fuerunt, repetendum est, quæ jus omne, velut olim Spartani, ad disciplinam remque militarem transtulerunt. Igitur qui victores in bello exstiterant, subjugatæ nationis prata, prædia, vicos & urbes tanquam virtutis ac magnanimitatis præmia strenuis militibus ac belliducibus suis vel donarunt, vel ad utendum fruendum concesserunt, reservato sibi jure supremo, & exacto fidelitatis & obsequii præstandi juramento qua in re secundum variarum gentium mores variæ quoque consuetudines fuerunt observatæ introductæque. Tum ubi barbaræ gentes Italiam longe lateque inundarunt Longobardi e Germania, præsertim ea ex

parte, quæ Saxonia dicitur, prædeuntes magnamque Italiæ partem, quæ olim Longobardia, hodie Lombardia vocatur, occupantes circa A. C. 568. regnante Justino II. Imp. e patria sua Feudorum jura & consuetudines secum adduxerunt, hisque perinde ac in patria sua usi sunt, quæ tam firmas egere radices, ut everso etiam a Carolo M. Longobardorum regno (quod cum Alboino an. 568. incepit, & cum Desiderio Rege ultimo desit an. 773.) extirpari nequaquam potuerint, sed ipsos victores in leges & jura sua pertraxerint. Quippe memoratas consuetudines tum Mediolanensium in Italia, tum Boiorum, Suevorum & Francorum in Germania moribus, tum Lotharii, Conradi, Fridrici aliorumque Imp. Constitutionibus locupletatas privati quidam Jurisconsulti, maxime Gerardus Niger & Obertus de Orto, quorum memini, Consules Mediolani (quæ civitas regni Longobardici & in ea dominantis Juris Feudalis olim Metropolis erat) literis mandarunt, & in formam juris redigere sunt aggressi. Verum primi hi Architecti hujus operis rerum magis forensium quam scholasticarum periti satis confuse, hispide, ac sine decenti ordine rhapsodias hasce suas in volumina retulerunt, quas posteri Ju-
ris-

risconsulti, maxime Cujacius emendavit, ac breviorē sed meliorē interpretationis genere illustravit. Ita latius semper non solum per Italiam, sed etiam per Germaniam, Galliam &c, tam per forum Ecclesiasticum quam civile, ob insignem tum pacis tum belli tempore utilitatem Jus istud Feudale se diffudit, cujus consuetudinum ea modo est in Imperio Romano auctoritas, ut vim legis obtineant, & ad dicendas causas recte allegari queant, non quidem eam ob rationem, quod Longobardi eas introduxerint, aut quod memorati Jurisconsulti illas conscripserint ac sint interpretati (utpote qui jus condendi potestate caruerunt) sed quia tum communi omnium Imperii Statuum consensu, tam Profanorum quam Ecclesiasticorum, tum usu memoriam hominum excedente fuerint receptæ, ac demum a Friderico II. Imp. in Corpus Juris, quo utimur, referri jussæ sint. Dividuntur autem in duos libros, & hi rursus in titulos 86. & isti in capitula, & hæc in paragraphos: quibus adnexus est alius liber, qui adpellatur quintus de Feudis. In his recensentur diversæ species Feudi, ordinantur successiones in feudis, explicantur *obligationes* tum *Domini directi* tum *Vasalli* seu *Clientis fiduciarii*, ape-

riuntur fontes, ob quos amittitur feudum præsertim ex delicto *feloniæ*; & demum agitur de Judice in causa Feudali.

Jam expositis ordine partibus Juris Civilis, ejusque Oeconomia, æquum videtur esse, ut præstantes in scientiæ hujus palæstra Scriptores in medium producamus. Post primos illos veterum Imperatorum Jurisconsultos, eosque qui Justiniani ævo floruerunt (quorum in historia Jurisprudentiæ meminimus) quatuor sectæ seu scholæ Jurisperitorum surrexere, quarum prima fuit Irneri seu Wernerî, e qua prodierunt præter alios Martinus Cremonensis, Bulgarus, Hugolinus a porta Ravennate &c. Hæc schola legibus velut recens sub Lothario renatis tanta religione adhæsit, ut non modo in administratione rerum civilium, sed etiam in docendi ratione atque ordine Justiniani præceptis quasi sacramentum dixisse videretur. Altera fuit Azonis, quem Baldus *fontem legum* adpellavit; assecclas habuit reliquis celebriores Balduinum Bononiensem, & Rosfredum Beneventanum. Hi jam liberius nonnihil & velut in apertum juris campum excurrere cœperunt. Tertia Accursii, sub cujus disciplina eminere Dinus Florentinus, Bartholomæus a Capua, Cinus Pistoriensis, & Albericus de Ro-

Rosata. Schola ista uberior fuit Irneriana; & in jure interpretando notis suis leges servire cogebat potius, quam notas legibus. Quarta demum erat, quam Bartolus erexit, quem multi ab ingenii subtilis præstantia & vasta Juris scientia magnis extollunt laudibus; apud non paucos tamen ob prolixitatem in commentando, contradicendi studium, & horridum dicendi genus non modice vapulat. Sequaces habuit Baldum, quo absente Bartolus scholam suam frigere arbitrabatur, Alciatum Mediolanensem, Budæum, Antonium Augustinum, Franciscum Hotomanum. Posterioribus seculis magnum sibi inter Jurisperitos nomen peperere Jacobus Cujacius, vir acuti ingenii & oris, sed varia fortuna usus, Petrus Faber, Joannes Udalricus Zasius, Franciscus Balduinus, Hugo Donellus, aliique viri doctissimi in Gallia ex illustri apud Bituriges schola . . . præterea Gregorius Tolosanus, Didacus Covarruvias, Bessoldus, Gothofredus, Andreas Vallengis, Manzius, Ferdinandus de Valentibus, Franzius, Gletleus . . . Gaillius, Schneidewinus, Mynsingerus, Lauterbachius, Samuel Stryckius, Brunemannus, Müllerus, Heineccius, præter alios, qui utilissimam Jurisprudentiæ Civili operam hodie adhuc navant.

CAPUT



CAPUT VII.

JUS PUBLICUM ECCLE- SIASTICUM.

XXXVI.

Proœmium.

Novum hoc fortasse Jus, immo novissimum esse alicui videbitur, quum nemo hætenus, quantum scio, illud in lucem ediderit, hoc nomine insignitum. Verum mirari desinet, quisquis quid rei sit Jus publicum civile, cujus studium tantis hoc ævo laudibus extollitur, tantoque ardore suscipitur, attentius consideraverit. Quemadmodum enim istud non circa leges & jura, quæ ad privatos cives eorumque commodum ac felicitatem pertinet (quod Juris civilis privati negotium est) sed circa universum Reipublicæ statum, hoc est, Imperium Romano-Germanicum, ejus Caput Augustissimum, præcipuaque membra, circa Comitia, Judicia, & Leges Imperii versatur, ita & Jus publicum Ecclesiasticum post constitutum Jus Canonicum, quo velut privato Jure subditi Ecclesiæ regun-

Cap. VII. Jus publicum ecclesiast. 205

guntur, & ad felicitatem sempiternam ordinantur, ad ea quæ ad universum Hierarchiæ Ecclesiasticæ statum, nempe Ecclesiam Romano-Catholicam, ejus in terris supremum Caput Pontificem, diversa-que membra, Cardinales Patriarchas, Primates, Archiepiscopos, Episcopos &c. item ad Concilia Oecumenica, Provincialia &c. ad Romanæ Curiæ Tribunalia, Legesque pro toto Christiano orbe latas spectant, singulatim explicanda pertractandaque sese convertit. Et vero juris hujus Publici Ecclesiastici studium non minus utile ac necessarium est, quam illud Juris Publici Civilis, quum & dignitate, amplitudine rerum, eruditione, majestateque isto longe superius esse videatur. Nec defuerunt unquam in Ecclesia Romana, qui de his ipsis, quæ recensui, Juris publici Ecclesiastici capitibus summo ingenio & pari ubertate doctrinæ scripserunt, ut ingentia de summorum Pontificum auctoritate, de hierarchia Ecclesiastica, de Conciliis, de Ecclesiæ regimine volumina testantur, quamvis non hunc ordinem, nomenque iis indolserint: Neque credo deerunt, qui quod negotium pro instituti mei ratione quam brevissime heic pertracto, etiam hoc characterere *Juris publici Ecclesiastici* insignitum

tum doctius feliciusque illustrabunt. Quare rem totam ad quatuor capita referendam esse censeo, nimirum ad personas Hierarchiæ Ecclesiasticæ (harum enim omnium dignitas & officia publici Juris sunt) ad Concilia, ad Curiam Romanam tribunalia, & ad leges, quæ universam Ecclesiam afficiunt, quemadmodum hoc ipso ordine Jus Publicum Civile ab Auctoribus proponi consuevit.

§. I.

Hierarchia Ecclesiæ.

XXXVII.

De Hierarchia, quæ Græcis sacrum Principatum significat, S. Dionysius Areopagita, qui tempore Apostolorum vixit, ita scribit: *Qui Hierarchiam dixit, omnium simul sacrorum ordinum dixit dispositionem* (n). Per ordines autem intelligit ipsas dignitates, officia & gradus illorum, qui tanquam membra insigne corpus hoc componunt. Doctor vero Angelicus (o) *Dicendum, inquit, quod Hierarchia est sacer Principatus; in nomine autem Principatus duo intelliguntur,*

(n) *Lib. de Eccl. Hier. c. 1.* (o) *1. p. 9. 108. 4. 1.*

zur, scilicet ipse Princeps, & multitudo ordinata sub Principe. Quare graviter fallit, falliturque Petrus Suavis Polanus in sua de Concilio Tridentino historia, gravissimis erroribus æque ac fraudibus scatente, dum „ Hierarchiam vocem ac „ significationem alienam esse ait, ne di- „ cam contrariam divinis effatis, & ve- „ teris Ecclesiæ consuetudini, & vocem „ a quodam inventam, qui etsi alicujus „ antiquitatis, quisnam & quando existi- „ terit, haud satis constat, qui alioqui „ est scriptor hyperbolicus, & quem „ in usu illius vocis, aliarumque quas „ ipse excogitavit, nemo ex antiquis „ imitatus est „ ita ille. Verum nisi gravis simum SS. Doctorum, Oecumenicarum Synodorum, ac summorum Pontificum per decem jam secula judicium contemnere velit Suavis (vero nomine Paullus Sarpi) fateatur necesse est, Hierarchiæ nomen S. Dionysium, quem dixi, operi suo celeberrimo præfixisse: hujus enim libros hoc titulo insignitos S. Gregorius sub nomine Dionysii, quem antiquum & venerabilem Patrem adpellat (p), palam adducit, cujus exemplum postea secuti sunt: S. Martinus P. M. & Martyr in Concilio Romano :

(p) *Hemil.* 24.

mano: S. Agatho item Pontifex in epistola ad Constantinum IV. Imperatorem: Nicolaus I. in quadam epistola ad Michaellem Cæsarem: Oecomenicum Concilium sextum in Act. 4. & Septimum in Act. 2. Porro S. Maximus Martyr, & D. Thomas eos libros tanquam genuinum Dionysii Areopagitæ partum reveriti sunt, ac interpretati. Quodsi ante S. Gregorium operis hujus vestigium reperire non licet (quæ criticorum quorundam ratiocinatio est) quid mirum, quod ethnicis in Christianos eorumque scripta ubique sævientibus horum memoria librorum per plura secula velut sepulta jacuerit, quum compertum nobis sit, quid Aristotelis aliorumque præstantissimorum scriptorum operibus temporum injuria inter barbarorum incursiones acciderit. Partitur autem Dionysius Hierarchiam in Cœlestem seu Angelicam, in Legalem, & in Ecclesiasticam. De cœlesti sic loquitur (q): „ Quædam igitur Angelorum est, & Archangelorum hierarchia, & supermundialium Principatumum, & Potestatum, & Virtutum, Dominationumque, & divinorum Thronorum, aut æquipotentium Thronis Essentiarum, quas Theologia attente, & semper circa Deum esse, & post Deum tradit, Cherubim

(q) *Cap. 1.* 628

„ eas hebræorum voce, & Seraphim no-
„ minans &c., De altera vero seu Le-
gali (r) hæc docet: „ Post illam vero
„ cœlestem, supermundanamque hierar-
„ chiam ad nostra quoque summa illa
„ Divinitas sua sacratissima munera, be-
„ nigne derivans, cum parvuli (juxta
„ eloquium) essemus, legale indulgit sa-
„ cerdotium, obscuris variarum rerum
„ imaginibus & figuris, a primitivis suis
„ remotissimis, signisque haud facile pe-
„ netrabilibus &c., Ac si diceret: post
hierarchiam Angelicam sacrosancta Trin-
tas, quæ triplicis Hierarchiæ principium
est, inter homines quoque hierarchiam
instituit; at imbecilli ceu parvulorum in-
telligentiæ respondentem, dum populo
electo lege per Moysen data Legale Sacer-
dotium condidit, quod tamen nonnisi
figura erat legis novæ veri Sacerdotii. De-
mum ad eam, de qua sermo mihi est;
Ecclesiasticam Hierarchiam progreditur,
his usus verbis: „ Porro profectiorem eru-
„ ditionem Hierarchicam nostram Theolo-
„ gia vocat impletionem hanc illius (sci-
„ licet Legalis) sacrumque adpellans
„ finem. Est autem tam cœlestis illa
„ perfunctio, quam legalis, quarum no-
„ stra

(r) *Cap. 5.*

BIBLIOTH. DOMEST. LIB. XL O

„ ſtra hæc, quod ſit media, utriusque
 „ extremitates apprehendit ſocietate mi-
 „ rabili: ac ſuperiori illi quidem, ſpiri-
 „ tualibus intelligentiis fulgoribusque
 „ communicat; inferiori vero, quæ ſig-
 „ nis carnalibus variatur, perque ipſa
 „ ſacratius promovetur in Deum,,. Quæ
 Dionyſii verba ſic interpretari licet: Quem-
 admodum homo corpore conſtans ac ſpi-
 ritu medius eſt Angelum inter & bru-
 tum, ac cum utroque participat, ita Hiê-
 rarchia Eccleſiæ, legisque gratiæ me-
 dia eſt inter Angelicam, quæ ſignis ſen-
 ſui ſubjectis penitus caret, ac inter Le-
 galem, in qua univerſa per ſigna atque
 figuras peracta ſunt.

Jam vero hæc, de qua ultimo loco
 dixi Eccleſiaſtica Hierarchia, quamvis ab
 ipſis Eccleſiæ Catholicæ cunis unanimi
 SS. Patrum & fidelium conſenſu agnita
 probataque fuerit, nullibi tamen manife-
 ſtius ſe ſe prodidit, quam in Concilio
 Tridentino. Quum enim hæretici, præ-
 fertim Anabaptiſtæ, qui Ordinem omnem,
 graduumque diſtinctionem in Eccleſia Chri-
 ſti abolere conati ſunt, eam ad conca-
 vum lunæ damnarent, ſummo ſtudio,
 ſummaque contentione in *ſeſſione vige-
 ſima tertia* res hæc agitata, & examini
 Theologorum ſubjecta fuit, quos inter
 Petrus

Petrus Sotus, Familiæ Dominicanæ decus insigne, ac Pontificis Theologus sententiam suam hunc in modum dixit: Esse in Ecclesia Hierarchiam, nimirum potestatem ac prærogativam gubernandi, dicente Apostolo: *Obedite Præpositis vestris.* Et alibi: *Attendite vobis & universo gregi, in quo vos posuit regeve Ecclesiam Dei.* Explicari hanc hierarchiam a S. Dionysio; eam videlicet esse sacrum quemdam Principatum ad imitationem cœlestis: quemadmodum ille in tres Angelorum gradus est partitus, ita quoque hanc dividi in Episcopos, Presbyteros, & in Ministros, sicut exponit idem Dionysius, præsertim *cap. 3. ac 5.* ostendens, quo pacto inferiores etiam Ordines ad ejusmodi Sacramentum pertineant: cum his consonare, quæ pronuntiavit Apostolus: *ad consummationem sanctorum, ad opus ministerii quosdam quidem dedit Apostolos, quosdam autem Prophetas, alios autem Pastores & Doctores* (1). Hac Scoti gravissima sententia permotus Sacer ille Senatus collectis Patrum suffragiis in eadem Sessione sequentes duos canones, sextum ac septimum, promulgari jussit: *Si quis dixerit, in Ecclesia Catholica non esse*

(1) *Ad Ephes. c. 4.*

esse Hierarchiam divina ordinatione institutam, quæ constat ex Episcopis, Presbyteris, & Ministris, anathema sit. Item: Si quis dixerit, Episcopos non esse Presbyteris superiores, vel non habere potestatem confirmandi & ordinandi; vel eam quam habent, illis esse cum Presbyteris communem &c. anathema sit.

Ut autem clarius pateat, quid rei sit Hierarchia Ecclesiastica, ejus imaginem & schema quoddam veluti oculis spectandum subjicio. Quemadmodum coelestem illam Hierarchiam varii gradus & munia distinguunt, *Angeli, Archangeli, Principatus, Virtutes, Potestates, Dominationes, Throni, Cherubim ac Seraphim* ad ipsum usque *Deum*, supremum Hierarcham, sic eam, quam dixi, Ecclesiasticam varia componunt membra, quorum unum altero vel officio vel dignitate superius est: Nimirum inferiores Ministri, seu *sex Ordines sacerdotio minores*: tum Viri quos vocant *Regulares*, & *Monachi*: dein *Presbyteri, Canonici, Parochi*: demum Præsules seu *Episcopi, Archiepiscopi, Patriarchæ, Primate*s, & qui reliquos omnes supereminet, *summus Pontifex*, tanquam Hierarchiæ totius Caput. Ita nos docet S. Bernardus (t)

„ quod

(t) *Lib. 3. de Consid.*

„ quod sicut illic (in cœlo) Seraphim
„ ac Cherubim, cæteri quoque usque
„ ad Angelos & Archangelos, ordinan-
„ tur sub uno Capite Deo, ita hic quo-
„ que sub uno summo Pontifice Prima-
„ tes, Patriarchæ, Archiepiscopi Episco-
„ pi, Presbyteri vel Abbates, & reliqui
„ in hunc modum,,. Sunt autem ex
hoc Præfulum ordine alii inferiores, su-
periores alii: Petrus enim Apostolus a
Christo constitutus tanquam Caput to-
tius Ecclesiæ, ubi Antiochia Romam
concessit, ibidemque an. Ch. XLV.
Claudio Imp. ac Lucio Vitellio COS.
sedem fixit, fideique arcem exstruxit;
nullis inferorum armis expugnandam, ut
Ordinem Hierarchicum per omnem late
terrarum orbem propagaret, discipulos
suos in diversas ejus partes Episcopos mi-
sit, e quibus illi, qui toti alicui regno
ampliori cum potestate in Sacris præfecti
fuerunt, Patriarchæ sunt adpellati: qui
vero uni duntaxat provinciæ præesse ju-
bebantur, Archiepiscopi seu Metropolitanæ,
atque inter hos ipsos aliquis Primas:
cæteri vero simplici Episcoporum nomine
insigniti fuere, ac in causis gravioribus
Metropolitanorum arbitrio subesse jussi.
Hi tituli omnes, velut dispersi per reli-
quos, in uno collecti D. Petro fulgebant.

Fuit enim primis Pontificatus sui annis Romanæ Urbis Episcopus : subinde non-nihil extra Urbis colles potestatem suam tanquam Metropolita in totum Latium exercuit: denique ultimis vitæ suæ annis quum jam auctus esset per Europam & Asiam non minus Episcoporum, quam cæterorum Christianorum numerus, Petrus officium Patriarchæ totius Orientis & Occidentis gessit.

Jam vero descriptæ hætenus Hierarchiæ Caput supremum esse illum, quem Papam, & Pontificem, id est, Patrem & summum sacrorum Antistitem nuncupamus, agnoverunt debitaque veneratione coluerunt cuncta a Christo nato secula, octodecim scilicet, paucis exceptis, qui vel schismate vel hæresi veræ Christi Ecclesiæ se subtraxerunt. Primus horum erat D. Petrus tanquam Christi Vicarius, cui oves suas pascendas regendasque, & claves regni cœlorum ad ligandum & solvendum ipse Servator commisit, atque supra hanc petram Ecclesiam suam ædificavit, contra quam ne portæ quidem inferi essent prævalituræ (u). Qui autem S. Petro successerunt non interrupta serie ad hæc usque tempora Pontifices, eodem in munere, eademque po-
testa.

(u) *Matth. 16. & 19. Joan. 21.*

testate collocatos universus orbis Catholicus (Imperatores, Reges, Principes, reliquique Ordines) semper agnovit, semperque veneratus est. Prærogativæ autem Pontificis maximi sunt: primo, quod Primatum inter omnes Præsules in Ecclesia obtineat. Ita jam olim D. Cyprianus, cui reliqui quoque Patres & Concilia adstipulantur, pronunciavit (x): *Primatus Petro datur, ut una Christi Ecclesia & Cathedra una monstretur.* Ita S. Augustinus (y): *In Romana Ecclesia semper Apostolicæ Cathedræ viguit Principatus.* Ita D. Bernardus (z) Eugenium Papam alloquitur: *Tu Princeps Episcoporum, tu hæres Apostolorum, tu primatu Abel, gubernatu Noe, Patriarchatu Abraham, ordine Melchisedech, dignitate Aaron, auctoritate Moses, judicatu Samuel, potestate Petrus nec modo ovium, sed & Pastorum omnium tu unus Pastor es.* Quin & Ecclesia, ut vocant, Gallicana in conventu Parisiensi an. 1681. profitetur: „ Summum Pontificem esse caput Ecclesie „ siæ . . . centrum unitatis: obtinere „ Primatum auctoritatis & jurisdictionis „ ipsi

(x) *Epist.* 162. (y) *Lib. de unit. Ecclesie*

(z) *L. 2. de Consid. c. 8.*

„ ipsi a Christo in persona S. Petri col-
 „ lacum: & eum, qui ab hac veritate
 „ dissentiret, schismaticum, immo & hæ-
 „ reticum fore,,. Secundo, quod falli
 nescius sit in rebus ad fidem pertinenti-
 bus definendis, quæ dos ad Ecclesiam,
 cujus Pastor & Rector a Christo Petrus
 & Successores in Petri persona constituti
 fuerunt, in fide vera retinenda summe
 necessaria est. Hinc ipse Imperator Ju-
 stinus (a) pronunciare palam non du-
 bitavit: *Hoc enim credimus esse Catholi-*
cum, quod vestro religioso responso nobis
fuerit intimatum. Et quamvis nonnulli
 Catholicorum Pontificem extra Conci-
 lium errori obnoxium esse posse existi-
 ment, nihilominus D. Augustinus, cujus
 tanta apud ipsos est auctoritas, jam olim
 Pelagianis ad Concilium Generale pro-
 vocantibus respondit (b): „ An vero
 „ congregatione synodi opus erit, ut
 „ aperta perniciēs damnaretur? quasi nul-
 „ la hæresis aliquando nisi synodi con-
 „ gregatione damnata sit, cum potius
 „ rarissimæ inveniantur, propter quas
 „ damnandas necessitas talis exstiterit,,.

Talis tantaque quum sit supremi Hie-
 rarchiæ Capitis dignitas atque potestas,
 non

(a) *In ep. ad Hormisdam Pap.* (b) *Lib. 4.*
cap. 12.

non minor est illius eligendi cura & apparatus. Plerique qui vitas Pontificum literis consignarunt, eos initio eligi a Clero & Populo Romano consuevisse tradunt, atque hunc morem per mille & amplius annos in Ecclesia viguisse, quod autem ita intelligendum esse censent sacri juris Doctores, ut primis temporibus populus quidem designaverit, quem sibi vellet Pontificem dari, non tamen idcirco Clerus jure fuerit obstrictus ad eum admittendum eligendumve, id quod ex ipso Jure probant (c) dicente: *Sacerdotum quippe est electio, & fidelis populi consensus adhibendus est; quin docendus est populus, non sequendus.* Hinc quoque Gratianus ait: in Ecclesia Dei recte præficitur Antistes, quum populus in eum acclamaverit, quem Clerus communi voto elegerit (d). Quandonam vero populus ab electione Pontificis omnino fuerit exclusus, non ita pro comperto est. Plurimi existimant, id factum fuisse decreto Nicolai II. qui anno 1059. Stephano X. successit. Verum satis constat, etiam postea Pontificum aliquos a Clero, sive a Clericis Cardinalibus electos fuisse, ita

(c) C. Nosse. dist. 63.
ead. dist. §. Elect.

(d) In c. cum longe

ita ut in hoc electionis negotio populi quoque adensus seu petitio, desiderium & votum intercesserit. Satis hoc prodit ipsum Nicolai II. decretum, quod (e) refertur, & ut lectoris conspectui sistatur, præsentis negotii magnitudo postulare videtur: *Inprimis Cardinales Episcopi diligentissime simul de Pontificis electione tractantes, mox Christi Clericos Cardinales adhibeant: sicque reliquus Clerus & populus ad sensum novæ electionis accedat; nimirum præcaventes, ne venalitatis morbus aliqua occasione subrepat Eligatur autem de ipsius Ecclesiæ gremio, si reperiatnr idoneus; vel si de ipsa non invenitur, ex alia assumatur; salvo debito honore & reverentia dilecti filii nostri Henrici, qui in præsentiarum Rex habetur, & futurus Imperator Deo concedente speratur; sicut jam sibi concessimus, & successoribus illius, qui ab hac Apostolica sede personaliter hoc jus impetraverint.* Non solum autem Clerus & populus ea, qua dictum est, ratione in electionis Pontificiæ consortium venerunt, verum etiam Imperatores olim aliquam in illa partem sibi vendicarunt, quod quomodo, quove jure factum fuerit, grave ac magnum inter profanos & Ecclesiasticos scriptores
ac

(e) *In C. in Nomine dist. 23.*

ac Jurisperitos divortium excitavit. Videri hac de re possunt Baronius, Bellarminus, Pagius, Azor, Gretserus, alique: ac Dissertationes Theologicæ a me olim Oeniponti, postea secundis typis editæ Viennæ Austriæ an. 1750. (f) At vero Alexandri III. tempore tota tandem electionis cura & potestas legitima ad solos Cardinales est devoluta.

Hæc electio ut majore integritate, simul ac securitate perageretur, certæ leges fuerunt statutæ, quæ in sexto *Decretalium* libro (g) recensentur: *Prima* est, ut ad Romanum Pontificem eligendum Comitia celebrentur in loco, in quo Papa decessit: mos tamen obtinuit, ut Romæ, ubi Pontifex plerumque degit, & in Palatio Apostolico tanquam propria sede instituantur. *Secunda*, ut vita functo Pontifice non habeantur Comitia, nisi decem ut minimum dierum spatio interiecto, quo tempore & Cardinales absentes expectari, & per præsentis exequiæ novendiales celebrari debent. *Tertia*, ut Cardinales omnes, quavis ratione a Conclavi absentes, nullum ferendi suffragii jus vindicare sibi queant. *Quarta*, ut non solum Cardinales absentes, sed omnes

(f) *Dissert. 6. num. 112.*
lum 3. in 6.

(g) *Ubi periculum*

nes cujusvis ordinis & conditionis homines in Romanum Pontificem eligi possint, nec ulli porta ad Petri Sedem sit occlusa. *Quinta*, ut finitis novendialibus exequiis, sacrisque die decimo Spiritui S. rite factis omnes, qui adsunt, Cardinales in Palatio, quod mortuus Pontifex inhabitabat, loco tuto undique concluso, & optime custodito, quod *Conclave* vocant, congregentur admissis duntaxat duobus famulis, qui a servitiis sint, & necessaria subministrent: nec alicui præterea fas sit, locum ingredi exceptis certis quibusdam personis ad id destinatis, vel egredi, nisi afflictæ valetudinis ratio exigat. *Sexta*, ut Cardinalibus e conclavi nulla ratione progredi liceat, nisi Romano Pontifice jam electo, & constituto: quod si re infecta exierint, ab his qui custodiæ præsumt, iterum ingredi cogantur. *Septima*, ut Cardinalibus iis, qui serius accedunt ad urbem, conclave ingrediendi potestas fiat, & cum cæteris suffragium ferendi, nullusque eorum quavis ratione, etiam si anathematis vinculo sit adstrictus, ab electione ipsa arceri queat. *Octava*, ut elapso ab ingressu in Conclave memoratum triduo, nisi collatis Patrum suffragiis novus Pontifex prodeat, Episcopi, Reguli Romani, & qui con-

conclavis custodiæ præsumt, maxime in epulis & cibis, qui ad Cardinales inferrentur, rationem habeant, nec nisi unum ferculum subministrent. Hujus tamen legis Gregorianæ rigorem mitigavit Clemens VI. *Nona*: ut in Comitibus habendis, pœna anathematis constituta, nemini fas sit, largitione munerum aut sollicitatione eligentium animos sollicitare, aut alii interea negotio, præterquam huic gravissimo, vacare. *Decima*, ut nemo censeatur Romanus esse Pontifex, nisi duarum partium e tribus Cardinalium in conclavi præsentibus servata suffragiorum integritate fuerit electus. *Undecima* tandem, ut mortuo Pontifice quamprimum omnes Ecclesiastici Magistratus cessent, & a muneribus suis abstineant, exceptis S. Poenitentiae tribunalis, ac Camerae, ut vocant, Apostolicæ Præsilibus. Atque his legibus saluberrimis Conclave, ipsaque Pontificis electio circumscribitur. Est autem conclave, si personas spectemus, conventus Patrum Purpuratorum defuncto Pontifice, in eam, quam hodie obtinet, formam in Concilio Lugdunensi II. a Gregorio X. redactus: si vero de loco sit sermo, est hic sacris istiusmodi comitiis destinatus in Palatio Pontificis ad D. Petri Basilicam Vaticanam adyto, continetque
aulas

aulas quasdam superiores tum con ventibus celebrandis, tum cameris singulorum Cardinalium, quæ e tignis & cortinis defluentibus parantur, servituras. Ita firmis undique repagulis, muroque clauditur, ut ostia nulla, fenestræ nullæ, nisi altissimæ, exitus nullus, introitus tamen unus super sit. Hæc omnia ipse præsens spectavi, quando felicissime regnans Clemens XIII. e familia Rezzonicorum 6. Julii an. 1758. in summum Pontificem electus fuit.

Proximum post Pontificem dignitatis locum obtinet Purpuratus Patrum Senatus, seu sacrum Cardinalium Collegium, Pontificiæ auctoritatis & ornamentum & subsidium. Id enim mutuum inter summum Pontificem & S. R. E. Cardinales vinculum intercedit, ut solus Papa Cardinales, & soli vicissim Cardinales Papam e gremio suo eligere soleant. De horum origine diversæ sunt scriptorum opiniones. Quidam existimant, repetendam esse a Gregorii I. alii vero a Sylvestri I. tempore: non nulli referunt ad Marcelli, ac demum ad Pontiani P. P. ævum. Eugenius IV. in epistola ad Cantuariensem Archipræsulem Cardinalium nomen, ait, non fuisse initio nascentis Ecclesiæ expressum: munus tamen & officium a B. Petro Apostolo, & ejus successoribus evidenter institutum. Onuphrius vero putat, Cardinales

nales cœpisse a Cleti & Evaristi ætate: „ Nam
 „ Cletus, inquit, teste Anastasio Biblio-
 „ thecario ex Damaso, Presbyteros Ro-
 „ mæ ad viginti quinque numerum au-
 „ xit: Evaristus vero Apostolorum insti-
 „ tuto ad septenarium numerum in Eccle-
 „ sia Romana Diaconos redegit, & titu-
 „ los in urbe Presbyteris divisit, ut unus-
 „ quisque suæ paræciæ terminis & limi-
 „ tibus distingueretur . . . & tunc Pres-
 „ byterorum Cardinalium nomen effluxit,
 „ ut is scilicet diceretur Presbyter Car-
 „ dinalis, qui cæteris Presbyteris ejusdem
 „ tituli præesset „. Verum salva Eugenii
 & Onuphrii sententia Cardinalium nomen
 in Annalibus Ecclesiasticis ante Sylvestri
 ævum non legimus, quo in Concilio Ro-
 mano Can. 6. sancitum fuit: *ut Diaconi*
non essent plures per Parochiarum examen,
quam duo, & Cardinales urbis Romæ se-
ptem. Atque hi septem prioribus Eccle-
 siæ seculis *Cardinales & Regionarii* voca-
 bantur: Cardinales quidem, quia licet di-
 versis in locis agerent, in uno tamen con-
 tinebantur principis Ecclesiæ cardine, a
 qua pendebant, ut a cardine janua: Re-
 gionarii vero, quoniam e S. Fabiani Pon-
 tificis instituto quatuordecim urbis regio-
 nibus præerant, ita ut singuli binis regio-
 nibus præpositi pauperum in iis degentium
 cu-

curam gererent, eisque eleemosynas a fidelibus corrogatas summa fide errogarent. Non equidem inficias eo, ab Evaristo & Fabiano summis Pontificibus Urbem in titulos certos seu regiones fuisse divisam, quarum cura Presbyteris & Diaconis demandata fuit, (erat autem *Titulus* urbis regio, vel potius domus aut ecclesia ad agendos conventus Christianorum destinata, cujus foribus præpendebat cortina, vel tabula imaginem aut alias notas præferens, ut eas domus & ecclesias quivis Christianorum agnosceret) his tamen Presbyteris ac Diaconis primum Sylvestri tempore Cardinalium nomen impositum fuisse assero. Nihilominus pauci fuerunt tunc, quibus nominis hujus honor obtigit. At Gregorii I. seculo frequentius esse cœpit, ac pluribus etiam Episcopis tribuebatur. Unde patet, triplicem esse Cardinalium gradum ac ordinem: Alii enim sunt & dicuntur Episcopi Cardinales, alii Presbyteri, Diaconi alii; atque ex hac triplici membrorum classe sacrum illud corpus, seu Patrum Purpuratorum Collegium componitur, uti Canonice Collegia e Presbyteris, Diaconis, Subdiaconis, & aliis inferioribus Clericis conflantur. Non est autem certus ac definitus Cardinalium numerus, sed Romani Pontificis arbitrio auger-

augeri minuiue solet, vel certe potest, quum temporum ac negotiorum varietas ita postulaverit. Bonifacio VIII. ad clavum sedente numerabantur viginti: ea tempestate, qua Avenione sedem aliquamdiu fixere summi Pontifices, fuerunt triginta: ne plures quam triginta quatuor in posterum forent, statuerunt Constantiensis Concilii Patres (h): ævo tamen Leonis X. qui unica vice ad hunc secundæ a Papa dignitatis gradum promovit triginta & unum, sacra insignes purpura sexaginta quinque simul compa-
ruerunt: Pauli IV. septuaginta: & Pii IV. septuaginta sex numerati sunt. Tandem Sixtus V. peculiari constitutione decrevit, ne plures paucioresve deinceps forent purpurati Patres, quam septuaginta, exemplo e sacris Literis deprompto (i), ubi Deus Mosi præcepit: *Congrega tibi septuaginta viros de senibus Israel, quos tu nosti, quod senes populi sint, ac Magistri, & duces eos ad ostium tabernaculi fœderis, faciesque ibi stare tecum, ut descendam, & loquar tibi, & auferam de spiritu tuo, tradamque eis, ut sustentent tecum onus populi, & non tu solus grave-
ris.* Acque hic Cardinalium numerus a Sixto

(h) Sess. 40. (i) Num. ix.

Sixto V. ut dixi, definitus etiamnum hodie perseverat, & instar Coetus septuaginta senum, uti olim Mosi in regenda Synagoga, ita nunc Pontifici summo in gubernanda Christi Ecclesia adâstis, ita ut ex Ordine Diaconorum seligi soleant quatuordecim, e Presbyterorum quinquaginta, ex Episcoporum sex: nimirum antiqui Romanæ Urbis Episcopi Ostiensis & Veliternus (quorum Episcopales sedes Eugenius III. conjunxit) Portuensis, Tusculanensis, Sabinensis, Prænestiensis, Albinensis, quos omnes D. Bernardus Seniores populi & orbis Judices adpellat. Quod vero ad Purpuratorum Patrum istorum dignitatem ac prærogativas adtinet, ex quo tempore jus ac potestas Romanum Pontificem eligendi in eos solos translata fuit, cœperunt administrationis auctoritate cæteris Præsulibus anteferri, quamvis potestate Ordinis Cardinales Presbyteri, & Diaconi Episcopis sint inferiores. Etenim Patrum horum est Pontifici, quem elegerunt, a consiliis esse: eosdem Papa Fratres adpellat: hi in Comitibus publicis primi a Romano Pontifice in eminentioribus subselliis sedent: primi suffragium ferunt. Atque hic præcedendi honor, quo Eugenius IV. eos insignivit, re ipsa in Conciliis duobus Lugdunen-

ludunensibus, Florentino, Lateranensi quinto, ac demum in Tridentino Oecumenicorum postremo ipsis habitus est. Præter hæc Cardinales a cæteris Prælatibus distinguit præcipue *ruber Galeris*, qui ab Innocentio IV. in signum fundendi pro libertate Ecclesiastica sanguinis in Concilio Lugdunensi l. an. 1245. iis impositus est: titulo vero *Eminentia* Innocentius X. illos honoravit edita hanc in rem publica Constitutione an. 1644. qua sancivit, *ut absque ullo secularis dignitatis additamento non aliis titulis nuncupentur, nec uti inter eos possint, quam Eminentissimi & Reverendissimi, nec non Eminentia Reverendissima.* His autem prærogativis non ante trui licet, quam (ut Ecclesiastica phrasi utar) Pontifex iisdem *os aperuit* solemni ritu, quod hac ratione fieri consuevit. In primo ut vocant Consistorio Papa recens promotis Cardinalibus interdicit, ne quid tum in Præsulum conventibus aut consiliis prius loquantur, quam percepta reliquorum Cardinalium sententia ipse os illis aperuerit: in sequenti vero, aut tertio Consistorio Patribus omnibus, antiquis & novis simul congregatis ac confidentibus, idem Pontifex ad novos conversus eos excedere loco jubet ac expectare, donec antiqui de aperien-

do ipsis ore interrogati mentem suam explicarint: Si consenserunt, advocantur novi, jubenturque suo quisque considerare loco, quos deinde surgentes ac stantes paternis monitis instruit Papa, modumque tradit, quem in Consistoriis, domi, publice ac in omnibus suis functionibus observare debeant: tandem finem dicendi his verbis facit: *Aperimus vobis os tam in collationibus, quam in consiliis, atque in electione Summi Pontificis, & in omnibus actibus, tam in Consistorio, quam extra, qui ad Cardinales spectant, & quos soliti sunt exercere, in nomine Patris &c.* Hæc de Purpuratorum Patrum Senatu, qui unum cum Papa tanquam Capite corpus peculiare ac eminens constituit.

XXXVIII.

Sequuntur Patriarchæ, qui in jure dicundo Archiepiscopis Superiores sunt. Nam uti Episcopus uni tantum civitati, Archiepiscopus vero uni Provinciæ præsidet, quæ multas civitates, quarum singulis suis est Episcopus, complectitur; sic Patriarcha multis præest provinciis, neque solum in Episcopos, verum etiam in Archiepiscopos potestatem exercet. In prima Ecclesia pro temporum illorum & locorum angustiis tres fuerunt hac digni-

gnitate conspicui: Patriarcha Romanus, Antiochenus, & Alexandrinus, quibus postmodum auctoritate Concilii Nicæni accessit Hierosolymitanus & Constantinopolitanus. Horum trium priorum originem ac excellentiam Philippus Berte-rius (k) repetit ex amplitudine trium illarum urbium, quæ Patriarchali sede fuerunt donatæ. Et quidem de urbe Roma res extra dubium est, quam Tullius vocat *Orbis Dominam*: Ammianus *Templum totius mundi*: Palæmon apud Athenæum *orbis universi Epitomen*. Hieronymus vero inscribens Eustachio Commentarios suos in Ezechielem: *totum orbem ait in ea Urbe interiisse, quum excisa est*; tanta erat illius amplitudo. Alexandrinæ urbis magnitudinem Eunapius in *Ædesio* his verbis celebrat: „Erat autem po-
 „ pulosa Civitas Alexandria, & propter
 „ Serapidis fanum alter quidam orbis
 „ terrarum: innumeri confluebant gre-
 „ gatim,,. De eadem Dio Prusæus (l) ipsos alloquens Alexandrinos: *Civitas ve-stra, inquit, magnitudine & loco immen-
 sum quantum differt, & aperte secundas
 obtinet partes inter omnes, quæ sunt sub
 cælo*. Ammianus vero *verticem civita-
 tum*

(k) *Diatriba 2. Pithan. c. 1.* (l) *Orat. 22.*

tum adpellat. Tandem Antiochiam Syriæ Josephus (m) ita celebrat : „ Antiochia Syriæ metropolis est, quæ propter magnitudinem & rerum copiam, tertium locum inter omnes orbis Romanæ civitates obtinet,,. D. autem Chrysostomus inter alia Magni Ignatii encomia hoc recenset; quod eum populum (scilicet Antiochenum) rexit, qui ducenta contineret hominum millia.

Ex his ergo Philippus, de quo dixi, Berterius probare conatur, tres urbes istas a S. Petro Patriarchatus prærogativa donatas fuisse habita magnitudinis & præstantiæ super omnes Orbis urbes ratione. Verum hæc auctoris istius sententia rerum peritis non probatur, quibus non ad magnitudinis mensuram dignitas Patriarchalis collata fuisse videtur. Vera igitur ratio, cur solis tribus illis urbibus eo tempore honor iste habitus fuerit melius inde petitur, quod S. Petrus illarum fuerit peculiaris Episcopus. Nam quum omnes eum Oviliis Christi summum Pastorem agnoscerent, quidquid ad ipsum quoquo modo adinuit, præcipua semper veneratione dignum credebatur. At memoratis tribus Patriarchis postmodum auctoritate Concilii Nicæni (saltem ali

(m) *L. 3. de bello Judaico. c. 3.*

aliqua dignitatis parte) accessit Hierosolymitanus ob reverentiam loci, quem Servator ipse præsentia sua, tantisque mysteriis & miraculis illustravit: dein & Constantinopolitanus, quoniam eam in urbem antiqua Roma a Constantino M. translata fuit. Inter istos tamen quatuor Patriarchas semper obtinuit primas Romanus, eique cæteri ceu supremo totius Ecclesiæ Capiti se submiserunt, donec circa annum 856. Photius Constantinopolitanus famoso illo schismate Græcam Ecclesiam a Romana separavit. Illustris quoque fuit in Occidente Patriarchatus Aquileiensis, quo postmodum diviso in Gradensem, & Aquileiensem (Utini civitate Venetæ ditionis collocatum) prior nempe Gradenfis a Nicolao V. sublatus Venetias migravit; posterior vero nimirum Aquileiensis an. 1751. a Benedicto XIV. suppressus, ac in duos Archiepiscopatus, Goriciensem & Utinensem, mutatus fuit. Cætera maximam Patriarcharum dignitatem amplissima quoque jura comitantur, quorum quatuor potissimum enumerat Glossa (n), scilicet: quod Pallium, postquam id a Pontifice acceperunt, suis Metropolitans illud jure conferant: quod
iidem

(n) *In c. Antiqua de Privil.*

iidem Metropolitanis recepto pallio iuramenti religione Patriarchis se obstringant ad obedientiam ipsis & Ecclesiæ Romanæ præstandam: quod ante se Crucis signum argenteum deferri jubeant, præterquam in Urbe Romana, & ubicunque Romanus Pontifex præsens fuerit vel ejus Legatus Pontificiis insignibus decoratus: quod Episcopi suis Metropolitanis prætermisissis jure ad ipsos primo adpellare possint.

Patriarchis proximi sunt Primates, qui præsent Civitatibus, quibus subiectæ sunt aliquæ Provinciæ. Amplior eorum est dignitas & potestas, quam Archiepiscoporum. Nam Anicetus Papa decrevit, ne Episcopus crimen Metropolitanis sui ad alium, nisi ad Primate aut ad sedem Apostolicam deferret: idem Pontifex (o) vetuit, ne Archiepiscopi Primates nuncuparentur.

Post hos summe conspicui veniunt Archiepiscopi. Græco idiomate Archiepiscopus idem sonat ac Princeps Episcoporum, seu is Episcopus, qui in una Provincia præest civitati primariæ ac metropoli, cui subiectæ sunt aliæ civitates, totidem habentes Episcopos; unde & Metropolitanus dicitur. Insigne autem Archiepiscopa-

pa.

(o) C. Nulli. dist. 99.

palis potestatis ac dignitatis est Pallium, de quo in Jure Canonico exstat Titulus *de auctoritate & usu Pallii*, quod vestis candida est, ex lana alba contexta, atque per modum circuli humeros constringens, duabus fasciis a fronte & a tergo defluentibus, & quatuor crucibus purpureis distincta, quarum una pectori, altera sinistro humero, dextro tertia, quarta scapulis insidet. Origo illius quam antiqua, tam incerta est. Rupertus (p) scribit, Maternum a S. Petro Trevirin missum hæreditatem pallii suis in ea Ecclesia successoribus reliquisse. Eusebius Cæsareensis primam Pallii institutionem D. Lino tribuit, ita ut sicut Ephod insigne fuerat auctoritatis sacerdotum in Synagoga, sic Pallium esset in Ecclesia insigne potestatis Pastoralis: alii a Clemente I. Archiepiscopos hoc ornamenti genere circumdatos fuisse tradunt, quod peti solemus hac verborum formula refert Auctor Rituum Ecclesiasticorum (q): *Ego NB. electus Ecclesiæ NB. instantèr, instantius, instantissime peto mibi tradi, & assignari mibi pallium de corpore sancti Petri sumtum, in quo est plenitudo Pontificia-*

(p) *Lib. i. de div. offe. c. 27.* (q) *Lib. i. Tit. 10. c. 5.*

cialis officii. Dicitur autem *assumi de corpore S. Petri*, quia nimirum super aram, ubi corpus D. Petri sepultum jacet, Romani Pontificis auctoritate consecratur, & ex ara illa sumtum ad Archiepiscopos mittitur.

XXXIX.

Præsulum in Ecclesia ultimi sunt Episcopi, quod nomen e Græcia in Latium, & ab Ethnicorum secta in Ecclesiam translatum fuit. Nam græcum ἐπί latinis *super*, & ὁρατὴς *Inspector* sonat, ita ut Episcopus idem sit, ac qui super alios intendit veluti speculator & excubitor. Unde Cicero ad Atticum scribens ait: *vult me Pompejus esse, quem tota hæc maritima ora habeat ἐπίσκοπον, id est, speculatorem & custodem.* Apud Ethnicos autem veteres nomen fuit Magistratus, cujus erat panis & cœterarum rerum ad cibum & victum pertinentium curam habere. Translatum est igitur nomen hoc a profano civili Magistratu ad sacros Ecclesiæ Præsules & Antistites, quod illorum præcipuum munus sit, gregis sibi commissi moribus ac vitæ invigilare, eique de Verbi Divini & Sacramentorum pabulo prospicere. Præterea proprium Episcoporum officium est, baptisate ablutos confirmare, Dei ministros ordinibus sa-

sacris initiare, Diocesin obire, in eaque ad Dei cultum & animarum salutem cuncta rite ordinare &c. De *Institutione* Episcoporum celebris olim fuit controversia in Concilio Tridentino, uti refert Pallavicinus (r): num ea proficiscatur a Deo sine interventu alius, uti asserabant Episcopi Hispani; vel per Pontificem Romanum, tanquam Christi Vicarium, quemadmodum sentiebant alii, Pontificis studiosiores. Fervebant partis utriusque studia fere usque ad contentionem. At Jacobus Lainius S. J. Præpositus Generalis extra ordinem postremus disputavit, & integrum tempus solus explevit. In exordio sermonis commemoravit, ter se illi Synodo interfuisse, sub Paulo, sub Julio, & sub Pio Pontificibus, semperque se usum sinceritate loquendi absque furo, eaque etiam in præsentē negotio se usum professus est. Postea quæstionem ipsam ingressus ejus indolem explicare cœpit, aliorum opinionem refellere, suam proferre sententiam, multisque illam argumentis confirmare. Tenuit autem, ac diserte non minus quam solide propugnavit sententiam, qua in Episcopos proxime a Deo derivari potestatem Ordinis demonstravit,

(r) *Lib. 18. c. 15.*

vit, non item Jurisdictionis, de qua potissimum lis erat, absque interveniente Christi Vicario, ac D. Petri Successore. Omnia tanta vi rationum, tantaque eloquentia pertractavit, ut multi Patrum oppositam secuti sententiam vel aperte eam deseruerint, vel mentem suam uberius & accommodate ad sensum Lainii declararent. Cæterum Insigne Episcoporum semper fuit cathedra seu Thronus, qui sedes est Augustior in Ecclesia, & cæteris aliorum Presbyterorum sedibus excelsior, scilicet:

„ ut in mentem revocarent, ait S. Augustinus, in *Psal.* 126. altiore se in
 „ loco tanquam in specula constitutos,
 „ quo oculorum acie pervigili atque indefessa in tutelam gregis incumbant,
 „ tanto cæteris virtute & probitate clariores, quanto magis essent sedis honore ac sublimitate conspicui,,. In multis Ecclesiis argentea fuit, quemadmodum observat Mabillonius (s), tantusque honor illi habebatur, ut instar sacri pignoris asservaretur. Talis erat Hierosolymis, quæ fuit S. Jacobi Fratris Domini, & Alexandriæ B. Marci Evangelistæ.

Præsulum ordinem in Hierarchia Ecclesiastica excipit Parochorum ordo. Est autem

(s) *Tom. I. Vet. Analect. in pass. S. Demetrii. M.*

autem Parochus quasi Paræcus ἀπὸ τοῦ παρίχου τοῦ ἀναγκαῖα, seu ab administrando incolis necessaria sic dictus. Initium suum ordo hic Parochorum debere videtur divisioni Urbis Romanæ in viginti quinque regiones (hodie in quatuordecim *Rioni*, ut vocant, dividitur) factæ a Marcello Papa, Marcellini successore, quamvis jam prius operi huic manus admovent in primis S. Clemens, qui primus septem urbis regiones in totidem Notarios divisit, ut Martyrum Acta calamo exciperent: dein Evaristus & Dionysius Pontifices. Quare Presbyteri illi, quos memoratus Papa regionibus istis præfecit, a munere sacramenta verbumque divinum administrandi Parochi dicebantur. Erat autem regio illa tunc id, quod hodie Parochia, quæ duobus modis considerari potest: primo quidem integra diœcesis Parochia nuncupatur (t). Secundo Parochia vocatur alicujus diœcesis Ecclesia, cujus populus certis limitibus est circumscriptus (u) & (x). Atque hac ratione accepta Parochia uni Presbytero committi solet, ut in ea baptismum, & reliqua sacramenta populo

(t) *Distin. 92. cap. si quis ordinatus.* (u) *Archid. in cap. licet Canon. de elect. in Sexto.*
(x) *Abbas in Rubrica de Parochiis.*

lo ministret, ita ut Parochiale beneficium habere dicatur in Jure Canonico, cui Parochialis Ecclesia curanda regendaque traditur. Ut autem Ecclesia Parochialis a quavis alia discerni possit, satis non est, quod sacri baptismatis fons in ea sit collocatus, in quo salutaribus undis abluantur Christo initiandi: neque quod cœmeterio cingatur, ubi certo Ecclesiæ ritu fideles defuncti sepulturæ mandantur. Horum enim utroque Ecclesia, quæ in Parochialium numerum neutiquam venit, gaudere potest vel consuetudine, vel privilegio, aut superioris Antistitis auctoritate. Opus est igitur, ut populum habeat limitibus suis ac finibus distinctum, qui Sacramenta in gremio illius percipere, & ad sacram Synaxin, præcipue Paschali tempore, accedere ipso jure teneatur. Jus vero istud Ecclesiæ Parochialis novem capitibus constituitur, uti docet Abbas (y) & Hostiensis (z): Primo, ut in ea populus Parocho subiectus baptismum recipiat. Secundo, ut quisque in ea semel in anno conscientiam a peccatis expiet. Tertio, ut sanctissimum Christi corpus quot annis in Paschate percipiat. Quarto, ut ju-

(y) *In rubr. de Paroch.* (z) *In summ. tit. de parochiis §. 2.*

justo ac debito tempore extremam facri Olei unctionem ab ea petat. Quinto, ut eorum, qui matrimonio junguntur, nuptiæ in illa solemni ritu celebrentur. Sexto, ut in ea mortui sepeliantur. Septimo, ut ibidem populus diebus festis rem divinam audiat. Octavo, ut ei decimam fructuum partem singulis annis pendat. Nono, ut primitias itidem fructuum, & alias, quæ de more fiunt, oblationes præstet, quæ omnia disertis verbis præcipiuntur in diversis Juris Canonici Capitulis. Jam vero Parochi functiones proprias Concilium Tridentinum velut in compendio exponit (a). *Quum præcepto, ait; Divino mandatum sit omnibus, quibus animarum cura comissa est, oves suas agnoscere, pro his sacrificium offerre, verbique divini prædicatione, sacramentorum administratione, ac bonorum operum exemplo pascere, pauperum aliarumque personarum curam paternam gerere, & in cætera munia pastoralia incumbere &c.* Varia heic imperantur: primo quidem, ut Pastores oves suas agnoscant, id quod fit per continuam in sede sua præsentiam, quam SS. Canones *Residentiam* vocant: dein ut pro suis ovibus sacrificium offerant: porro ut easdem

(a) *Sess. 23. c. 1. de Reform.*

dem verbi divini pabulo reficiant: demum ut exemplo præluceant, curam pauperum suscipiant &c. Hæc si rite faciant, duplici honore dignos pronunciat Paulus in epistola prima ad Timotheum (b) ubi honoris nomine duo complectitur, reverentiam scilicet, & subsidium seu alimentum. Non enim, pergit Apostolus, *alligabis os bovi trituranti: &, dignus est Operarius mercede sua.* Nam olim Deus in veteri Testamento præcepit, ut bobus, quibus Hebræi in Palæstina ad trituram utebantur, non clauderent os, quo minus de sua tritura comedere possent. Voluit itaque indicare, multo amplius Pastores animarum, qui laborant ut boves in area Domini, fructuum participes esse debere; quam rem magis explicat alibi, dum ait: *Si nos vobis spiritualia seminavimus, parum est, carnalia vestra metamus:* utpote quæ semini per nos jacto comparata nullius sunt pretii. Mercedem autem vocat, quia justitiæ titulo debetur, non quidem tanquam pretium, quod operi sacro respondeat (hoc enim *Simoniam* saperet) sed ut necessarium ad vitam sustentandam subsidium; quamvis Presbyter pro labore, cura, itinere ac defatigatione mercedem pro-

(b) Cap. 5.

proprie dictam recipere valeat, uti animadvertit Adrianus, (c) & D. Bonaventura (d).

Post Parochos memorandi veniunt Canonici, ita dicti vel a Canonica pensione ipsis præberi solita, vel a Canone seu certa vivendi regula & disciplina iisdem præscripta. Utamque opinionem scite inter se conciliat Suarius (e) docens, primam originem usumque vocis *Canonicus* petendam esse a Clericis sub regula viventibus, communemque in Choro Ecclesiastico vitam degentibus: ubi vero Canonici vitæ communi valedicentes *Canonias* quas vocant, & *Præbendas* inter se partiri cœperunt, vocem *Canonicus* relicta velut prima statione ac etymologia ad alteram deflectisse, scilicet pensionis *Canonicæ*. De antiquitate Canoniorum major est inter Eruditos controversia, quorum aliqui negant ante Seculum VIII. in Ecclesiis Cathedralibus, vel ut nunc adpellant Cathedralibus ullos fuisse Canonicos: alii ante seculum III. rara Canoniorum vestigia detegi posse existimant. Nemo tamen facile inficiabitur, jam ab Apostolorum ætate Clericos in Ecclesiis laudes divinas

(c) *Quodlib. 9. art. 1.* (d) *In 4. diff. 25.*

(e) *Tom. 4. de Relig. l. 1. c. 9.*

vinas decantare solitos esse, non secus ac hodie Canonici faciunt, & cum Episcopo præfuisse reliquo fidelium gregi instar Ecclesiastici cujusdam Senatus, qui *Presbyterium* dicebatur. Unde dignitatem ac munus Canoniconum adparet esse in Hierarchia Ecclesiastica antiquissimum, quamvis nomen posterioribus primum seculis invaluerit. Diversi autem Ordinis sunt Canonici, alii Ecclesiæ *Cathedralis*, alii *Collegiatae*: quidam *Seculares*, *Regulares* alii Ex his qui in Ecclesia Cathedrali sunt constituti, cæteros Clericos & Canonicos dignitate antecellunt. Quapropter summus Pontifex eis causas delegare solet, non minus quam Clericis dignitate præditis (f). Canonicos autem omnes ab origine sua fuisse *Regulares* non vana est conjectura, quum simul in eodem loco habitare consueverint, in communi dormitorio somnum capere, in eodem triclinio ad communem mensam prandere ac cænare, ut facilius & commodius ad laudes divinas in choro canendas surgerent & convenirent, atque ut vitæ ac morum præceptis imbuerentur, ut legimus in Concilio Moguntino (g) Turonensi (h) & Aquisgranensi I. sub Ludovico Pio Imperato-

(f) *C. statutum. de rescript. in 6.*

(g) *Can. 9.*

(h) *Cap. 23.*

ratore celebrato (i). Quare *Secularium* nomine intelliguntur ii, qui ab hac vita communi succedentibus temporibus vel se ipsos exemerunt, vel auctoritate Ecclesiastica fuerunt exempti, officio ac dignitate retenta. Est autem, proprium Canonicis omnibus officium, in choro preces, quas dicunt *Horarias*, seu statis horis decantare, & sacris in Ecclesia operari.

De sacro dicendi plura paullo post occasio se se offeret: per horas autem Canonicas intelliguntur eæ preces, quæ ad Deum laudandum, opemque illius divinam implorandam certis statisque horis secundum Canones Ecclesiæ fundi, recitari, aut cantari solent ac debent. Originem hujus rei Polydorus Vergilius (k) & quidam alii, ut Maurolycus in Martyrologio ad 27. Augusti, ac Supplementum Chronicorum ad Pelagium I. vel Pelagium II. referunt, a quibus legem Ecclesiasticam de septem Horarum Canonicarum officio a Clericis persolvendo latam fuisse contendunt. Alii vero institutum hoc Damaso I. rursus alii Gregorio I. tribuunt. Verum si historias Ecclesiasticas, & Patres Clementem, Cyprianum, Basilium, Chry-

(i) *Cap. 117.* (k) *Lib. 6. de Invent. rer. c. 2.*

Chrysostomum, Athanasium &c. consulamur, fateri necesse est, jam inde ab Apostolorum temporibus Clericos certis diei ac noctis temporibus in Ecclesiam convenire consuevisse, ut psalmos preces, hymnosque Deo decantarent. Quare verosimilimum est, Pelagium I. aut II. legem tulisse, qua Clerici preces horarias septies in die persolvere jubebantur, ita ut quod antea usu & consuetudine antiqua servabatur, lege dein lata perpetuo in Ecclesia custodiretur. Ad numerum horarum quod adtinet, in duas sententias abeunt Auctores, quibusdam horas octo adsignantibus, quum in psalmis Regius Propheta profiteatur: *Septies in die laudem dixi tibi*: postquam eodem psalmo dixerat: *Media nocte surgebam ad confitendum tibi*, ubi diem a nocte videtur distinguere. Aliis contra numerus septenarius placet, innixis auctoritati Concilii Cabilonensis II. (1): ubi septem duntaxat numerantur: ac Cassiodori versum illum *septies in die* sic exponentis sententiæ: „ *Septem* illas „ significat vices, quibus se Monachorum „ pia devotio consolatur, Matutinum, „ Primam, Tertiam, Sextam, Nonam, „ Lucernariam (id est Vespertinam) Completorios & Nocturnos, videlicet psal-

„ mos.

(1) C. 59.

„ mos. „ Sed litem hanc optime composuisse videtur Turrecremata (m), dum afferit : olim in multis Provinciarum ecclesiis nocturnas vigilas divisas fuisse atque sejunctas a Matutinis laudibus, proinde tum temporis Officium Divinum vere in horas octo fuisse distributum : at vero nostro ævo usu receptum esse, ut Matutinæ Laudes simul cum Nocturnis Vigiliarum psalmis decantentur, atque ita septem duntaxat horas numerari. Suffragatur huic sententiæ Glossa, (n) ubi versus sequentes a pietate commendandos in medium producit.

Hæc sunt, septenas propter quæ psallimus horas :

Matutina ligat Christum, qui crimina purgat :

Prima replet sputis : caussam dat Tertia mortis :

Sexta cruci nectit : latus ejus Nona bipertit :

Vespera deponit : tumulo Completa reponit.

XL.

Aliud genus, quod Hierarchiam constituit, sunt Sacerdotes seu Presbyteri. Primum

(m) *Traçt. 73. in c. Presbyter. dist. 91. q. 1. Conclus. 2.* (n) *In Cap. 1. de celebr. Missæ.*

num nomen a sacris seu sacrificiis, quæ offerunt, ortum suum habet, jamque in usu fuit longo ante Christianam legem tempore, quum Numa Pompilius Sacrorum apud Romanos Auctor nomen hoc iis indiderit, qui Romæ sacra curabant: Alterum græco idiomate seniore, velut ætate ac dignitate venerabilem sonat. Nam uti animadvertit Durandus (o), in Evangelio & fere usque ad tempus Irenæi Sacerdotes Presbyteri & Patres dicti fuerunt. Perperam heic agunt, qui Episcopi, ac Sacerdotis seu Presbyteri munus ac dignitatem inter se confundunt, partim hæretici, ut Aerius, Wiclefus, Calvinus, partim mali Critici. Quamvis enim initio Episcopis ac Sacerdotibus nomen Presbyteri commune videatur fuisse, functio tamen & potestas utriusque semper erat peculiaris. Ita definit Tridentinum (p)

„ Præter cæteros Ecclesiasticos Ordines,
 „ Episcopos qui in Apostolorum locum
 „ successerunt, ad hunc Hierarchicum
 „ Ordinem præcipue pertinere, & po-
 „ sitos, sicut Apostolus ait, a Spiritu S.
 „ regere Ecclesiam Dei, eosque Presby-
 „ teris superiores esse. „ Demonstrat
 hanc Ordinis utriusque diversitatem Hie-
 rarchia

(o) *De Rit. Eccles. Cath. l. I. c. I.*

(p) *Sess. 23. c. 4.*

rarchia Legalis, quæ umbra posterioris fuit, tanquam imaginis, ut vocat Apostolus (q). Quippe in lege veteri unus erat Sacerdos summus Aaron, & qui huic in munere successerunt: præterea minores erant Sacerdotes, videlicet filii Aaron, & qui ab istis descenderunt; denique Levitæ, qui a Levi originem duxerunt, sed non per Aaronem. Atque hos tres Pontificum, Sacerdotum, & Levitarum gradus jure divino diversos fuisse, ita ut Pontifex major esset Sacerdotibus, & Sacerdotes Levitis, palam est legenti librum Exodi(r) Levitici(s) Numerorum(t) ubi eos consecrandi ritus, vestes, & officia ipso Numine dictante satis clare distinguuntur. Hinc perpetua quoque lege cautum fuit in Conciliis etiam antiquissimis, ut penes solos Episcopos definiendi auctoritas esset, non item penes Presbyteros, nisi Episcoporum fuissent Legati. Porro proprium Sacerdotis munus in Hierarchia Ecclesiastica est, incruentum illud Sacrificium offerre, quod cruentum in ara crucis pro humani generis salute obtulit Christus, Sacerdos Maximus secundum ordinem Melchisedech. Sacrificium hoc
vocat

(q) *Ad Hebr.* 10. (r) *Cap.* 28. (s) *Cap.* 8.
(t) *Cap.* 3.

vocant græci *Liturgiam*, Latini *Missam*,
 cujus quam antiquus, tam varius fuit
 usus ac ritus, ut patet ex diversis Li-
 turgiis, quarum quinque præcipue oc-
 currunt Græcorum, Armenorum, Co-
 ptorum, Æthiopum, & Syrorum, quos
 inter soli Græci quatuor numerant reli-
 quis celebriores notioresque, scilicet Li-
 turgiam S. Jacobi Apostoli, S. Basilii M.
 S. Chrysostomi, & D. Marci Evangeli-
 stæ. Illa quam describit S. Dionysius
 Areopagita (u), qui tempore Apostolo-
 rum vixit, sane in plurimis ei, qua ho-
 die Catholica Ecclesia utitur, quam si-
 millima est. Operæ pretium esse videtur,
 Liturgiam hanc seu *Missam* Apostolorum
 conceptis Dionysii verbis in conspectum
 dare: „ Pontifex quidem perfecto pre-
 „ cum sacro ad Dei altare, cum ab eo
 „ incendendi odorem initium fecit, sa-
 „ crum obit locum. Reversus autem ad
 „ divinam aram, sacros psalmos canere
 „ incipit, canuntque cum eo omnes Ec-
 „ clesiastici Ordines. Deinceps a Mini-
 „ stris Sanctorum librorum lectio ordine
 „ recitatur. Ea recitata, extra templi
 „ ambitum collocantur catechumeni, &
 „ una cum eis energumeni, atque ii,
 „ quos superioris vitæ pœnitet: manent
 „ autem

(u) *Lib. 3. Hier. Eccles. in Bibl. PP. edit. Colon.*

„ autem ii, qui divinarum rerum & aspe-
„ ctu digni sunt, & communione. Mi-
„ nistrorum vero alii stant pro templi
„ foribus, quæ occlusæ sunt: alii autem
„ aliquid aliud eorum, quæ illorum or-
„ dinem attingunt, perficiunt. Electi
„ porro ex ordine eo, qui ministrat cum
„ Sacerdotibus, in divino altari propo-
„ nunt panem, benedictionisque calicem,
„ cum antea universus fidelium cœtus
„ generalem fidei confessionem pronun-
„ ciarit: ad hæc Pontifex sacras pre-
„ ces rite perficit, sanctamque pa-
„ cem omnibus nunciat. Cum omnes
„ se inter se salutaverunt, mystica San-
„ ctorum in sacris tabulis conscriptorum
„ recitatio fit. Cumque manus aqua ab-
„ luerunt & Pontifex & Sacerdotes, Pon-
„ tifex quidem in medio altari colloca-
„ tur: circumstant autem eum soli cum
„ Sacerdotibus Ministri selecti. Pontifex
„ laudatis sacris Dei operibus, ea quæ di-
„ vinissima sunt, rite perficit, & ea, quæ
„ laudata sunt, per adiacentia sacra sym-
„ bola (seu species) in conspectum ad-
„ ducit. Bonis divinorum operum mon-
„ stratis, ad sacram eorum Communio-
„ nem & venit ipse, & invitat cœteros.
„ Accepta dataque divina communione,
„ in sacram gratiarum actionem desinit:

Q 5

„ cum

„ cum interea multi quidem sola divina
 „ signa considerent, ipse autem divino
 „ Spiritu semper ad sacra principia eo-
 „ rum, quæ perficiuntur, beatis mentis-
 „ que contemplationibus, ut Pontificem
 „ decet, in Divini status puritate duci-
 „ tur. „ Hucusque S. Dionysius de sui
 temporis, atque ipsorum adeo Apostolo-
 rum Liturgia, in qua mutato paullum or-
 dine vix non omnia, quæ hodie adhuc
 in *Missâ* solemnè fiunt, facta jam tunc
 fuisse observo: & utinam hæretici quo-
 que observarent, ac rituum sacrorum
 mastyges, vociferantes *Missam* recentio-
 rum Ecclesiæ temporum esse inventum.
 Cætera S. Gregorius Papa (x) auctor est,
 in primordiis Ecclesiæ ordinante S. Petro
 duas duntaxat fuisse partes *Missæ*, quas *inte-*
grantes vocant, Consecrationem nimirum
 ac Orationem Dominicam. Idem Petrus
 Apostolus, teste Lindano (y) Antiochiæ
 tres addidit orationes, *Collectam*, ut di-
 citur, *Secretam*, & *Postcommunionem*. Cre-
 scente vero cultu Christianæ Religionis
 adjecta sunt alia, quæ magis devotio-
 nem fovere visa sunt: alia subinde demta;
 alia meliorem in ordinem redacta. Id
 certum est, *Missam* ob querimoniam po-
 puli

(x) *In Epist. ad Joan. Episc. Syracus.*

(y) *Ad Liturg. S. Petri.*

puli breviorē esse redditam, uti observat Baronius ad annum 418. ex Augustino (2). Nihilominus tamen minus Lindanus in Apologia pro Liturgia D. Petri græca (quæ Gregorianæ admodum similis est) conatur ostendere, a D. Petro jam designatam fuisse totius *Missæ* Latinæ œconomiam, paucis exceptis: Successores autem illius vel firmasse aliqua novis decretis, vel restituisse neglecta; quandoquidem adolescente Ecclesia sub tyrannide in eam sævientibus tutum non erat, moras longiores in sacrificio trahere; quæ Lindani sententia displicere non poterit consideranti descriptam paullo ante a S. Dionysio *Missæ* ideam.

Aliud quoque membrum Hierarchiæ conspicuum est, quod componunt Monachi & Viri, ut vocant, *Regulares*, quos ab ea procul arcere conantur nonnulli, etiam Catholici; sed male, ut pridem adversus librum calumniis in Ordines Religiosos plenum, quem Lutetiæ Parisiorum quidam *Baccalaurei* cum Sigerio in lucem ediderunt, demonstravit. S. Thomas (a) his verbis: „ Papa non destruit „ Ecclesiasticam Hierarchiam, cum mittit „ Monachos ad prædicandum; quod enim „ potest

(2) *Serm.* 251. *de Temp.* (a) *Opusc.* 19.
c. 4.

„ potest inferior ut Curatus concedere,
 „ committendo curam alicui, hoc potest
 „ ejus Superior ut Episcopus & Papa,,.
 Quare licet Hierarchiam ex Episcopis
 Parochisque componi, ceu veris Aposto-
 lorum ac Christi discipulorum successori-
 bus Pontifices & Concilia uno velut ore
 pronuncient, nihilo tamen secius iidem
Regularium opera usi eos Hierarchiæ suæ
 quasi ramos recentes arbori Ecclesiæ in-
 fertos esse voluerunt, & exercitui suo
 tanquam conducticias selectasque copias
 aggregarunt, quas eundem in finem quin-
 quaginta Pontifices longa serie privile-
 giis armisque instruxere. Plurimum loco
 juvat Bullam *Etsi Mendicantium* a Pio V.
 datam inspicere: *Attendentes*; ait Ponti-
 fex, *etiam illos, qui diei & æstus tam in*
prædicationibus quam cæteris spiritualibus
muneribus quotidie sustinent . . . omnia &
singula privilegia (Mendicantibus indulta)
auctoritate Apostolica tenore præsentium
perpetuo approbamus & confirmamus. Equi-
 dem Monachi primi ab hominum turba
 & mundi tumultu semoti in locis de-
 sertis solitariam degebant vitam: neque
 sacris erant initiati, sed Superiores Mo-
 nachorum Sacerdotem ab Episcopis acci-
 pere solebant, qui certis temporibus Missæ
 Sacrificium ijs faceret, ac Sacramenta ad-
 mini-

ministraret. Verum S. Basilius M. in Oriente teste D. Gregorio Nazianzeno (b), ne Monachorum institutum vagaretur & fluctuaret, neque sibi solum sed & aliis prodesse, primus cœnobia ædificari iussit, ritumque antiquum & agrestem ad ordinem quemdam formulamque Religioni propiorem reduxit. Idem in Occidente molitus est S. Benedictus, si fides Trithe- mio (c). Magnus enim hic Patriarcha non modo vitam cœnobiticam in com- mune instituit, sed & Ordini suo *Cleri- catum* proprium voluit, dum de sacerdo- tibus Monasterii sic præcipit (d): *Si quis Abbas sibi Presbyterum vel Diaconum or- dinare petierit, de suis eliget*, memor cre- do mandati Syricii Papæ, quo Monachis injungitur, ut sacris deinceps ordinibus initiarentur, quo non sibi solis sed alio- rum quoque salutis vacarent. Ita factum, ut Religiosi Ordines non solum pfallendo & contemplando intenti, sed etiam stre- nue laborando in Vineâ Domini, docen- do, verbum Dei prædicando, profligan- do hæreses, animarum curam domi for- risque exercendo, sanguinem etiam pro vera Religione fundendo, per hosce la- bores suos & obsequia Apostolicæ sedi & orbi

(b) *In Monodia.* (c) *de script. Eccles. in Be- nedicto.* (d) *in Regula c. 62.*

orbi christiano exhibita honorificum in Ecclesiastica Hierarchia locum occuparint. Quapropter & Patribus Societatis Jesu Paulus III. in Bulla *Cum inter*. ea privilegia adtribuit, quæ nonnisi Hierarchis conveniunt. Patet id ex duplici ratione, quam pro munifica largitione sua Pontifex adfert, quarum una hæc est: *Ne gregi Dominico animarum cura desit, & illum antiquus serpens indefensum & impræparatum invadat.* Altera *Attendentes ad fructus uberes, quos in domo Domini hæcenus produxistis, & producere non desinitis vestra religione, integritate, scientia, doctrina, moribus & experientia &c.* Quare tantum abest, ut viri Religiosi ab Hierarchia Ecclesiastica iniquo nonnullorum & invidiæ pleno judicio excludendi esse censeantur, ut potius honorificum in ea locum summorum etiam Pontificum ac Præsulum testimonio mereantur.

XLI.

Infimum denique in Hierarchia Ecclesiæ locum occupant Ministri, quorum nomine veniunt, quotquot ad cultum divinum ita ordinantur, ut necdum ad sacerdotii gradum ascendant. Hoc certe innuit Concilium Tridentinum, dum (e)

ait:

(e) *Seff. 23. cap. 2.*

ait: Cum divina res sit tam sancti sacerdotii ministerium, consecraneum fuit, quo dignius & majore cum veneratione exerceri posset, ut in Ecclesiæ ordinatissima dispositione plures essent, & diversi Ministrorum Ordines, qui Sacerdoti ex officio deservirent, ita distributi, ut qui jam Clericali Tonsura insigniti essent, per minores ad Majores ascenderent. Quinam autem sint horum Ministrorum Ordines minores, quinam majores (quos omnes perperam rejiciunt hæretici, præsertim Calvinus in suis Institutionum libris) dudum jam declaravit Cornelius Papa (f) ita scribens: „ In Ecclesia Catholica „ Presbyteros esse quadraginta sex, Dia- „ conos septem, Subdiaconos septem, „ Acoluthos quadraginta duos, Exorci- „ stas & Lectores una cum Ostiariis quin- „ quaginta duos,,. Primus itaque ac infimus ordo est Ostiarii seu Janitoris, cujus præcipua functio olim fuit, fores templi aperire ac claudere: claudere quidem infidelibus & quibuscunque ipso jure prohibitis; aperire vero fidelibus ad sacra mysteria propius inspicienda percipiendaque aptis & abunde instructis. Alter est ordo Lectorum, quorum munus quondam fuit

(f) In epist. ad Fabian. Antioch. apud Eusebium
l. 6. Hist. c. 35.

fuit, legere ex pulpito in Ecclesia, quidquid legendum fors occurrebat utraque ex Lege; nam Evangelia quoque legi ab iis consuevisse Auctor est S. Cyprianus (g). Tertius Ordo Exorcistarum est, cui instituendo præbuit occasionem frequentia energumenorum ad Ecclesias concurrentium, ut antiqua monumenta tradunt. Supra hos ab Ecclesia præscriptos exorcismos legere, eosdemque ut ad sacrificium divinum idonei redderentur, præparare proprium fuit officium Exorcistarum. Quartus ordo Acoluthorum, quasi pedissequorum, qui etiam a cereo, quem gestant *Ceroferarii* dicuntur. Eorum est, Sacrificio Missæ ministrare, vinum, aquam, lumen, & thus præparare, portare urceolos atque ampullas, ac Subdiacono porrigere. Per hos quatuor veluti gradus ad Ordines Majores & Sacros ascendunt, scilicet Subdiaconatus & Diaconatus, qui generali nomine Levitarum dicuntur, quod antiquis Ministris & Tribu Levi respondeant, qui Sacerdotibus familiæ Aaron inferiores erant. Hi proxime adstant sacrosancto Missæ Sacrificio, suisque manibus res sacratas contingunt, ipsimet cultui divino plene consecrati, atque in sortem Domini electi.

Du-

(g) *lib. 2. epist. 5.*

Duplex autem Subdiaconorum est ministerium: primum, Diacono ministrare in Missæ Sacrificio; quem in finem, dum ordinantur, calicem vacuum patenamque accipiunt: secundum, Epistolas D. Paulli sub sacro legere, uti docet Synodus Remensis (h) his verbis: *Et presentibus cunctis lectæ sunt epistolæ Pauli, qualiter Subdiaconi ministerium est, eundem Apostolum legere.* His duobus aliud olim munus accessit, quod erat, ut in gestis Martyrum adnotandis Diaconos juvarent, quemadmodum patet ex libro de Roman. Pontif. qui a quibusdam sub nomine Damasi Papæ diu falso circumferebatur, sed a Labbeo alteri Damaso non Pontifici tribuitur. In hoc de Fabiano Papa legitur: *Quod regiones divisit Diaconibus, & fecit septem Subdiaconos, qui septem Notariis imminerent, qui gesta Martyrum in integrum colligerent.* Diaconi supremi sunt in infimo Hierarchiæ hujus gradu, quibus triplex incumberebat munus: primo donis oblati, (quæ res frequens erat apud primos Christianos) colligendis, opibusque Ecclesiæ administrandis fuere præpositi, uti producit Acta Apostolorum (i). Dein Sacerdoti

Sa-

(h) Can. 4. (i) Cap. 6.

BIBLIOTH. DOMEST. LIB. XI. R

Sacrum facienti proxime adfistunt, eique ministrant teste S. Clemente, vel quisquis Auctor est Constitutionum (k), & sacrificii tempore Evangelium legunt, ut tradit S. Gregorius (l). Demum Episcoporum ac Presbyterorum vices obibant, si Corporis Domini consecrationem excipias, baptizando exemplo Philippi Diaconi (m), prædicando exemplo Stephani & Philippi Diaconorum (n), & Laicis Evcharistiam administrando, ut docet Concilium Nicænum (o).

Hæc de Hierarchia Ecclesiastica, quæ ad primum Juris & Status Politici Ecclesiastici caput atque personas pertinet, curatius exponere visum est, ut agnoscant, quotquot ab Ecclesiæ Catholicæ Sacris alieni sunt, quanta sit Majestas, Antiquitas, sublimis ordo, quamque amplæ sint functiones Hierarchiæ in Ecclesia Catholica, a qua se ipsos novissimis temporibus sua & violenter separarunt, malueruntque Pseudo - Ecclesiæ suæ tot habere Pontifices, quot Principes & Magistratus; Antistites & Ministros, qui nullo jure, nec legitima auctoritate in divini Verbi & Ecclesiæ administrationem temere involarunt: Sacra, (si tamen italia

(k) lib. 2. Const. c. 14. (l) lib. 4. epist. 44.

(m) Act. 8. (n) Act. 7. & 8. (o) Can. 14.

lia sint, & non potius profana) a quibus omnem ordinem hierarchicum, & ceremonias vetustissimas ab ipsis Apostolorum temporibus ad nos transmissas proscripserunt: contra vero immensum chaos sine ordine, sine symmetria, sine decore ullo introducere non dubitarunt, passim contempti a suis & ignobiles, postquam Ecclesiam veram contempserunt.

§. II.

Concilia.

XLII.

Alterum juris Ecclesiastici caput esse diximus Concilia, quæ ut Tertullianus loquitur (p), *aguntur certis in locis ex universis Ecclesiis, per quæ & altiora quæque in commune tractantur, & ipsa representatio totius nominis Christiani magna veneratione celebratur.* Atque horum Conciliorum, si legitima fuerint, summa est & auctoritas, & in rebus fidei definiendis potestas, eorumque decreta, ut D. Ambrosius adpellat, sunt *hereditaria signacula*, nullius temeritate violanda. Duplex autem Conciliorum genus distinguere

(p) *Lib. de jeunio c. 13.*

guere oportet: *Universale* seu Generale, quod totius Ecclesiæ nomine celebratur, & ad quod omnes ex toto orbe Christiano Episcopi vocantur: hoc si quoque legitimum fuerit, Oecumenicum dici solet. Constat enim ex Annalibus Ecclesiasticis, plura fuisse Concilia Generalia, uti Mediolanense an. 355. in causa Athanasii coactum: Ariminense an. 359. in quo per fraudem damnata fuit Nicæna fides: Ephesinum II. an. 449. in quo Præsides Dioscoro confirmata est Eutychis hæresis, hisque similia, quibus tamen Oecumenici Concilii nomen nemo tribuit, nemo honorem habuit, quum nec a summis Pontificibus probata, nec ab Ecclesia tanquam legitima unquam recepta fuerint. Unde Concilia Generalia in tres classes, scilicet in legitima seu Oecumenica, quorum octodecim, in Reprobata, quorum septem, & in partim Approbata partim Reprobata, quorum sex communius recensentur, dividendi mos inolevit. *Particulare* est, in quo vel integræ cujusdam Nationis, vel certæ cujusdam Provinciæ Præsules, aut diocesis alicujus animarum Pastores congregantur. Unde hoc Conciliorum genus in *Nationale*, *Provinciale*, ac *Diocesenum* plerisque partiri libuit. Origo Conciliorum

Ec-

Ecclesiasticorum ab ipsis Apostolorum temporibus repetenda est. Quippe hi priusquam in omnem terram dividerentur, Spiritus sancti impulsu & Christi promissione nixi (*ubi enim sunt duo vel tres congregati in nomine meo, ibi sum in medio eorum*) (q). convenerunt, ut fidei tradendæ breve compendium, quod Symbolum Apostolorum dicimus, conciperent, omnibus deinceps fidelibus proponendum: deinde ad substituendum alium in Judæ locum: tum ad constituendos, qui mensis & eleemosynarum distributioni servirent: demum exorta Antiochiæ de *Legalium* observatione controversia Jerosolymis Concilium coegerunt iidem Apostoli, & *seniores videre de verbo hoc* (r). Atque ab eo tempore Conciliorum mos in Ecclesia invaluit, quæ pro necessitatum impendentium diversitate diversa singulis pene ætatibus celebrata fuerunt. Neque humanum duntaxat inventum est convocare Concilia, ut perperam censuit Albertus Pighius (s); alias enim male tribuissent Apostoli Spiritui S: id, cujus ipse nec Auctor esset, nec Actor, dum palam in Concilio professi sunt: *Visum est Spiritui*

(q) *Matth. 18.* (r) *Act. 15.* (s) *Lib. 6. de celest. Hierarch. c. 1.*

tui S. & nobis. Quamvis autem non sit ea Conciliorum ineluctabilis necessitas Ecclesiæ imposita, ut absque his fides Catholica & animarum regimen salvum esse ac incolume nequeat, quum plures hæreses sine Concilio, quam in Concilio proscriptas fuisse jam olim ætate sua observavit S. Augustinus (t), summæ tamen utilitatis ac prope necessitatis rem hanc censuerunt omni tempore supremi Antistites & Patres: Nullibi enim, ait Illmus de Marca (u) fides universalis Ecclesiæ solet apertius explicari, vel splendidius eminere, aut securius prædicari, quam in compendio universæ Ecclesiæ, quæ Conciliis Generalibus repræsentatur. Causas autem convocandi Concilia Belarminus sequentes recenset (x): Prima esse solet nova & recens orta hæresis. Sic in Nicæno primo damnatus est Arius, in Constantinopolitano primo Macedonius, in Ephesino Nestorius, in Chalcedonensi Dioscorus & Eutyches &c. Altera, si quod forte schisma inter Romanos Pontifices oriatur, ad id in cunis suffocandum, quemadmodum contigit tempore Cornelli, Symachi, Innocentii II. Alexandri III., & in Concilio Constantiensi.

Ter-

(t) *Lib. 5. ad Bonif. c. ult.* (u) *lib. 5. concord. c. 8.* (x) *l. I. de Conc. c. 9.*

Tertia, si a Turcis aliisque Ecclesiæ hostibus orbi Catholico periculum immineat, ut communi consilio, subsidiis, collectisque viribus avertatur. Ob hanc Urbanus II. Calixtus II. & Eugenius III. Concilia olim congregarunt. Quarta, suspicio hæresis, si Pontifex Romanus eam incurreret, alia via non tollendam. Ita coactum fuit Romanum in caussa Damasi, Sixti III. Leonis III. nullum tamen ex his Conciliis sententiam damnationis in Papam tulisse legitur. Quinta demum, ad tollendos abusus, extirpandaque in Ecclesiam forte irrepsissent vitia, & Ecclesiasticam disciplinam in vigore suo conservandam, quem præ reliquis laborem sibi vindicavit sacrosancta Synodus Tridentina.

XLIII.

Ut vero Concilia vim suam auctoritatemque falli nesciam obtineant, tria potissimum sunt observanda: Primum est, quod antecedit; ut Concilium legitime congregetur: opus igitur erit, ut a Romano Pontifice Christi vices gerente indicatur, ac convocetur, isteque tanquam Ecclesiæ universæ Caput vel per se, vel per Legatos suos quocunque demum modo prælideat: Episcopos quoque totius orbis Catholici, si Generale Concilium

fuerit, vocatos adesse necessum est, (si non legitimum intercedat impedimentum) ut universæ Ecclesiæ imaginem exhibeant, cui Christus se adfuturum promisit. Frustra heic clamant hæretici, (uti tempore ultimæ Synodi Tridentinæ contigit) oportere ut Concilium legitimum sit, non solos Episcopos, qui decidendi auctoritate pollent, ac Presbyteros, quibus cura examinandi controversias committitur, verum etiam *Laicos*, saltem peritos & in SS. Literis eruditos, nec non Principes, Reges, ac Imperatores vocari, ut suffragium ferant, & iudices adsint, quum non minus hi quam illi membra sint Ecclesiæ, quam exhibet Concilium Oecumenicum. Sed aliud nos docet novum ac vetus Testamentum: istud quidem, dum in Deuteronomio legimus (y): *Si difficile & ambiguum apud te iudicium esse perspexeris . . . venies ad Sacerdotes Levitici generis . . . sequerisque sententiam eorum; nec declinabis ad dexteram, nec ad sinistram.* Illud vero, ubi D. Lucas tradit (z): Quum venissent Paullus & Barnabas, & quidam alii Hierosolymam, susceptisunt quidam omnes ab Ecclesia, quæ erat Hierosolymis: sed quum proposita fuisset quæstio, *conveniunt* ait, non juvenes, non foeminae,

non

(y) Cap. 17. (z) Act. 15.

non laici, non Principes, sed *Apostoli & Presbyteri* videre de verbo hoc. Solvere igitur quæstiones circa fidem exortas latroque in Conciliis iudicio ligare fideles, & obligare ad credendum non quorumlibet est, sed eorum tantum, qui ut claudendi & aperiendi, ita ligandi solvendi-que potestatem acceperunt a Christo (a). Et quamvis Conciliis interesse posse, ac nonnunquam interfulsse alios quoque, præter Episcopos & Ecclesiasticos doctrinæ præstantes, historia Ecclesiastica prodat, nihilominus solis Episcopis, & qui jus suffragii obtinuerunt, his verbis subscribere licet: *Definiens subscripsi.* Cæteri vero vel non subscribunt, vel hac solummodo formula utuntur: *Consentiens subscripsi.* Alterum est, quod comitatur, scilicet ut in ipso Concilio res, quæ ad fidem ac mores pertinent, ea industria, cura & zelo Patrum agantur, quem adhiberi voluit Christus, dum dixit: *ubi fuerint duo vel tres congregati in nomine meo, illic ego in medio eorum sum.* Certa utriusque rei nota partim cum Bellarmino ex fide humana, partim cum Melchiorre Cano ex divinæ providentiæ recta gubernatione petenda est. Prior (b) ita ratio-

(a) *Matth.* 16. (b) *l. 2. de Concil.* c. 9.

tlocinatur : „ Iis enim, qui concilio præ-
 „ sentes adsunt, evidens esse potest sine
 „ alia probatione, Concilium istud esse
 „ legitimum. Vident enim convenisse
 „ in unum Episcopos, qui habentur ab
 „ omnibus veri Episcopi, & convenisse
 „ ex variis Provinciis, & vocatos ab
 „ eo, qui habet auctoritatem; & si quid
 „ aliud requiratur ad legitimum Conci-
 „ lium, id etiam videre possunt . . . Po-
 „ steris autem vel absentibus id ipsum
 „ est notum ex humana fide, sed certis-
 „ sima, & quæ evidentia naturali ali-
 „ quo modo comparari possit, . . . Poste-
 „ rior vero, nempe Canus, ita de re præ-
 „ sente loquitur (c) : „ Deum suaviter om-
 „ nia disponere, simulque prospicere &
 „ finem & media ad finem necessaria . . .
 „ cum ergo Ecclesiæ firmitatem fidei fue-
 „ rit pollicitus, deesse non potest, quo
 „ minus tribuat Ecclesiæ preces, cæte-
 „ raque præsidia, quibus hæc firmiter
 „ conservetur . . . Quodsi semel Hære-
 „ ticus licentiam permittimus, ut in quæ-
 „ stionem vocent, num Ecclesiæ Judices
 „ eam diligentiam & curam exhibuerint,
 „ qua opus erat, ut quæstio via & ra-
 „ tione finiretur, ecquis adeo cæcus est,
 „ qui non videat, omnium mox Ponti-
 „ ficum

(c) *De Loe. Theol. l. 5. q. 3.*

„ficum & Conciliorum judicia labefac-
„tari? „. Tertium est, quod subsequi-
tur: nimirum si Concilium Oecumeni-
cum, actaque illius vel præsentis vel ab-
sentis Pontificis auctoritate, ac tacito vel
expresso consensu firmentur; tunc enim-
vero certam fidem facit, & numeris om-
nibus absolutum censetur. Est enim Pon-
tificiæ confirmationis æqua conditio cum
definitione illius, e cathedra, ut ajunt,
loquentis, quæ nulli errori obnoxia est,
ut totus paucis exceptis Catholicus orbis
fatetur. Concilium autem una cum Pon-
tifice id ratum habente fidei vel morum
dogmata definiens totam repræsentat Ec-
clesiam, e membris simul & capite com-
positam, quæ quum Dei nomine loqui-
tur, fallere non potest, nec falli, utpo-
te Spiritus S. Magisterio imbuta, nisi eam
a Christo conditore male materiata, &
inferorum portis evertendam fuisse reli-
ctam dicere velimus. Unde Nicænæ sy-
nodi Patres, quamvis eidem Pontificis Le-
gati interfuerint, nihilominus datis ad Syl-
vestrum Papam literis: *Quidquid consti-*
tuimus, precamur, ut oris vestri confor-
tio confirmetur. Quod ubi factum est,
tantam apud orbem Catholicum auctori-
tem obtinuit, ut D. Cyrillus (d) ejusdem
Syno-

(d) *Lib. i. de Trinit.*

Synodi decreta adpellare non dubitarit *sanctissima & divina oracula*: non minus D. Gregorius (e) palam professus est, se quatuor Concilia Generalia, quæ ipsum præcesserunt, velut *quatuor Dei Evangelia* suscipere ac venerari.

XLIV.

Jam vero imaginem Concilii, quo modo, quave forma celebrandum sit, simplicem quidem sed omnino perfectam S. Scriptura suppeditat in Actis Apostolorum (f). Initio proponitur quæstio, qualis fuit orta inter Apostolos & fideles, nimirum an qui e Gentibus conversi ad fidem veram fuerunt, oporteat circumcidi, & præcipere eis legem Moïsis? *Convenerunt Apostoli & Seniores* (Presbyteri) *videre de verbo hoc*. En! Apostoli & Presbyteri, non vero Laici ad decidendam hanc quæstionem convenerunt. *Cum autem magna conquisitio fieret*. En! accurate discutitur & examinatur causa a Patribus conscriptis. *Surgens Petrus dixit ad eos*. En! Petrus tanquam Præses concilii sententiam dixit primus, nempe Christianis non esse imponendum legis Mosaicæ jugum. *Tacuit autem omnis multitudo, & audiebat Barnabam & Paullum narrantes &c. & postquam*

(e) *Cap. I. epist. 24.* (f) *cap. 15.*

quam tacuerunt, respondit Jacobus &c. En! populus omnino tacuit, & soli loquebantur Apostoli, accedentes Petri sententiæ, ubi scilicet ad sententiam definientem ventum est; licet Presbyteros, non vero populum prius ad ineundum consilium ac veritatem inquirendam admiserint. *Tunc placuit Apostolis & Senioribus cum omni Ecclesia eligere Viros &c.* En! Sententiæ Apostolorum acquiescunt Seniores cum tota Ecclesia, suamque operam conferunt, ut ea opere ipso compleatur, atque aliis etiam Concilii hujus decretum promulgetur, quod erat hujusmodi: *Visum est Spiritui S. & nobis, nihil ultra imponere vobis oneris &c.* Atque hæc de Conciliis, eorumque origine, causis, forma & auctoritate univèrse dicta sufficiant. De illorum numero, Actis, & legibus seu Canonibus quam plurima exstant volumina, summa diligentia, fide, ac eruditione conscripta.

§. III.

Tribunalia.

XLV.

Tertium Juris Publici Ecclesiastici caput constituunt Curia Romanæ Tribunalia, per quæ intelligo Congregatio-
nes

nes illas, quibus præesse ac interesse solent Eminentissimi Cardinales cum aliis Prælati, Theologis & Doctissimis Viris Ecclesiasticis. Quum enim immensa negotiorum & curarum moles sit, quæ Romam velut in centrum ex omnibus per orbem totum diffusis Ecclesiis, & a diversi ordinis fidelibus undatim confluere solent, pro rerum tractandarum varietate in varias classes, quas Congregationes vocant, provido consilio divisum est sacrum Cardinalium Collegium. Harum facile præcipua est *Congregatio Concilii*, ad cujus tribunal dubia & quæstiones circa Concilii Tridentini decreta & morum disciplinam occurrentes deferri consueverunt. Hanc Pius IV. instituit anno 1563. vel ut Bullarium Cherubini censet, an. 1564. ex octo S. R. E. Cardinalibus, aliisque Adjutoribus conflata, quorum est invigilare, ut decreta sacrosanctæ hujus Synodi inviolate observentur, & effectui dentur. Declarationes eorum nihil aliud sunt, quam interpretationes decretorum præfati Concilii, ad reformandos mores pertinentium. Nam illa, quæ ad fidei dogmata adtinent, interpretanda per Constitutionem Sixti V. an. 1587. editam ipsa Sedes Apostolica sibi reservavit. Communior Doctorum sententia est, declaratio-

tiones has, si *comprehensiva* sint atque consulto Pontifice fiant, & si de iis authentice constet, jus constituere, quod omnes obligat, quamvis non promulgentur, quemadmodum aliæ leges Pontificiæ promulgari consueverunt.

Congregatio S. Officii seu *Inquisitionis* erecta fuit a Paulo III. an. 1542. per Constitutionem *Licet ab initio* &c. a Paulo IV. confirmata, a Successoribus aucta pluribus privilegiis & facultatibus, cujus est Catholicæ fidei sartæ rectæque conservandæ prospicere. In hoc Tribunali omnes causæ ac materiæ versantes circa Hæreticam pravitatem, Schismata, Apostasiam a fide, Magiam, Sortilegia, Divinationes, Sacramentorum abusus summa accuratione discutiuntur, rei que judicantur, ac debitis afficiuntur pœnis. Atque huic tribunalī nescio quam crudelitatis speciem adfingunt hæretici, ac maleferiati quidam Catholici, collectas e priorum libris mendacissimas narratiunculas, immo fabulas plenis buccis crepantes. Dolet nimirum iis, quod per fortissimum hunc murum & custodiam erroribus suis falsisque dogmatibus oppositam penetrare nequeant in Ecclesiæ viscera, quemadmodum in Germania, Gallia, Suecia, Dania &c. fecerunt cum maximo rei Catholicæ damno.

Certe

Certe videmus ab omni hæresum labe intactas regiones illas, in quibus tribunalia hæc erecta vigent.

Alia est *Congregatio super negotiis Episcoporum & Regularium*, auctore Sixto V. per Constitutionem, quæ incipit *Immensa æterna* Dei &c. Hæc primum in duas Congregationes erat divisa, postea vero ab eodem Pontifice in unam conjuncta, & ex viginti quatuor Cardinalibus composita, quorum munus est diffinire controversias tum eas, quæ inter Episcopos & alios Prælatos aut Vicarios una ex parte, ex altera inter subditos vel *Regulares* exortæ sunt, tum illas, quæ inter Religiosos sive ejusdem sive diversi Ordinis, uti etiam inter Religiosum & ipsam Religionem agitantur, absque tamen forma judicii.

Congregatio Jurisdictionis & Immunitatis Ecclesiasticæ. Hanc condidit Urbanus VIII. eo Cardinalium & Prælatorum (qui plerumque etiam sunt Auditores Rotæ, ut vocant) numero, qui Summo Pontifici placuerit. Huic incumbit tueri pro viribus Jurisdictionem & Immunitatem, tam quæ personas Ecclesiasticas, quam quæ loca & res illarum afficit: controversias hac super re exortas dirimere, illosque qui eam violare audent, in officio continere.

Con-

Congregationi Sacrorum Rituum initium & auctoritatem dedit rursus Sixtus V. solenni Constitutione promulgata, eamque in duplicem quasi classem distribuit: una est ordinaria, cui cura sacrorum Ecclesiæ rituum, ceremoniarum, & consuetudinum incumbit: altera velut extra ordinem, quæ merita eorum expendit, qui ut inter Beatos & Sanctos referantur, proponi solent.

Congregatio Indicis librorum prohibitorum, itidem a Sixto V. erecta fuit eum in finem, ut libri hæresis veneno infecti stigmatibus notentur, vel de doctrina sana suspecti, aut noxia aspersi prohibeantur, vel corrigantur, quales Indices cum certis regulis jam plures in lucem prodierunt.

Alia porro est *Congregatio de propaganda fide Catholica*, quam Gregorius XV. per Constitutionem suam *Inscrutabili* an. 1622. fundavit. Hujus officium est, modos omnes investigare, ut fides Catholica & in terris, ubi recepta jam est, illibata conservetur, & in aliis etiam regionibus, a quibus adhuc exulat, per viros Apostolicos & zelo divinæ gloriæ propagandæ plenos introducatur.

Congregatio de Indulgentiis & SS. Reliquiis, quam instituit Clemens IX. Con-

stitutione *In Ipsis*. an. 1669. edita. Illius est, cunctas difficultates & dubia, quæ circa *Indulgentias* & Sanctorum Reliquias occurrunt, nec tamen ad fidei dogmata pertinent, expedire, tollere abusus, qui forte irrepererunt hoc in negotio, falsarum exemplaria recognoscere, & ad summi Pontificis Tribunal vel ut confirmentur, vel ut proscribantur, deferre.

Sunt & plures aliæ similes Congregationes tum perpetuæ, uti *Dataria*, *S. Penitentiaria*, *Signaturæ Gratiæ & Justitiæ*, rerum & causarum *Consistorialium*, tum non perpetuæ, quales exigente rerum necessitate, & occurrentibus negotiis gravioribus ad tempus eriguntur.

§. IV.

Leges universales.

XLVI.

Quartum Juris Publici Ecclesiastici caput Leges, vel potius Legum, quæ universam Ecclesiæ gubernationem afficiunt, fontes comprehendit. Facile princeps horum est Concilium Tridentinum, inter oecumenicos decimum octavum, & hucusque postremum, quod & temporis, quo duravit, diuturnitate, & Patrum vir-

virtute ac doctrina præstantissimorum copia, & rerum gestarum magnitudine longe celebratissimum, reliquorum omnium præcedentium conciliorum splendorem auctoritatemque in se uno, velut in compendio quodam complexum fuisse videri potest. Inchoatum est Tridenti a Paulo III. imperante Carolo V. an. 1545. post duos vero annos ab eodem Papa ob metum pestis Bononiam translatum, inde a Julio III. Tridenti rursus continuatum, sed ob bellicos tumultus abruptum, & sub Marcello II. & Paulo IV. per decem fere annos suspensum, denique post decem & octo annorum intervallum a Pio IV. regnante Ferdinando I. Cæsare Tridenti instauratum, & communi orbis Catholici emolumento an. 1563. fuit absolutum. Duplex erat causa, immo necessitas convocandi hoc Concilium, scilicet tum hæresis a Luthero longe lateque per Germaniam, & a Calvino per hanc ipsam & per Galliam sparsa, atque pestifera doctrina omnium fere præcedentium hæresiarcharum erroribus conspersa: tum depravatis in clero & populo moribus disciplina Ecclesiæ prope modum collapsa. Utrique morbo ut mederetur hæc synodus sacrosancta, geminum sibi scopum præfixit, nimirum

condemnare hæreses, ac mores emendare, ut hac ratione quies, pax, & sanitas Ecclesiæ restitueretur. Hoc ut fieret, instituti sunt viginti quinque conventus, quas *Sessiones* vocant, in quorum plerisque duo promulgata fuerunt decreta, unum ad res fidei, alterum ad reformandos mores pertinentia. Decretis autem fidei subnectebantur plures Canones, in quibus hæreses damnatæ, & qui eas tuerentur, vel iisdem adsensum præberent, anathemate perculsi sunt. Subscribere ad finem Concilii decretis his Patres præsentis numero ducenti quinquaginta quinque: videlicet Legati quatuor, Cardinales duo, Patriarchæ tres, Archiepiscopi viginti quinque, Episcopi centum sexaginta octo, Abbates septem, absentium Procuratores triginta novem, Ordinum Religiosorum summi Antistites septem; quamvis longe plures diversis temporibus Synodo huic interfuerint, nimirum Cardinales Legati septem, non Legati duo, Archiepiscopi tres, Episcopi ducenti triginta quinque: præterea Oratores & Legati Imperatoris Ferdinandi, Regis Galliæ, Hispaniæ, Lusitaniæ, Hungariæ, Bohemiæ, Poloniæ, Republicæ Venetæ, septem *Cantonum* Helveticorum, Baviaræ, Sabaudiar, Florentiar,

tia, aliorumque Principum Ecclesiasticorum, ita ut Nicolaus de Ponte, Venetæ Reipublicæ inclytus Senator, & ejusdem ad Synodum Orator in sua de Concilio historia asserere non dubitarit, majorem illuc confluisse hominum doctorum numerum, quam forsân in quavis alia Synodo, etiam in prima Nicæna fuerit. Jam vero auctoritas hujus Concilii tanta est, quanta aliorum oecumenicorum, & ab Ecclesia receptorum, ita ut omnia ejus decreta *dogmatica*, seu canones, ut articuli fidei firmissime retinenda, ea vero, quæ ad mores reformandos pertinent, tanquam commune ac novissimum jus Ecclesiæ custodienda & observanda sint, ubicunque legitime promulgata, nec per desuetudinem aut consuetudinem contrariam (si non forte potius morum corruptela sit) abrogata fuerint. Est enim Concilium hoc auctoritate Apostolica in Spiritu S. congregatum, ejusque decreta omnia a memorato Pontifice Pio IV. in *Consistorio* secreto per Constitutionem, quæ incipit *Benedictus Deus* 7. Calend. Februar. an. 1563. fuerunt confirmata.

XLVII.

Sequitur *Magnum Bullarium* Romanum, cui initium dedit collectis Ponti-

ficum Bullis & Constitutionibus Laertius Cherubinus, præstantissimus Jurisconsultus Romanus, ut privato usui serviret: Sed Sixti V. auspiciis publici juris factum est. Laertio autem e vivis erepto ejusdem filius, Monachus Cassinensis, Angelus Maria Cherubinus Patris vestigia secutus magno incremento opus hoc auxit, Urbano VIII. dedicatum. Succedere alii, inter quos Angelus a Lantusia, & Joannes Paulus a Roma Ord. Min. *strictioris observantiæ*, qui recentiorum Pontificum Constitutiones hætenus promulgatas tam ample collegerunt, ut insigne opus istud usque ad annum, 1757. ad Tomos novemdecim excreverit. Equidem fateri oportet, tantam esse Bullarii hujus fidem, usu Curiae Romanæ comprobata, ut temeritatis notam incurreret, qui vel universe, vel nulla facta exceptione suspectam redderet: nihilominus quum neque peculiari summi cujusdam Pontificis mandato fuerit compositum, seu collectum hoc opus, neque postmodum auctoritate Apostolica confirmatum, inter libros canonicos recenseri haud potest: quumque sæpius debito modo non constet, an ejusmodi Bulla in eo contenta sit rite promulgata, vel usu recepta, vel primogeniæ in omnibus respon-

spondeat, in Judicio plenam probationem non facit, ubi de re magni momenti vel præjudicii agitur, nisi authentica producat.

Decisiones Rotæ Romanæ, quamvis magnæ auctoritatis sint, & in Curia Romana, si plures existent super eadem questione conformes, secundum illas in similibus causis judicari soleat, extra illam tamen vim Juris universalis non obtinent, quoniam illis, qui tribunali huic assident, non condendi leges, sed solum judicandi secundum eas data sit potestas. Ut autem quid rei sit *Rota Romana* intelligatur, nosse oportet, quod olim e toto terrarum orbe nedum causæ Ecclesiasticæ, sed etiam profanæ, privatorum hominum non minus quam Principum, Romam & ad Sedem Pontificiam deferri sponte consueverint, ut *Annales Ecclesiastici* passim docent: ex vero ad celebranda sacra, quæ *Missas* vocamus, pergenti Pontifici, quo facilius aditus pateret, offerebantur, quas postmodum iste eximiis quibusdam & insignibus Jurisconsultis, qui sacra operanti adistere solebant, discutiendas commisit. Atque hi sunt, qui hodie *Auditores Rotæ* vocantur ob eam causam, quod in orbem sedentes, controversias ad se delatas ro-

tent seu examinent, & secundum jura, prudentiam & æquitatem dirimere satagant. Constat hæc Rota e duodecim Prælatiſ partim Italiſ & Hiſpaniſ, partim Germaniſ & Galliſ, iſque in jure verſatiſſimiſ.

Supereſt, ut de Reguliſ *Cancellariæ* dicamus. Sunt hæc, uti nomen ipſum præſert, certæ ordinationeſ Pontificum, quæ potiſſimum ad cauſaſ, quaſ vocant *Beneficiales* ſpectant, & circa Literaſ Apoſtolicas verſantur, qualeſ in *Cancellaria* expediri ac promulgarī ſolent. Harum priorē tractant de *Reſervationibuſ* tum generalibuſ tum ſingularibuſ Beneficiorum, quæ conferenda ſibi reſervare Papa conſuevit: poſteriorēſ vero agunt de Literiſ Apoſtolicis expediendiſ, & de forma illarum, atque clauſuliſ, nec non de *Diſpenſationibuſ* ac *Indulgentiſ* obtinendiſ. *Cancellaria* hæc jam antiquiſ temporibuſ erat celebriſ, utpote cujuſ mentio ſæpiuſ in Jure Canonico occurrit (g): vi-
væ ſolum vociſ mandato tunc peragi ſolebant negotia, uſque dum Joanniſ XXII. juiſſu circa annum, 1330. certæ quædam regulæ fuerint conſcriptæ, & in eadem *Cancellaria*, ut ſanctè obſerventur, pro-
mul-

(g) *C. ad hæc. c. de Reſcriptiſ. item c. porrecta 6. de confirm. utili &c.*

mulgatæ, demum a Nicolao V. in eam, qua hodie gaudent, formam redactæ. Porro singuli Pontifices ejusmodi regulas sui regiminis initio condere solent, renovando, augendo, vel minuendo eas, quas Antecessores præscripserunt; unde quandoque majorem, quandoque minorem earum numerum esse contingit: immo cum morte Pontificis expirant, & S. Sede vacante nullam habent vim, donec a Successore iterum velut resuscitentur, id quod mox altero ab electione die fit arbitrio novi Papæ. De his jam Regulis, utrum Jus commune constituent, magna est in utramque partem opinandi diversitas: mediam viam tenent, qui discrimen faciunt inter regulas, quæ formam præscribunt rebus in Cancellaria tractandis, & eas, quæ generatim *ad beneficia reservata, ad annualem & triennalem possessorem, ad infirmos resignantes &c.* sese extendunt. Prioris enim generis regulæ solum in Cancellaria, posterioris vero etiam extra curiam vim & auctoritatem juris obtinere videntur.

XLVIII.

Ex his quatuor capitibus hucusque brevi calamo delineatis perspicuum esse potest

test omnibus, præsertim heterodoxis, tum quam ordinata, exacta, & numeris omnibus absoluta sit gubernatio & respublica Ecclesiastica, nisi contra jus & fas, ac contra omnem prudentiam & conscientiam criminari velint, hæc & similia solum ad speciem & pompam, aut fucum in negotio gravissimi momenti faciendum ab Ecclesia & Summis Pontificibus fuisse ordinata & stabilita, non attendentes, quid simili ratione ac maledicentia de Principum & Imperatorum regimine atque Curiis conviciari liceret: tum etiam, quam amplum & late patens, eruditione plenum & scitu dignissimum sit Jus Publicum Ecclesiasticum, ita ut ab aliis fusiore calamo illustrari omnino mereatur. Huic autem labori servire possunt eruditissimorum virorum libri, quos de potestate Pontificis, de Hierarchia Ecclesiæ, de Conciliis, de Curia Romana &c. in lucem ediderunt, cujusmodi sunt præter eos, qui in Jus Canonicum commentati sunt ac supra recensiti, Card. Bellarminus de potestate Pontificis, Conciliorum, Ecclesiæ, de Clericis... Franciscus Zypæus J.C. Duvallius, Augustinus de Ancona de jure novissimo & jurisdictione Ecclesiastica Franc. Anton. de Simeonibus de Romani Pontificis judiciaria potestate... Felicianus.

nus de Oliva e Souza, Lusitanus, de foro Ecclesiæ, Tomis tribus. Dionysius Areopagita, Deyerus, Jacobus Sprengius & Franc. Xav. Zechius S. J. de Hierarchia Ecclesiastica . . . Gabriel Cossartius & Petrus Labbe S. J. de Conciliis Tomis XVII. . . . item Cabassutius, Fronto Ducæus, Jacobus Sirmondus S. J. de Canonibus Apostolorum, Conciliis tum generalibus tum Provincialibus. Emanuel a Schellstrate S. Th. Doctor Antwerpiensis de Antiquitate illustrata circa Concilia, Decreta Pontificum, & totam historiam Ecclesiasticam. Dionysius Petavius, & Card. Sfortia Pallavicinus S. J. de Concilio Tridentino: sacræ vero Congregationis Concilii *Resolutionum Thesaurus* exstat a variis auctoribus collectus Tomulis XIV. . . Haunoldus, Plettenbergius S. J. de notitia Curie Romanæ. . . . Prosper Farinaccius J. C. Romanus de Decisionibus Rotæ. . . Hieronymus Gonzalez J. C. Hispanus. Joan. a Cockier Canonicus Leodiensis, & novissime Joan. Bapt. Rigantius J. C. Romanus de regulis Cancellariæ. . . . Theodoricus Amydemius Advocatus Romanus de officio & jurisdictione *Datarii* & *Stylo Datarie* &c. . . . Abundantissimam denique pro jure Publico Ecclesiastico materiam subministrare poterit eruditissimi Viri

Viri ac Scriptoris Josephi Binneri S. J.
Apparatus eruditionis ad Jurisprudentiam
Ecclesiasticam.



CAPUT VIII.

JUS PUBLICUM POLITICUM.

XLIX.

Proœmium.

Jus hoc natales eosdem habet, quos
quævis Respublica, utpote quam ad
finem sibi præfixum, scilicet pacem,
tranquillitatem, ac felicitatem hujus vitæ
non solum per leges, quibus privatæ actio-
nes membrorum Reipublicæ ad se invi-
cem diriguntur, verum etiam, & vel
maxime per leges, quibus actiones pu-
blicæ ad totius corporis conservationem
ac incolumitatem ordinantur, perducî
oportet. Optime hoc agnovit Imp. Ju-
stinianus, dum in Institutionibus suis ita
loquitur (b): *Hujus studii duæ sunt posi-
tiones (seu objecta) publicum & priva-
tum. Publicum jus est, quod ad statum
rei Romanæ spectat. Privatum, quod sin-
gulorum utilitatem.* quamvis illius ac
eo-

(b) §. *hujus studii* 4. *Instit. de J. & J.*

posterioris temporis Jurisconsulti parum vel nihil huic studio tribuisse reperiantur, vel quia Principum interdictione iis non licuit disceptare de statu publico (i), vel quia alterum studii genus, scilicet juris privati, ac forum contentiosum plus emolumenti ac lucri adferebat. Non vero ubivis gentium eadem juris publici forma est, sed pro temporum & rerum diversitate diversum fuit introductum. Ita in Gallia regiminis Politici ac publici fundamentum est Lex Salica, in Anglia Jus Normannicum a Guilielmo Conquæstore conscriptum viget: Dani utuntur eo, quod Waldemarum Danicæ Rex condidit ac promulgavit; Imperium vero Romano - Germanicum (*ibi enim nostra Roma, ubi Imperator* (k) tot mutationes passum, postquam a Democratia in Monarchiam, ab hac in Aristocratiam, & ab ista rursus in Monarchiam, tum a Romanis ad Græcos, a Græcis ad Germanos transiit, denique proprium sibi jus Publicum constituit, nimirum illud, quod Imperatorum auctoritate atque unanimi Electorum ac Statuum Imperii consensu in Comitibus Generalibus fuit adprobatum ac confirmatum.

§. I.

(i) *Per l. disputare 3. cod. de crimine sacrilegii.*

(k) *Arg. c. 24. d. 93.*

§. I.

Caput & membra Imperii nobiliora.

L.

Jam vero Jus hoc publicum Romano-Germanicum quatuor potissimum capitibus comprehendi commode potest, quorum primum de personis in Imperio considerandis agit, alterum de Comitibus & Conventibus Imperii, tertium de tribunalibus ejusdem, & quartum de Imperii legibus. De his omnibus ut quam brevissime differam, quod ad personas adtinet, suprema & cunctarum Apex est Imperator, qui Germanus, Catholicus (ut ex *Capitulatione* satis patet) ac ejusmodi esse debet, qui grandes ditiones possideat, ut sustinendæ Majestati par sit. Initio eligitur tanquam Rex Romanorum, vel vivo adhuc Imperatore, ut eidem auxilio sit, & defuncto absque nova electione succedat, vel jam e vivis erepto, ut mox Imperator promulgetur, ac coronetur. Eligitur hic per plura Electorum, quos Archiepiscopus Moguntinus & inter eos dignitate primus Francofurtum convocat, suffragia: corona vero olim Romæ a Pontifice (uti S. Leo III. Occidentis Imperium, trecentis annis amplius

plius capite orbatum, ac diadema in Carolum M. transtulit) imponi solebat: post Carolum V. vero munere hoc fungitur Moguntinus Elector; allatis Norimberga Insignibus; scilicet Caroli M. corona, ense, ac sceptro cum Pomo Imperiali. Inter alia, dum coronatur, promittere debet: *Sanctam fidem Catholicam & Apostolicam tenere, & operibus justis servare; nec non SSmo in Christo Patri & Domino Romano Pontifici, & S. Romanæ Ecclesiæ subjectionem debitam & fidem reverenter exhibere.* Amplissima est Imperatoris uti dignitas, ita & potestas: solus Imperii legibus est solutus, nulli poenæ obnoxius, nec se superiorem recognoscit: solus privilegia & immunitates confert; Magistratus qui universo Imperio jus dicunt; constituit, Reges Duces Principes ac Comites creat; civitatis jura concedit; Feudis Imperii Electores, Duces, Principes &c. investit; ad eum ab omnibus in Imperio judiciis ad extremum provocatur: ab Imperatore vero nec ad Tribunal aliquod, nec ad Comitia provocare licet. Demum etiam *primarum* ut vocant *Præcun* beneficio gaudet ad personam idoneam in quavis Ecclesia ad *Canonicatum* præsentandam &c. Quantumvis tamen ampla sit hæc potestas Imperatoria, non paucis tamen

tamen limitibus circumscribitur tum in legibus, quæ universum Imperium obligent, ferendis, novis vectigalibus imponendis, in re monetali immutanda, tum in vendendis, permutandis, oppignorandis Imperii bonis, in cogendis Comitibus, in antiquandis Tribunalibus, in proscribendo aliquo Statu Imperii, seu in *bannum* ut vocant mittendo. In his enim gravissimis negotiis omnium Statuum, aut majoris partis Electorum consensus accedat, necesse est. Hæc de Capite vastissimi hujus Corporis: ejus membra in certos Ordines, Status, & Collegia distribuuntur. Primum ac dignitate præcipuum est Collegium Electorum. Olim quidem singulis provinciarum Præfectis, Ducibus, Comitibus &c. integrum erat interesse Imperatoris electioni, ac in ea suffragium ferre: postmodum potentiores solum Principes hanc sibi potestatem arrogarunt: denique totum electionis negotium ad Septemviros delatum est: Moguntinum, Coloniensem, ac Trevirensen Archiepiscopos, Regem Bohemiæ, Comitem Palatinum, Ducem Saxonix, & Marchionem Brandeburgensem: fuitque hæc eligendi forma, & Eligentium numerus amplissime confirmatus Aurea Bulla, a Carolo IV. edita an. 1356. auctus vero posteriore
tem-

tempore duobus capitibus, Duce nimirum Bavariz, ac Brunsvico - Hanoverano ad Electorum dignitatem evectis. Horum potestas ampla est; soli enim Cæsarem vel Romanorum Regem eligunt: soli *Capitulationem*, seu ea, in quæ jurare debet novus Imperator electus, concipiunt: Coire possunt inter se, quoties Imperii bonum id postulat, ac Comitia suadere Cæsari, ut indicat: ab eorum sententiis adpellari non potest, nisi denegatæ justitiæ causa. Dignitas vero illorum tanta est, ut Regiæ æquiparetur. Nam in Imperii terris certant de priore loco cum Regibus: eorum Legati Regiis præferuntur, & in Aula Cæsarea si præsentés sint, similiter regiis honoribus excipiuntur. Præterea Moguntinus Elector est *Archicancellarius* per Germaniam: Trevirensis per Galliam, Coloniensis per Italiam: Bohemus *Archipincerna*, Bavarus *Archidapifer*, Saxo *Archimarescallus*, Brandenburgensis, *Archicamerarius*, Palatinus & Hanoveranus *Architeſaurarii*. Vicarii autem Imperii sunt Saxo & Comes Palatinus Rheni, qui tempore interregni rebus prospiciunt. Alterum inferius priore Collegium est Principum. In horum numerum veniunt e personis Ecclesiasticis *Primas* Germaniæ, seu Archiepiscopus

BIBLIOTH. DOMEST. LIB. XI. T pus

pus inter reliquos præcipuus, qualis olim erat Magdeburgicus, nunc Salisburgen-
sis: Archiepiscopi, Episcopi, Abbates,
quamvis aliqui eorum Principes haud
sint: e *Laicis* Archidux Austriæ, Ducum
supremus, Duces alii, Principes, *Land-
gravii*, Comites ac *Barones* Imperii,
quorum ambo duplex in Comitibus subse-
lium occupant, scilicet Wetteravii, qui
per Franconiam & Rhenum ditiones occu-
pant, & Suevici. Tertium est Collegium
Civitatum liberarum seu Imperialium, quæ
soli Imperatori ac Imperio subjiciuntur:
nam reliquæ Municipales vocantur. Ori-
ginem suam illæ debent Carolo IV. Imp.
ac Bohemiæ Regi, qui dum sumptibus
immodicis Electorum suffragia coemisset,
ad incitiam prope reductus multis civitati-
bus libertatem auro vendidit; hanc quæ
obtinuerunt, Imperii *Statibus Immediatis*
sunt accensæ. Dicuntur autem Status
Imperii, qui sessione ac suffragio in Co-
mitibus Generalibus gaudent. Eorum jura
sunt sane conspicua, nimirum jus sessio-
nis & suffragii, jus pangendi fœdera, quæ
inter se & cum exteris (non tamen con-
tra Imperium) inire possunt: jus *Super-
rioritatis* in suis territoriis: jus *Regalium*
seu legum ferendarum, nundinarum, pu-
niendi ac poenas remittendi &c. porro
ex-

extra Germaniam in jus vocari nequeunt.

§. II.

Comitia & Conventus Imperii.

LL

Alterum ut diximus caput Juris Publici sunt comitia & conventus Imperii. Heic nosse oportet, post Maximilianum I. a Carolo V. Imperium Germanicum in decem Provincias, quas *Circulos* vocari jussit, fuisse divisum, ita ut nomine *Statuum*, qui quovis in Circulo siti sunt, una cum dimensione pecuniarum, quas Imperio pendunt, libro seu Albo inscribantur, qui *Matricula* adpellari consuevit. Singulis duo Principes *Directores* præsent, qui reliquos Status ad Conventum convocant: his additur Dux, qui militiæ illius Circuli Præfectum agit, atque duo ad negotia politica gerenda, quæstor ad *Ærarii*, & alius ad monetæ curam & administrationem adjunguntur. Jam vero Conventus vel sunt Circulorum, in quibus cujusvis *Deputati* semel quot annis aut sæpius congregari possunt, ut de rebus & obsequiis, quæ a quovis ejusmodi Circulo ad commune bonum Imperii præstare convenit, in medium consulant. Atque ad hos conventus plerum-

que Cæsar suos mittit *Commissarios*, qui tamen ipsis deliberationibus non intèr-sunt: Vel sunt conventus Electorum, qui ab his, quando lubet, cogi possunt: nulus tamen in iis modus negotiis publicis poni potest, aut quid decerni, nisi reli-quorum Imperii Statuum consensu & ad-probatione, ac Cæsaris auctoritate inter-veniente: Vel sunt conventus *Deputato-rum*, ad quos se conferunt *Commissarii* Imperatoris, Electorum, & quidam alii tum Principes, tum Abbates, Comites & Civitates, tam e Catholicorum quam A catholicorum gremio selecti, quemad-modum cautum fuit an. 1559. Atque in his de occurrentibus gravioribus Imperii negotiis deliberatur. At Comitìa gene-ralia, quæ cum consensu Electorum Cæ-sar ipse convocat, ex omnibus Imperii Statibus seu per se, seu per Legatos præ-sentibus congregantur, in quibus de cau-sis tantummodo publicis, nempe bellis, foederibus, re *monetaria*, expeditionibus in Turcas, proscriptione seu *banno* Im-perii consilia agitantur. Locus in quo celebrabantur olim hæc comitìa, fuit No-rimberga, uti Aurea Bulla præscribit: nunc Ratisbonam translata fuerunt. Ordo autem suffragiorum hic est, ut post ne-gotia per Legatum Imperatoris (*Principa-*
lem

lem Commissarium vel Plenipotentiarium dicunt) proposita rebus deliberatis, singula collegia suffragium suum privatim ferant: Electores quidem & Principes seu Ecclesiastici seu *Seculares* viritim: Abbates vero & Comites ac Civitates curiatim, ita ut Abbatum ac Civitatum cœtui duo, Comitum vero Ordini quatuor vota conveniat. Rebus ita comparatis in unum cocunt omnia hæc tria Collegia, suæque quæ prius seorsim conceperant suffragia, in commune conferunt: Tum sententia, in quam plures Statuum classes iverint, Imperatori adprobanda offertur, qui si non annuat, utut omnia conspiciantur collegia, concludere aut decernere quidquam fas non est: At ubi inter Caput & membra convenit, Tabulæ solemnes conscribuntur, quibus postquam Cæsar atque Ordines subscripsere, *Recëssus Imperii* nuncupantur. Atque hæc de quibus postremo loco dixi, comitia præstitutum tempus haud quidem habent, nihilominus ea, quæ an. 1662. coacta fuerunt, in hanc usque diem continuantur Ratisbonæ, vix aliquando finienda.

Tribunalia Imperii.

LII.

Tertium caput Juris Publici sunt Tribunalia, pro rerum, quæ ibidem tractantur, varietate varia. *Primo*, Consilium Intimum Cæsareum, in quo de negotiis politicis ad *rationem Status* ut ajunt pertinentibus decernitur: *Secundo*, Consilium *Imperiale* Aulicum, quod antiquis jam temporibus semper in Curia Imperatoris celebratum fuit, quamvis in ordinem, quo hodie utitur, a Ferdinando I. Maximiliano II. Mathia & Ferdinando III. redactum fuerit. Primaria hujus Tribunalis officia, uti Præsidentis, & eorum qui huic a consiliis sunt, Imperator distribuit, cui juramentum præstant, se Imperii utilitatem ac jura semper præ oculis habituros esse: minora Elector Moguntinus tanquam *Archicancellarius*. Componitur ex octodecim personis, quarum sex ut ex A catholicorum gremio assumantur, pace Westphalica cautum est. Agitur heic de causis & litigiis componendis, quæ inter Imperii Status sunt exorta, & quidem sine legum ambagibus brevissima, qua fieri potest, via: ubi lata est

est hoc in tribunali sententia, nec ea corrigi a Consilio Intimo, licet superiore, nec ab illa ad Cæsarem appellari concessum est: aperta tamen relinquitur porta gratiæ per supplicem libellum obtinendæ, quo porrecto Cæsar summa potestate rebus prospicit. *Tertio* Judicium *Camera Imperialis*, quod est confessus multorum Nobilium ac Doctorum, ad privatas Statuum lites componendas institutum a Maximiliano I. an. 1495. in Comitibus Wormatiensibus, postquam *diffidationes*, triste illud bellorum privata auctoritate gestorum seu potius latrociniorum genus, e medio sustulit. Erectum est Tribunal hoc primum Francofordiæ, tum Norimbergam, inde Wormatiam, Spiram, demum Wezlariam an. 1693. translatum. Constat autem Iudice, binis Præsidibus, viginti Assessores, partim Catholicis partim A catholicis pari numero, Procuratore & Advocato *Fisci*, Notariis &c. Summa in eo accuratione omnia ad juris apicem & justitiæ bilancem, quamvis lento gradu, expenduntur. Hinc lata semel sententia provocare ab illo nefas est; conceditur tamen *Revisionis* remedium in causis, quæ saltem duobus millibus *Imperialium* æstimantur. Peculiare huic iudicio est, quod

vacante throno Cæsareo non sileant oracula fori hujus, utpote quod totum Imperium, non solum Imperatorem (utl Aulicum Judicium) repræsentat. Præter hæc sunt alia quædam Tribunalia, quemadmodum Judicium Comitum Palatini, in quo secundum veterem consuetudinem ab Aurea Bulla confirmatam ipse Imperator judicio conveniri potest, quum æquitati maxime consonum sit, ut Principes orta inter se & subditos controversia rem per alios quosdam Judices cognosci patiantur; Item Judicium Rottwilanum a Conrado III. Romanorum Rege an. 1147. uti creditur, institutum, cui solus Imperator supremam auctoritatem indulget. Ejus potestas valde exigua est, & hoc ævo rarus admodum illius usus. Denique Judicium, quod *Austregæ* adpellatur, quarum originem a Maximiliano I. repetunt, serviuntque ad componendas, dirimendas, transigendasque lites unius Status cum alio per Arbitros ex aliis statibus electos, ita tamen, ut penes Cæsarem vel *Cameram Imperialem* sit diremptæ litis executio.

§. IV.

Leges Imperii.

LIII.

Quartum caput sunt Leges Imperii. Inter has facile princeps Lex est *Aurea Bulla* a Carolo IV. condita an. 1356. vel Norimbergæ, vel Metis, vel quod verosimilius, Metis concepta, & Norimbergæ promulgata. Nomen Aureæ Bullæ obtinuit, a capsula seu bulla aurea, quæ sigillum Imperatoris exhibet, non secus ac in Pontificum bullis eorundem sigillum in plumbo continetur. Comprehendit titulos viginti sex, in quibus de forma eligendi Regem Romanorum, maxime vero de Juribus Electorum agitur. Quippe Carolus ære alieno, quo Electorum suffragia coemit, plurimum gravatus, ut illo se se expediret, & Electoribus gratum se sisteret, simulque filio suo degeneri Wenceslao viam sterneret ad solium, multa eaque insignia Electoribus jura permisit, succisa non modice Cæsarum potestate. Quapropter in omnibus *Capitulationibus* iidem Electores vel maxime urgent Aureæ hujus Bullæ observantiam, eamque sacrosanctam ac inviolatam esse volunt. Ea primum

T 5

idio-

idiomate Latino conscripta fuit, postea ab incerto auctore in Germanicum fuit translata. Unde si controversia oritur, e latino authographo decidenda venit: hodie Francofurti ad Mœnum adservatur. Secundum inter Imperii Leges locum obtinet *Capitulatio Cæsarea*, sic dicta a certis capitibus, ad quæ juramento firmanda Rex Romanorum, antequam ad Imperatoriam dignitatem promoveatur, adstringitur. Quippe nullus est vel Rex, vel Princeps in orbe Christiano, cujus auctoritatem non circumscribant aut jurandum, aut inita cum regni ordinibus pacta, dicente jam olim Tacito (1): *Nec Regibus eorum infinita aut libera potestas*. Fateri nihilominus oportet, Capitulationem ejusmodi haud esse legem proprie dictam, multo minus *Regiam*, uti quidam Scriptores A catholici contendunt, quum non feratur a Superiore in inferiorem, nec Electores in ea nomine suo loquantur jubendo, sed ipse Imperator dicat: *Nos volumus & debemus absque consensu Electorum nulla inire fœdera* &c. immo ipsi Electores eadem in *Capitulatione* agnoscunt ac profitentur Cæsarem tanquam supremum suum Judicem ac Dominum. Proinde non ut lex, sed

(1) *De mor. German. cap. 7.*

sed ut Pactum quoddam præcipuum, a quo norma regendi petenda est, considerari debet. Originem autem hujus rei referunt nonnulli ad initium Imperii Romano-Germanici, quidam ad ævum Conradi I. alii ad turbulentum Henrici IV. regimen, rursus alii ad Caroli IV. tempora, ubi in tantam amplitudinem excrevit Electorum dignitas & potentia. Verior esse videtur illorum opinio, qui asserunt, primam ea, qua nunc fit, methodo ac forma *Capitulationem* comparuisse an. 1519. quo Carolus V. fuit electus. Nam isto ditiones Austriacas, Hispaniam, Belgium, magnam Italiæ partem, & recens detectam Americam tenente metus invasit Proceres Germaniæ, ne potentia sua ad minuendam circumscribendamque Statuum libertatem uteretur, maxime vero A catholicos Principes, ne ad restituenda tot tamque ampla bona Ecclesiæ post suam a fide Catholica defectionem erepta adigerentur. Hinc tam solícite cautum fuit, ne facultates Imperii (quarum jam magnam partem sub Carolo IV. propriam sibi fecerant Principes tunc Catholici, aliam vero majorem postmodum, scilicet integros & ditissimos Episcopatus & Monasteria A catholici) distraherentur, oppignorarentur, aut quovis alio modo dete-

deteriores deinceps redderentur, id quod Carolus V. præter alia jurejurando firmare debuit, si non Imperii diademate vellet excidere.

Tertio loco legibus adnumerantur *Recessus Imperii*, qui a recedendo dicti fuerunt, non quod ab iis recedi soleat, sed quia sub ipsum quasi Imperatoris & Statuum a Comitibus discessum confici consueverant; suntque constitutiones, quæ circa res ad Imperii Romano-Germanici incolumitatem ac felicitatem peculiari providentia spectantes paullo ante finem Comitibus impositum utriusque partis consensu conditæ fuerunt. Horum Recessuum originem aliqui ab ævo Caroli M. repetunt, alii a remotioribus adhuc temporibus, sed nullius vestigium ante auream Bullam authenticis e Tabulis exhiberi potest. Eorum usum haud amplius vigere, postquam an. 1662. sub Leopoldo I. Comitibus Imperii velut perpetua Ratisbonæ stabilita fuerunt, monent Auctores. Quarto loco memoranda venit Pax Publica profana, seu Constitutio illa, qua Maximilianus I. inito cum Electorum, Principum, Prælatorum, Comitum, aliorumque Imperii Statuum consilio in Comitibus Wormatiensibus an. 1495. sustulit *Diffidationes* seu vim ac vindictam pri-

privatam, quæ adeo excreverat in Imperio, ut in latrocinium publicum migraverit, dum Nobiles quamplurimi ad incitas redacti in summis montium arces conderent, e quibus armata manu in vicinorum agros, prædia, & castella irrumpentes ubivis impune prædabantur. Legem itaque statuit Imperator hic, quam Pacem Publicam adpellari placuit, quæque cuivis statui dictata 2000. marcarum auri multa, aliisque gravioribus pœnis omni diffidationis genere interdixit. Hanc ipsam legem innovavit Carolus V. an. 1521. Ut autem litibus & controversiis inter Cives Imperii finiendis locus esset, erectum est Tribunal illud *Camera Imperialis*, de quo dixi, eodem Maximiliano Auctore, & tandem Wezlariz an. 1693. stabilitum. Hinc Ordinationes hujus Camerae, quæ in tres partes & centum septuaginta sex titulos dividuntur, aliud non sunt, quam leges, secundum quas Judex ejusque Assessores hoc in tribunali causas ad se delatas decidere terminareque jubentur. Excipiuntur tamen causæ Ecclesiasticæ, ac matrimonii, in quas nulla jurisdictio huic Judiciocompetit: dein *Feuda Regalia*, quorum investitura per insigne vexilli, si sint Principes Laici, si vero Ecclesiastici, scepro fiunt.

fiunt. Nam hæc conferendi potestas, eorumque cognitio ad solum Imperatorem pertinet: demum causæ *criminales*, circa quas Carolus V. Augustæ Vindelicorum & Ratisbonæ an. 1530. & 32. peculiare edidit Constitutiones, *Nemesis Carolina* nominatas.

Quintum inter leges Imperii locum obtinet Pax Religiosa, dira necessitate ad majora mala evitanda a Ferdinando I. inita, Passavii an. 1555. & per *Instrumentum* Pacis Westphalicæ renovata an. 1548. Nam tristibus illis temporibus, quibus hinc secta Lutherana & Calviniana, inde arma Suecica & Gallica Imperium & Germaniam fusdeque vertebant, & sacra profanis ac profana sacris miscuerunt, primo Passavii in eas conditiones conventum est, ut Principibus Lutheranis in perpetuam possessionem cederentur Bona Catholicarum Ecclesiarum ab ipsis direpta, tum ut in *Judicio Cameræ Imperialis* non soli deinceps Catholici, sed & Lutherani sedem occuparent. Unde nata dictaque est *Transactio Passaviensis*. His necdum contenta factio Lutherana, ut rebus suis arctius consuleret, perpetuis querelis ac turbis extorsit, ut postmodum in Comitibus Augustanis eadem *Transactio* publica Imperii lege

ge rata haberetur; atque ita in lucem prodiit, de qua dixi, Pax Religiosa, cujus tabulis Carolus Cæsar quidem nunquam, Ferdinandus vero Augustus Frater non sine lacrymis subscripsit. Tum vero tricennali bello Suecico, & irruptionibus Gallicis calamitates Germaniæ magis magisque augmentibus coaluit Pax Westphalica, duplici quidem loco (Monasterii cum Gallis, Osnabrugæ cum Suecis) uno tamen communique fœdere ac pacto; ita ut Gallis tres Lotharingiæ Episcopatus & Alsatiam cedere, Calvinianis non minus ac Lutheranis liberum sectæ suæ in Imperio *exercitium*, utrisque bonorum Ecclesiæ ereptorum usum (jus enim nullum accedere potuit) indulgere oportuerit. Equidem paci huic quamprimum intercessit Innocentius X. solenni edita Bulla, quæ incipit *Zelus Domus Dei*. &c. quæ omnes articulos in præjudicium & perniciem avitæ Religionis Catholicæ, Jurium Ecclesiæ, ac Bonorum Ecclesiasticorum vergentes nullos ac irritos declaravit; sed vis ac necessitas temporum illorum prævaluit. Demum ad leges Imperii *Fundamentales* ut vocant, pertinet *Matricula* Imperii seu instrumentum publicum, cui singuli Ordines ejusdem in decem circulos distributi
una

304 *Cap. VIII. Jus publicum &c.*

una cum Statibus in quovis circulo sitis sunt inserti, addita militum & pecuniarum, quam unusquisque eorum ad totius Imperii immunitatem ac defensionem præstare debet ad modum census mensuri. Atque his finibus seu quatuor capitibus, quæ de Personis in Imperio considerandis, de Comitibus & Conventibus, Tribunalibus, & de Legibus Imperii tractant, totum Jus Publicum Romano - Germanicum circumscribitur, quod uti nunc traditur & usurpatur, vix Caroli IV. & Bullæ Aureæ conditæ ætatem excedit, quemadmodum ex dictis patet; ac insuper magna ex parte A Catholicorum post funestam ab avita religione defectionem violentia quadam est introductum. Inter Scriptores hujus Juris Publici celebrantur Magnif. P. Schmier, lumen Academiæ Salisburgensis, & in utroque jure versatissimus . . . De Wolleren, & D. L. B. ab Andlern, de jure publico & privato . . . Gletleus in selectis juris publici . . . Stapfius & Weizeneggerus J. C. Academiæ Friburgensis . . . Schwederus introductione ad jus publicum . . . Hermannus Hermes . . . Bruneman . . . Hugo Grotius . . . Vitriarius &c.

CAPUT



CAPUT IX.

CRITICA JURISPRUDENTIÆ.

§. I.

*Errores quorundam in tradenda
Juris disciplina.*

LIV.

Magnum sibi nomen plausumque in
theatro Jurisprudentiæ aliquo ab-
hinc tempore, maxime in Germa-
nia, compararunt Scriptores aliqui, ac
Professores hujus disciplinæ; ut plurimum
A catholici, inter quos facile eminuit Hu-
go Grotius; nec absque merito suo, ut-
pote qui rempublicam politicam & in-
genio & calamo non parum illustravit,
conjungens fere ubique egregiam doctri-
nam cum magna prudentia. Hujus ve-
stigia secuti sunt Vitriarius, Pufendorf-
fius, Wolfius, Heineccius, in quorum
scriptis non paucos doctorum virorum
characteres est invenire. Horum aucto-
ritate freti Nepotes quidam, & ultra
fines doctrinæ Patrum suorum progressi
in Jure naturæ ac gentium, nec non in
Jure publico explanando clavem ad ar-
BIBLIOTH. DOMEST. LIB. XI. U cana

cana scientiæ istius non sine fastu, & grandi Scriptorum Catholicorum, præcipue Scholasticorum, contemptu sibi solis vindicare, ac monopolium stabilire visi sunt. Neque hoc contenti, doctrina majorum suorum, vel minus casta atque probata, vel non bene intellecta abusi sunt ad perniciofa & a veritate aliena dogmata cudenda, & in libris ac commentariis suis venum exponenda; quin etiam ad ea nobili juventuti, ad vivendi æque ac sentiendi libertatem pronæ, in scholis instillanda. Primum facile fundamentum istorum dogmatum in eo collocant, quod doctrinam a Deo revelatam procul arceri a Juris naturalis finibus, & hominem nonnisi naturæ dotibus vestitum considerare debere contendant, ut quid justum, quid æquum sit, rite intelligere valeamus. Hinc contra Patres & Theologos insurgunt, & amaris questibus, sed parum sinceris utramque aurem implent, quod hi revelatas doctrinas cum juris naturæ placitis perperam commiscuerint, atque ita crassis erroribus & ignorantie tenebris nobilissimum Juris naturalis studium misere fœdarint. Neque Patribus solum & Theologis hoc quasi grande crimen exprobrant: etiam primipilos suos carpere non verentur. Ita Thomasius Grotio

tio non dubitat vitio id vertere (m) in-
 quiens: *Nimis sollicitus est in conquiren-
 dis Græcorum & Latinorum Scriptorum
 testimoniis, dum aliquid juris naturæ, &
 gentium esse probare voluit adde,
 quod lumen revelatum & naturale ubique
 fere miscet.* Verum nescio sane, an ho-
 mines isti in Adamo se peccasse memi-
 nerint. Profecto lumen naturæ primis
 parentibus ante lapsum inerat dei dono
 lucidissimum, purissimum, & ad omnia,
 quæ naturæ rationali conveniunt, aut
 disconveniunt, expeditissimum. At quis
 est, qui negare ausit vel possit, post fa-
 talem lapsum illum lumen hoc tum in
 Adamo, tum in posteris omnibus multa
 caligine perfusum, atque intellectum hu-
 manum densis tenebris fuisse obscuratum?
 Manifestum hujus rei habemus exemplum
 in Sapientibus ethnicis tum græcis tum
 latinis, qui improbo labore ac studio
 omnes hujus scientiæ angulos excussisse
 sibi visi sunt, ac morum philosophiam,
 seu quod idem erat, juris naturæ do-
 ctrinam excoluerunt, & ex optimis prin-
 cipiis quid æquum & justum sit, ac na-
 turæ rationali conveniens, explicarunt,
 ita ut S. Augustinus fateri non dubitet,
 quod

(m) *Hist. Jur. Nat. c. 6. §. 2.*

quod in his priscis sapientibus comper-
tum habeamus, *quid absque gratia natu-
ra valeat* : ejusmodi fuerunt Socrates,
Plato, Aristoteles, Seneca, Epictetus
&c. Hi tamen Viri maximi, quibus
fortasse Scriptores isti Acatholici sicut
ætate, ita & ingenio multum inferio-
res sunt, quam graviter in quibusdam
veritatibus hallucinati fuerint (quemad-
modum circa finem ultimum, animæ im-
mortalitatem, virtutis & vitiorum indol-
em &c.) utpote veræ fidei lumine, &
revelatorum notitia destituti, nemo est
est qui ignoret. Et tamen hi, de quibus
loquor, veræ virtutis ideam, recte ho-
nesteque vivendi normam, & omnem
æqui ac justæ rationem, finemque ultimum
hominis Christiani, in quo positus sit,
in solius Juris naturæ regno absque fidei
lumine, ac veritatum revelatarum du-
ctu deprehensuros se confidunt, ac de-
prehendisse gloriantur, ita ut omnes lu-
mini huic supernaturali portas atque fe-
nestras, per quas penetrare posset, oc-
clusas velint. Quis credat ?

Quærere ex illis liceat, cæteroquin vi-
ris doctis, an Christus Servator noster,
postquam legem Mosaicam penitus abo-
levit, novamque gratiæ legem verbo &
exemplo in Ecclesia sua stabilivit, an
in-

Inquam Christus nil præter naturalis juris præcepta ad docendam Ecclesiam, seu fideles instruendos in Evangelio proposuerit? an non multa revelata cum naturæ principiis, ad quæ sæpius provocabat, optime conjuncta docuerit? Sublimis fuit & altissima divini hujus Magistri doctrina, quæ utroque lumine, & naturall & quod supra naturam est, nitebatur: quin quod ea, quæ de jure naturæ sunt, ad longe altiorem gradum evexerit. Legant obsecro caput quintum e Matthæi Evangelio, & invenient Christum ita loquentem: I. *Audistis, quia dictum est antiquis, non occides: qui autem occiderit, reus erit judicio. Ego autem dico vobis, quia omnis, qui irascitur fratri suo, reus erit in judicio.* II. *Audistis, quia dictum est antiquis: non mæchaberis. Ego autem dico vobis, quia omnis qui viderit mulierem ad concupiscendum eam, jam mæchatus est eam in corde suo.* III. *Iterum audistis, quia dictum est antiquis, non pejerabis. Ego autem dico vobis, non jurare omnino, neque per cælum, neque per terram &c. Sit autem sermo vester, est est, non non.* IV. *Audistis, quia dictum est: oculum pro oculo, & dentem pro dente. Ego autem dico vobis, non resistere malo.* V. *Audistis, quia*

*dictum est : Diliges proximum tuum, & odio habebis inimicum. Ego autem dico vobis : diligite inimicos vestros &c. Si autem hæc legant, quum in aliis semper ad S. Scripturam, ad Dei Verbum adpel-
lent, cur ad tractandum jus naturæ ac gentium solius luminis naturalis usum nulla religionis divinitus revelatæ habita-
ratione adhibendum esse tam inepte quam falso contendunt? Num forte etiam Chri-
sto, cœlesti Magistro nostro, exprobrare audebunt, quod doctrinas a se revelatas cum juris naturæ placitis perperam com-
miscuerit, (adde, quod lumen revelatum & naturale ubique fere miscet) & hujus scientiæ studium corruperit, uti Thomasius cum aliis Patres & Theologos criminatur? At, inquit, hæc duo lumina *rationis* & *revelationis* distinctæ res sunt. Ita est: sed idem est homo, qui utroque lumine opus habet ad vitam juri naturali, & profes-
sioni Christianæ, ultimoque fini suo conformem ducendam: *professioni* inquam *Christianæ*. Quippe, ut existimo Chri-
stianis Jus suum naturale ac gentium, non ethnicis aut turcis, in quorum manus vix unquam perveniet, aut aliis homini-
bus in Statu puræ naturæ, qui nunquam existit, nec existet, constitutis scribunt atque commendant.*

A fundamento, quod quam male materiatur sit vidimus, ad reliquum ædificium Juris, quod ipsi profitentur, pergamus. Paucissima duntaxat fragmenta e scriptorum istorum doctrina & libris produco, ut ex unguibus leones cognoscamus. Samuel Pufendorffius non arbitrabatur necessarium, statuere quædam, quæ secundum naturam suam, absque eo, quod lex imponatur, honesta aut turpia dicantur, atque objectum sint juris naturalis ac perpetui. *Non adparet*, inquit satis modeste, *quomodo honestas aut turpitudine intelligi possit ante legem, & citra superioris impositionem* (n). At Laurentius Fleischerus audacter pronunciat (o): *Præcepta naturalia non esse leges proprie dictas, sed mera consilia, monita paterna: rationem sibi relictam ignorare conceptum Dei tanquam legislatoris ac domini, sed solius patris ac doctoris.* Si hæc ita se habent, ad solum jus naturale respiciendo ejusdem ordinis ac sortis erunt, antequam præcipiantur vel prohibeantur, orare, ambulare, furari, fornicari &c. Immo in lege naturæ consultum quidem fuis-

(n) *L. I. de J. N. & G. c. 21. §. 6.*

(o) *Inst. I. N. & G. l. I. c. 5.*

fuiſſet, non tamen præceptum omittere turpia quævis, naturæ rationali diſconvenientia: nec data fuiſſet cognitio Dei tanquam legiſlatoris, ſed ſolius patris atque doctõris. Quam apta ſit hæc doctrinam ad timorem ſupremi Numinis, remunerantis bona, & mala vindicantis, e corde pellendum, quamque periculofa juventuti parum cautæ, nec rerum ſatis intelligenti, nemo non videt. Rurſus ſunt alii, qui docent falli eos, qui credunt, ſemper illum mentiri, qui aliquid contra mentem dicit, ſeu quod ab animi ſui ſententia diſcrepat; quique natura ſua turpe autumant, ſi aliud loquantur, aliud ſentiant, eſſeque admodum ſimplicem, qui credat, piaculo ſe obſtringi, ſi citra ullius injuriam & in commodum ſuum aut aliorum falſum dicit. Distinguunt enim perquam acute inter *faſiloquium* ut vocant, & *mendacium*, quod poſtremum ajunt eſſe illud, quod cum damno aut injuria alterius, aut certe ſine comodo profertur: immo & hoc licitum eſſe caſu, quo alter decipi ſe haud ægre laturus credatur propter commodum, quod inde naſcitur. Addit Thomafius, falſiloquium ejusmodi eſſe *prudẽtiam a natura per ſermonem intentam*. Sed rurſum doctrina hæc periculi plena eſt, &
noxia

noxia non solum aliis, qui facile sibi persuadebunt, adesse commodum in *falsiloquio* suo, & abesse injuriam & damnum alterius, qua ratione pessime prospectum erit commercio humano: sed etiam Auctoribus suis; quis enim fidem adhibeat ulli eorum libro, paragrapho, numero, aut lineæ, quum securus nunquam sit, an non saltem *falsum loquantur*, utpote quod fieri posset citra injuriam eorum, qui decipi se a scriptoribus A catholicis ægre non ferunt; & fieri posset cum *commodo* Auctorum, id est, lucro, quod ex libris divenditis capiunt non contemnendum: immo fieri posset cum merito, quum *falsiloquium* sit virtus, scilicet *prudencia a natura per sermonem intertextata*, ut audivimus. Verum ajunt, censeri Deum, quando in rebus & circumstantiis valde gravis momenti versamur, tanquam licitum permittere loqui falsum neque hoc fore mendacium; quemadmodum licere voluit justis ex causis cædes gentilium, & spolia Ægypti Israelitis, quin hæc latrocinia aut furta dici potuerint. Grandes Theologi! si tenet similitudo, cur non Deus id quod hominibus tanquam licitum permittere potest, etiam sibi licere credat, ita ut falsum loqui possit, quemadmodum occidere potest (utpote vitæ ac necis arbiter) & re-

rum alienarum dominia in alios transferre, tanquam supremus omnium Dominus? quod si concedatur, actum est de Religione, quum ejusmodi Deo, qui falsum nobis dicere potest, fidem firmam adhibere nequeamus: immo actum est de Deo ipso, quem omnes agnoscunt ac venerantur & falli & fallere nesciunt.

LVI.

Promoveamus gradum ad alia nescio an non pejora dogmata. Scripserat Grotius, dum agit de illis, quæ jure naturæ quæve in Evangelio prohibita sunt (p): *Qui aliter sentiunt, mirum quam sudant, ut probent, quæ Evangelio vetantur, ipso jure naturæ esse illicita, ut concubinatum, divortium, matrimonium cum pluribus familiis. Sunt quidem hæc bujusmodi, ut eis abstinere honestius dicet ratio; at non talia, ut absque lege divina nefas in illis appareat.* Hucusque Grotius: mox adfuit Sincerus Vahrenbergius, (sub nomine ficto Joannem Leyserum, vel alium latere autumant) & polygamiam jure naturæ non solum licitam, sed & præceptam esse defendere voluit, uti narrat Christianus Thomasius (q): Ipse vero Thomasius

meris

(p) *L. de B. & P. c. 2. §. 6.* (q) *In Hist. I. N. c. 6. §. 16.*

maris, inquit, rationibus naturalibus demonstrari haud posse, omnem scortationem, etiam ad bestialitatem quæ pertinet, aut concubinatum, aut lenocinium esse prohibitum (r). Eodem in loco matrimonium in primo gradu (nempe Patris cum filia, & Matris cum filio) naturæ juri haud repugnare scribit. Ejus verba sunt: *Mallem & hic imperfectionem rationis agnoscere, & asserere, connubia parentum & liberorum non esse objectum legis naturalis, sed alterius legis divinæ*. Idem alibi (s), ubi multa in favorem libidinis congerit, ita loquitur: *Concubinatus, quod ad species scortationis fuerit relatus, deberi Clero Pontificio, qui omnia dicebat esse fornicationem, cui non accesserit benedictio sacerdotalis. His exceptis reliqui scriptores appellant matrimonium secundarium, vel simile quid*. Joannes Barbeyracus omnino asserere audet non sine impudentiæ nota, & crimine falsi, S. Augustinum docere: uxorem alteri mulieri cedere jus posse, quod in proprium maritum habet, & contra, maritum viro alteri renunciare jus in propriæ uxoris corpus (t). Profecto dogmata Cyclopibus digna! Nihilolo-

(r) *Inst. Jurispr. Div. l. 3. c. 2.* (s) *Fund. I. N. & G. l. 3. c. 11.* (t) *In pref. ad Pufendorffii I. N. & G.*

hilominus & se ipsos prædicant, & aliis prædicantur tanquam Dii majorum gentium, arcanorum omnium jurisprudentiæ consilii, aurei seculi scriptores, nec sine cunctorum aliorum insigni contemptu. Ita Weberus (u): *Scholasticos, ait, etsi Moralistarum nomine suberbiant, non tamen nisi centonem ex theologia, jurisprudentia & philosophia consarcinatum, imo nonnisi quæstiunculas inanes, in vita civili nullum plane usum habentes proposuisse; unde factum, ut hæctenus hoc jus naturale tanquam commune prostibulum, cum quo omnes rem habere voluerunt, tractatum sit, ideoque maximæ Pufendorffio debeantur grates, quod discrimen hoc omnium primus hic tradiderit.* Utique Scholastici, qui de Jure naturæ tractarunt, hucusque non eo dementiæ delapsi sunt, ut mendacia, usuras, duella, scortationes, poligamiam concubinatum, bestialitatem spectato solo jure naturæ inter adiaphora recensuerint, nec a lege naturali prohibita esse docuerint, aut luminis supernaturalis usum omnem ex illius regno proscripserint. Si tamen Scholasticos de jure naturæ ac gentium late discentes legerint aut legant, spondere aulam, inventuros non solum principia solidissima & clarissima, magisque sincera &

ca-

(u) *In Comment. ad Pufendorff.*

casta, rationibus firmissimis stabilita, verum etiam illa, quæ in libris scriptorum ejusmodi A catholicorum sana & bona continentur, uberius explanata. Neque desunt ex horum gremio, melius sapientes, qui probe id, quod dixi, perspexere. Valentinus Velthemius Doctor & Professor Theologiæ in Academia Jenensi, S. Thomam in moralibus *Principem*: Suarezium, Molinam, Valentiam, Conimbricenses, & alios ut *Scriptores æternitate dignissimos* celebrat: Hermannus Conringius Professor Politices Helmstadii hispanos Theologos Vasquezium, Henriquez, Fernandez, Dicastillo &c. in Jurisprudentia & Philosophia naturali celebriores cæteris omnibus judicat, addens Grotium Lectioni Francisci Victoriz (Ord. Præd. insignis Theologi) opus suum incomparabile de jure pacis & belli debere: ipse Grotius (x) Scholasticos, si in quæstione morum consentiant, vix errare affirmat, ob perspicaciam ad ea videnda, quæ in aliorum dictis reprehendi possunt.

LVII.

Non diffiteor, jus naturæ, etiam a religionis revelatæ principiis separatim utiles
sup-

(x) *In Praef. §. 52.*

suppeditare doctrinas tum ad Regum, Principum ac Rerumpublicarum controversias & lites decidendas: tum ad belli, pacis, ac foederum rationes componendas: quin etiam ad honestatis ac utilitatis fines in hominum societate statuendos. Nec diffidentur hoc Patres ac Theologi, alique Jurisconsulti probe Catholici. Simul tamen uno fatentur ore, ultra naturalem statum homini christiano progrediendum esse, ut quid ad ultimum finem veramque felicitatem, quid ad morum honestatem, quid ad virtutum & vitiorum naturam ac conditionem necesse sit, ex iis quæ in Evangelio revelata nobis sunt, discat, ac doceat. Hoc ipsum probe agnovit Grotius, ut dictum est. Sed nepotes a tanti parentis doctrina brevi velut ruptis carceribus in avia & devia sunt abrepti, qui ad statum *purae naturæ*, quem nemo hominum vidit, eo in quo versamur neglecto ubique adpellant, & ex illo, quid licitum sit, quid illicitum, dicendum esse pronunciant. Parum hoc: libris suis ac commentariis, qui quod mirere, per manus etiam Catholicorum impune volunt, immiscent seu data seu non data occasione graves calumnias: Ecclesiasticum jus est ipsis merum Papæ ac ejus Theologorum inventum ad homines decic-

cipiendos: Episcoporum potestatem dignitatemque, ac Sacerdotum & Monachorum instituta ad infimæ sortis hominum condicionem deprimunt, & velut inutile vulgus e republica politica exterminandum proclamant: Sacros & vetustissimos Ecclesiæ ritus ac ceremonias irrident: vota religiosa, jejunia, pias ut vocamus *oblationes* tanquam abusus damnant, vitæ Civili noxios: Conciliorum decreta & Canones flocci pendunt: quumque talia ut plurimum vel contemptim vel ridicule proponant, eo certius atque facilius nocent male credulis lectoribus, præsertim juvenibus Studiosis. Mirum sane, quod hoc agant, qui præter Jus naturæ ac gentium etiam Civile profitentur, ejusque oracula videri haberique volunt, quum tamen eos non lateat, nec latere possit, quantum doctrinæ ipsorum atque dictis adversetur ipsum Corpus Juris Civilis, quod adeo claris & manifestis characteribus antiquæ Ecclesiæ, a qua patres eorum, filii, atque nepotes miseri recesserunt, placitis suffragatur, ut si sanæ rationi ac lumini naturali locum concedere velint, & præjudicatas opiniones foras mittere, oculis videre queant, ac manibus palpare; quæ nunc dicturus sum. Eia! aperiamus Corpus Juris Civilis, inspiciamus, & legamus:

Fri-

Primo quidem: fuisse in Ecclesia sacros Canones, quos leges civiles & Imperatoriae non dedignantur imitari. *Novell. 38. cap. 2. . . . Novell. 6. cap. 1. . . . Novell. 131. cap. 1. & 2. . . . L. sacris 45. Cod. de Episc. & Cler.*

Secundo: fuisse in Ecclesia Pontifices & Episcopos quibus obedientia & reverentia debeatur. *Novell. 131. cap. 2. . . . L. inter claras Cod. de sum. Trinit. & toto tit. de Episc. & Cler.*

Tertio: fuisse consecrationes & benedictiones rerum sacrarum. §. 7. *de Instit. de rev. divis.*

Quarto: fuisse Monachos ac Monasteria. *Novell. 133. . . . L. 4. Cod. de Episc. & Clero . . . & tota Novell. 5.*

Quinto: Illos, qui moniales matrimonii jungendi causa attentare ausi fuerint, capitali poena feriendos esse. *L. 5. Cod. de Episc.*

Sexto, fuisse morem psallendi & cantandi horas Canonicas. *L. omnem, §. 10. Cod. eod.*

Septimo: fuisse honoratas, & in Litanis publicis portatas sacras cruces, & habitas publicas supplicationes. *Novell. 5. cap. 1. . . . Novell. 23. . . . Novell. 63. Novell.*

Novell. 4. cap. 4. . . . L. un. cod. nemini licere.

Octavo: observatum fuisse jejunium Quadragesimæ. L. 6. Cod. de feriis. . . . & L. Provinciarum Cod. eod.

Nono: Fuisse sacrificium Missæ. Novell. 133. cap. 1. . . . Novell. 137. . . . L. 6. Cod. de Episc. & Cler. . . . L. omnem. 42. Cod. eod. . . . Novell. 49. cap. 7. &c.

Decimo: fuisse Concilia, quorum dogmata sicut sacras Scripturas, & regulas sicut leges observari voluit Imperator Justinianus, nominatim loquens de Conciliis Nicæno, Constantinopolitano, Ephesino, & Chalcedonensi. Novell. 131. cap. 1. & aliis Juribus passim.

Hæc olim tempora, hi mores, hæ leges fuerunt, quibus Respublica & Ecclesiastica & Politica amico pulchroque fœdere jungebantur, & ad suum quævis finem, ad felicitatem nempe temporalem ac supernaturalem æquis veluti passibus promovebatur. Et quamvis non raro lites atque dissidia Sacerdotium inter & Imperium fuerint exortæ, nullæ tamen tam noxiæ doctrinæ ac dogmata in lucem prodierunt, nisi postquam rupta religionis compage uti vivendi, ita etiam opinandi scribendique licentia invaluit;

BIBLIOTH. DOMEST. LIB. XI. X ita

ita ut Majorum nostrorum facerrimis legibus posthabitis non quid *juris*, sed quid *facti* sit, attendatur.

Supereſt, ut & illud breviter ad trutinam expendatur, an tanta ſcriptorum Acatholicorum in ſtudio & doctrina Juris, præſertim Naturalis ac Gentium excellentia ſit, quantam ut vidimus, ſibi met ipsis magno cum plauſu adtribuunt quidam illorum, qui a Grotii, aliorumque vere doctorum Acatholicorum modestia procul abſunt. Mea quidem opinione præferendi videntur ſcriptores illi, quibus fortius, ſincerior, ac purius ineſt lumen naturale, quo duce in ejus Juris arcana & principia penetrare valeant; ut nihil dicam de lumine ſupernaturali, de quo ſi cum altero conjungatur, merito illud dicere poſſumus: *Duo oculi plus vident, quam unus.* Quis autem ſibi perſuadeat, tali lumine dominante inſtructos eſſe viros, quantumvis alias ingenio ac eruditione valeant, qui religionis ejusmodi, cui parum ipſimet fidunt, principiis imbuti reum mundanarum, facultatum, familiæ, officiorum curis non paucis diſtinentur continuo, & implicantur: contra alios quemadmodum Patres, & Theologos, atque ſacri profanique juris peritos, quorum multi aut vitæ ſanctitate,

aut

aut morum integritate, simul ac præclarissimis doctrinæ monumentis christianum orbem illustrarunt, tam debili, exiguo, & fæculento lumine præditos fuisse hoc in negotio, quod ad totum genus humanum, & maxime ad conscientias pertinet, tantumque cæcutiisse, ut si cum illis heroibus in comparisonem veniant, nonnisi cum jure naturæ, ut Weberus sine fronte ait, *tanquam cum communi prostibulo rem habuisse, nec nisi centones & quæstiunculas inanes in lucem edidisse* videantur, dum illi montes integros parituerunt? Non credo, ejusmodi *Protestantes*, ut vocant, *Jurisperitos privilegio* aliquo seu naturæ seu gentium munitos esse, neque illud unquam exhibere illos posse, quod perfectius, nobilius, atque sublimius lumen naturæ sint nacti, quam Patres, & Scholastici Catholici omnes. Fortassis hoc eo probant argumento, quod Principibus & Magistratibus profanis tradant jus in sacra & profana? quod potestati Ecclesiasticæ subtrahant, quidquid possunt, & non possunt? quod Cleri ac præcipue Monasteriorum bona alienæ jurisdictioni tanquam hastæ subjiciant? quod Deo sacras personas inutiles, immo statul politico summe noxias pronuncient? quod tot pias majorum *fundationes Canoniciatus*,

& *Episcopatus* ut in ordinem *secularem* redigantur, persuadere conentur? Talia modo passim & palam scribunt, & præfixo *principiorum status politici* titulo vendunt Acatolici, legunt (plus non dico) Catholici. Quod si ita est, Lutherum, Calvinum, cæterosque ultimorum temporum hæresiarchas lumine naturæ quam excellentissimo & incomparabili præditos fuisse dicemus, qui tam insignem in Germania & Gallia religionis stragem ediderunt, qui integros devorarunt Episcopatus, qui sacra omnia conculcarunt. Hæc pauca de erroribus quorundam in tradenda Juris disciplina heic adducenda videbantur (plura inveniri poterunt in præclaro opere de Jure naturæ ac gentium Ignatii Schwarzii) ne ut cum D. Augustino loquar, *dum tacemus, errorem approbare videamur.*

§. II.

Errores quidam in discenda Jurisprudentia.

LVIII.

In nobilissimo Jurisprudentiæ studio non paucis, iisque Viris longa experientia doctis non placet nimia & inconsulta aliquo-

quorum festinatio. Vix humanioribus literis ac Musis valedicitur, Philosophia in limine solum salutata, & Logicæ duntaxat ac Metaphysicæ quæstionibus aliquot perceptis, sine omni aut certe cum levissimo rerum physicarum, mathematicarum, & moralium adparatu, sine ullo eruditionis & solidæ ratiocinationis, quod pessimum est, præsidio juvenum quidam gravissimo Jurisprudentiæ studio adplicantur. Tum ubi per duos, aut tres summum annos inter plurimas alias animi partim relaxationes partim evagationes utriusque Juris compendium aliquod manibus tritum, & quæstionum elenchus memoriæ mandatus est, post brevissimam quam dicunt praxin jam ad tribunalia patet accessus, jam causarum patrocinia suscipiuntur, jam publica, quibus justitiæ administratio adnexa est, officia vel parentum importunis precibus, vel Magnatum favoribus, vel omnino pecuniis comparantur. Sed non est hæc via regia. Magna philosophiæ, præsertim quæ de moribus agit, scientia, multiplici rerum experientia, & eruditionis copia, maturo limatoque judicio opus est iis, qui sacre Themidi operam navare, multoque magis, qui ejusdem sacerdotio fungi cupiunt. At sunt, apud quos rerum

istarum penuriam,¹ & curtam, quæ domi est, Juris scientiæ suppellectilem supplere dicuntur optimi quique libri, qui Juris arcana complectuntur; & quales amabo optimi hi libri sunt? Huic interrogationi non e privata opinione mea, sed e publico magni illius Critici, Ludovici Vives testimonio atque judicio responsum dabo: „ Habent, inquit iste „ (y), habent ornatum, cultum, elegantiam, splendorem semonis. Admiscent „ tamen his tam salutaribus perniciofa „ non pauca, & quasi venenum melle, „ aut suavissimo vino temperant: scrupulos & suspensiones de rebus pietatis, „ quodque gravius est, derisum etiam „ apertum, & nonnunquam etiam insectationem. Nam ut eorum (scilicet scriptorum) curæ ac cogitatus ad ambitionem referebantur, vel quæstum, „ ea sequebantur modo, per quæ vel „ pecunia parari vel honor posset. Ei „ qui scit esse damnosa hæc, quique ea „ cognoscit, fortassis nihil foret periculi, per hæc ingredi: quin sapientes „ viri haud secus noxiis utuntur interrim contra noxia, ac periti medici „ venenis contra venena. Periculosa „ sunt tamen hæc curiosis: quales illi „ sunt,

(y) *Lib. I. de tradendis disciplinis.*

„ sunt, qui non dubitant cicutam gu-
„ stare & experiri, cujus sit saporis,
„ id quod hominem extinguit. Item
„ imperitis, incautis, qui dextere
„ uti nesciunt. Effet omnino consul-
„ tissimum propter infirmitatem & te-
„ nebras nostri ingenii hæc esse expur-
„ gata, ut nulla occasio nocumenti fo-
„ ret reliqua: vel ut in iis demum cam-
„ pis versaremur, in quibus solæ herbæ
„ utilitatis cujusquam, aut honestæ vo-
„ luptatis crescerent a probo & prudenti
„ agricola illuc fatæ, ex tutis viridariis
„ sanctæ Religionis desumptæ, aut quæ
„ convenirent, ex periculosis agris huc
„ translata, tanquam thesauri Ægyptio-
„ rum ad ornatum templi conversi,,.
Hucusque Vives.

Quod de libris judicium, idem de pe-
regrinationibus, in exteras regiones ad
Jurisprudentiam addiscendam susceptis,
ferunt non pauci, utpote quæ non raro
magnis sumtibus fiunt, & majore cum
periculo. Utinam non tristis experien-
tia doceret, præter superficiem Jurispru-
dentiæ ideas depravatas de vera religio-
ne, male sana dogmata de rebus ad
fidem Catholicam, & Traditiones anti-
quissimas pertinentibus, principia pseu-
do-politica, contemptum extremum re-
rum,

rum, personarum, & jurium Ecclesiasticorum, libertatem vitæ, ac morum corruptelam, tanquam præclaras merces ex hujusmodi literarum emporiis in patrium solum reportari. Ajunt quidem peregrinationum istarum patroni, abesse omne periculum, quum illis in Athenæis solum doctrina juris, ab omnibus Religionis controversiis, quas lites Scholasticorum vocant, abstracta proponatur, relicta cuivis secundum suam, quam elegit, opinandi vivendique libertate. Sed quod hæc dicantur, scio: an fiant etiam, nescio, immo vehementer dubito. Si quidam calamo & in libris publice spargant tam periculosas, ut vidimus, doctrinas, quid facient ore, ac privatos intra parietes? Non ita pridem contigit, quod in Academia Jenensi, dum publicus celebraretur confessus, atque in eo docta quædam pro more dissertatio producenda esset, auctor illius ad invidiam Pontificibus creandam sequentes propositiones, ac si a Catholicis ipsis docerentur, crederenturque, in medium protulerit, typis postea vulgatas: nimirum primo: S. Petri in Romana cathedra Successores totius terrarum orbis, universique humani generis Christi Vice-Dominos esse, nec plus potestatis & juris Reges ac Principes

cipes seu profanos seu Ecclesiasticos habere, quam quantum Pontifex velut precario ipsis concefferit. Secundo, unum esse solummodo Regem in mundo, unumque Episcopum, nempe Romanum Pontificem, a quo univerti cum Reges tum Episcopi omnem jurisdictionem ac potestatem traditam acceperint. Tertio, omnes Gregorii VII. Successores non modo Antistitem jura sensim diminuisse, sibi que attribuisse, sed etiam Reipublicæ civilis Gubernatores suis subjecisse legibus: inde factum, ut non Ecclesiæ tantum, sed totius terrarum orbis imperium sibi jam Seculo XII. vindicarint Pontifices Romani. Verum tam apertæ calumniæ aliud non merentur responsum, quam illud Regii Vatis (z): *Insurrexerunt in me testes iniqui, & mentita est iniquitas sibi.* Nihil heic scribo, quod non hausi ex eorum commercio, qui operam Juris scientiæ in hisce Athenæis dedere: quod non ipsorum aliqui post reditum prudentiores effecti mihi fatebantur: quod non legi in libris, quos vir quidam primæ nobilitatis tanquam cimelia secum e terris istis peregrinis secum attulit, magno labore privato a se conscriptos, in quibus

gra-

(z) Psalm. 26.

graves omnino, multasque Professoris, a quo excepit, hallucinationes, religioni, sanæ doctrinæ, ac morum integritati adversantes eo non invito notavi, ac palam feci. Patet igitur ex his, quam præclaras atque sinceras de religione sua ideas a fortunatis his insulis domum redux secum adferat juvenus Catholica.

§. III.

Nævi in administranda justitia.

LIX.

Non solum in docenda, discendaque Jurisprudencia, sed etiam in administranda justitia, qui ultimus denique terminus est Jurisprudentiæ, nævos quosdam, velut in sole maculas, deprehendit melior Critice, quos non dissimulant vel ipsi hac in palæstra multum exercitati Jurisconsulti, & de quibus scientiæ hujus candidatos sedulo admonendos esse censent. Primo ajunt: non parum peccant illi, qui omnem scientiæ istius vim atque virtutem in legum subtilitatibus, quas *Juris apices* vocant, rimandis & verborum cortice explicando positam esse arbitrantur, dimissa ex oculis Legislatoris men-

mente, bona fide, ac æquitate naturali. Equidem verum est, in legum interpretatione ad verba respiciendum esse, quorum ministerio ad exprimenda sensa sua utuntur Legislatores: unde etiam in utroque Jure tam sacro quam profano peculiare *de verborum significatione* tituli ponuntur. Verum hujus rei studio non ita acquiescere oportet, ut non ultra progrediatur Jurisconsultus, & ad mentem Legislatoris, atque ad *æquum & justum*, quod in condendis legibus ille sibi proposuit, penetrare conetur. Mens enim legislatoris *anima legis* nuncupatur, & æquitas *justitiæ norma* est: utraque vero tum e verbis, tum & vel maxime e materia subjecta, circumstantiis, causa movente, & fine præfixo petenda est. Certe legislator quod æquum est, spectasse, & quod contra æquitatem est, nec statuisse, nec si hæc nimis clare reluceat, statuere potuisse censendus est. Æquitas autem ut plurimum a circumstantiis causæ pendet, quibus mutatis & ipsa mutatur, vel omnino esse definit. Nota hæc sunt vel Jurisprudentiæ tyronibus, quibus in ipso limine tanquam prima principia instillantur: *non esse semper attendendum ad legum apices: mentem legislatoris esse animam legis: non bærendum*

dum in cortice verborum ; sed nucleum veritatis quærendum : in omnibus æquum & bonum esse spectandum. Verum quoties non, quum ad rem ipsam acceditur, id quod contrarium est, fieri videmus?

*Video meliora, proboque,
Deteriora sequor.*

ubi de testamento, de pingui hæreditate, de feudo, de possessione bonorum & reddituum, de jure decimarum agitur, quantus leguleiorum & causidicorum numerus, quantus scripturarum & Actorum adparatus, quanta actionum, legum, & interpretationum sylva comparet! ad tertiam, quartam, & quintam ut vocatur *replicam* pervenitur: ad secundam & tertiam *instantiam* reducitur: interea audiendo partium litigantium cavillationes prolongantur conventus, instituuntur consultationes, habentur interlocutiones, novæ actiones intentantur, *punctum* vero *juris* in tanta rerum varietate ac perturbatione relinquitur, aut omnino deperditur, totaque res ad legum apices investigandos perducitur, non raro extra orbitam saltatur, ac demum vel male concluditur, ac pejus judicatur, vel lites, quæ modicum intra tempus æquum & bonum præ oculis habendo finiri potuissent,

non

non sine gravissimo partium litigantium damno, ac sumtuum dispendio per plures annos extrahuntur. Luctuosa res! quam melius ageretur, si primum quidem ubi lis amice componi, & transigendo inter partes finiri nequit, exacta & sincera *facti species*, ut adpellant, constituatur, e quo plerumque totius rei summa & æquitatis æstimatio pendere solet: tum audiantur utriusque partis momenta, & instrumenta inspiciantur: postmodum vero leges hinc & inde in medium allatæ probe ponderentur, an causæ faveant, an repugnent. Quodsi claræ fuerint, earumque interpretatio cum mente legislatoris perspicue ac citra prudens dubium conveniat, acta res est, sententia feratur. Si vero perpensis omnibus nec pro hac, nec pro illa parte firmum in legibus vestigium certumque iudicium inveniatur, aut istæ variis exceptionibus utrinque sint obnoxia, tum vero relictis Causidicorum velitationibus, & præcis contentionum ulteriorum ambagibus ad æqui & iusti normam de toto negotio decidatur ac pronuncietur. Ita sane fieret & temporis, & sumtuum, & litium grande compendium cum manifesta tum reipublicæ, tum privatorum hominum utilitate, ac iustitiæ celeriter administrandæ

dæ emolumento. Hac profecto ratione rem agebant veteres Jurisconsulti, quorum officium teste Gregorio Tolosano, viro Juris peritissimo, in quatuor potissimum capitibus positum erat: „ Primo „ judiciorum actionumque omnium for- „ mulis præerant (a). Secundo cave- „ bant, hoc est, consilium clientibus „ suis fidele dabant, ut in contractibus „ securiores tutioresque essent (b). Ter- „ tio, si lex legi obstabat, id est, quan- „ do casu & eventu inter se pugnabant, „ vel lex scripta nimis dura erat, & „ æquitati adversabatur, vel cum more „ Majorum, & consuetudine contende- „ bat, ipsi interpretabantur & concilia- „ bant. Quarto denique, si neque lex „ exstabat, neque testamenta, vel pa- „ ctiones essent, ipsi de jure, quid „ æquum bonumque esset, interrogati „ respondebant,,.

LX.

Secundo loco peccant illi, qui heterodoxorum placita & dogmata, contra quam conscientia dictat, sequentes Ecclesiæ jura, etiam satis manifesta, nullo in pretio ha-

(a) *L. Barbarius Philippus ff. de officio Praetoris.* (b) *L. 3. ff. de transactionibus l. 53. §. 1. ff. de actione empti.*

habent, sed cum Oza ad Arcam Dei manus extendunt, non ad eam sustentandam, sed subruendam Horum quidam ne aperta fronte cum hæreticis sentire videantur, agnoscunt quidem Jus aliquod Canonicum seu Ecclesiasticum, sed quod illud? nempe quod & quatenus ad dilatandam potestatem profanam, constringendamque Ecclesiasticam ipsis servit, qua in re sequi videntur Daniele Kayserum, Choburgensem Jurisconsultum, qui palam pronunciare non veretur (c): *Non utimur jure Canonico in gratiam Pontificis Romani, aut in recognitionem superioritatis, ut ANTICHRISTO OCCIDENTALI aliquod imperium in nos concedamus, vel illius errores approbemus, sed utimur jure Canonico tanquam jure nostro.* Nimirum maximam potestatis in sacra, & jura Ecclesiastica partem turpi adulatione ac incivili furto Pontificibus, Episcopis, ac Præsulibus auferunt, eamque in Principes profanos transferunt. Sed quo jure? Jus suum cuique tribuit. Nimis clara sunt, quæ passim in hoc libro de jure sacro & profano tanquam rebus distinctis tum ex historia, tum ex utroque foro prodidi monumenta. Neminem latet in historia non peregrinum, quam

(c) *In succincta Juris historia.*

quam funestas in Germania & Italia per Henricos & Fridericos tragœdias excitavit sacrorum contra jus usurpatio: neminem latet, hanc fuisse potissimum causam defectionis, hæresis, perturbationis, ac gravissimorum bellorum per secula plus quam duo in Imperio, & nobilissima natione Germanica, quando Lutherus, ut objecto bolo pinguisimo inescaret Principum animos, in Papam & Sacerdotium insurrexit, omnemque potestatem in sacra, in jura, in bona Ecclesiæ iisdem adjudicavit, ita uti si penes ipsum stetisset, totum D. Petri patrimonium devorandum concessisset: neminem latet, quanta felicitate, quam ampla dominatione terrena, quam copioso fœnore cœlesti fuerint cumulati Principes in Deum & Ecclesiam liberalissimi, & jurium sacrorum non secus ac suorum vindices ac defensores, Constantinus M. Carolus M. Lotharius Pius, Henricus sanctus &c. Quis est, qui non intelligat, quanta rerum & dominiorum perturbatio oriretur, si passim Principes unus in alterius jura involaret? & quæ non mala gravissima oriri necesse est, si sacra profanis, & profana sacris misceantur, tanto a se invicem intervallo sejuncta? Sinenſes, gens si quæ alia bene guber-

nan-

nandi arte inclyta Tartaricum & Siner-
se regnum ingenti latissimeque patente
muro sejunxerunt. Si ejusmodi murus
sacram inter & profanam potestatem in-
tercederet, si *quæ sunt Cæsaris Cæsari*,
& *quæ sunt Dei, Deo* tribuantur, felicis-
sima erit Christiana Respublica, mutuis-
que se incrementis perpetuo conservabit.
Non me latet, quid ad hæc respondeant
Jurisperiti quidam, potissimum Acatho-
lici: exemplis invidia plenis demonstrare
conantur, Pontifices ac sacros Antistites
non raro in jura Principum involasse, ac
potestatem & jurisdictionem in sacra æque
ac profana sine discrimine sibi arrogasse,
totumque veluti mundum suis subjecisse
pedibus. Nolim heic omnium facta ex-
cusare, nec excusant etiam scriptores
Catholici integræ fidei ac veritatis aman-
tes, quamvis exempla ab Acatholicis ad-
ducta plerumque sint vel figmentis, vel
documentis minus sinceris, ac sinistris
interpretationibus, vel omnino calumniis
referta. Illud assero, Principum esse, si
quæ jura eorum a quocunque demum
violentur, illa vindicare: idcirco enim
sceptrum & gladium portant, tum ad
regendum alios, tum ad se suaque de-
fendendum: non autem esse privatorum,
sæpe infimæ sortis scriptorum, perpetuo

calamum plus felle quam atramento plenum stringere in sacra, quæ ipsi Principes Catholici summe venerantur, Capitula: jura illis sua, & in Jure Canonico & in Civili probe fundata violenter eripere velle, ac in Republica Ecclesiastica Dictatores agere. Valeat heic præclarum Nicolai I. Pont. Max. effatum, dum ad Michaellem Imperatorem Orientis in epistola contra Photium Patriarcham ad illum data (d) ita loquitur: *Antequam Jesus Christus veniret, dabantur Reges simul & sacerdotes, qualis erat Melchisedech: illudque diabolus imitatus est in Imperatoribus Gentilibus, qui etiam summi Pontifices erant. At postquam in mundum missus est ille, qui proprie Rex est & Pontifex, non amplius Imperatores jura Pontificum invaserunt, nec Pontifices jura Imperatorum. Jesus Christus ambas potestates ita separavit, ut Imperatores auxilio Pontificum ad consequendum vitam æternam, & Pontifices in negotiis secularibus Imperatorum legibus uterentur.*

Tertio demum loco admonendi veniunt Justitiæ administri, ac Themidis sacerdotes magni, qui vel intra subsellia causas Clientum agunt, vel e tribunali sententias

(d) *Apud Fleury Tom. 12. l. 1. ad an. Chr. 865.*

tias pronunciant, admonendi inquam veniunt gravissimi simul ac periculosissimi muneris sui, ne vel partium studio, vel præpotentium timore, vel muneribus a recto juris dicundi tramite avelli aut excæcari se permittant. hinc dudum cecinit Ovidius (e):

Inde datae leges, ne fortior omnia possit.

Et Petronius Arbiter:

*Quid faciant leges, ubi sola pecunia
regnat?*

*Aut ubi paupertas vincere nulla
potest?*


Nil possunt leges, nil juris seu scientia seu prudentia prodest, si non æqua incorruptaque bilance administretur justitia. Justitiam inclamant Clientes, justitiam spondent Causidici, justitiam profitentur Judices. Nihilominus quantæ non inter viduas, pupillos, pauperes, ac partes litigantes querelæ de justitia negata, protracta, depravata!

*Discite justitiam moniti, & non tem-
nere Divos.*

Discite justitiam Juris Studiosi, docete justitiam Jurisconsulti, administrate justitiam Judices: cogitate omnes, altius
Y 2 ad-

340 *Cap. IX. Critica jurisprudentiæ.*

adhuc esse tribunal, scilicet supremi Numinis, coram quo omnia inferiora, seu humana, profana & Ecclesiastica tribumalia olim comparere, rationem exactam reddere, severissimum sustinere judicium debebunt; coram quo non solum injustitiæ, sed etiam justitiæ judicabuntur, id est, sententiæ, quæ apparebant justæ, sed non erant, vel deficiente scientia, & cognitione causæ, vel fraude ac dolo interveniente.



INDEX



INDEX

RERUM ET VERBORUM

LIBER XI.

L. Indicat Librum. N. Numerum Libri.

A.

Administratio justitiæ qua ratione a priscis Jurisconsultis inita fuerit. L. II. N. 59.

Adulatio Scriptorum A catholicorum, dum jus in sacra tribuunt Laicis Principibus & Magistratibus. L. II. N. 60.

Ædiles curules apud Romanos. L. II. N. II.

Æmulatio de Imperio C. Julii Cæsaris, & Cnei Pompeii. L. II. N. II.

*Æquitatis & justitiæ integritas commen-
datur.* L. II. N. 60.

*Æqui & Boni ratio prima in judicando
habenda est.* L. II. N. 59.

Archiepiscoporum potestas & dignitas. L. II. N. 38.

Pallii auctoritas & usus. L. II. N. 38.

Index Rerum

B.

Bulla Aurea Caroli IV. L. 11. N. 53.

Bullarium magnum, ejusque auctoritas.
L. 11. N. 47.

C.

Cancellaria Romana : ejus Regula. L. 11.
N. 47.

*Canones Apostolorum, & Constitutiones
Papæ Clementis.* L. 11. N. 13.

*Examinatur, utrum Canones illi vere ab
Apostolis fuerint confecti.* L. 11.
N. 25.

Canones Penitenciales. L. 11. N. 25.

Canonicorum origo antiquissima. L. 11.
N. 39.

*Alii Cathedrales, alii Collegiata Eccle-
sia : alii Regulares, alii seculares.*
L. 11. N. 39.

Capitulatio Casarea. L. 11. N. 53.

Cardinalium Origo, & numerus. L. 11.
N. 37.

Eorundem dignitas & officium. L. 11.
N. 37.

Censores Romani : eorum officium. L. 11.
N. 11.

Cice

& Verborum Lib. XI.

Ciceronis testimonium de Jurisperitis.
L. 11. N. 3.

Circuli Imperii : eorum conventus. L. 11.
N. 51.

Clementinae Constitutiones curante Clemente V. & Joanne XXII. L. 11. N. 28.

Codices duo Gregorii & Hermogeni. L. 11.
N. 14.

Codex Theodosianus. L. 11. N. 14.

Codex Justinianæus. L. 11. N. 31.

Codex repetitæ lectionis. L. 11. N. 31.

Codicis duo beneficia : doctrina juris ordinata, & litigiorum proscriptio. L. 11.
N. 31.

Collectiones variae Sanctionum Ecclesiasticarum & Pontificiarum Constitutionum.
L. 11. N. 23.

Collectores juris Ecclesiastici. L. 11. N. 23.

Collectores Decretalium. L. 11. N. 26.

Collegium Principum S. R. J. L. 11. N. 50.

Collegium civitatum liberarum S. R. J.
L. 11. N. 10.

Comitium locus in foro Romano. L. 11.
N. 50.

Comitia curiata, centuriata, & tributa.
L. 11. N. 10.

Comitia generalia Imperii, eorumque jura.
L. 11. N. 51.

Index Rerum

Communitas familiae : communitas civilis.

L. II. N. 21.

*Concilia Apostolorum : Leges & Canones
borum Conciliorum.*

L. II. N. 12.

*Conciliorum Ecclesiasticorum summa au-
thoritas.*

L. II. N. 42.

*Concilia alia sunt Universalia seu Genera-
lia : ex his quaedam legitima seu Oecu-
menica, quaedam reprobata, quaedam
partim approbata, partim reprobata.*

L. II. N. 42.

*Alia sunt particularia : ex his quaedam
nationalia, quaedam provincialia, quae-
dam diocesana.*

L. II. N. 42.

Conciliorum origo & utilitas.

L. II.

N. 42.

*Causae convocandi Concilia : 1. Orta hæ-
resis. 2. Schisma inter Pontifices. 3.*

*Metus à Turcis &c. 4. Suspicio hæ-
resis in Pontifice. 5. Abusus & vitia*

Ecclesiasticæ disciplinæ. L. II. N. 42.

Concilium ut sit infallibile, requiritur.

*1. ut legitime sit congregatum. 2. cura &
industria in rebus examinandis. 3. con-*

firmitas Papæ. L. II. N. 43.

*ad Concilium non sunt vocandi Laici, ut
Suffragium ferant, aut iudices sint.*

L. II. N. 43.

Con-

& Verborum Lib. XI.

*Concilium si est legitimum & confirmatum,
non potest in quaestionem vocari diligen-
tia Patrum in examinandis articulis.*

L. 11. N. 43.

*Concilii celebrandi imago & forma ex Actis
Apostolorum.*

L. 11. N. 44.

Concilii Tridentini descriptio. L. 11.
N. 46.

*Congregationes varias Romæ erigendi
caussa.*

L. 11. N. 45.

*Congregationes Romæ præcipuæ : Congre-
gatio Concilii Tridentini : S. Officii seu
Inquisitionis. Super negotiis Episcopo-
rum & Regularium : Immunitatis Ec-
clesiasticæ : SS. Rituum : de propaganda
fide : Indicis librorum : de Indulgentiis
& SS. Reliquiis.*

L. 11. N. 45.

*Conringii Acatbolici testimonium pro D.
Thoma, & Theologis circa doctrinam
Juris Naturalis.*

L. 11. N. 56.

Consilium intimum Cæsareum. L. 11. N. 52.

Consilium Imperiale Aulicum. L. 11. N. 52.

*Constitutionum sex species : Leges, Plebi-
scita, Senatus Consulta, Placita Prin-
cipum, Prætorum edicta Responsa Pru-
dentum.*

L. 11. N. 14.

Corpus Juris Canonici cum suis partibus.

L. 11. N. 26. &c.

Index Rerum

Consuetudines feudales collegerunt Consu-
les Mediolanenses Gerardus Niger, &
Obertus de Orto. L. 11. N. 35.

Feuda Regalia, eorumque investitura. L. 53.
N. 53.

Fides in Christum ante ac post legem Mo-
ysaica necessaria fuit ad salutem. L. 11.
N. 19.

Fleischeri doctrina perversa de praeceptis
naturalibus. L. 11. N. 55.

G.

Gratiani imago, encomium & epitaphium.
L. 11. N. 13.

Gratianus consilium dat inducendi in Aca-
demias gradus Baccalaureatum, Licen-
tiatum & Doctoratum. L. 11. N. 13.

Gregorii IX. Papae commendatio Juris
Ecclesiastici in proëmio Decretalium.
L. 11. N. 1.

H.

Hierarchia Ecclesiastica: eam dari ostendi-
tur. L. 11. N. 37.

Hierarchiae Ecclesiasticae supremum caput est
Pontifex. L. 11. N. 37.

Hobbesii perversa doctrina de praeceptis
Evangelicis. L. 11. N. 20.

Homo secundum omnem sui consideratio-
nem juri subjacet. L. 11. N. 2.

I. Ina-

& Verborum Lib. XI.

I.

Imaginum Sanctarum cultus. L. II. N. 12.

Imperatoris dignitas, persona, & prerogativa. L. II. N. 50.

Imperatoris & Regis Romani electio. L. II. N. 50.

Imperatoris coronatio. L. II. N. 50.

Imperatoria insignia custodiuntur Norimbergæ. L. II. N. 50.

Imperatoris primæ preces. L. II. N. 50.

Imperium in decem circulos divisum. L. II. N. 51.

Innocentius X. per bullam solemnem intercedit Paci Westphalicæ. L. II. N. 53.

Institutiones Juris, eorumque auctor Justinianus, adjuvantibus Triboniano, Theophilo, & Dorotheo Juris Consultis. L. II. N. 33.

Institutiones Juris, e quibus fontibus fuerint confecti. L. II. N. 33.

Institutionum synopsis. L. II. N. 33.

Institutiones Juris Ecclesiastici auctore Lancelloto. L. II. N. 28.

Josaphat, Regis Juda, insigne exemplum de administrando jure sacro & civili. L. II. N. 8.

Irue

Index Rerum

*Irnerius J. G. interpretatur publice Pisis
& Bononiæ Jus Justinianæum.* L. 11.
N. 15.

*Israeliticus populus solus tenebatur lege Mo-
sica.* L. 11. N. 19.

Judicium camerae Imperialis. L. 11.
N. 52.

Judicium Comitum Palatini. L. 11. N. 52.

Judicium Rottwilanum. L. 11. N. 52.

Judicium Austregæ dictum. L. 11. N. 52.

*Juris & Justitiæ elegans imago, in qua
illius dotes exprimuntur.* L. 11. N. 1.

Jurisprudentia est munus Dei. L. 11. N. 2.

Justitiæ Antistes Astræa. L. 11. N. 2.

*Jurisperiti dotes: ingenium, judicium,
usus & experientia, eruditio.* L. 11.
N. 3.

*Juris Doctorum insignia purpurea instar
Regum.* L. 11. N. 3.

*Jurisprudentiæ prima periodus a prima
mundi ætate usque ad Moysen, Regum ac
Rerumpublicarum tempora.* L. 11. N. 4.

*Jurisprudentiæ secunda periodus a Moysen
usque ad Christi adventum.* L. 11. N. 7.

*Jurisprudentiæ tertia periodus a Christi
adventu usque ad hæc tempora.* L. 11.
N. 12.

Juris

& Verborum Lib. XI.

- Juris naturalis principia duo, e quibus reliquæ leges oriuntur.* L. 11. N. 4.
- Jus sacrum in familia Set & Enoch : Jus civile in familia Cain.* L. 11. N. 5.
- Jus naturale ac supernaturale circa diluvii tempus vix non extinctum : post diluvium fuit instauratum a Noëmo.* L. 11. N. 6.
- Jus sacrum fuit conservatum in familia Sem, & Abraham.* L. 11. N. 6.
- Jus profanum viguit in familia reliquorum Noëmi filiorum.* L. 11. N. 6.
- Jus naturale ac divinum fere penitus fuit obscuratum per idololatriam.* L. 11. N. 6.
- Jus naturale ac divinum a Deo per Moysen instauratum in tabulis Decalogi.* L. 11. N. 7.
- Jus civile veteris Testamenti in Deuteronomio.* L. 11. N. 7.
- Jus legis Mosaicæ tum per Pontifices & Judices, tum per Reges, tum per Prophetas fuit administratum.* L. 11. N. 8.
- Jus administrandi forma in lege Mosaica.* L. 11. N. 8.
- Juris Politici origo apud varias gentes sub ipsorum Regibus.* L. 11. N. 9.
- Juris Romani initia.* L. 11. N. 10.
- Jus civile Papyrianum.* L. 11. N. 10.

Juris

Index Rerum

- Juris profani incrementa.* L. 11. N. 14.
- Juris Consulti Veteres.* L. 11. N. 14.
- Jus Justinianæum in Occidente collapsum, in Oriente neglectum.* L. 11. N. 15.
- Introductum in Germaniam, confirmatum, ac præscriptum a Maximiliano Imp.* L. 11. N. 15.
- Juris naturæ descriptio ex Aristotele, Cicerone, & Gratiano.* L. 11. N. 17.
- Jus naturæ ac lex æterna in quo consistat.* L. 11. N. 17.
- Juri naturæ soli homines subjecti sunt, non item animalia.* L. 11. N. 17.
- Juris naturæ principia generalia, & quæ ex his deducuntur.* L. 11. N. 17.
- Principia particularia de officiis erga Deum, erga seipsum, erga proximum.* L. 11. N. 17.
- Jus naturale mutari non potest.* L. 11. N. 17.
- Jus naturæ ac gentium sunt diversa jura: in quo consistat jus gentium.* L. 11. N. 18.
- Juris gentium duplex consideratio, cum pacto, & sine pacto.* L. 11. N. 18.
- Juris humani fundamentum humana societas.* L. 11. N. 21.

Juris

Et Verborum Lib. XI.

Juris Oeconomiae tres partes : Societatis, Casus, Remedia : explicantur singulae.

L. 11. N. 30.

Juris Consultorum annulatio Et invidia.

L. 11. N. 31.

Jus inforciatum.

L. 11. N. 32.

Juris publici civilis studium a priscis neglectum.

L. 11. N. 49.

In Jure naturae ac gentium, Et publico explanando artes quorundam Acatbolicorum minus sincere.

L. 11. N. 54.

Criminationes eorundem contra Patres ac Theologos circa doctrinam Juris naturae.

L. 11. N. 54.

Jus naturale a supernaturali violenter separant Acatbolici Scriptores non sine gravissimis erroribus.

L. 11. N. 54.

Juris naturalis cum supernaturali arte connexi exemplar luculentum.

L. 11.

N. 45.

Jus Ecclesiasticum veteris Testamenti in libris Exodi, Levitici, Et Deuteronomii.

L. 11. N. 7.

Jus sacrum Et profanum distinguitur a fine, ad quem utrumque tendit.

L. 11.

N. 30.

Jus populi Judaici ad alias gentes propagatum.

L. 11. N. 8.

BIBLIOTH. DOMEST. LIB. XI. Z Ju

Index Rerum

- Jurisdictionis Ecclesiasticæ initia in novo Testamento.* L. 11. N. 12.
- Jus sacrum scriptum & non scriptum.* L. 11. N. 12.
- Juris sacri incrementum.* L. 11. N. 13.
- Jus Canonicum quod a primo seculorum usu alienum sit, falso criminantur quidam Acatbolici.* L. 11. N. 22.
- Jurisdictionis Ecclesiasticæ exercita primis Ecclesiæ temporibus.* L. 11. N. 22.
- Eadem confirmata ab Imperatoribus.* L. 11. N. 22.
- Jurisdictionem Pontificibus Wicleffus, Lutherus, alique cripere conantur, sed frustra.* L. 11. N. 22.
- Jus publicum Ecclesiasticum versatur* 1. circa caput & membra Hierarchiæ. 2. circa Concilia. 3. Circa Tribunalia Curie Romanæ. 4. Circa leges Ecclesiasticas universales. L. 11. N. 36.
- Juris publici Ecclesiastici commendatio: bujus Scriptores celebriores.* L. 11. N. 48.
- Justinianus Codicem, Digesta seu Pandectas & Institutiones condit.* L. 11. N. 15.
- Ejus imago & elogium.* L. 11. N. 15.
- Justi-*

Et Verborum Lib. XI.

*Justiniani commendatio Juris Civilis in
Præfat. Institutionum.* L. II. N. I.

K.

*Kayseri (Danielis) insolens de Jure Ca-
nonico effatum.* L. II. N. 60.

L.

Lancellotus insignis Juris Consultus. L. II.
N. 2.

*Legislatores veteres suas leges alicui Nu-
minis afflatui adscripserunt.* L. II.
N. 4.

*Legislatores primi profani e Decreto Gra-
tiani recensentur.* L. II. N. 9. & 30.

*Leges gentilium Et Romanorum : leges
Imperatorum ethnicorum.* L. II. N. 30.

Leges tyrannorum : leges Christianorum.
L. II. N. 30.

Leges Imperii Romano Germanici. L. II.
N. 53.

*Leo Imp. Et Filius Constantinus novum
corpus juris condunt.* L. II. N. 15.

*Lex supernaturalis per fidem, spem, Et
charitatem.* L. II. N. 4.

Index Rerum

- Lex privata prima in paradiso promulgata*
Adamo & Evæ. L. 11. N. 4.
- Lex Matrimonii.* L. 11. N. 4.
- Lex matrimonii confirmata.* L. 11. N. 6.
- Lex vetans esum carnis cum sanguine.*
 L. 11. N. 6.
- Lex Circumcisionis.* L. 11. N. 6.
- Lex Mosaica ultra 700. ante Romam con-*
ditam, & ultra 1000. ante jus XII. Ta-
bularum. L. 11. N. 8.
- Legis Mosaicæ perturbatio sub Rege An-*
tiocho. L. 11. N. 8.
- Leges Curiatæ.* L. 11. N. 10.
- Lex Regia.* L. 11. N. 10.
- Eadem revocata sub Augusto Cæsare.*
 L. 11. N. 11.
- Legibus in ordinem redigendis initium*
quando datum fuerit. L. 11. N. 14.
- Legum multitudo: librorum duo millia:*
versuum 3000000. L. 11. N. 14.
- Lex novi Testamenti quando cæperit obli-*
gare. L. 11. N. 19.
- Longobardi e Germania, maxime e Saxo-*
nia, feudorum jura & consuetudines in
in Italiam secum attulerunt. L. 11. N. 35.
- Lotbarius II. Imp. resuscitat Jus Justinia-*
væum. L. 11. N. 15.
- Luthe-*

& Verborum Lib. XI.

*Lutherus negat Christi legem esse veram
legem, & Christum fuisse Legislatorem.*
L. 11. N. 20.

M.

Matricula Imperii. L. 11. N. 51. & 53.

*Ministri Ecclesiæ inferioris Ordinis: Ostia-
rii, Lectores, Exorcistæ, Acoluthi,
Subdiaconi, Diaconi, eorumque officia.*
L. 11. N. 41.

*Monachi & Religiosi sunt membra Hierar-
chiæ Ecclesiasticæ.* L. 11. N. 40.

*Monachorum veterum institutum diversum
a nostris temporibus.* L. 11. N. 40.

*Moses constitutus a Deo tanquam Legisla-
tor juris sacri & profani.* L. 11. N. 7.

N.

*Naturæ triplex status proponitur & de-
scibitur.* L. 11. N. 16.

*Status naturæ integræ: ejus perfectio-
nes ex parte corporis & animæ: aliæ
dotes ac privilegia, donaque dei exte-
riora.* L. 11. N. 16.

Index Rerum

Status naturæ lapsæ & reparatæ : peccatum originale : hujus pœnæ : genus humanum reparatum. L. 11. N. 16.

Status naturæ puræ : ejus possibilitas : doctrina Baii damnata : beatitudo hujus status : propagatio generis humani. L. 11. N. 16.

Nicolai I. Pont. præclarum effatum de concordia secularis & Ecclesiasticæ potestatis. L. 11. N. 60.

Novellæ seu Authenticiæ : earum numerus, & vis obligandi. L. 11. N. 34.

Novellarum Interpretes. L. 11. N. 34.

Numa Pompilius jus gentium propagavit. L. 11. N. 10.

P.

Pallium Archiepiscopale. L. 11. N. 38.

Pandectæ seu Digesta, cur sic vocentur : earundem auctor. L. 11. N. 32.

Duo millia voluminum præci Juris in quinquaginta libros contracta fuerunt, & in septem tractatus. L. 11. N. 32.

Pan-

& Verborum Lib. XI.

Pandectarum seu Digestorum synopsis.

L. 11. N. 32.

Parænesis ad justitiæ Administros.

L. 11.

N. 59.

Papirius primus Juris Consultus.

L. 11.

N. 10.

Parochorum nominis etymon : institutio &

munus.

L. 11. N. 39.

Patriarcharum numerus & prærogativæ.

L. 11. N. 38.

Pax Religiosa.

L. 11. N. 53.

Pax Westphalica.

L. 11. N. 53.

S. Petrus caput Ecclesiæ, & Præses Con-

ciliorum.

L. 11. N. 12.

Platonis Respublica ordinata, ejusque le-

ges.

L. 11. N. 9.

Plebisscita quid fuerint.

L. 11. N. 11.

Pœnitentiæ publicæ mos & forma in anti-

qua Ecclesia.

L. 11. N. 25.

Pœnitentiæ rigorem antiquum quidam in

Gallia resuscitare conantur.

L. 11.

N. 25.

Pontificis primatus & infallibilitas.

L. 11.

N. 37.

Potestas Principum & Regum unde oria-

tur.

L. 11. N. 21.

Index Rerum

- Potestas sacra sejuncta a potestate politica non est figmentum aut monstrum, ut hæretici calumniantur.* L. 11. N. 22.
- Præcepta triplicis generis in veteri lege :
Moralia, Ceremonialia, Judicialia.*
L. 11. N. 7.
- Ad moralia pertinebant tam naturalia quam supernaturalia.* L. 11. N. 19.
- Ad Ceremonialia pertinebant sacrificia, sacramenta, sacra, & observantiæ.*
L. 11. N. 19.
- A Judicialia officia Principum & populi.*
L. 11. N. 19.
- Præcepta juris divini partim sunt moralia,
partim ceremonialia.* L. 11. N. 20.
- Judicialia nulla sunt a Christo instituta, sed relicta Ecclesia, ejusque jurisdictioni.*
L. 11. N. 20.
- Præcepta juris divini non possunt mutari, nec proprie in illis dispensari.* L. 11. N. 20.
- Prærogativa apud Romanos quid fuerit.*
L. 11. N. 10.
- Prærogativa Juris Ecclesiastici præ Politico : Nobilitas, finis, præstantia Legislatoris, amplitudo rerum.* L. 11. N. 22.
- Præ-*

& Verborum Lib. XI.

Prætores Romani; eorum munus. L. 11.
N. 11.

Primatum dignitas in Ecclesia. L. 11.
N. 38.

Principum erga Deum & Ecclesiam reverentium & liberalium felicitas. L. 11.
N. 59.

Puffendorffii doctrina circa actionum bonitatem ac inhonestatem. L. 11. N. 55.

Q.

Quæstio: an lumine naturali plus polleant Scriptores Catholici, quam Acatbolici.
L. 11. N. 57.

Querelæ de causis protelatis. L. 11. N. 59.

R.

S. Raymundi de Pennafort imago & encomium. L. 11. N. 13.

Religionis & justitiæ neglectus respublicas & regna brevi pessumdat. L. 11. N. 30.

Regimina politica varia, in quibus viget jus gentium. L. 11. N. 18.

Regimen benevolentiae mutuae, in primo mundi ævo. L. 11. N. 29.

Z 5

Regi-

Index Rerum

*Regiminis exemplum in familiis Abraham
& Lot.* L. II. N. 29.

Regimen æqui & boni apud veteres. L. II.
N. 29.

Rogatio legis apud Romanos. L. II. N. 10.

Romulus jus naturæ propagavit. L. II.
N. 10.

*Romulus populum Romanum in decem cu-
rias dividit.* L. II. N. 10.

Rota Romana quid sit. L. II. N. 47.

Rubricæ quid sint. L. II. N. 33.

S.

*Sacerdotum potestas, & jus Pontificum
apud ethnicos.* L. II. N. 22.

*Sacerdotes seu Presbyteri non sunt ejusdem
ordinis cum Episcopis.* L. II. N. 40.

*Scholæ utriusque Juris in veteri Testamen-
to : discipuli, Doctores.* L. II. N. 8.

*Scholæ quatuor Juris Consultorum : pri-
mæ caput Irnerius ; secundæ Azo : ter-
tiæ Accursius : quartæ Bartolus.* L. II.
N. 35.

Scien-

& Verborum Lib. XI.

Scientiæ juridicæ vis non est posita in legum subtilitatibus. L. 11. N. 59.

Scriptores juris publici celebriores. L. 11. N. 53.

Scriptores, qui in corpus juris Civilis commentati sunt. L. 11. N. 35.

Scriptores juris publici Ecclesiastici. L. 11. N. 48.

Scriptores de jure naturæ ac gentium. L. 11. N. 18.

Scriptores iuclyti de jure divino novi ac veteris Testamenti. L. 11. N. 20.

Scriptores juris Ecclesiastici insignes. L. 11. N. 28.

Senatus Consulta apud Romanos. L. 11. N. 11.

Servius Tullus jus civile promovit. L. 11. N. 10.

Societas humana triplex : Conjugalis, Paterna, Servilis. L. 11. N. 21.

Triplex hominum classis in civili Societate. L. 11. N. 21.

Egregia doctrina Ciceronis & D. Thomæ de Societate humana. L. 11. N. 21.

Status Imperii Romani, eorumque jura. L. 11. N. 50.

Suffra-

Index Rerum

Suffragiorum apud Romanos forma & descriptio. L. 11. N. 10.

Symbolum fidei ab Apostolis compositum. L. 11. N. 12.

T.

Tabulae legum X. advehuntur Romam e Græcia. N. 11. N. 11.

His adjiciunt Romani duas alias. L. 11. N. 11.

Tabulis duabus Moysis opposuit dæmon XII. Tabulas. L. 11. N. 11.

Testamenti veteris descriptio. L. 11. N. 19.

Testamenti veteris leges Christi adventu fuerunt abrogatae. L. 11. N. 19.

Testamentum novum : ejus prærogativæ præ veteri. L. 11. N. 20.

Thomasi perversa doctrina de falsiloquio refellitur. L. 11. N. 54.

Ejusdem alia perversa doctrina in genere luxuriæ. L. 11. N. 56.

Transactio Passaviensis. L. 11. N. 53.

Tribunalia Imperii Romano Germanici describuntur. L. 11. N. 52.

Tribus

& Verborum Lib. XI.

Tribonianus Quæstor S. Palatii : ejus potissimum opera confectus est Codex Justinianæus : item Pandectæ, seu Digesta.

L. II. N. 31. & 32.

Tribunorum potestas apud Romanos. L. II.

N. II.

Trinudinum quid fuerit. L. II. N. 10.

V.

Veltbemii Acatbolici testimonium pro D. Tboma, & Tbeologis circa doctrinam juris naturalis.

L. II. N. 56.

Vitia in studio Jurisprudentiæ. L. II.

N. 58.

W.

Weberi jactantia & calumnia. L. II.

N. 56.







